





mi's

VIII. 2 = 715



~~XVIII 105~~ 13

60

14.20.07



QVÆSTIONVM
PHILOSOPHICARVM.
SYLVESTRI MAVRI
SOCIETATIS IESV.
LIBRI QVINQVE.

THE UNIVERSITY OF CHICAGO

LIBRARY

500 EAST 57TH STREET


CHICAGO, ILL. 60637

QVÆSTIONVM
PHILOSOPHICARVM
SYLVESTRI MAVRI SOC. IESV
LIBER PRIMVS.

Continens primam partem Logicæ
Hoc est Summulas, Quæstiones proœmia-
les ad Philosophiam, & scientias,
& quæstiones de Vniuersalibus
in communi.

Editio Secunda.

Iu qua additæ Sũt Summulæ.



Romæ, Typis Michaelis Herculis. 1670.
Superiorum permisso.

Sumptibus Federici Franzini, sub Signo
Fontis, cū priuilegio Summi Pontif.

Imprimatur si videbitur Reueren-
dis. P. Mag. Sal. Pal. Ap.

I. de Ang Archiep. Vrb. Vicesg.

~~Imprimatur iterum.~~

Fr. Hyacinthus Libellus Sacri Pala-
tij Apostolici Magister.

ILLVSTRISS. ET EXCELLENTISS.

P R I N C I P I

BENEDICTO

PAMPHILIO

Federicus Franzinus felicitatem .



E mirere, Excellentif-
sime Princeps , quod
ego Tibi fortasse vix
notus Te potissimum

elegerim, in cuius nomine appa-
rerent Philosophicæ P. Syluestri
Mauri Commentationes, quæ fla-
gitantibus plurimis , me procu-
rante auctæ, & elegantioribus ty-
pis expressæ iterum publicæ luci
donantur . Expertus siquidem,
olim mihi faustissimum Pamphi-
liæ Gentis patrociniū, cum Pa-
renti tuo Optimo Principi , qui
nunc, vti sperare fas est, Cælo de-
git, consecrarem celeberrimas
Francisci Card. Toleti Lucubra-

tiones , quibus ad sua munera
rite peragenda Sacerdotes infor-
mat , rectè me huius Operis feli-
citati consulturum putavi , si Te
illi Patronum adoptarem . Quod
si Patroni dignitas tutelare velu-
ti sydus doctis hisce laboribus
plurimum conferre creditur , ha-
beo profecto in præclarissimis a-
nimi tui dotibus , quo confir-
mem consilium meum . Quantus
enim appares Adolescens Nobi-
lissime , qui amplissimæ fortunæ,
in qua natus es quodammodo
oblitus in id totus incumbis , vt
morum innocentia, sapientiæ stu-
dio , & virtutum exercitatione
patrimonium generosæ mentis
amplifices . Quare cum sis indo-
le, ingenioque doctrinæ , laudis-
que quantumlibet magnæ capa-
ci , vt ex ijs , qui te intimè no-
runt , non semel accepi , reddendos
olim per Te Orbi terrarum
Paternos Pamphiliæ , & mater-

nos Aldobrandinæ Gentis inclý-
tos Proavos iure ominamur. Et
quid ni ominemur, dum Tui no-
bis occurrunt candidissimi mo-
res, ab omni non tantum labe,
sed etiã ab omni suspicione labis
intacti. Dum cū quodã voluptatis
sensu recolimus quãta cōtentio-
ne in Collegij Romani exedris
certares, vt cum inter Principes
Rōmanæ Iuuentutis numerare-
ris in primis, nulli esses in Scho-
la doctriinæ laude secundus. Quã
celeres, quam faciles habueris
in amœnioribus literis progres-
sus Musarū in sinu adolescens, &
occupato propemodum Parnassi
vertice ea ætate, qua cæteri ad
radices infeliciter hærent; Aures
adhuc iucundissimè feriunt plau-
sus, quibus non semel exceptus
es dum carmina, quæ ingenio-
fissimè scripseras in nobili Audi-
torum panegyri cum summa a-
ctiōis dignitate redderes. Au-

diu iam te post lustratos naturæ
recessus, altissima diuinitatis ar-
cana meditari, vt doctrinarum
omnium fontibus inundatus ple-
num sapientia pectus afferas,
si quando ad Rempublicam tua
te merita cogent accedere; Sed
quamuis tanta bonarum artium
in te sitis exæstuet, longè maior
est nobilis impetus, quo ad
Christianas virtutes audio te fer-
ri, vt enim in præsentia sileam
modestam illam morum suauita-
tem, qua rapis animos, miram
in Iuene huius ætatis pruden-
tiam, quæ tibi sua sponte natura
contulit; quanta sunt illa cælestis
gratiæ munera, ob quæ vel vitæ
sanctioris professoribus pro mi-
raculo es. Quam liberaliter sta-
tas, ac certas eleemosinas in pau-
peres erogas; quam humaniter in
carcere detentos, qua voce, qua
ministerio, qua cibo tuis sumpti-
bus præparato recreas; quâ sæpè
in

in publicis valetudinarijs infimæ
seruitutis officia ægrotis exhibes,
languentium lectulos singillatim
obeundo, fercula in os non rarò
ingerendo, quin & ipsos iā letho
proximos ad supremam luctam
cælestibus monitis, & precibus
muniendo; quam religiosè cele-
briora septem Urbis Tempia, &
triumphalia Martyrū spelea fre-
quentas; Quantopere diuini con-
gressus, & consuetudinis assidui-
tate delectaris; Quanto cū sensu
cælestis voluptatis pijs vel ser-
monibus, vel lectiunculis sæpè
detineris; Quam frequenter ani-
mum contractis labeculis eluis,
vt Angelorum esca fruaris. No-
runt præterea qui tecum in pri-
mario Rom. Collegij sodalitio
sub signis Virginis studiosè me-
rent quam eximio pietatis studio
erga Dei parentem tenearis, quo
sensu altissimæ demissionis humi-
liora cætus illius munera ambiē-

do colere soleas . Verum ego dicendi finem nullum facerem, nisi tua me moneret modestia equius esse me cogitare, quid aures tuæ ferre possint, quam quid virtutibus debeatur; Et quæ hucusque dicta sunt, satis, ut puto, ostendunt quam merito huic operi à te patrocinium, & gloriâ quæsierim. Quod profecto illi deberi tu etiâ optime Princeps fatebere, dignû. que quod tuî nominis luce splendescere patiaris, si oculos in Authorê conieczeris P. Pallauicino, quem in Philosophia priuatim audisti, studiorum, & voluntatum similitudine tota vita coniunctissimum; me autem clientem dedittissimum tibi pro tua humanitate existimabis, ut qui non iniucundum, ut spero, munus obtulerim. Vale.

CLEMENS PP.X.

AD futuram Rei Memoriam. Cum sicut dilectus filius Federicus Franzini Romanus B. bliopola Nobis nuper exponi fecit ipse Opera musicalia nempe mottetta, Psalmos, & alia à dilecto filio Nicolao Stamigna in lucem edenda, nec nō opus in plures tomos distinctum, cui titulus Philosophia Sylvestri Mauri Presbyteri Societatis Iesū cum nouis additionibus sua impensa typis in hac alma Vrbe nostra mandari facere intendat; vereatur autem ne postquam in lucem prodierint, alij, qui ex alieno labore lucrum querunt eadem opera imprimi facere curent in ipsius Exponentis præiudicium. Nos eius indemnitati ne ex impressione huiusmodi Aliquod dispendium patiatur prouidere, illūq; specialibus fauoribus, & gratijs, prosequi volentes, & à quibusuis excommunicationis, suspensionis, & interdicti; alijsq; ecclesiasticis sententijs, censuris, & poenis à iure, vel ab homine quauis occasione, vel causa latæ, si quibus quomodolibet innodatus existit ad effectū præsentium rātum consequendum harum serie absoluen & absolutū fore censentes. Supplicationibus eius nomine nobis super hoc humiliter porrectis inclinati. Eidem Exponenti vt durāte decennio à primæua dd. operum & eorum cuiuslibet respectiuè impressione cōputan-

do dūmodo tamen à dilecto filio Sac. Pal.
Apostol. Magist. approbata fuerint, nemo
tam in Vrbe, quam in reliquo Statu Eccle-
siastico mediātē, vel immediātē Nobis su-
biecto opera prædicta etiam sub prætextu
additionum, distinctionum, alteriusue
formæ, vel tituli sine speciali dicti Expo-
tentis, aut ab eo causam habentium licen-
tia, imprimere, aut ab alio, vel alijs im-
pressa vendere, seu venalia habere, aut
proponere possit, & valeat opera auctoritate
tamen præsentium cōcedimus, & indulgemus.
Inhibentes propterea vtriusq; sexus Chri-
stifidelibus, præsertim librorum impresso-
ribus, & Bibliopolis sub quingentorum
ducatorum de Camera, & amissionis ty-
porum omnium pro vna Camera nostre
Apostolicę, & pro alia eidē Exponenti, ac
pro reliqua tertiis partibus accusatori, &
Iudici exequēti irremissibiliter applican-
& eo ipso absque vlla declaratione incur-
ren penis, ne dicto decēnio durante opera
tota, aut aliquā eorū partem tam in Vrbe,
quàm in reliquo Statu Ecclesiastico pote-
rit sine licentia huiusmodi imprimere, aut
ab alio, vel alijs impressa vendere, seu ve-
nalia habere quoquomodo audeant, seu
præsumant. Mandan præterea dilectis filiis
nostræ, & Apostolicę Sedis de latere Le-
gatis, seu eorū Vicelegatis, aut Præsiden-
tibus, Gubernatoribus, Prætoribus, & alijs
Iustitiæ Ministris Prouinciarum, Ciuita-
tum,

cum , Terrarum, & locorum Status nostri
Ecclesiastici prædicti quatenus eiusdem Ex-
ponenti seu ab eo causam habenti prædictis
in præmissis efficacis defensionis præsidio
assistere quodcumq: ab eodẽ Exponente
fuerunt requisiti poenas prætenfas contra
quoscunque inobedientes irremissibiliter
exequantur . Non obstantibus constitu-
tionibus , & ordinationibus apostolicis ac
quibusvis statutis , & consuetudinibus etiã
iuramento confirmatione apostolica , vel
quavis firmitate alia roboratis priuilegijs
quoque inductis , & literis apostolicis in-
communi præmissorum quemlibet conces-
sis , confirmatis , & innouatis cæterisque
contrarijs quibuscunque . Volumus au-
tem, vt præsentium transumptis etiam in-
ipsis impressis operibus manu alicuius No-
tarij publici subscriptis , & Sigillo per-
sonæ in Ecclesiastica dignitate constitutę
munitis eadem vbique fides adhibeatur
quę præsentibus adhiberetur si forent ex-
hibitæ , vel ostensę . Datum Romę apud
Sanctam Mariam Maiorem sub Annulo
Piscatoris Dię xxj. Iunij MDCLXX.
Pontificatus Nostri Anno Primo .

Io. Slutius .

IOAN-

IOANNES PAVLVS OLIVA
Præpositus Generalis
Societatis Iesu .

CVM Quæstiones Philosophicas
P. Syluestri Mauri Nostræ Socie-
tatis Sacerdotis tres eiusdem Societatis
Theologi recognouerint, & in lucem
edi posse probauerint, potestatem faci-
mus, ut iterum typis mandentur cum
Summularum additione, si ijs, ad quos
pertinet, ita videbitur. Dat. Romæ
29. Iunij 1670.

Io. Paulus Oliua .

INDEX

Capitum, & quaestionum

Libri Primi.

Summula seu Logica brevis.	1
Caput. I. de necessitate summularum.	1
Cap. 2. Quid sit Logica.	2
Cap. 3. De tribus operationibus intellectus.	7

Tractatus Primus de Terminis.

C. 4. Quid sit Terminus.	8
C. 5. De Termino mentali, Vocali, & scripto.	11
C. 6. De Termino significatio, & non significatio.	12
C. 7. De Termino Categorematico, & syncategorematico.	15
C. 8. De Termino Vniuoco, Aequivoco, & Analogo.	17
C. 9. De Termino communi, & singulari. pag.	21
C. 10. De Termino Transcendente, & non transcendente.	22
C. 11. De Termino Finitante, & Infinitante. pag.	24
C. 12. De Termino complexo, & incomplexo pag.	26
C. 13. De Termino Denominatio, & Denominante.	27

C. 14.

C.14. De termino copulatiuo , & non copulatiuo .	28
C.15. De Termino absolutuo , & conno tatiuo pag.	29
C.16. De Termino concreto, & abstracto pag.	31
C.17. De termino primæ , & secundæ in tensionis.	33
C.18. De Terminis pertinentibus , & im pertinentibus .	35
C.19. De Proprietatibus Terminorū .	38
C.20. Quid sit suppositio materialis , & formalis.	39
C.21. De suppositione simplici , & perfo nali. pag .	40
C.22. De suppositione communi , & di screta .	43
C.23. De suppositione naturali , & acci dentali .	44
C.24. De suppositione distributiva , & collectiva .	45
C.25. De suppositione determinata, & con fusa .	50
C.26. De Ascensu, & Descensu.	51
C.27. De Appellatione.	55
C.28. De statu , Ampliatione , & Restri ctione .	56
C.29. De diminutione , alienatione , & remotione .	58

Tractatus secundus de Propositione.

C.30. De Nomine.	61
C.31. De Verbo.	68
C.32. De Oratione.	74
C.33. Quid sit enunciatio, seu propositio.	77
C.34. De materia, & forma propositionis.	79
C.35. De Quantitate propositionis.	82
C.36. De Qualitate propositionis.	83
C.37. De Unitate propositionis.	85
C.38. De Contradictione.	87
C.39. De oppositione propositionum.	91
C.40. De Aequipollentia.	94
C.41. De Conuersione.	97
C.42. De Propositionibus disiunctiuis, & copulatiuis.	100
C.43. De Propositione conditionali, & causali.	102
C.44. De Propositionibus exponibilibus.	107
C.45. De Propositionibus modalibus.	111

Tractatus Tertius de syllogismo.

C.46. Quid sit syllogismus.	115
C.47. De materia, & forma syllogismi.	119
C.48. De Figuris syllogismi.	122
C.49. De Modis syllogismi.	126

C.50 Ostenditur primos quatuor directos
modos necessario, & perfecte conclu-
dere. pag. 130

C.51. Ostenditur per reductionem osten-
suam modos imperfectos concludere. 133

C.52. Ostenditur per reductionem ad im-
possibile modos imperfectos conclu-
dere pag. 136

C.53. De Regulis syllogismorum. 141

C.54. Ostenditur ex Regulis quadraginta
quinque modos esse inutiles. 144

C.55 Comparatio figurarum, & modorum. 148

C.56. De syllogismo expositorio, & eius
reductione. 151

C.57. De reductione aliarum argumenta-
tionum. 154

C.58. De syllogismo sophistico; & de fal-
lacijs. 162

Questiones proœmiales ad

Philosophiam, & scientias. 167

Explicatur ordo disputandorum. 167

Quæst. I. Vtrum cognitio perfecta debeat
esse per causam rei. 170

Q. 2. Vt causæ cognitionis sint potentia, &
obiectum. 178

Q. 3. Vt causa specificatiua cognitionis sit
potentia, vel obiectum. 187

Q. 4. Vt necessaria sit aliqua diuisio artifi-
cialis habituum, ac scientiarum. 200

Q. 5. Vt allata diuisio scientiarum in qua-
tuor primarias sit bona, & fundata in

rerum

- rerum natura . 209
- Q.6.V. quatuor facultatibus conueniente assignetur obiectum attributionis materiale, & formale . 233
- Q.7.V. quatuor scientiæ habeant inter se aliquem ordinem. 248
- Q.8.V. omnes scientiæ speculatiue, & facultates practiue subordinentur quatuor primarij . 254
- Q.9.V. conuenienter assignetur obiectum attributionis materiale, & formale, logice practice . 263
- Q.10.V. aliquæ veritates obiectiue sint practice, aliæ speculatiue. 288
- Q.11.V. cognitio practica bene definitur. pag. 291
- Q.12.V. ad executionem requiratur imperium rationis consequens electionem. pag. 313
- Q.13.V. quatuor facultates primariæ sint speculatiue, vel practice. 323
- Q.14.V. cognitio speculatiua sit nobilior practica. 331
- Q.15.V. bona sit definitio, ac diuisio virtutum intellectualium . 337
- Q.16.V. intellectus sit habitus specialis colligens prima principia per inductionem singularium. 344
- Q.17.V. scientia sit habitus inferens conclusiones ex principijs . 355
- Q.18.V.trum sapientia sit habitus specialis, ac be-

- ac bene definiatur . 363
- Q. 19. V. prudentia differat ab arte , & à scientia morali. 371
- Q. 20. V. prudentia sit vna , & architectonica, seu princeps artium. 380
- Q. 21. V. artes bene diuidantur in actiuas , & factiuas: rationales , & non rationales. pag. 384
- Q. 22. V. quatuor facultates speculatiue sint scientie subalternantes , & virtutes intellectus. 390
- Q. 23. V. logica practica secundum omnes partes sit virtus, scientia, vel ars. 399
- Q. 24. V. logica bene diuidatur in naturalem, & artificialem, docentem, & vrentem , & an sit necessaria ad scientias. 404

Questiones de Vniuersalibus.

- Explicatur ordo disputandorum. 413
- Q. 25. V. sit perfectio cognitionis, ac scientiæ quod sit vniuersalis. 415
- Q. 26. V. scientia humana sit de singularibus. pag. 420
- Q. 27. V. detur vniuersale, à parte rei extra singularia . 426
- Q. 28. V. vniuersale detur ante singularia , vel in singularibus . 437
- Q. 29. V. vnitas conuenienter definiatur, ac diuidatur. 446
- Q. 30. V. identitas, ac distinctio conuenienter

Q V A E S T I O N V M.

ter definiantur, ac diuidantur. 462

Q. 31. V. in Creatis dari possit distinctio
virtualis intrinseca, aut formalis ex
natura rei. 474


Q. 32. V. in creatis rationes genericę, spe-
cificę, & indiuiduales distinguantur for-
maliter ex natura rei. 490

Q. 33. Vtrum intellectus faciat vniuersale
per abstractionem. 550

Q. 34. V. omnis, & solus intellectus faciat
vniuersale. 565

Q. 25. V. predicabilitas sit proprietas vni-
uersalis. pag. 580





S V M M V L A E ,

seu Logica brevis .

PROOEMIUM .

De necessitate Summularum. Cap. I.

VMMVLAE sunt summa quædam , seu compendium logicæ . Sicut enim pictores figuram prius delineant , deinde coloribus additis perficiunt , ac absoluunt ; sic nos logicam ruditer delineamus in summulis , perfectiorem deinde ac absolutiorem in quæstionibus tradituri .

Porro necesse est logicæ perfectæ summulas præmittere , seu logicam imperfectam . Ratio est , quia logica est instrumentum scientiarum , & ideo necessaria est ad scientias perfectè acquirendas , eo pacto , quo malleus est instrumentum artis fabrilis , & est necessarius ad facienda opera talis artis . Ex alia parte sicut malleus perfectus est opus artis fabrilis , quod effici non potest nisi per alium malleum , saltem imperfectum ; sic perfecta logica est scientia , quæ comparari non potest nisi adiutorio alterius logicæ imperfectæ . Sicut ergo ad conficiendum primum malleum perfectum debuit artifex prius con-

A

ficere

ficere alium malleum imperfectum ex ferro ruditer elaborato, cuius deinde adiutorio malleum perfectum confecit; sic nos ad comparandam perfectam logicam debemus acquirere prius in summulis aliam logicam imperfectam, & rudem, quæ nos iuuet ad perfectam acquirendam.

Quid sit Logica. Caput. II.

VT rudem hanc logicam tradamus explicandum est prius, quid sit logica. *Logica est ars directiva actuum rationis, seu operationum intellectus.* Dirigit autem actus rationis tradendo præcepta, & regulas quasdam, quibus actus rationis facile, ordinatè, & absque errore fiant. Ut enim primo metaph. Aristoteles aduertit, & ex eo S. Thomas in primum poster. lect. prima, cætera animalia exercent suas operationes ex quodam instinctu naturæ sine arte, & sine certo iudicio rationis; ex gr. ex quodam instinctu naturæ, ac sine vlla arte vulpes gallinis insidiatur; araneus texit sua retia ad muscas venandas; cuius rei signum est quod animalia eiusdè speciei vniuniformiter ab initio mundi, & vbiq; locorum tales actus exercent. At homines faciunt suos actus ex arte, & ex certo iudicio rationis, ideoque ad diuersos actus humanos exercendos diuersas artes

artes diuersis temporibus , & locis sunt inuentæ , & à diuersis hominibus varijs modis exercentur . Sicut ergo homo ratiocinando circa motum pedum inuenit , artem saltatoriam, quæ tradit præcepta , & regulas quibus facile , ordinate , & concinne pedes moueantur in saltibus , & choreis; ratiocinando circa actus manuum inuenit ædificatoriam, & fabrilem , atque alias artes manuales tradentes regulas facile, & ordinatè mouendi manus in ordine ad ædificandum, & alia opera manualia exercenda ; sic ratiocinando circa actus rationis, & intellectus inuenit artem logicam , seu rationalem tradentem regulas ordinatè , & sine errore exercendi actus rationis , præsertim in ordine ad scientias acquirendas

Hæc autem facultas vocatur rationalis non solum quia exercetur per rationem ; quod est commune omnibus artibus , sed etiam quia versatur circa actus rationis tanquam circa proprium obiectum , & materiam . Sicut enim saltatoria versatur circa motum pedum , sic logica circa actus rationis .

Tanto igitur logica præstat dignitate cæteris artibus quanto actus rationis præcellunt cæteris operationibus, & actibus omnium aliarum potentiarum , idque merito dicitur ars artium , quia

versatur circa actus rationis, à quibus procedunt cœteræ artes .

De tribus operationibus intellectus.

Caput. III.

QUoniam logica versatur circa actus rationis, hoc est circa operationes intellectus, explicandum quot, & quæ sint operationes intellectus .

Tres sunt operationes intellectus; simplex apprehensio, iudicium immediatum, & discursus .

Simplex apprehensio est intellectio, qua ita percipimus obiectum, ut nihil de illo affirmemus, vel negemus per talem actum : ut cum dico *Petrus*, nihil de illo affirmans, aut negans. Vocatur apprehensio, quia intellectus per illam quasi per manum apprehendit obiectum, & ponit illud in se. Possumus per simplicem apprehensionem cognoscere non solum res simplices, sed etiam compositas, & integram propositionem : ex. gr. ego per simplicem apprehensionem cognosco propositionem istam *Astra sunt paria*, & neque affirmo quod sint paria, neque nego : et cum quis legit aliquam historiam dubitans de eius veritate apprehendit totam historiam nihil de eius veritate affirmando, vel negando . Dum ergo Aristoteles vocat primam apprehensionem

tionem intelligentiam simplicium, vel incomplexorum, nomine simplicium intelligit quæ per talem actum neque affirmantur, neque negantur.

Secunda operatio, seu iudicium immediatum est *intellectio qua affirmamus, aut negamus aliquod obiectum, quod innotescit per se ipsum*; ut cum dico *omne totum est in maius sua parte*; per se enim innotescit veritas talis propositionis. Vocatur compositio, vel diuisio, quia per illam prædicatum vel componitur cum subiecto affirmando, vel diuiditur ab illo negando.

Tertia operatio est, *per quam intellectus ab affirmatione vel negatione alicuius per se noti procedit ad affirmationem, vel negationem alterius per se ignoti*, ut cum videns fumum, & non ignem, dico *ex camino prodit fumus; ergo intra domum est ignis*. Tunc est mihi notum per se, & immediatè quod prodit fumus, cum fumum videam, quod verò intra domum sit ignis mihi est ignotum, cum ignem non videam: ex fumo verò per se noto venio in cognitionem ignis ignoti. Dicitur discursus, quia intellectus quodammodo currit ex veritatibus per se notis ad ignotas.

In hoc negotio trium operationum, intellectus imitatur iudicem. Sicut enim prius iudex causam audit, deinde fert sententiam absolutoriam, vel condemna-

toriam; sic intellectus prius apprehendit obiecta, deinde de illis fert sententiam, affirmatiuam, vel negatiuam. Præterea sicut iudex cū id, de quo agitur est ambiguum, examinat testes fide dignos, & rationes pro vtraque parte, & deinde fert sententiam pro ea parte, quam suadent testes, & rationes; sic intellectus cum occurrit aliquid, quod secundū se est ignotū, quærit veritates per se notas, & deinde fert iudicium de ignotis secundum connexionem, quam habent cum veritatibus per se notis.

Possunt operationes intellectus aliter diuidi, sed allata diuisio est adæquata, & sufficiens ad præsens institutum. Quod sit adæquata probatur, quia comprehendit omnes operationes intellectus. Quælibet enim intellectio vel est iudicatiua, vel non; si non est iudicatiua, est apprehensio; si est iudicatiua, vel immediate, vel mediate: si immediatè, est secunda operatio, si mediatè, est tertia; ergo nulla est operatio intellectus, quæ non reducatur ad aliquam ex tribus assignatis.

Obijcies: cum quis dubitat, suspicatur, vel admiratur, exercet aliquem actum intellectus; sed dubium, suspicio, & admiratio non reducuntur ad vllam ex tribus; ergo &c.

Respondetur concedo maiorem, & ne-

go minorem: dubium enim est *simplex apprehensio alicuius questionis relinquens intellectum ita libratum*, ut neque inclinet ad affirmandum, neque ad negandum: ut cum proponitur an astra sint paria; intellectus remanet dubius, quia neque inclinatur ad affirmandum, neque ad negandum quod astra sint paria.

Suspicio est *simplex apprehensio inclinans intellectum ad unam partem contradictionis*: ex.gr. cum ego suspicor Petrum commisisse homicidium, ita apprehendo hoc obiectum, ut inclinet ad credendum, quod verè commisit.

Admiratio est *apprehensio cause latentis, & ignote alicuius effectus de nouo occurrentis intellectui*: ex.gr. cum Indi viderunt primo explodi tormenta bellica, mirati sunt, quia apprehenderunt causam latentem, & ignotam tanti effectus, quem primo viderunt; cum verò nos audimus explodi bellica tormenta, non miramur; tum quia ille effectus non occurrit de nouo; tum quia scimus causam; ideo admiratio est filia ignorantiae, & mater sapientiae: nascitur enim ex ignorantia causae; generat verò curiositatem sciendi talem causam, ex qua curiositate nascitur studium, & inuestigatio, ac inuentio causae, quae scientia est. Patet ex his omnes actus intellectus reduci ad tres operationes enumeratas.

Est etiam allata diuifio fufficiens ad præfens institutum. Enumerantur enim operationes intellectus ad hoc, vt logica poffit de ijs tradere fua præcepta. Sufficit autem vt prius tradat præcepta de ijs, quæ fpectant ad primam operationem, deinde de ijs quæ ad fecundam; demum de ijs, quæ fpectant ad tertiam. Et quia ad primam præcipuè fpectant termini; ad fecundam propositio, feu enunciatio, in qua termini inuicem componuntur, & diuiduntur; ad tertiam fyllogismus, ad què diriguntur reliqui difcurfus; ideo de tribus iſtis eſt nobis differendum.

T R A C T A T V S

P R I M V S

DE TERMINIS

Quid fit Terminus. Caput. IV.



TERMINVS definitur ab Aristotele primo prior. cap. primo: *Terminus est, in què resoluitur propositio tanquam in prædicatum, vel subiectum.* Vt intelligatur definitio explicandum est, quid sit propositio, quid prædicatum, quid subiectum, & quid sit resolutio propositionis.

Propositio ex Aristotele ibidem, est

uniuſ

unius de altero affirmatiua, aut negatiua oratio: ex gr. cum dico Petrus est doctus, facio propositionem affirmatiuam, cum dico Petrus non est doctus, facio propositionem negatiuam.

Tres sunt ergo partes propositionis: predicatum, quod est id, quod affirmatur de aliquo: subiectum, quod est id, de quo alterum affirmatur; & copula quæ est ipsa affirmatio, vel negatio: ex. gr. in hac propositione: *Petrus est doctus*: *Petrus* est subiectum, *doctus* prædicatum, & particula *est* copula.

Resolutio propositionis est assignatio eorum, quæ in propositione componuntur, aut diuiduntur per affirmationem, aut negationem.

Dum ergo dicitur terminus est in quem resoluitur propositio: sensus est terminus est quod in propositione componitur per affirmationem, aut diuiditur per negationem.

Collige primo cur ea, quæ in propositione componuntur, aut diuiduntur, vocentur termini. Ratio est, quia terminant compositionem, aut diuisionem.

Collige secundo in propositione dari duos saltem terminos. Ratio est, quia compositio, aut diuisio saltem est compositio, aut diuisio duorum. Neque enim idem componi potest cum se ipso, vel à se ipso diuidi. Verum quidem est, quod aliquan-

do verbum significat copulam simul, & prædicatum. Cum enim dico *Petrus currit*, sensus est, *Petrus est currens*; cum dico *Petrus existit*, sensus est, *Petrus est existens*.

Collige tertio casus obliquos non esse terminos: ex: gr. cum dico *Petrus est filius Franc sci ly Francisci* non est terminus, quia non componitur cum alio termino, sed solum est obliquum recti, quod quia componitur, est terminus.

Collige quarto illud quod actu terminat compositionem, vel diuisionem esse terminum actu, illud verò quod actu non terminat, sed potest terminare, non esse terminum actu, sed solum potentia.

Ex duobus terminis seu extremis propositionis prædicatum vocatur maius extremum, subiectum vocatur minus extremum.

Ratio prima huius rei est, quia prædicatum fungitur nobiliori, & principali munere. Cum enim quæro ex: gr. an homo sit risibilis, habeo cognitionem subiecti, hoc est hominis valde imperfectam, & quæro cognitionem prædicati, ut per ipsam perficiam, & clarificem cognitionem subiecti; ergo cognitio prædicati quæritur ut perfectiua cognitionis subiecti; sed perfectior, & nobilior est ratio perfectiui, & dantis perfectionem, quam ratio perfectibilis, & accipientis perfectionem;

tionem ; ergo ratio prædicati nobilior est quam ratio subiecti.

Secunda ratio est , quia prædicatum , connaturaliter exigit esse maius, & latius patens, quam subiectum, vel saltem non minus subiecto : subiectum è contra, connaturaliter exigit esse quid minus , vel saltem non maius prædicato : ideo propositiones, in quibus subiectum est maius, & latius patens prædicato , dicuntur innaturales, qualis est hæc , *aliquod animal est homo*; propositiones verò, in quibus prædicatum magis late patet, & est vniuersalius subiecto dicuntur naturales , qualis est hæc, *homo est animal*.

*De Terminis Mentali, Vocali, &
Scripto. Cap. V.*

Dividitur primo terminus in mentalem, vocalem, & scriptum. Mentalis est qui exprimitur mente: vocalis qui exprimitur voce: scriptus qui exprimitur scripto. Ex.gr. cum dico *Petrus est homo*, *Petrus* & *homo* in quantum exprimuntur mente, seu conceptu interno. sunt termini mentales; in quantum exprimuntur vocibus, sunt termini vocales ; in quantum exprimuntur scripto, sunt termini scripti.

Hæc diuisio similis est diuisioni, quæ diuiditur Cæsar in sculptum, & pictum,

vel qua B. Virgo diuiditur in Lauretanam, & S. Mariæ maioris : neque enim B. Virgo diuiditur ratione sui, cum sit vnica, sed ratione diuersarum imaginum ; sic terminus non diuiditur ratione sui, sed ratione diuersarum expressionum, atque adeo si nomine termini intelligamus rem significatam, terminus mentalis, vocalis, & scriptus sunt idem terminus, sed diuerso modo expressus, eo pacto, quo B. Virgo Lauretana est eadem ac B. Virgo S. Mariæ Maioris, sed expressa per diuersam imaginem. Si verò nomine termini intelligamus signum exprimens, terminus mentalis, vocalis, & scriptus sunt termini diuersi, eo pacto quo si nomine Virginis Lauretanæ, & Sanctæ Mariæ maioris intelligantur imagines, sunt diuersæ imagines.

De Termino significatiuo, & non significatiuo. Cap. VI.

O Misso termino mentali, & scripto, de quo nihil peculiare dicendum, occurrit, agimus de vocali in quantum sumitur non pro re significata, sed pro actu significante. Diuiditur ergo in significatiuum, & non significatiuum. Significatiuus est vox, quæ ex pacto, vel consuetudine ponitur in propositione ad significandum subie-

subiectum, & prædicatum diuersum à voce.

Non significatiuus est vox quæ potest poni in propositione ad significandum pro subiecto, vel prædicato solum ipsam vocem: ex. gr. *Cælum* est terminus significatiuus. Sicut enim ex pacto, vel consuetudine ramus potest poni ante tabernam ad significandum vinum vendibile, sic hæc vox *Cælum* ex pacto, vel consuetudine poni potest in propositione ad significandum tanquam subiectum, vel prædicatum ipsum *Cælum*. Dum enim dico *cælum est rotundum*, subiectum, de quo affirmo rotunditatem, non est vox *Cælum*, sed ipsum *cælum*. E contra *Blitri* est terminus non significatiuus, quia potest poni in propositione solum ad significandum pro subiecto, vel prædicato se ipsam, non verò rem distinctam ab ipsa voce. Dum enim dico *Blitri est vox* affirmo prædicatum solum de hac voce *Blitri*.

Obijcies primo: hic terminus vox non potest poni ad significandum aliquid distinctum à voce, & tamen est terminus significatiuus: ergo etiam *Blitri* erit terminus significatiuus, licet poni non possit in propositione ad significandum aliquid distinctum à voce. Respondeo distingo antecedens: terminus vox non potest poni ad significandum aliquid distinctum ab omni voce, concedo antecedens; non potest

potest poni ad significandum aliquid distinctum ab hac voce *vox*, nego antecedens, & nego consequentiam. Disparitas est manifesta. Terminus *vox* potest poni in propositione ad significandas voces specie diuersissimas ab illa: ideo possum dicere *Cælum est vox*, *terra est vox* &c. At Blitri non potest poni in propositione ad significandas voces specie diuersas à Blitri; ideo non possum dicere *Cælum est Blitri*, adeoque non significat.

Obijcies secundo: terminus Blitri nihil significat præter ipsam vocem; ergo terminus Blitri, & terminus *nihil* sunt eiusdè significationis; sed terminus *nihil* est significatiuus; ergo etiam Blitri.

Respondeo distingo maiorem: terminus Blitri nihil significat positiuè, nego maiorem: negatiuè, concedo maiorem: & distingo minorem: terminus *nihil* significat nihil positiuè, concedo minorem: solum negatiuè, nego minorem; & nego consequentiam. Terminus Blitri nihil significat negatiuè, hoc est non significat aliquid distinctum à voce: at terminus *nihil* significat nihil positiuè, hoc est significat ipsam negationem essendi, quæ est aliquid quodammodo diuersum à voce. Ideo vera est propositio *Deus fecit omnia ex nihilo*; hoc est ex negatione essendi, quia vox *nihil* significat negationem essendi;

sendi : at non est vera hæc alia propositio
Deus fecit omnia ex Blitri, quia Blitri non
 significat negationem essendi .

De Termino Categorematico, & Syncategorematico. Cap. VII.

O Misso termino non significatiuo, terminus significatiuus diuiditur in categorematicum, & syncategorematicū. Categorematicus, quæ vox idem sonat apud Græcos, ac apud latinos *significatiuus*, est qui per se solum potest esse subiectum, aut prædicatum propositionis. Syncategorematicus, quæ vox idem significat ac *consignificatiuus*, est qui potest esse subiectus, aut prædicatum propositionis solum ut adiectus alicui alteri ex.gr. *Petrus, et albus* sunt termini categorematici, quia in hac propositione *Petrus est albus*, *Petrus* se solo est integrum subiectum, *albus* est prædicatum integrum. E contra *omnis, nullus, aliquis, uterque, neuter, duo, tres*, & alij numeri sunt termini syncategorematici, quia non possunt esse integrū prædicatum, aut subiectum propositionis, sed debet saltem in mente addi aliquis alius terminus, qui subintel ligatur. Neque enim possum formare hanc propositionem *omnis currit*, nisi exprimam, vel intelligam *omnis homo, omnis leo*. &c.

Termini ergo categorematici sunt sicuti vocales : syncategorematici sunt sicuti consonantes. Sicut enim vocales se solis possunt constituere syllabam, ut cum dico *amo*, vocalis A se sola constituit primam syllabam, atque idem valet de cœteris vocalibus, ut patet experientia, & ideo vocantur vocales, quia se solis possunt exprimi, & sonare; sic termini categorematici possunt se solis constituere integrum prædicatum, aut subiectum propositionis, & ideo absolute vocantur significatiui. Sicut consonantes se solis non possunt pronunciari, nec constituere integram syllabam, sed solum cum alia vocali (experiat enim quisque an possit exprimere B sine aliqua vocali) ideoque dicuntur consonantes, quia se solis non sonant, sed consonant cum vocalibus; sic syncategorematici non possunt se solis esse integrum subiectum, aut prædicatum, id est integer terminus propositionis, sed cum categorematicis, ideoque dicuntur consignificatiui.

Obijcies: in hac propositione *Deus, & creatura sunt omnia*, ly 'omnia est integrum prædicatum; ergo terminus syncategorematicus potest esse integrum prædicatum propositionis.

Respondeo in mente subintelligi *entia*, vel quid simile. Sicut enim antiquitus Hebræi

Hebrei in scriptione ponebant solas consonantes, & vocales intelligebantur, ac proinde debebant addi à legentibus; sic aliquando ponimus solos terminos syncategorematicos, ac categorematici debent subintelligi.

De Terminò Vniuoco, Aequiuoco, & Analogò. Caput. VIII.

Terminus uniuocus est qui potest pluribus diuissim applicari secundum eamdem rationem, seu significationem nominis: ex gr. homo est terminus uniuocus, quia potest applicari Petro, Paulo &c. secundum eandem significationem, & rationem, ac definitionem animalis rationalis. Dum enim dico Petrus est homo, sensus est quod sit animal rationale; idem sensus est dum dico Paulus est homo &c. Aequiuocus est qui potest pluribus applicari secundum diuersam rationem, seu significationem, & explanationem nominis: ex gr. canis est terminus æquiuocus, in quantum dicitur de terrestri, coelesti, & marino, quia dicitur de illis secundum diuersam rationem, & explanationem nominis. Dum enim applicatur terrestri nomine canis intelligitur animal latrabile; dum applicatur coelesti intelligitur quædam constellatio; dum applicatur marino, intelligitur quidam piscis.

piscis. Hinc verò procedit, quod si duo colloquentes vtuntur termino æquiūoco in diuersa significatione, non se intelligunt; vt si quis dicat alteri, canis orietur circa mediam noctem, & loquens significat ortum cōstellationis in Cœlo, audiens verò intelligit de partu canis domesticæ, profectò se non intelligent.

Debet autem aduerti, quod idem nomen respectu aliquorum est vniūocum, quia applicatur illis in eadem significatione, respectu aliorum est æquiūocum, quia conuenit illis in diuersa significatione: ex gr. nomen canis respectu omnium canum terrestrium est vniūocum, quia conuenit illis in eadem significatione *animalis larabilis*; respectu vero cōstellationis, piscis, & canis terrestris est æquiūocum, quia conuenit illis in diuersa significatione.

Terminus æquiūocus diuiditur in æquiūocum strictè, siue à casu, & analogū, qui est æquiūocus latè, seu à consilio. Terminus strictè æquiūocus est qui conuenit pluribus secundum significationes omnino diuersas, seu non habentes affinitatem, propter quam illud nomen fuerit illis tributum. Huiusmodi est nomen Galli prout significat Gallum auem, & hominem natum in Gallia.

Æquiūocus à consilio, seu analogus est qui conuenit pluribus secundum significationes
affines

affines, propter quas non casu, sed certo consilio tribuitur illis. Huiusmodi est nomen Ludouici prout tribuitur Regibus Galliae propter memoriam primi Ludouici. Ideo terminus analogus communiter definitur, qui significat plura secundum significationem, & rationem non omnino eandem, nec omnino diuersam: nam propter affinitatem significatio dicitur partim eadem, partim diuersa. Aristoteles cap. primo Antep. omittit analogia, quia comprehenduntur definitione aequiuocorum. Eo enim ipso, quod significatio non sit omnino eadem, est diuersa.

Diuiditur terminus analogus in analogum attributionis, & analogum proportionis. Analogus attributionis est qui conuenit pluribus propter ordinem ad vnum cui principaliter competit. Tale nomen est ex. gr. sanum, quod in quantum dicitur de medicina, de aere, & de colore dicitur minus principaliter, quam cum dicitur de animali, quod dicitur sanum principaliter, quia habet sanitatem in se, ac verò dicitur sanus, qui a causat sanitatem in animali, color dicitur sanus, quia est signum sanitatis &c. In diuersa igitur significatione dicuntur sana, animal, color, aer &c. sed propter ordinem ad vnum, quod est ipsum animal. Illud, cui nomen conuenit principaliter, vocatur analogatus princi-

principale; coetera vocatur analogata minus principalia.

Analogus proportionis est *qui conuenit pluribus propter proportionem, quam habent inter se; ex.gr. nomen ridentis prout tribuitur homini, fortunæ, & prato est analogum proportionis; nam fortuna, et pratum dicuntur ridere propter proportionem, quam habent fortuna fauens, & pratum amœnum cum homine ridente.* In analogia proportionis fundatur omnes Metaphoræ. Nomina enim metaphorica sunt analogia proportionis improprie. An vero dentur analogia proportionis propriæ, & an ens sit analogum, explicabimus quæstione de Antepredicamentis.

Obijcies: ex Aristotele 6. Top. Aequiuoca non possunt definiri vnica definitione: ergo mala est allata definitio.

Respondeo distingo antecedens: æquiuoca prout significantur per nomen conueniens illis in diuersa significatione definiri non possunt vnica definitione, concedo antecedens: æquiuoca prout significantur per nomen conueniens illis in eadem significatione, nego antecedens, & nego consequentiã. Dico, quod æquiuoca, ex.gr. Gallus auis & Gallus homo natus in Gallia, prout significantur nomine Galli, quod illis conuenit in diuersa significatione, definiri non possunt vna defini-


definitione, sed duabus explicantibus diuersam significationem nominis. At vero æquiuoca in quantum significantur per nomen conueniens illis in eadem significatione definiri possunt vnica definitione: ex.gr. Gallus auis, & Gallus homo quatenus cōueniunt in nomine animalis, quod illis conuenit in eadem significatione viuentis sensitiui, definiri possunt vnica definitione. Sic in casu nostro omnia æquiuoca in quantum significantur nomine æquiuoci, quod illis conuenit in eadē significatione definiri possunt vnica definitione.

De Termino communi, & singulari
Cap. IX.

Terminus communis est, qui potest pluribus diuisim applicari secundum significationem saltem analogicē eandem; ex.gr. homo, equus &c. sunt termini communes: nam homo potest dici de Petro, Paulo &c. secundum significationem eandem vniuocē; sanum etiam est terminus communis, quia potest dici de pluribus sanis secundum significationem eandem analogicē.

Terminus singularis est qui potest de vno tantum dici secundū eandem significationem ex.gr. Petrus est terminus singularis; nam

solum



solum æquiuocè dicitur de pluribus hominibus.

Quæres an sol, luna &c. sint termini communes?

Respondeo affirmatiuè, quia dici possunt de pluribus solibus, ac lunis possibilibus.

Terminus communis diuiditur in vniuersalem propriè, & vniuersalem analogicè. Vniuersalis propriè est cum dicitur de pluribus secundum significationem vniuoce eandem. Vniuersalis analogicè est cum dicitur de pluribus secundum significationem eandem solum analogicè.

De Termino Transcendente, & non transcendente. Cap. X.

Terminus communis diuiditur in transcendentem, non transcendentem, & supertranscendentem. Non transcendens est qui dicitur de rebus vnius tantum prædicamenti. Porro decem sunt prædicamenta, seu classes, ac genera rerum, ad quæ omnia reducuntur.

Primum prædicamentum est substantia; quæ est, ens per se subsistens, & non inhaerens alteri. Huiusmodi sunt Cælum, elementa, animalia, & plantæ &c.

Secundum est quantitas, per quam res dicuntur magna, vel parua, palmares, vel

bi; a!

bipalmæres, multæ, vel paucæ, decem, vel viginti &c.

Tertium est qualitas, per quam res dicuntur quales; ex.gr. calidæ, vel frigidæ, albæ, vel nigræ, bonæ, vel malæ &c.

Quartum est relatio, per quam res dicuntur esse aliquid alterius, vel quomodo-
documque se habentes ad aliud; ex.gr. si-
miles, aut dissimiles alteri, æquales, vel
inæquales, maiores, vel minores altero
&c.

Quintum est tempus, seu duratio, per
quam dicuntur res esse hoc anno, vel a-
lio &c.

Sextum est locus, per quem res sunt in
Cœlo, vel in terra, Romæ, Londini, vel
Neapoli &c.

Septimum est situs, qui consistit in di-
spositione partium in ordine ad locum,
per quem dicuntur stare, sedere, iace-
re &c.

Octauum est habitus, qui consistit in
quadam adiacentia vestium aut armorum,
vel alterius extrinseci, per quam aliquis
dicitur vestitus, vel armatus &c.

Nonum est actio, per quam res dicen-
tur agere; ex.gr. calefactio est actio per
quam ignis calefacit.

Decimum est passio, per quam aliquis
dicitur ex.gr. calefieri.

De his prædicamentis tum in communi

ni, tum in particulari fusius agendum, tum in logica libro prædicamentorum, tum in Physica, & Metaphysica. Termini igitur non transcendentes sunt qui dicuntur de rebus vnius tantum prædicamenti.

Terminus transcendens est qui dicitur de rebus plurium prædicamentorum. Solent autem assignari sex significati litteris huius vocis *Reubau*. Sunt autem *Res, ens, Vnum, Bonum, Aliquid, Verum*. Nam omnia sunt res, sunt ens.

Terminus supertranscendētalī est qui dicitur non solum de ente, sed etiam de non ente, & de impossibilibus; ex. gr. intelligibile, cognoscibile &c. Nam non solum entia sunt intelligibilia, sed etiam non entia, impossibilia, & ipsum nihil, vt patet, quia de ijs loquimur.

De Termino Finitante, & Infinitante.

Caput. XI.

Terminus finitus, seu finitans est per cuius affirmationem determinatur aliquid quod res est; ex. gr. homo est terminus finitus, quia dum dico *Petrus est homo*, determino aliquid, quod Petrus est.

Terminus infinitus seu infinitans est, per cuius affirmationem determinatur solum aliquid quod res non est; ex. gr. non
homo

homo, non leo; Dum enim dico equus est non homo determino aliquid quidem, quod leo non est, at non determino quid leo sit.

Nota primo, quod intellectus eo ipso quod infinitat aliquem terminum cognoscit omnia. Dum enim dicit ex. gr. *non homo* cognoscit hominem, & non hominem; sed homo, & non homo complectitur omnia: quodlibet enim est vel homo, vel est non homo; ergo dum infinitat terminum cognoscit omnia: & quia solus intellectus potest cognoscere omnia, imaginatio enim, & alia potentia inferiores cognoscunt solum quaedam, ideo solus intellectus potest infinitare terminos. Rursus quia cognito quocumque termino intellectus potest illum infinitare; ex. gr. cognita luce potest dicere *non lux*, ideo cognito quocumque obiecto intellectus formare potest conceptum communem omnium rerum.

Nota secundo, quod quominus vniuersalis est terminus finitatus, tanto magis vniuersalis est terminus infinitans: ex. gr. Petrus est terminus minus vniuersalis quam homo; homo est terminus minus vniuersalis quam animal; ideo *non Petrus* est terminus magis vniuersalis quam *non homo*, & *non animal* est terminus minus vniuersalis quam *non homo*. Patet manifestè. Nam *non Petrus* dicitur de omni-

bus rebus, excepto Petro, qui est *unum* ens: at vero *non homo* dicitur de omnibus rebus, excepto non solum Petro, sed etiam aliis hominibus; ergo de pluribus dicitur *non Petrus*, quam *non homo*. *Non animal* dicitur de omnibus, non solum exceptis hominibus, sed etiam brutis; ergo de pluribus dicitur *non homo*, quam *non animal*. Cum verò terminus finitus est vniuersalissimus, & complectitur omnia, qualis est terminus intelligibile, tum non potest infinitari, nisi verbaliter. Ideo cum dicitur *non intelligibile*, de nullo potest affirmari talis terminus, cum nullum obiectum sit non intelligibile.

De Termino complexo, & incomplexo.

Caput. XII.

Terminus complexus est, cuius partes sunt termini seorsim sumpti, qui habent eandem significationem, quam simul sumpti; ex. gr. *homo albus* est terminus complexus: nam partes ipsius, hoc est *homo*, & *albus* sunt termini, qui seorsim sumpti habent eandem significationem ac simul sumpti.

Incomplexus est cuius partes seorsim sumptæ non habent eandem significationem ac simul sumptæ; ex. gr. *Petrus* est terminus incomplexus, quia partes ipsius nempe *Pe*, & *trus* nihil significant. Dominus etiam est

est terminus incomplexus, quia licet partes *Do* & *minus* sint significatiuæ, tamen seorsim non habent eandem significationem quam simul. *Respublica* est terminus incomplexus: nam si *res*, & *publica* sumantur seorsim, non significant communitatē hominum certis legibus deuinctam, quam significant simul, sed significant quamcumque rem, quæ sit publica. Ideo potest dici *aqua est res publica*; at dici nequit *aqua est respublica*.

Collige duas voces synonimas, ex. gr. *gladius ensis* non constituere terminum complexum. Ratio est, quia ad terminum complexum requiritur, ut constet ex partibus: at duæ voces synonimæ non sunt partes vnius termini: ad partes enim requiritur, ut totum addat aliquid significationi singularum partium: at *gladius ensis* nihil addit significationi huius vocis *gladius*; ergo vox *gladius* non est pars.

De Termino Denominatiuo, & Denominante. Cap. XIII.

Terminus denominatiuus est qui ab altero deriuatur, & quoad vocem, & quoad significationem. *Iustus* ex. gr. deriuatur a *iustitia*, & quoad vocem, & quoad significationem, ideoque est terminus deno-

minatiuus: *Studiosus* è contra prout significat virtute præditum non est denominatiuus à studio, quia licet deriuetur à studio quoad nomen, non deriuatur quoad significationem: nec est denominatiuus à virtute, quia licet deriuetur quoad significationem, non deriuatur quoad nomen.

Terminus denominans est *d quo alter deriuatur, & quoad nomen, & quoad significationem*: ex. gr. iustitia est terminus denominans iustum, quia iustus deriuatur à iustitia quoad nomen, & quoad significationem.

De termino copulatiuo, & non copulatiuo
Caput. XIV.

COpulatiuus est qui *plura in recto, & in vnum per accidens aggregata significant*, vt populus, exercitus, turba, ciuitas &c. Populus enim significat plures homines in recto per accidens congregatos.

Terminus non copulatiuus est, qui *significat in recto vnum, aut plura, non vt in vnum per accidens aggregata, vt Petrus.*

Obijcies: isti termini *navis, domus, templum, scamnum* &c. non sunt copulatiui, & tamen significant in recto plures partes vnius domus, aut templi in vnum per accidens congregatas; ergo &c.

Respondeo terminum copulatiuum
signi-

significare debere plura vt plura, hoc est expressè cognita secundum pluralitatem; domus vero licet significet plures partes, non tamen significat vt plures, sed præscindit à pluralitate, ideo non est terminus copulatiuus.

De Termino absoluto, & connotatiuo
Caput. XV.

Absolutus est terminus significans vt per se stans; ex.gr. Petrus, homo, & cuncta, nomina substantiua sunt termini absoluti, quia significant vt stantia per se, non verò vt adiacentia alijs terminis, seu nominibus.

Connotatiuus est terminus significans vt adiacens alteri termino, ex.gr. albus, iustus, & omnia nomina adiectiua sunt termini connotatiui, quia significant vt adiacentia alteri nomini substantiuo, cum quo concordare debent in genere, numero, & casu. Vt id melius explicetur, nota duo esse genera rerum, substantias nimirum, quæ per se stant, & sunt, ex.gr. Deus, homines, Petrus, &c. & accidentia, quæ postulant adhærere substantijs; ex.gr. cognitio postulat adhærere alicui substantiæ cognoscenti, albedo debet adhærere alicui substantiæ albæ.

Huic duplici rerum generi correspondet

det duplex modus cognoscendi, & significandi: absolutus, quo connaturaliter debent significari substantiæ per nomina substantiua; & connotatiuus, quo connaturaliter significari debent accidentia per nomina adiectiua. Sicut enim albedo postulat adhærere alicui substantiæ, ex. gr. niui; sic nomen *albus* postulat adhærere alicui nomini substantiuo, ex. gr. huic nomini *nix*, dum dicitur *nix alba*, concordando penitus cum eo nomine, eo pacto quo accidens coarctatur suo subiecto.

Licet autem iuxta primum, & maximè naturalem modum significandi, substantiæ significantur terminis absolutis, qui ideo vocantur nomina substantiua, accidentia verò terminis connotatiuis, qui idcirco vocantur nomina adiectiua; tamen possumus inuertere talem ordinem, & significare substantias per terminos connotatiuos, & ad modum accidentium, vt cum dicimus *animatus* significamus animam, quæ est substantia ad modum accidentium: & contra possumus significare accidentia ad modum substantiæ; vt cum dico *albedo*, *nigredo* &c. significo hæc accidentia per terminos per se stantes, & ad modum substantiæ.

Obijcies: nomen *cæna* est connotatiuū, connotat enim tempus vespertinum, & tamen per se potest stare quin adiaceat alteri

alteri nomini; ergo aliqua connotatiua possunt per se stare.

Respondeo, distinguo antecedens: cœna est nomen connotatiuum in sensu summulistico, in quo nunc agimus, nego antecedens; in alio sensu, concedo antecedens, & distinguo consequens: connotatiua in sensu summulistico possunt per se stare, nego consequentiam, in alio sensu, concedo consequentiam.

De Termino concreto, & abstracto.

Caput XVI.

Terminus concretus est qui significat compositum, vel quasi compositum ex subiecto, & forma; ex. gr. homo est terminus concretus, quia significat compositum ex corpore, & anima, ex persona, & humanitate: Deus est etiam terminus concretus, quia significat quasi compositum ex persona, & deitate; licet neque deitas sit forma, sed quasi forma, neque persona sit subiectum, sed quasi subiectum; albus etiā est concretum, quia constat ex subiecto, & albedine.

Terminus abstractus est, qui significat seorsim aliquam partem, vel quasi partem compositi, vel quasi compositi: ita humanitas est terminus abstractus, quia significat seorsim humanitatem, quæ est pars homi-

nis, deitas est etiam terminus abstractus, quia significat deitatem, quæ est quasi pars.

Quia igitur intellectus considerat aliquando ipsa tota, & composita, ex. gr. hominem, Deum, album &c; aliquando verò progreditur ad considerandas etiam partes vel quasi partes; ideo aliquando utimur terminis concretis, aliquando abstractis. Concreta diuiduntur sicut ipsa composita. Quemadmodum igitur quædam composita sunt substantialia, constantia nimirum ex materia, & forma substantiali, ut *homo*: quædam sunt accidentalia, ac important formam accidentalem, ut *albus* quædam logica, & rationis, importantia partes distinctas solum logicè, & per intellectum, ut *homo* in quantum dicit animalitatem, & rationalitatem, quæ distinguuntur solum per intellectum: quædam virtualia importantia partes, vel quasi partes distinctas solù virtualiter, ut *Deus*, in quo personalitas, & Deitas solum distinguuntur virtualiter: quædam sunt solum vocalia, in quibus partes vel quasi partes distinguuntur sola voce, & modo significandi, ut *essentitas* enim est quasi forma sola voce, & modo significandi differens ab ente: sic concreta quædam sunt substantialia, quædam accidentalia, quædam physica, & realia, quædam logi-

logica, & rationis, quædam virtualia, alia solum vocalia.

*De termino primæ, & secundæ intentionis.
Caput. XVII.*

Terminus primæ intentionis est qui significat rem secundum se, & secundum esse reale. Terminus secundæ intentionis est qui significat rem ut denominatam à cognitione, & secundum esse cogniti, & rationis.

Pro intelligentia nota primo posse res habere duplex esse, & duo genera prædicatorum. Primum esse consistit in prædicatis realibus, quæ conueniunt rebus secundum se, & non tantum per hoc, quod obijciantur alicui actui intellectus, seu rationis: ex. gr. *esse album* est quoddam esse reale, quia nix secundum se est alba: Idem dic de prædicatis hominis, equi, cognoscentis &c. Secundum esse consistit in prædicatis intentionalibus, quæ nimirum conueniunt rebus purè propter hoc quod obijciantur actibus rationis. Tale est esse cognitum. Petrus enim habet esse cogniti purè propter hoc, quod obijciatur cognitioni. Similiter *esse prædicatum, esse subiectum* conuenit rebus præcisè propter hoc, quod obijciantur cognitioni prædicanti, vel subijcienti. Ideo cum dico *Petrus est homo*, Petrus constituitur

subiectum purè propter hoc, quia obijci-
tur huic cognitioni, quæ subijcit Pe-
trum.

Termini igitur primæ intentionis sunt
qui significant res secundum esse, & præ-
dicata realia; vt homo, equus, album, ni-
grum &c.

Termini secundæ intentionis sunt qui
significant res secundum esse cogniti, &
secundum prædicata intentionalia, quæ
conueniunt rebus purè propter hoc, quod
obijciantur cognitioni: vt cognitum,
prædicatum, subiectum &c.

Vt verò melius intelligatur vis horum
nominum *prima intentio*, & *secunda intentio*,
nota secundo, quod intentio est tenden-
tia in obiectum. Sicut enim quod moue-
tur per motum localem tendit in aliquem
locum, ita quod cognoscit per cognitio-
nem tendit in obiectum aliquod. Porro
in ijs, quæ mouentur, aliquando contin-
git, vt inueniant aliquod impedimentum,
& tunc redeunt, & reflectunt versùs
proiicientem, eo pacto, quo pila parieti
allisa reflectitur, & redit ad eum, qui
proiecit. Tum verò in tali motu datur
duplex tendentia. Prima, & directa est,
qua pila tendit ad parietem. Secunda
& reflexa, qua redit à pariete ad proij-
cientem. Simile quid accidit intellectui.
Sæpe enim per cognitionem tendit in
obie-

obiectum, ex.gr. parietem, deinde verò ab obiecto, hoc est. à pariete reflectitur in se ipsum, & in suam cognitionem, & cognoscit parietem vt cognitum. Tunc vero cognitio, qua tendit in parietem, vocatur cognitio directà, & prima intentio: cognitio verò, qua reflectitur ad se ipsum, vocatur cognitio reflexa, & secunda intentio.

De terminis pertinentibus, & impertinentibus. Caput. XVIII.

Diuidentur vltimo termini inter se inuicem comparati in pertinētes, & impertinentes. Impertinentes sunt quorum unus non inferitur, neque infert alium, neque excludit, neque excluditur ab altero, vt album, dulce. Neque enim valet illatio affirmatiua, qua dicatur, *est album; ergo est dulce*: neque negatiua, qua dicatur, *est album; ergo non est dulce*.

Pertinentes sunt qui se inferunt, vel excludunt. Qui se inferunt vocantur pertinentes sequela, vt rationale, risibile. Valet enim: *est rationale; ergo est risibile*. Qui se excludunt vocantur pertinentes repugnantia, vt album, nigrum: valet enim *est album; ergo non est nigrum*,

Termini repugnantes diuiduntur in

disparatos, contrarios, priuatiuos, contradictorios, & relatiuos. Disparati sunt, qui significant res omnino diuersas, vt homo, leo. Contrarij sunt qui se mutuo excludunt ab eodem subiecto, vt album, & nigrum: albedo enim excludit à subiecto nigredinem, & nigredo albedinem. Priuatiui sunt quorum unus significat formam, alius priuationem, formæ in subiecto apto; vt cæcum, & videns. Cæcum enim significat negationem visionis non in quocumque subiecto, sed in subiecto apto ad videndam; ideoque lapis non dicitur cæcus, quia non est aptus ad videndum, sed homo dicitur cæcus, quia est aptus videre. Contradictoriij sunt, quorum unus negat quod alius affirmat, vt possibile, & impossibile. Relatiui sunt qui dicunt ordinem ad inuicem, vt pater, & filius.

Termini pertinentes sequela diuiduntur in æquales, & inæquales. Aequales siue conuertibiles sunt qui se mutuo inferunt, vt rationale, & risibile. Valet enim, est rationale; ergo est risibile, & è conuerso est risibile; ergo est rationale.

Inæquales sunt qui se inferunt nõ mutuo, ex. gr. homo, & animal. Valet enim est homo; ergo est animal, & nõ è conuerso est animal; ergo est homo. Ex his terminis inæqualibus ille qui inferitur, & non infert vocatur terminus superior; ille qui infert, & non infer-

infertur, vocatur terminus inferior: ex
gr. animal est terminus superior res-
pectu hominis, quia infertur ex homine,
& non infert hominem; homo est ter-
minus inferior respectu animalis, quia in-
fert animal, & non infertur ex animali.

Circa allatas diuisiones terminorum
aduerte, quod sicut licet esse musicum,
aliud sit, quam esse architectum, potest ta-
men idem homo esse musicus, & archite-
mus, si calleat vtramque artem: sic licet
ex gr. esse terminum concretum sit aliud,
ac esse terminum absolutum, potest tamen
eadem vox esse simul terminus concretus
& absolutus; ex gr. homo est terminus
concretus, absolutus, categorematicus
communis, &c. Vt igitur non confun-
dantur istæ rationes terminorum, sufficit
quod aliqua vox possit esse terminus vnius
rationis, quoniam sit terminus alterius ratio-
nis, aut è conuerso; ita esse musicum, &
esse architectum non confunduntur, quia
multi musici non sunt architecti, & multi
architecti non sunt musici. Sic in casu
nostro terminus communis non confundi-
tur cum copulatiuo, quia multi termini
communes, ex gr. homo, leo &c. non
sunt copulatiui, & multi copulatiui, ex
gr. Roma, Neapolis non sunt communes
cum secundum eandem significationem
dicantur de vnica ciuitate. Similiter mul-

ti concreti non sunt termini absoluti ; ex. gr. albus , doctus ; & multi absoluti non sunt concreti ; ex. gr. nigredo , albedo .

De Proprietatibus Terminorum .

Cap. XIX.

Postquam egimus de terminis , agendum est de varijs proprietatibus terminorum ; ac primo de suppositione , quæ est præcipua terminorum proprietas. Suppositio est *usus termini pro aliquo suo significato* . Cum enim idem terminus sæpe significet plura , ille usus , quo utimur tali termino ad vnum potius significandum , quam aliud , vocatur suppositio .

Hinc collige primo suppositionem differre à significatione per hoc , quod suppositio est determinatio significationis , in qua utimur voce : significatio verò est indeterminata ad hoc , ut illa utamur , vel non .

Collige secundo terminos non supponere nisi in propositione . Ratio est quia ut supponant debet apparere in qua significatione usurpentur ; at dum non formatur propositio hoc non apparet ; dum enim dico *Cælum* , adhuc non apparet an utar hac voce ad significandam se ipsam , an *Coelum* . Dum verò formo propositionem ,

nem, & dico *Cælum est vox*, tùm apparet, quod utar ea voce ad significandam ipsam vocem : cum dico *Cælum est rotundum*, apparet, quod utar ea voce ad significandum *Cælum*.

*Quid sit suppositio materialis,
& formalis. Cap. XX.*

Suppositio materialis est *usus termini pro se ipso*, & *pro ipsa voce*, ac *sono materiali*; ut cum dico *Cælum est vox*. Termini non significatiui qualis est *Blitri* non possunt habere aliam suppositionem, quam *materialem*.

Suppositio materialis alia est *naturalis*, alia *artificialis*. Suppositio *naturalis* est *usus termini pro se ipso secundum id, quod habet à natura*: ut cum dico *Cælum est vox*: nam iste terminus habet à natura esse *voce*. Suppositio *artificialis* est *usus termini pro se ipso secundum id, quod habet ab arte*, & *ab institutione humana*, ut cum dico *Cælum est nomen secundæ declinationis*: nam vox *Cælum* esse *nomen secundæ declinationis* habet ex libera hominum institutione.

Suppositio *formalis* est *suppositio termini pro suo significato distincto ab ipsa voce*: ut cum dico *Cælum est rotundum*. Soli termini

ni significatiui sunt capaces suppositionis formalis. Alia est propria, alia impropria, & metaphorica. Propria est *usus termini pro suo proprio significato*, vt cum dico *homo est ridens*. Impropria est *usus termini pro suo significato improprio*, vt cum dicitur *pratum ridet*.

Regula vniuersalis est, quod cum variatur suppositio terminorum semper argumentum est sophisticum, & non concludit; vt cum dicitur: *omne ridens mouet labia; pratum ridet; ergo mouet labia*. Nam ridens in maiori supponit proprie in minori improprie. Similiter non valet *Deus est nomen secundae declinationis; Trinitas est Deus; ergo Trinitas est nomen secundae declinationis*. Nam *Deus* in maiori supponit materialiter, in minori formaliter.

De suppositione simplici, & personali.
Cap. XXI.

Suppositio simplex est *usus termini pro suo significato prout denominato à conceptu, cui substat*.

Suppositio personalis est *usus termini pro suo significato nudè sumpto, & non prout denominatur à conceptu, cui substat*.

Pro intelligentia aduerte voces significare res non vtcumque, sed vt substantia
deter-

determinatis conceptibus. Hinc est, ut aliquæ voces licet significant eandem rem, adhuc tamen non sint synonymæ, quia significant illam ut substantem, hoc est expressam diuersis conceptibus: ex. gr. eandem rem significant istæ voces *animal rationale*, ac ista vox *homo*, quandoquidem homo, & animal rationale sunt idem omnino, & tamen non sunt voces synonymæ, quia illam eandem rem, quam vox *homo* significat ut expressam per conceptum obscurum, & definibilem, voces *animal rationale* significant ut expressam per conceptum clarum, ac definitiuum. E conuerso *gladius*, & *ensis* sunt voces synonymæ, quia significant eandem rem ut expressam eodem conceptu.

Hoc posito, cum terminus ponitur pro suo significato nudè sumpto, tunc est suppositio personalis; cum verò ponitur pro suo significato non nudè sumpto, sed ut denominato à conceptu, cui substat, & quo exprimitur, tunc est suppositio simplex. Regula verò ad id dignoscendum est: cum quod affirmatur de aliquo termino verificatur de illo nudè sumpto, & non ratione conceptus, cui substat, tunc ille terminus supponit personaliter: cum verò quod affirmatur conuenit termino non nudè sumpto, sed ratione conceptus, cui substat, tunc est suppositio simplex.

Ex.

Ex. gr. in omnibus istis propositionibus : *homo est animal* , *homo est rationalis* , *est albus* &c. terminus *homo* supponit personaliter. quia prædicata animalis, rationalis, albi &c. conueniunt homini secundum se, & non ratione conceptus, cui substat. E conuerso in his propositionibus *homo est species* , *homo est superior Petro* , *homo est prædicatum* , *subiectum* &c. terminus *homo* supponit simpliciter, quia esse speciem, esse quid superius Petro, esse prædicatum, aut subiectum conueniunt homini ratione conceptus, cui substat. Similiter in hac propositione : *animal est genus* & *superius homine* ; *Petrus est indiuiduum* , *subiicibile* , & *inferius homine* &c. termini *animal* , & *Petrus* supponunt simpliciter ex eadem ratione.

Notandum est autem, quod non solum termini primæ intentionis, ex. gr. *homo* , *animal* , *Petrus* &c. sed etiam termini secundæ intentionis, ex. gr. *prædicabile* , *subiectum* , *prædicatum* , *genus* , *species* &c. possunt supponere tum simpliciter, tum personaliter. Supponunt verò simpliciter, cum utimur illis ad significandas secundas intentiones prout denominatas ab alijs cognitionibus reflexis, quibus exprimuntur: ex. gr. sicut in hac propositione *animal est genus* , ly *animal* supponit simpliciter, quia denominatio generis

ris conuenit ratione cognitionis, qua exprimitur, sic in hac propositione *predicabile est genus*, predicabile supponit simpliciter, quia esse genus conuenit predicabili ratione alterius cognitionis reflexe, qua exprimitur.

Distinguendo istas duas suppositiones solui possunt plura sophismata; ex. gr. hoc argumentum: *homo est species; Petrus est homo; ergo est species*; non concludit, quia homo in maiori supponit simpliciter, in minori personaliter. Ex eadem ratione non concludit: *animal est genus; equus est animal; ergo equus est genus; animal est communius homine, & superius homine; homo est animal; ergo est superius, & communius homine*.

De suppositione communi, & discreta Cap. XXII.

Suppositio communis est *usus termini communis pro suo significato retinente suam communitatem*. Ita cum dicitur: *homo est animal, est rationalis, est risibilis &c.* homo supponit communiter, quia tales predicationes conueniunt homini prout est ratio communis, atque adeo secundum totam suam communitatem.

Suppositio discreta est *usus termini pro suo*

suo significato singulari tantum, vel saltim non retinente totam suam communitatem : ut cum dico *Petrus currit* ; homo currit ; animal est rationale. Termini ergo singulares supponunt solum discretè : termini communes possunt supponere tum communiter, tum discretè ; ex.g. cum dicitur *animal est sensitiuum* ; terminus *animal* supponit communiter, quia prædicatum sensitiui conuenit animali secundum totam suam communitatem : cum verò, dicitur *animal currit* ; *animal est rationale* ; terminus *animal* supponit discretè, quia prædicata currentis, & rationalis non conueniunt animali secundum totam suam communitatem.

De suppositione naturali, & accidentali. Cap. XXIII.

Suppositio naturalis est usus termini pro eo, quod illi semper, & necessario conuenit : ut cum dicitur *homo est animal, est rationalis, est risibilis* : nam omnia hæc prædicata semper, & necessario conueniunt homini.

Suppositio accidentalis est usus termini pro eo, quod illi conuenit solum contingenter, & pro tempore importato per copulam : ut cum dicitur *homo currit, homo existit* ; nam
curre-

currere, vel existere non conueniunt homini necessario, & semper, sed solum contingenter, cum possint non conuenire, & conueniant solum, pro tempore præsentis importato per copulam.

Queritur an in propositione, in qua inferius prædicatur de superiori, & magis communi, ex. gr. in hac *animal est homo*, subiectum, hoc est *ly animal* supponat naturaliter, vel accidentaliter.

Respondeo quod supponit naturaliter, sed discretè: supponit quidem discretè, quia supponit solum pro aliquo inferiori, vt explicatum est cap. 19. Supponit verò naturaliter, quia alicui animali semper, & necessario conuenit prædicatum hominis: ideo suppositio communis non confunditur cum naturali, nec discreta confunditur cum accidentali, quia potest aliquis terminus supponere naturaliter, & non supponere communiter, sed discretè; vt cum dicitur *aliquod animal est homo*; & potest supponere discretè, & non accidentaliter, vt in eodem exemplo,

De suppositione distributina, & collectina. Cap. XXIV.

Superfunt alię quatuor suppositiones conuenientes terminis communibus
ratio-

atione syncategorematis, seu signi, aut termini syncategorematici adiuncti. Syncategorema, seu signum est nota quantitatis, seu extensionis, per quam termini communes sumuntur pro omnibus, aut pluribus, aut paucioribus, aut uno tantum ex suis inferioribus. Duo sunt signa vniuersalia, hoc est denotantia terminum communem sumi pro omnibus inferioribus, nempe *omnis*, *nullus*. Cum enim dico; *omnis homo est animal*, ly *omnis* denotat quod terminus *homo* sumitur pro omnibus suis inferioribus, atque adeo quod *animal* affirmatur de Petro, Paulo, & omnibus alijs hominibus. Similiter cum dico *nullus homo est lapis*, ly *nullus* denotat, quod nego lapidem de omnibus hominibus. Duo sunt signa particularia, hoc est *aliquis*, & *unus*. Cum enim dico *aliquis homo currit*, vel *unus homo currit*; ly *aliquis*, & *unus* denotant quod prædicatum affirmatur solum de aliquo homine, non de omnibus.

Syncategoremata media inter vniuersalia, & particularia sunt omnes numeri, nempe duo, tria, quatuor, & sic in infinitum. Denotant enim quod termini communes sumantur pro pluribus, aut paucioribus. Cum enim dico *centum homines sunt occisi* ly *centum* denotat, quod terminus *homo* sumitur pro pluribus, quam cum dico *decem homines sunt occisi*:

&

& ideo quo numeri sunt maiores, eo magis participant de vniuersali, quo sunt minores magis accedunt ad particulare.

Vterque etiam, & neuter habent rationem vniuersalis, si comparentur cum hoc termino *alteruter*, qui habet rationem particularis.

Ratione igitur signi vniuersalis termino communi potest conuenire duplex suppositio, distributiva, seu copulatiua, & collectiua, seu copulata. Distributiva, seu copulatiua est *usus termini communis pro omnibus suis inferioribus seorsim sumptis*. Ex. gr. in hac propositione *omnis homo est animal*, terminus *homo* sumitur distributiue, quia sumitur pro omnibus suis inferioribus seorsim sumptis, ita vt nullus homo sumi possit, de quo animal non affirmetur.

Suppositio distributiva potest esse completa, vel incompleta. Completa est *sumptio termini communis pro omnibus suis inferioribus mediatis, & immediatis*. Incompleta est *sumptio termini communis pro omnibus suis inferioribus, solum immediatis*: ex. gr. in hac propositione: *omne animal est sensitiuum*, ly *animal* supponit completè, quia nihil omnino potest sumi, quod sit animal, & non sit sensitiuum.

E contra in hac propositione: *Omne animal fuit in arca Noe*: supponit incompletè:

pletè: sensus enim est quod omnes species animalium fuerint in arca, non verò quod omnia indiuidua. Ideo non valet, *omne animal fuit in arca Noe; tu es animal; ergo fuisti in arca Noe*, quia animal in maiori distribuitur solum incompletè. Suppositio incompleta dicitur esse pro generibus singulorum; completa verò dicitur esse pro singulis generum.

Suppositio collectiua est *usus termini communis pro omnibus suis inferioribus simul, & non seorsim sumptis*: ex.gr in hac propositione: *omnes Apostoli sunt duodecim*: terminus *Apostoli* supponit collectiuè, quia prædicatum affirmatur de omnibus Apostolis simul sumptis, & non seorsim. Neque enim est sensus *Petrus est duodecim* &c. Similiter cum dico *decem homines sunt plures quam octo*: suppositio est collectiua, quia prædicatum affirmatur de decem simul, non verò de singulis seorsim. E conuerso cum dico *decem homines currunt*: suppositio est distributiua.

Variando suppositionem collectiuam, & distributiua[m] due præsertim committuntur fallacię. Prima est cum prædicatum, quod conuenit omnibus collectiuè infertur de singulis, vel de aliquo inferiori distributiue; vt cum dicitur *omnes Apostoli sunt duodecim; Petrus est Apostolus; ergo Petrus est duodecim*.

Secun-

Secunda fallacia est, cum ex eo quod aliquod prædicatum conuenit omnibus inferioribus distributiuè, & seorsim, inferatur de omnibus collectiuè, & simul sumptis; vt cum dicitur *Petrus est unus ex duodecim, Andreas est unus ex duodecim &c.* sed *Petrus, Andreas &c. sunt omnes Apostoli*; ergo *omnes apostoli simul sumpti sunt unus ex duodecim*. An autem in quibusdam casibus valeat consequentia à singulis inferioribus seorsim ad omnia simul sumpta, & quæ regula sit ad id dignoscendum, examinabimus alibi.

Ad videndum quandonam termini cōmunes in suppositione distribuuntur, quando vero non, duæ sunt regulæ, altera pro subiecto, altera pro prædicato. Prima est: subiectum distribuitur in omni, & sola propositione vniuersali; ita in his propositionibus: *omnis homo est animal: nullus homo est equus: ly homo* sumitur distributiuè pro singulis inferioribus, ita vt nullus possit sumi *homo*, de quo non affirmetur animal, & negetur equus.

E conuerso in his propositionibus: *aliquis homo est albus, aliquis homo non est albus, ly homo* non sumitur distributiuè, cum possint sumi homines, de quibus prædicatum non affirmatur.

Secunda regula pro prædicato est prædicatum distribuitur in omni, & sola pro-

positione negatiua : ita in hac propositione : *Petrus non est equus*, ly *equus* distribuitur, quia nullus equus potest sumi, qui non negetur de Petro: at in hac propositione : *omnis homo est animal* prædicatum *animal* non distribuitur, quia propositio non est negatiua, ideoque possunt sumi multa animalia, nimirum leo, equus &c. quæ non affirmantur de homine.

Ex his regulis colligitur, quod in propositione vniuersali negatiua distribuitur utrumque extremum; prædicatum nimirum, & subiectum; in suppositione vniuersali affirmatiua distribuitur solum subiectum; in particulari negatiua distribuitur solum prædicatum: in particulari affirmatiua neque distribuitur prædicatum, neque subiectum.

De suppositione determinata, & confusa.

Caput. XXV.

Ratione signi particularis *aliquis*, aut *vnus* termino communi conuenit duplex suppositio, determinata nimirum, & confusa. Determinata est *usus termini pro aliquo suo inferiori*, cui *seorsim sumpto conueniat prædicatum*: vt cum dico *aliquis oculus videt*, *aliqua naus nauigat*: termini *oculus*, & *naus* supponunt determinatè; quia vt suppositio sit vera, dari debet *aliquis*

quis oculus, de quo seorsim sumpto verificetur quod videt, & si hoc non verificaretur de vilo oculo seorsim sumpto, propositio esset falsa. Idem dic de naui.

Confusa est *usus termini communis* pro aliquo inferiori, cui conuenit predicatum non seorsim sumpto, sed sumpto disiunctim cum alijs; ex. gr. cum dico aliquis oculus requiritur ad videndum: aliqua naus est necessaria ad nauigandum: terminus oculus, & naus sumuntur confuse. Neque enim, de vilo oculo seorsim potest affirmari, quod requiratur ad videndum; nam dexter non requiritur, quia sufficit sinister, sinister non requiritur, quia sufficit dexter; at de vtroque disiunctim sumpto predicatum affirmatur, cum sit verum, quod vel dexter, vel sinister requiritur: atque idem dic de naui. Ratio est, quia necessitas, exigentia, & ius ferri possunt ad plura indeterminatè, ita vt non magis ferantur ad vnum, quam ad aliud; ex. gr. ego ad viuendum exigo panem, sed non magis hunc panem, quam illum: creditori debentur mille aurei, sed non magis isti, quam illi &c. Ab hac igitur necessitate, quæ fertur ad plura indeterminatè, denominantur illa necessaria, & debita indeterminatè, & dicitur *aliquis panis est necessarius ad viuendum, aliqua pecunia debetur creditori*; licet de nullo pane seor-

sim sumpto verificetur, quod sit necessarius, de nulla pecunia, quod sit debita.

E conuerso actiones, & passionες non possunt dari nisi in subiecto determinato hoc potius, quam illo, & nisi ad terminum determinatum, hunc potius, quam illum; ideo qui comedit panem, comedit panem determinatum, & qui soluit pecuniam, soluit pecuniam determinatam, hanc potius, quam illam. Idcirco propositiones istæ *aliquis panis comeditur, aliqua pecunia soluitur, aliquis oculus videt* &c. supponunt determinatè.

De Ascensu, & Descensu.

Cap. XXVI.

Descensus est *progressus à termino communi, & superiori ad inferiora in illo contenta per legitimam consequentiam*. Ascensus est *progressus ab inferioribus ad terminum communem, & superiorem illa continentem per legitimam consequentiam*. Deseruiunt descensus, & ascensus ad penetrandam, & explicandam vim propositionum, in quibus termini ratione syncategorematis supponunt distributiue, collectiue, determinatè, vel confusè; atque adeo datur quadruplex ascensus, ac descensus correspondens quadruplici sup-
posi-

positioni iam explicatæ.

Propositio distributiua resoluitur per descensum, in quo enumerantur inferiora, & de singulis seorsim sumptis affirmatur, aut negatur prædicatum, copulando affirmationes, vel negationes per particulam & ; ex. gr. hæc propositio: *omnes Apostoli vocati fuerunt à Christo*, resoluitur, & explicatur per descensum dicendo; *ergo Petrus fuit vocatus à Christo &c.* Sim liter hæc propositio: *nullus Apostolus euasit mortem*; resoluitur; *ergo nec Petrus euasit mortem, nec Andreas &c.*

Ascensus è conuerso fit progrediendo ab inferioribus sufficienter enumeratis ad terminum communem, & superiorem; ex. gr. *Petrus fuit vocatus à Christo, Andreas fuit vocatus, & sic de reliquis*; ergo *omnes fuerunt vocati*.

Propositio collectiua resoluitur per descensum, in quo enumerantur inferiora, & nō de singulis, sed de omnibus nō seorsim, sed simul sumptis, & copulatis per particulam & dicitur prædicatum; ex. gr. hæc propositio *omnes Apostoli sunt duodecim*, resoluitur per descensum dicendo; *ergo Petrus, & Andreas &c. simul sumpti sunt duodecim*.

Ascensus fit cum ab inferioribus simul sumptis procedimus ad terminum communem dicendo *Petrus, & Andreas &c. simul*

sumpti sunt duodecim; ergo omnes Apostoli sunt duodecim.

Propositio determinata resolvitur per descensum, in quo enumerantur inferiora, & de singulis affirmatur, aut negatur prædicatum, disiungendo propositiones per particulam *vel*; ex. gr. hæc propositio *aliquis Apostolus fuit proditor*: resolvitur ergo *vel Petrus fuit proditor, vel Iudas &c.* Ascensus verò fit progrediendo ab inferioribus sic enumeratis ad terminum communem, & superiorem.

Propositio confusa resolvitur per descensum enumerando inferiora, & de ijs non seorsim, sed disiunctim sumptis affirmando prædicatum; ex. gr. hæc propositio *aliquis oculus requiritur ad videndum*, resolvitur dicendo; *ergo dexter, aut sinister requiritur ad videndum.*

Aduerte, quod in suppositione simplici non valet descensus ad inferiora, neque ascensus ad superiora; ex. gr. non valet *homo est species*; ergo *Petrus est species*; nec valet *animal est genus*; ergo *homo est genus*; nec è conuerso valet ascensus *homo est species*; ergo *animal est species*. Solum ergo valet ascensus, aut descensus diuersi generis ad suum correlatiuum; ex. gr. valet: *animal est genus respectu hominis, & equi*; ergo *homo, & equus sunt species respectu animalis.*

De appellatione . Cap. XXVII.

Secunda proprietas terminorum est appellatio . Definitor *transmissio significati unius termini ad rem significatam per alium terminum* . Terminus cuius significatum transmittitur , vocatur *appellans* : terminus ad quem transmittitur , vocatur *appellatus* .

Prædicatum semper appellat subiectum , sed aliquando secundum rectum , aliquando secundum obliquum , & hoc est diligenter aduertendum ad æquiuationes euitandas ; ex. gr. in hac propositione *Christus est æternus* , prædicatum *æternus* appellat solum personam diuinam , quæ importatur in recto , secundum quam solum Christus est æternus ; cum natura humana , quæ significatur in obliquo , sit solum temporalis .

In hac verò propositione *Christus est passus , & mortuus* prædicatum appellat solum naturam humanam , quæ significatur in obliquo , secundum quam solum Christus est passus , & mortuus .

Præterea ponitur sæpe in propositione ultra prædicatum , & subiectum principale aliquis terminus , de quo potest esse dubiū an appellet prædicatum , vel subiectum , & nisi id explicetur committuntur æqui-

uocationes. Ex. gr. in hac propositione *Petrus magnus est logicus*, ambiguum est an *ly magnus* appellet subiectum, & sensus sit *Petrus qui secundum staturam est magnus, est logicus*, an appellet prædicatum, & sensus sit *Petrus est valde peritus, & excellens in logica*.

Debent igitur omnia diligenter attendi, vt penetretur quinam terminus appelletur, & cum res est ambigua debet distinguī, atque hæc est optima regula; nam ille, quæ solent tradi potius rem obscurant, quam explicent.

De statu, Ampliatione. & Restrictione. Caput. XXVIII.

Tertia proprietas est status. Definitur: *acceptio termini pro tempore importato per copulam*. Ita cum dico *Petrus est iustus* tam subiectum, quam prædicatum accipitur cum statu, quia vt propositio sit vera, tempore præsentī debet *Petrus* existere, & in eo esse *iustitia*.

Quarta proprietas est ampliatio, quæ opponitur statui, & definitur *acceptio termini pro tempore diuerso ab eo, quod importatur per copulam*; vt cum dico *iustus peccat mortaliter*: subiectum *iustus* sumitur ampliatiuè pro tempore immediatè præter-

terito. Neque enim sensus propositionis est, *ille qui nunc est iustus, peccat mortaliter*: nam eo ipso quod nunc mortaliter peccat, non est iustus, sed iniustus; sed sensus est, *ille qui immediatè ante erat iustus, nunc peccat*.

Ad soluenda sophismata aduertendum est diligenter an termini sumantur cum statu, vel cum ampliacione. Ideo ut multi docent sunt falsæ istæ propositiones: quando homo moritur, tunc est: quando ignis extinguatur, tunc est; quando res interit, corrumpitur, destruitur, desinit &c tunc est: nam subiectum in his propositionibus sumitur ampliatiuè pro tempore immediatè antecedente, atque adeo quando homo moritur, tunc primum non est, sed fuit immediatè ante: quando res corrumpitur, ac desinit, tunc res non est, sed fuit immediatè ante.

E contra sunt falsæ istæ propositiones: quando homo generatur non est: quando mundus creabatur, non erat. Nam in istis propositionibus subiectum sumitur cum statu, atque adeo quando aliquid generatur, creatur, fit, atque incipit, tum primo est, licet immediatè ante non fuerit.

Quinque enumerantur tempora, circa quæ fieri potest ampliatio, nimirum præsens, præteritum, futurum, possibile, & imaginarium.

Præter ampliationem, quæ opponitur statui, datur etiam ampliatio, quæ opponitur restrictioni, & definitur: *extensio terminum à minori ad maiorem significationem*. Restrictio verò definitur: *contractio terminum à maiori ad minorem significationem*. Ex gr. hic terminus *rationalis* si sumatur ampliatiuè, significat omne id, quod intelligit, seu intelligat per discursum, seu sine discursu; & in hoc sensu etiam Deus, & Angeli sunt rationales; si vero sumatur restrictiuè significat solum quod intelligit per discursum proprium, & in hoc sensu solus homo est rationalis; Deus verò, & fortasse Angeli non sunt rationales propriè, quia propriè non discurrunt.

Ad vitanda sophismata debet attendi an termini sumantur amplè, an latè, vel strictè. Dicuntur etiam termini restringi per additionem alterius termini, ut cum dico *homo iustus saluabitur*, homo per additionem iusti restringitur ad significandum solum hominem iustum.

De diminutione, alienatione, & remotione,
Caput. XXIX.

Diminutio est, per quam denotatur predicatum conuenire subiecto non toti sed solum secundum partem: ut cum dico
Aethyops

Aethiops est albus secundum quid, hoc est secundum dentes.

Alienatio est acceptio termini pro suo improprio significato; ut cum dico *Cæsar pictus venditur in foro*. Notandum est igitur diligenter, an quod additur alicui termino sit additum purè restringens, vel additum diminuens, vel alienans. Nam à prædicato cum addito restringente valet consequentia ad prædicatum sine tali addito: ex.gr. valet *Petrus est homo iustus; ergo Petrus est homo*. Similiter à propositione cum addito purè diminuente valet consequentia ad propositionem, in qua prædicatum affirmatur de certa parte subiecti; ex.gr. valet: *Aethiops est albus secundum quid hoc est secundum dentes; ergo dentes Aethyopis sunt albi*. At à propositione in qua prædicatum affirmatur cum addito distrahente, seu alienante, non valet consequentia, in qua prædicatum affirmatur absolutè, & sine addito de aliqua parte subiecti, vel de toto subiecto; ex.gr. non valet *imago hominis est homo pictus; ergo imago hominis est homo; iustitia, & misericordia Dei distinguuntur ratione; ergo distinguuntur*.

Remotio est auocatio termini à significatione entis realis ad significationem entis impossibilis, & chimerici. Ut cum dico *homo irrationalis terminus homo auo-*

catur ad significandum hominem impossibilem, & chimericum.

Debet igitur notari, an subiecto addatur terminus aliquis remouens. Tunc enim propositiones solent esse falsæ, & de subiecto non supponente; ex.gr. cum dicitur *creatura omnium perfectissima est minor Deo*, falsa est propositio, quia supponit dari posse creaturam omnium perfectissimam, quod est falsum, quia data quacunque creatura, dari potest perfectior in infinitum. Similiter istæ propositiones: *numerus omnium maximus non est infinitus; in primo instanti æternitatis mundus non erat*, sunt falsæ; & de subiecto non supponente, quia supponunt dari numerum omnium maximum, & dari primum instans æternitatis.

Cum verò termini remoti ponuntur pro subiecto in propositione conditionata tunc solet sequi vtraque pars contradictionis; ex.gr. cum quis dicit *si daretur creatura perfectissima esset minor Deo*, distinguendum est, esset minor solum, nego: esset simul minor, & non minor, concedo; nam ex eo quod esset creatura, sequitur, quod esset minor Deo, ex eo quod esset perfectissima, & non haberet creaturam perfectiorem supra se, esset Deus, quia solus Deus non habet creaturam supra se.

TRACTATUS SECVNDVS DE PROPOSITIONE

De nomine. Caput. XXX.



AGIT Aristoteles de propositione duobus libris; qui græcè inscribuntur *περί ἐξηγίας* latinè de Interpretatione, quia nimirum per propositionem mentem nostram interpretamur, & exponimus. Et quia propositio est oratio, præcipuæ verò partes orationis sunt nomen, & verbum, ideo præmittit aliqua de nomine, verbo, & oratione.

Nomen definit cap. 2. libr. primo *vox significatiua, ex instituto, sine tempore, cuius nulla pars significat separata, finita, & recta, quæ cum verbo veram, aut falsam efficit orationem*.

Pro intelligentia aduerte nomen esse ens artificiale. Porro entia artificialia, constare solent ex materia, quam habent à natura, & ex forma quam habent ab arte; ex gr. naus constat tanquam ex materia ex lignis à natura factis, & tanquam ex forma, ex figura, & dispositione lignorum superaddita ab arte. Idcirco quan-

quando artificialia definiuntur, secundum regulam Aristotelis 8. Metaph. tex. 6. poni debet tanquam genus materia, quam habent à natura, & tanquam differentia forma, quam habent ab arte: ex.gr. scamnum definitur *lignum sic factum, & figuratum ut sit aptum ad sedendum*. Cum igitur nomen sit ens artificiale, in eius definitione poni debet tanquam genus *vox*, quæ est materia, quam nomen habet à natura, & tanquam differentia significatio, quæ est forma vocibus superaddita ab arte, & institutione humana.

Sed iam explicandæ sunt singulæ particulæ definitionis: Dicitur primo *vox*: est autem vox ex Aristotele secundo de Anima, tex. 90. *sonus ex ore animalis prolatus cum quadam imaginatione*; ideoque soni, qui vel nō proferuntur ex ore animalis, vel proferuntur sine vlla imaginatione, non sunt voces.

Dicitur secundo *significatiua*, & per hoc differt nomen à vocibus non significatiuis tum articulatis vt *Bluri*, tum inarticulatis vt quidam sibili.

Tertio dicitur *ex instituto*, ideoque suspiria, & gemitus non sunt nomina, quia significant dolorem naturaliter, & non ex institutione humana.

Dicitur quarto *sine tempore*; & per hoc nomen differt à verbo, & participio, quod signifi-

significat cum tempore ; ex.gr. *verbum*
amo significat actionem amandi vt factam
tempore præfenti: at nomen *amor* signifi-
cat eandem actionem amandi non vt fa-
ctam tempore præfenti, sed sine tempore .
Porro significare cum tempore non est
solum significare tempus , sed est signifi-
care rem, aut actionem vt existentem , &
mensuratam tempore præterito, præfenti,
aut futuro respectu prolationis vocis .
Ideo hæc nomina *tempus, annus, dies, hora,*
&c. significant quidem tempus, sed non
significant cum tempore . Rursus hæc no-
mina *cœna, prandium* connotant tempus
vespertinum , per quod cœna differt à
prandio, vel aliud tempus, per quod pran-
dium differt à cœna , sed non significant
actiones comedendi vt factas tempore
præfenti, vel præterito : at verbum *cæno*
significat comestionem vt factam tempo-
re præfenti. Præterea etiam in alio sensu
verbum significat cum tempore , quia ni-
mitum declinatur per varia tempora ,
præfens, præteritum, & futurum, quod nul-
li nomini convenit .

Dicitur quinto *cuius nulla pars seorsim*
significat : et per hoc nomen differt ab o-
ratione, cuius partes significant separatae ;
ita partes huius orationis *Petrus scribit* si-
gnificant separatae ; secus syllabæ huius
nominis *Petrus* .

Pro huius pleniori intelligentia aduerte quasdam proprietates conuenire toti principaliter, partibus verò conuenire secundario, in quantum sunt in toto, ita vt illis non conueniant, si seperentur à toto; ex. gr. potentia volatiua, & volatus conuenit toti aui, partibus verò auis, nempe alis, pedibus &c. conuenit secundario, & ratione totius, ideoque alę separatae ab aue volare non possunt. Alię sunt proprietates, quę conueniunt principaliter partibus, toti verò conueniunt secundario & ratione partium; ex. gr. progressio exercitus conuenit singulis hominibus principaliter, ideoque singuli homines etiam separati ab exercitu possunt progredi, toti verò exercitui conuenit secundario, & ratione singulorum hominum, ideoque totus exercitus in tantum progreditur, in quantum singuli milites progrediuntur.

Iam in casu nostro significatio conuenit toti nomini principaliter, partibus verò hoc est syllabis conuenit ratione totius: at verò toti orationi cōstanti ex pluribus partibus, nimirum dictionibus, conuenit significatio secundario, & ratione singulorum dictionum; ideo nomina, & alię dictiones significant eo pacto, quo aues volant: partes nominum significant eo pacto quo volat caput, pedes, & alię partes auiū.

E con-

E conuerso tota oratio significat eo pacto, quo progreditur exercitus : singula partes orationis significant eo pacto, quo mouetur singuli milites in exercitu. Quo pacto partes nominum compositorum, quale est Respublica, non sint significatiue dictum est cap. 9.

Dicitur sexto *finita ad excludenda nomina infinita*, qualia sunt *non homo, non leo*, quæ absolute non sunt nomina, sed solum cum addito alienante, quia non significant determinatè aliquid, sed æquè dicuntur de ijs, quæ sunt, ac de ijs, quæ non sunt; ex. gr. sicut homo est non leo sic chimera est non leo.

Dicitur septimo *recta ad excludendos casus obliquos*, ex. gr. *hominis, Deum &c.*, qui absolute non sunt nomina, sed casus nominum, quia cadunt per quandam derivationem originis à recto, quod quia absolute est nomen, vocatur nominatiuus, & dicitur rectus, quia non cadit. Stoici tamen, quos sequuntur grammatici etiã nominatiuum dixerunt casum, quia nimirum cadit à mentis conceptione, licet simul sit rectum, quia non repugnat aliquid ita cadere, vt remaneat rectum, eo pacto quo ferrum acutum ex alto decidens si infigatur in ligno, potest remanere rectum, & nullatenus inclinatum, vel obliquatum.

Demum per ultimas particulas nomen differt à casibus obliquis, adverbijis, & alijs partibus orationis, quæ non sunt nomina. Nomen enim vnà cum verbo *est* efficit orationem veram, aut falsam; ex. gr. nomen *Petrus* coniunctum cum verbo *est* cum dicitur *Petrus est*, efficit orationem veram aut falsam: sed aduerbia obliqua, & coniuncta cum verbo *est*, non faciunt orationem veram, aut falsam: neque enim hæc oratio *Petri est*, vel hæc alia, *sapienter est* sunt veræ, vel falsæ. Et quia talis proprietates simpliciter, & absolutè conuenit solis nominibus substantiuis: nam nomina adiectiua coniuncta cum verbo *est* non sufficiunt ad faciendam orationem veram vel falsam, vnde hæc oratio *albus est* non est vera, vel falsa: ideo sola nomina substantiua simpliciter, & absolutè sunt nomina; adiectiua verò sunt nomina cum addito, hoc est nomina adiectiua. Et confirmatur, quia sicut sola substantia est ens absolutè, & simpliciter, accidens verò est solum entis ens, sic sola nomina substantiua, quæ significant rem ad modum substantiæ, sunt nomina simpliciter, adiectiua verò, quæ significant ad modum accidentis sunt solum nomina adiectiua, & quasi nomina nominum. Adhuc tamen adiectiua participant rationem nominum magis quam aliæ partes orationis, quia possunt effi-

efficere orationem veram, vel falsam tanquam partes principales illius, cum obliqua, aduerbia, propositiones, & alia huiusmodi non tam sint partes orationis, quam coniunctiones partium, eo pacto quo clauis & alia similia non tam sunt partes navis, quam coniunctiones partium.

Quæritur an casus obliqui specie differant inter se, & à recto; ex.gr. an genitiuus specie differat à datiuo?

Respondeo primo casus obliquos specie differre à recto. Ratio est quia licet significant eandem rem, tamen significant illam vt diuerso modo cognitam: nam diuerso modo Petrus cognoscitur, quando cognoscitur in recto, ac quando cognoscitur in obliquo. Confirmatur, & explicatur, nam imago repræsentans Cæsarem stantem, ac rectum differt specie ab imagine, quæ representat eundem sedentem; ergo vox significans Cæsarem in recto specie differt à voce significante eundem in obliquo. Imo sicut imago sedentis representat actum sessionis, quem non representat imago stantis: sic vox obliqua significat ordinem ad suum rectum, quem non significat vox recta.

Addo secundo casus obliquos specie differre inter se. Ratio est, quia ex primaria institutione sunt imposita ad significandum diuersum ordinem, & habitudinem
ad

ad rectum: ex gr. diuersum ordinem significare debet ista vox *Petri*, & ista vox *Petrum*, ideoque in græco, & vulgari idiomate diuersis casibus adduntur diuersi articuli significantes diuersum ordinem, ad rectum. Cum verò diuersi casus non significant de facto diuersum ordinem, vt cum dico *egeo pecunia*, vel *pecunia*, tum specie differunt solum grammaticaliter, non philosophicè, quia differunt solum quoad vocem. E conuerso cum idem casus modo significat vnum ordinem ad rectum, modo alium, tum est idem casus grammaticaliter, sed philosophicè diuersus.

De verbo. Caput. XXXI.

Verbum definitur eodem libro cap. 3. *Vox significatiua ex instituto, cum tempore, cuius nulla pars significat separata, finita & recta, & est semper eorum, quæ de altero prædicantur nota.*

Particulæ, in quibus verbum conuenit cum nomine, iam sunt explicatæ. Vt intelligatur differentia, per quam verbum differt à nomine, aduerte ex S. Thoma in Comment. duo esse genera entium, res nimirum, hoc est subiecta actionum, & passionum, & ipsas actiones, & passionem. Res solent esse permanentes, & solent esse

le principia , & subiecta actionum , & passionum ; ex gr. ignis est aliquid permanens , & principium calefactionis , & est subiectum multarum passionum ; potest enim recipere motum ab alio &c. E conuerso actiones , & passionis solent esse fluxæ , & transire cum tempore : ex gr. motus est fluxus , & consumitur cum tempore . Sicut enim vna pars temporis pellit aliam , sic vna pars motus pellit aliam , quod idem solet euenire in plerisque actionibus , quas experimur . Rursus actiones proueniunt à rebus , & iisdem inhærent tanquam subiectis : ex gr. calefactio prouenit ab igne , & inhæret alicui subiecto .

Huic duplici generi entium correspondent duo genera vocum , nomina nimirum , & verba .

Nomina præsertim substantiua significant per modum rerum ; & ideo sicut res sunt subiecta actionum , & passionum , ita nomina in propositione sunt subiecta verborum : sicut res sunt permanentes , ita nomina significant permanentes , & sine tempore . E conuerso verba significant per modum actionis , & passionis ; atque ideo sicut actiones , & passionis sunt in subiecto , ita verba dicuntur de subiecto propositionis ; & sicut actiones tempore mensurantur , ita verba significant cum tempore .

Non

Non dico quod verba significant solas actiones; hoc enim est falsum: nam verbum *existere* significat existentiam, quæ non est actio: verba caleo, frigeo, significant qualitates caloris, & frigoris. Solum igitur assero, quod verba vel significant actiones sicut *amo, curro*, vel significant res ad modum actionis, ut explicatum est. Similiter non dico quod nomina significant solum subiecta actionum: hoc enim est falsum, cum multa nomina ex.gr. calefactio, frigefactio &c. significant actiones, sed solum affirmo quod vel significant subiecta actionum ut homo, leo &c. vel significant actiones ad modum rerum permanentium, ita ut possint esse subiecta in propositionibus, ut explicatum est. Ideo fortasse vniuersaliter dicerentur nomina significare essentias, quæ sunt æternæ, & non mensurantur tempore: verba verò significare actuales existentias creatas, quæ tempore mensurantur, ut alibi dicitur. Patet ex his in definitione verbi quid significet particula *cum tempore*, per quam verbum differt à nomine, & conuenit aliquantulum cum participio. Altera particula, per quam verbum differt etiam à participio est, ut sit. *nota*, seu *signum eorum*, quæ de altero prædicantur. Dicitur autem verbum esse signum prædicati primo, quia omne verbum potest signi-

significare prædicatum propositionis, nulum potest significare subiectum, cum nomina, & participia possint etiam significare subiectum. Ex gr. cum dico *feriens gladio peribit gladio*, participium *feriens* significat subiectum: at cum dico *Petrus ferit*, verbum *ferit* significat prædicatum, nec potest significare subiectum, quia significat per modum actionis, ut dictum est. Secundo dicitur verbum esse nota prædicati, quia significat copulam, per quam prædicatum affirmatur de subiecto ex. gr. cum dico: *Petrus currit*, verbum *currit* significat copulam *est*, ita ut sit sensus *Petrus est currens*. Et quia verba infiniti modi, ex. gr. *currere* non significant copulam, & possunt esse in propositione subiectum, ut patet in hac propositione *currere est moueri*; ideo potius sunt nomina, quam verba. Aduerte, quod verba semper exercent in propositione munus significandi copulam, alterum verò munus significandi prædicatum non semper exercent, ut patet in hac propositione, *homo est animal*, in qua *est*, significat solam copulam, & non prædicatum. Propositiones, in quibus verbum fungitur utroque munere, vocantur de secundo adiacente, quia nimirum prædicatum adiacet secundo loco, & immediatè post subiectum, absque eo quod mediet copula distincta,

distincta, ut patet in his propositionibus *Petrus currit, Petrus est*. Propositiones in quibus verbum fungitur munere solius copulae, qualis est haec; *homo est animal* vocantur de tertio adiacente, quia inter praedicatum, & subiectum mediat copula distincta, atque adeo praedicatum adiacet tertio loco. Verbum *sum* vocatur substantivum, quia significat actum existendi, qui est primus actus, & in quo fundantur alij actus: cetera verba, ex. gr. *amo curro* &c. vocantur adiectiva, quia significant actus, qui fundantur in existentia, quod enim non existit, amare non potest neque currere &c.

Explicanda est tertia particula, quod verbum sit vox finita. Additur autem ad excludenda verba infinita, ex gr. *non amo non curro*, quae ut dicit Aristoteles, non sunt verba absolutè, sed cum addito distrahente, hoc est verba infinita.

Obijcit Hurtadus, & alij moderni verba non possunt infinitari: nam eo ipso quod in propositione negatio praepositur verbo, ac dicitur ex gr. *Petrus non currit*, propositio evadit negativa, & non infinita; ergo frustra ponitur in definitione particula finita.

Respondeo negando antecedens; sepe enim ex usu cum negatio praepositur verbo propositio non evadit negativa, sed in-

finita:

finita : ex. gr. in hoc argumento Aristotelico : *astra non scintillantia sunt prope nos ; planetae non scintillant ; ergo planetae sunt prope nos* ; minor non est negatiua , sed infinita , & facit hunc sensum : *planetae sunt astra non scintillantia* . Si enim minor esset merè negatiua argumentum esset ineptum , & simile huic : *astra non scintillantia sunt prope nos ; chimerae non scintillant ; ergo chimerae sunt prope nos* , quo argumento nihil est ineptius , non ex alia ratione , nisi quia minor est merè negatiua . Licet igitur negatio quia est malignantis naturæ , quando præponitur verbo , & copulæ , negare debeat copulam , & reddere propositionem purè negatiuam , non infinitam ; tamen ex usu loquentium sæpe limitatur ad hoc , vt non neget copulam , sed cadat supra solum prædicatum , illud infinitando , vt explicatum est . Vltima particula est , quod verbum sit *vox recta* ; & per hanc excluduntur verba obliqua , quæ non sunt verba , sed casus verbi ; obliqua autem sunt omnes modi præter indicatiuum , & omnia tempora præter præsens , ac proinde solum præsens indicatiui cuiuscumque personæ , ac numeri est verbum rectum . Ratio est , quia verbum simpliciter est quod significat esse , vel agere , vel pati simpliciter , & actus sed solum præsens indicatiui cuiuscumque personæ , ac numeri significat

D esse ,

esse, aut agere, & pati simpliciter, & actu; ex.gr. *ego curro, tu curris*, significat, quod ego simpliciter, & actu curro; tu simpliciter, & actu curris, & solum variantur subiecta istarum actionum; ergo præsens indicatiui est verbum rectum. E conuerso alii modi, & alia tempora non significant esse, vel agere, aut pati simpliciter; ex.gr. *Petrus curret*, vel *Petrus curreret* nō significat quod simpliciter currit; ergo significant actiones valde obliquè, adeoque sunt casus obliqui. Adde præteritum, & futurum esse tempora obliqua, quia sicut obliquum non potest intelligi nisi per ordinem ad rectum, ita præteritum, & futurum non possunt intelligi nisi per ordinem ad præsens; præteritum enim dicitur præteritum respectu præsens, & præterea est illud, quod aliquando fuit præsens; idemque dic proportionaliter de futuro: at præsens intelligitur per se & sine ordine ad aliud tempus, ut patet experientia.

De Oratione. Caput. XXXII.

○ Ratio definitur capite 4. eiusdem libri: *vox significatiua ad placitum, cuius partium aliqua separata significat, ut dictio, non ut affirmatio, aut negatio*. Differt à nomine, & verbo, quia partes orationis separatæ significant, ut explicatum est

est cap. primo. Additur quod partes orationis debent significare vt dictiones, hoc est vt nomina, & verba &c, non verò vt affirmatio, vel negatio, hoc est vt integra propositio. Quamuis enim in quibusdam orationibus compositis, ex. gr. in ista *Petrus currit, & Paulus sedet*, aliqua pars, hoc est *Petrus currit* significet vt integra propositio, tamen id nõ requiritur ad orationem in communi acceptam, licet neque repugnet orationi, & in definitione solũ significatur, quod non requiritur.

Diuiditur oratio in perfectam, & imperfectam. Perfecta est, *quæ facit sensum perfectum*, & non relinquit pendulum animũ audientis, ex. gr. *Petrus currit*. Imperfecta est, *quæ facit sensum imperfectum*, & pendulum relinquit animum audientis; ex. gr. *si Petrus curreret*, & omnes orationes sine verbo.

Oratio perfecta diuiditur in enunciativam, & non enunciativam. Non enunciativa ex Aristotele est, in qua non est verum, vel falsum; ex. gr. *fac studeas: utinam studeas*. Enunciativa est in qua est verum, vel falsum; ex. gr. *Petrus studet*. Signum autem est, quod cum quis dicit optatiuè *utinam studeas*, nemo respondebit *tu dicis verum vel falsum*; at cum dicitur indicatiuè *tu non studes*, adhiberi solet responsio, *falsum dicis*. Et quia veritas, & falsitas dantur so-

lum in secunda, & tertia operatione, non verò in prima; ideo veritas, & falsitas dantur in vocibus solum significantibus res vt affirmatas, vel negatas, non verò in nominibus seorsim, quæ non significant completè secundam, aut tertiam operationem. Ita cum dico *alter Deus* nondum dico verum, vel falsum; cuius signum est quia si addam *est* propositio erit falsa, si addam *non est* dicens *alter Deus non est* dicam verum. Ex orationibus etiam perfectis, quæ significant principaliter res vt voluntas, & nō affirmatas, non habent veritatē, aut falsitatem, vt patet in istis: *fac studeas, utinam studeres*, quia veritas, & falsitas non dantur in actibus voluntatis.

Nota quod verum, & falsum sunt analogia attributionis, in quantum dicuntur de iudicio mentis, de vocibus, & de rebus. Iudicium mentis dicitur verum, in quantum habet veritatem in se, & est subiectū veritatis. Voces dicuntur veræ, in quantum sunt signa iudicij veri. Res sunt veræ in quantum verificant, aut falsificant iudiciū, & sunt causa veritatis, aut falsitatis, iuxta illud Aristoteles in postpredicamentis; *ex eo quod res est, vel non est, propositio est vera, vel falsa*.

Orationes non enunciativæ, in quibus non est verum, vel falsum secundum Aristotelem non spectant ad logicam, quæ so-
lum

lum curat de scientia, & de veritate, ac falsitate, sed spectant ad rhetores, & poetas, ideo illis relictis, agimus solum de enunciatiuis.

Quid sit enunciatio, seu propositio.

Cap. XXXIII.

Definitur enunciatio ab Aristotele primo Peri hermenias cap. 4. *Oratio significans verum, vel falsum: & primo Prior. cap. primo oratio affirmatiua, vel negatiua alicuius de aliquo.* Ratio huius duplicis definitionis est, quia Aristoteles in lib. Prior. agit de enunciatione, in quantum ex illa constat syllogismus: ad constructionem, autem syllogismi, & ad eius essentiam solū attendi debet, an propositiones sint affirmatiuæ, vel negatiuæ: vtrum autem sint veræ, vel falsæ, attendi non debet, ideoque syllogismi, qui proponuntur ab Aristotele tanquam exempla cæterorum: constant ex propositionibus falsis, qualis est hic: *Omne A est B; omne C est A; ergo omne C est B.* E contra in libris Perihermenias agit de propositione in ordine ad scientiam, & demonstrationem, ad quā maximè refert quod propositiones sint veræ, cum scientia conclusionis acquiri non possit nisi per præmissas veras.

Licet enunciatio confundi soleat cum

propositione, tamen apud Aristotelē solet differre per hoc, quod enunciatio est oratio affirmatiua, vel negatiua secundum se: propositio est talis oratio, in quantum ponitur in syllogismo tanquam præmissa. Simile est discrimen inter nomen, & terminum. Nomen enim est vox significatiua secundum se: terminus verò est talis vox, in quantum ex eo componitur propositio, seu præmissa syllogismi; ideo enunciatio tum solum fit actu propositio, & nomen fit actu terminus, cum ex ijs componitur syllogismus.

Distinguit etiam Aristoteles primo Prior cap. primo propositionem dialecticam à demonstratiua per hoc, quod propositio dialectica est interrogatio, seu sumptio vtriusque partis contradictionis. Interrogat enim dialecticus *homo est risibilis nec ne?* & quæcumque pars concedatur à respondente illam sumit, et ex ea construit syllogismum. E contra propositio demonstratiua est sumptio vnius tantum partis contradictionis. Neque enim qui demonstrat interrogat an homo sit risibilis, sed id assumit tanquam certum, & addens aliam propositionem facit syllogismum. Ratio diuersitatis sumitur ex diuerso fine dialectici, ac demonstrantis. Dialectica non habet pro fine proximo veritatem, sed solum instruit intellectum

ad

De materia, & forma propositionis 79
ad disputandum in vtramque partem, vt ingenium exerceatur, ac disponatur ad inueniendas rationes pro quacumque residueo dialecticus non curat de veritate propositionum, sed solum de apparentia, & assumit illam partem contradictionis, quę respondentī videtur vera, & arguit ex illa. At demonstrans habet pro fine veritatem, ideoque non assumit illam partem, quę videtur vera respondentī, sed illam, quę vera est, & arguit ex illa ad demonstrandam conclusionem.

De materia, & forma propositionis.

Caput. XXXIV.

Sicut in domo, vel templo materia sunt lapides, ligna, & alia huiusmodi, forma verò est ordinatio materię, per quā alii lapides ponuntur supra, alij infra, &c; sic materia propositionis sunt termini qui in propositione componuntur, aut diuiduntur, forma verò est copula, in quantum ita terminos disponit, vt iste sit prædicatum, ille subiectum. Ideo cum in duabus propositionibus sunt iidem termini, sed diuerso modo dispositi, vt accidit in istis: *omnis homo est risibilis; omne risibile est homo*, tales propositiones differunt non materia, sed forma.

Triplex assignatur materia; necessaria,

D 4

impossi-

impossibilis, seu remota, & contingens. Materia necessaria est cum prædicatum inest, seu conuenit necessario subiecto, ita vt non possit non conuenire; ex. gr. in his propositionibus; *homo est animal, est rationalis, est risibilis* &c. materia est necessaria, quia prædicata rationalis, animalis, & risibilis conueniunt homini necessario, cum homo non possit non esse animal &c. In materia necessaria omnes propositiones affirmatiuæ sunt veræ, omnes negatiuæ sunt falsæ, vt patet in exemplis allatis.

Materia impossibilis est, cum prædicatū necessario repugnat subiecto, ita vt non possit conuenire; ex. gr. in hac propositione *omnis homo est lapis* est materia impossibilis, quia repugnat homini esse lapidem. In materia impossibili omnes propositiones negatiuæ sunt veræ, omnes affirmatiuæ sunt falsæ.

Materia contingens est, cum prædicato potest subiectum conuenire, vel non conuenire, vt *homo est albus*; nam homo potest esse albus, vel non esse albus. In materia contingenti omnes particulares solent esse veræ, omnes vniuersales falsæ. Ratione formæ seu dispositionis terminorum propositiones diuiduntur in naturales, seu directas, & innaturales, seu indirectas. Naturales sunt, in quibus termini disponuntur, sicut postulant disponi, hoc est ita

vt id quod significat ad modum formæ sit prædicatum, id quod significat ad modum subiecti, sit subiectum; & etiam ita, vt vniuersalius sit prædicatum, minus vniuersale sit subiectum. Innaturales sunt, in quibus termini disponuntur aliter, ac postulant disponi, hoc est ita vt magis vniuersale sit subiectum, minus vniuersale prædicatum; vel etiam vt forma sit subiectum, subiectum autem talis formæ sit prædicatum; ex. gr hæc propositio *homo est albus* est naturalis: e contra hæc alia propositio, *aliquod album est homo* est innaturalis, quia *album* quod significat formam, sit subiectum; *homo* qui est subiectum albedinis, sit prædicatum. Similiter hæc propositio *homo est animal* est naturalis, quia prædicatum est vniuersalius subiecto: hæc alia *aliquod animal est homo*, est innaturalis ex opposita ratione.

Collige hanc propositionem *aliquod animal est rationale* esse partim naturalem, partim innaturalem: est naturalis quia, rationale quod est quasi forma, prædicatur de subiecto: est autem innaturalis, quia rationale, quod est minus vniuersale, prædicatur de magis vniuersali.

De Quantitate propositionis
Caput. XXXV.

Quantitas in rebus materialibus est extensio partium, in propositione extensio subiecti.

Ratione quantitatis propositio diuiditur in vniuersalem, & particularem, indefinitam, & singularem. Vniuersalis est, in qua subiectum est terminus communis, & sumitur pro omnibus inferioribus; vt cum dico *omnis homo est animal; nullus homo est equus*.

Particularis est, in qua subiectum est terminus communis, & sumitur pro aliquo tantum ex inferioribus; vt cum dico *aliquis homo est albus*.

Indefinita est, in qua subiectum est terminus communis, & non additur vllum signum determinans, quod sumatur pro omnibus, vel pro aliquo tantum inferiori; vt cum dicitur *homo est albus*. Propositiones indefinitę in materia necessaria, vel impossibili æquivalent vniuersalibus: ita hæc propositio *homo est animal*, æquualet isti *omnis homo est animal*; hæc alia propositio *homo non est equus*, æquualet vniuersali negatiuę. In materia contingenti æquivalent particularibus; ex. gr. hæc propositio *homo non est iustus*, æquualet huic *aliquis*

quis homo non est iustus . Propositio singularis est, in qua subiectū est terminus singularis; ex.gr. *Petrus currit .*

Sicut dantur syncategoremata media inter vniuersalia , & particularia , cuiusmodi sunt numeri, *duo, tria* &c. ita dantur propositiones medię , in quibus dantur notę numerales prepositę subiecto , vt cum dicitur *decem homines currunt* , & quo numerus est maior, eo magis propositiones participant de vniuersali , vt dictum est cap. 21.

De Qualitate propositionis . Caput. XXXVI.

Qualitas non accidentalis , sed essentialis propositionis , atque eiusdem essentialis differentia est , per quam propositio est affirmatiua , vel negatiua . Vocatur qualitas , quia interrogationi *qualis est propositio* , respondetur *est affirmatiua , vel negatiua* . Dicitur qualitas essentialis , quia non est accidens propositionis , eo pacto , quo albedo ex.gr. est accidens hominis , ita vt ille homo , qui est albus , potuerit non esse albus , sed est differentia essentialis propositionis , eo pacto , quo rationalitas, & irrationalitas sunt differentię essentialis animalis . Sicut enim illud animal , quod est rationale , non potest

non esse rationale; sic illa propositio, quæ est affirmatiua, non potest non esse affirmatiua eiusdem prædicati de eodem subiecto.

Propositio affirmatiua, seu affirmatio definitur ab Aristotele cap. 4. *enunciatio alicuius de aliquo*; hoc est enunciatio, per quam prædicatum componitur cum subiecto. Propositio negatiua definitur *enunciatio alicuius ab aliquo*, semper per quam prædicatum diuiditur à subiecto.

Sicut animal rationale est nobilius, quam irrationale, ita propositio affirmatiua est nobilior, quam negatiua. Ratio est, quia propositio negatiua minus nos facit scire res, quam affirmatiua. Per negatiuam enim tantum cognoscimus quid res non sit: per affirmatiuam autem cognoscimus quid sit res.

Addit Aristoteles affirmationem esse priorem negatione. Ratio est, quia intellectus non potest negare ex. gr. hominem de lapide, nisi sciat aliququaliter, quid sit homo, & quid lapis. Ideo negatio semper fundatur in aliqua affirmatione.

De Vnitate Propositionis.

CAP. XXXVII.

Quia vnitas est proprietas entis, sicut cætera entia, sic etiam propositio suam

suam habet vnitatem, sed non omnes propositiones habent vnitatem eiusdem rationis . Quemadmodum enim tabula potest esse vel simplex seu simpliciter vna, vel composita, seu vna per coniunctionem, sic propositio. Tabula simpliciter vna nō intelligitur illa , quæ nullo pacto constat ex partibus , cum talis tabula non detur, sed intelligitur illa , quæ est omnino homogenea, hoc est eiusdem rationis, & non habet partes coniunctas aliquo glutine , vel clavis : si verò sint plures tabulæ non coniunctæ aliquo glutine , tunc non faciunt unam tabulam , neque simpliciter , neque compositione , seu coniunctione. Proportionaliter propositio simplex non est illa, quæ nullo pacto componitur ex partibus , cum quælibet propositio constet ex prædicato , & subiecto ; sed intelligitur illa , quæ constat ex vno prædicato , & vno subiecto : propositio verò composita est, in qua sunt plura prædicata , & plura subiecta , quæ connexionem quasi glutine fiant vnum .

Propositio simplex definitur ab Aristotele capit. 4. in qua enunciatur vnum de vno : vt cum dicò *Petrus est homo*. Propositio composita definitur ab eodem , in qua enunciantur plura , quæ coniunctione fiant vnum , vt cum dico , *Petrus est diues, & doctus*, quæ fiunt vnum per coniunctionem

nem &c. Cum verò enunciantur plura, quę neque coniunctione fiunt unum, ex. gr. cum dico *Petrus est diues, Petrus est doctus*, tunc nullo modo fit vna propositio, sed absolutè, & simpliciter sunt plures propositiones.

Propositio composita diuiditur iuxta diuersum modum coniunctionis in disiunctiuam, conditionalem, causalem, & copulatiuam. Disiunctiua est in qua plures propositiones disiunguntur, quod fit per particulam *vel*, vt cum dicitur *Petrus, vel Paulus currit*. Conditionata, seu hypothetica est, in qua plures propositiones coniunguntur cum dependentia vnius ab altera, quę relinquitur suspensa, quod fit per particulam *si*, vt cum dicitur, *si cras pluet, tyberis exundabit*. Propositio, quę relinquitur suspensa dicitur, *conditio*, siue hypothesis: propositio, quę pendet à propositione suspensa, vocatur *conditionatum*; ex. gr. in exemplo proposito, *si cras pluet* est *conditio*, *Tyberis exundabit*, est *conditionatum*.

Propositio causalis est, in qua coniunguntur plures propositiones cum dependentia vnius ab altera, quę non relinquitur suspensa, quod fit per particulam *quia*, vt cum dicitur *quia cras pluet tyberis exundabit*.

Propositio copulatiua est in qua plures propositiones coniunguntur sine dependentia
vnius

unius ab alia, quod fit per particulam &, ut cum dico Petrus currit, & Paulus quiescit.

Propositio simplex solet appellari categorica, hoc est predicativa; composita solet vocari hypothetica. Licet enim, nomen hypotheticę stricte sumptum conveniat solum conditionali, tamen late sumptum applicatur omni propositioni compositę.

De Contradictione.

Cap. XXXVIII.

Contradictio definitur ab eodem Aristotele cap. 4. affirmatio, & negatio eiusdem de eodem, respectu eiusdem, in eodem sensu, & in iisdem omnino circumstantiis. Ut igitur duę propositiones sint contradictorię requiritur primo ut affirment, & negent idem predicatum de eodem subiecto, ut contingit in istis, *Petrus currit, Petrus non currit*; si verò varietur predicatum, aut subiectum, non sunt contradictorię, ut accedit in istis *Petrus currit, Petrus non volat*. Requiritur secundo, ut affirmetur, & negetur idem respectu eiusdem, ut accedit in istis, *musca est maior quam formica: musca non est maior formica*. Contra istę duę propositiones *musca est maior formica: musca non est maior elephanto*, non sunt contradictorię, quia

affir-

affirmatur maioritas respectu formicæ ,
negatur maioritas respectu elephanti .

Tertio requiritur , ut prædicatum , &
subiectum sumantur in eodem sensu , &
non æquivocè . Ideo non sunt contradi-
ctoriæ istę propositiones , *canis est animal*
latrabile : canis non est animal latrabile , si
nomen canis sumatur in prima proposi-
tione pro cane terrestri , in secunda pro
cœlesti constellatione .

Quarto demum requiritur , ut affirme-
tur , & negetur idem de eodẽ pro iisdem
circumstantiis temporis , loci &c. Ideo
non sunt contradictoriæ istę proposi-
tiones : *Petrus studet Romæ : Petrus non studet*
Bononiæ : Petrus studet duabus horis , Petrus
non studet tribus horis , quia affirmatur , &
negatur studium pro diuerso tempore ,
aut loco .

Duę propositiones contradictorię non
possunt esse simul verę , quia est primum
principium euentissimum , in quo fun-
dantur omnes scientię , & omnes huma-
ni discursus , *non potest idem esse , ac non*
esse : non potest idem esse album , & non esse
album : nec possunt simul esse falsę , quia
est etiam euentissimum illud principium
quodlibet vel est , vel non est , atque adeo
non potest esse simul falsum , & quod sit ,
& quod non sit . Duę igitur contradi-
ctorię nec possunt simul concedi , nec simul
negari ,

negari, sed qui concedit unam, debet alteram negare, qui negat unam, debet alteram concedere. Ad vitandas tamen fallacias debet attendi diligenter, quando proponuntur duę propositiones ut contradictorię, atque adeo tanquam nec simul concedibiles, nec simul negabiles, an verè sint contradictorię, ita ut in ijs seruentur regulę supradictę: si enim non seruentur, poterunt simul concedi, vel simul negari.

Aduerte aliud esse propositiones contradictorias, aliud prædicata. Prædicata contradictoria sunt, in quibus idē affirmatur, & negatur: ex. gr. esse hominem, & non esse hominem, sunt prædicata contradictoria. Prædicata contradictoria non possunt simul verificari, vel falsificari de eodem subiecto: ex. gr. de eodem Petro non potest verificari quod sit homo, & non sit homo: de duobus subiectis possunt simul verificari, vel falsificari: ex. gr. simul est verum quod *Petrus sit homo*, & *lapis non sit homo*, simul est falsum quod *equus sit homo*, & *Petrus non sit homo*.

Est axiomata commune, quod inter prædicata contradictoria non detur medium, cum detur medium inter prædicata opposita relatiuè contrarię, & priuatiuè Medium est duplex positium, & negatiuum. Positium est, quod *participat utrum-*

trumque extremum ; ex. gr. inter calidissimum, & frigidissimum datur medium, positium, nimirum tepidum, quod participat calorem & frigus. Medium negatiuum est, quod caret utroque extremo. Inter prædicata contradictoria, qualia sunt *esse*, & *non esse* ; *esse album*, & *non esse album*, neque datur medium positium, quod simul sit, & non sit, neque medium negatiuum, quod neque sit, neque non sit. At verò inter prædicata opposita relatiuè, contrariè, & priuatiuè datur medium saltem negatiuum: ex. gr. inter Patrem & Filium datur Spiritus Sanctus, qui neque est Pater, neque est Filius: inter album, & nigrum datur rubrum, quod neque est nigrum, neque album: inter lucidum, & tenebrosum datur angelus, qui neque est lucidus, neque tenebrosus.

Aduertendum est igitur diligenter, quando formantur aliquę propositiones disiunctiuę de prædicatis oppositis, an talia prædicata sint contradictoria: si enim sunt contradictoria negari non possunt; si verò non sint contradictoria sæpe debebunt negari: ex. gr. est neganda hæc propositio; *quodlibet vel mouetur, vel quiescit*, quia ens immobile, qualis est Deus, neque mouetur, neque quiescit propriè. Quies enim propria est *priuatio motus in subiecto mobili*; sed Deus non est

est mobilis ; ergo in Deo non datur qui
es propriè.

Propositiones singulares eo ipso quod
differunt qualitate , ita vt vna sit affirma-
tiua , altera negatiua eiusdem prædicati
de eodem subiecto , sunt contradictoriæ .
Propositiones verò non singulares non
eo ipso , quod differunt qualitate , sunt
contradictoriæ . Ita hæc propositiones ,
homo currit , homo non currit non sunt con-
tradictoriæ , sed vtraque est vera . Re-
quiritur ergo ulterius , vt differant quan-
titate , ut iam explicabitur .

De Oppositione propositionum .

Cap. XXXIX.

Oppositio est duarum propositionum ha-
bentium idem prædicatum , & subiectum
secundum quantitatem , vel qualitatem diffe-
rentia . Duæ conditiones requiruntur ad
oppositionem . Prima est vt habeant idem
prædicatum , & subiectum . Si enim præ-
dicatum , aut subiectum sit diuersum ,
propositiones non erunt oppositæ : ex.gr.
istæ omnis homo est risibilis ; nullus equus est
risibilis non sunt oppositæ , quia habent di-
uersum subiectum . Secunda est ut diffe-
rant quantitate , vel qualitate , vel utra-
que . Oppositio propositionum de subie-
cto communi quadruplex est . Propositiones
enim singulares capaces sunt tantum

oppo-

oppositionis contradictorię. Prima est contradictoria, secunda contraria, tertia subcontraria, quarta subalterna.

Contradictoria est per quam due propositiones de eodem predicato, ac subiecto differunt quantitate, & qualitate, ita ut una sit affirmatiua, altera negatiua, una sit vniuersalis, altera particularis: ex. gr. istę due propositiones; *omnis homo est iustus*; *aliquis homo non est iustus* sunt contradictorię; & similiter istę *nullus homo est iustus*; *aliquis homo est iustus*. Propositiones contradictorię nec possunt esse simul verę, nec simul falsę ideoque nec possunt simul concedi, nec simul negari.

Contraria est per quam due propositiones uniuersales differunt in sola qualitate; ex. gr. *omnis homo est iustus*, *nullus homo est iustus* sunt propositiones contrarię. Propositiones contrarię non possunt simul esse verę, atque adeo concedi non possunt simul, possunt esse simul falsę, ideoque negari possunt simul.

Subcontraria est per quam due propositiones particulares differunt in sola qualitate; ex. g. *aliquis homo est iustus*; *aliquis homo non est iustus*. Possunt simul esse verę, ideoque possunt simul concedi; non possunt simul esse falsę, ideoque non possunt simul negari.



Omnis
Homo est
Iustus

Contrariæ

Nullus
Homo est
Iustus

SVBALTERNÆ

CONTRA
DICTORIÆ

SVBALTERNÆ

Aliquis
Homo est
Iustus

Subcontrariæ

Aliquis
Homo nō
est Iustus

Subalterna est per quam due propositiones eiusdem qualitatis differunt in quantitate, ex. gr. *omnis homo est iustus* ; *aliquis homo est iustus* . Possunt esse simul verę, & simul falsę, et si vniuersalis est vera, etiam particularis est vera; si verò particularis est falsa, etiam vniuersalis est falsa.

Exempla harum propositionum apposita figura exhibebit .

Aduerte quod in materia de propositionibus nomine propositionis affirmatiue vniuersalis intelligitur distributiua, nomine particularis affirmatiue intelligitur determinata. Ideo istę due propositiones ; *Omnes Apostoli sunt duodecim* , *aliqui Apostoli non sunt duodecim* ; non sunt contradictorię, sed vtraque est vera, quia vniuersalis non est distributiua, sed collectiua.

Collige maximam oppositionem esse contradictoriam. Nam maxima oppositio est, per quam duo se inuicem excludunt, ita ut exclusio unius sit inclusio alterius, ergo &c.

Secunda oppositio est contraria . Cum enim due contrarię non possint simul esse verę se inuicem excludunt ; cum possint simul esse falsę non ita se excludunt, ut exclusio unius sit inclusio alterius, ergo, &c.

Tertia & non ita propria est subcontraria

traria. Cum enim subcontrariæ possint esse simul verę nō se inuicem excludunt, cum non possint esse simul falsa, exclusio vnius est inclusio alterius, ideoque participant aliquid de oppositis.

Quarta demum, & impropijssima est subalterna. Cum enim subalternæ possint esse simul verę, & simul falsę, non participant veram rationem oppositionis, cum neque se inuicem excludant, neque exclusio vnius est inclusio alterius Oppohūntur ergo solum relatiuē, sicut magnum, & paruum.

De Aequipollentia: Cap. XXXX.

A Equipollentia est duarum propositionum æquiualentia in significādo. Sicut enim duę monete dicuntur æquiualentes, quando idem valent; sic duę propositiones dicuntur æquiualentes, quando idem significant.

Ad cognoscendum quando propositiones æquipollean, traduntur aliquæ regulę explicantes quomodo propositiones oppositę reddantur æquiualentes.

Prima, & fundamentalis regula est: negatio hoc est particula *non* est malignantis naturę, hoc est inuertit, & mutat quantitatem, & qualitatem, cui præponitur; nam si præponatur quātitati vniuersali, mutat illam

illam in particularem: proportionaliter si proponatur quantitati affirmatiuę, mutat illam in negatiuam; si negatiuę mutat illam in affirmatiuam. Ex. gr. *nullus* est signum vniuersale negatiuum. Si igitur præponatur *non*, & dicatur *non nullus*, euadit particulare affirmatiuum, & idem significat *ac aliquis*; idem dic de cœteris.

In hac regula fundantur alię tres regulę explicatę hoc versiculo .

Præ contradic, post contra, præ postque sub alter.

Prima regula est *præ contradic*, hoc est una contradictoria euadit æquipollens alteri præponendo negationem propositioni: ex. gr. hæc propositio *nullus homo currit*, si præponam *non*, & dicam *nonnullus homo currit*, æquipollet suę contradictorię, quę est *aliquis homo currit*. Idem enim significat *nonnullus* ac *aliquis*.

Secunda regula pro contrariis, & subcontrariis est *post contra*: hoc est vna contraria vel subcontraria fit æquipollens alteri, præponendo negationem subiecto, & illam anteponendo soli copulę: ex. gr. *omnis homo currit* postponendo negationem copulę, & dicendo *omnis homo non currit* æquipollet contrarię, & idem significat atque hæc *nullus homo currit*.

Tertia pro subalternis est *præ postque ubi alter*, hoc est subalternę redduntur æqui-

æquipollentes, præponendo negationem, semel copulæ, semel toti propositioni; ex. gr. hæc propositio *omnis homo currit*, dicendo *non omnis homo non currit*, redditur æquipolens suæ subalternæ, quæ est *aliquis homo currit*.

Quæres an propositiones infinitæ æquipolleant purè negatiuis?

Respondeo, quod cum prædicatum est aliqua actualis existentia, nō æquipollent, seu infinitetur subiectum, seu infinitetur prædicatum; exemp. gr. hæc propositio negatiua *Petrus non currit actu* non æquipollet huic, in qua infinitatur prædicatum *Petrus est actu non currens*. Si enim Petrus non existeret, vera esset propositio hæc negatiua, *Petrus non currit actu*; at falsa esset infinita *Petrus est actu non currens*; nam per hanc affirmatur quod actu existat. Similiter propositio negatiua *Petrus non currit actu* non æquiualeat huic infinite ex parte subiecti *non Petrus currit actu*; nam in prima negatur, quod Petrus currat actu, in secunda affirmatur quod currat actu aliquid distinctum à Petro, ideoque si nihil curreret, vera esset negatiua *Petrus non currit actu*, ac falsa esset infinita *non Petrus currit actu*.

Cum tamen prædicatum non est aliqua actualis existentia, tunc propositio negatiua æquiualeat infinitæ ex parte prædi-

cati, at non æquualet infinitæ ex parte subiecti; ex. g. hæc propositio *nullus homo est equus*, æquualet huic *omnis homo est non equus*: at non æquualet isti alteri infinite ex parte subiecti *omnis non homo est equus*: nam negatiua est vera, infinita est falsa, quia leo est non homo, & tamen non est equus.

De Conuersione . Cap. XLI.

Conuersionis est *unius propositionis ad alteram per extremorum transpositionem. necessaria consequentia*. Dux conditiones requiruntur ad conuersionem. Prima est, vt prædicatum fiat subiectum, & subiectum fiat prædicatum. Secunda est, vt facta tali transpositione consequentia sequatur necessario, ita vt concessio antecedenti, non possit negari consequentia. Propositio antecedens vocatur cōuersa propositio consequens vocatur cōuertēs.

Conuersionis propositionum constantium ex terminis communibus est triplex: simplex, per accidēs, & per cōtrapositionem. Simplex est in qua retinetur quantitas propositionis, ita vt si conuersa erat vniuersalis, etiam conuertens sit vniuersalis, si conuersa erat particularis, etiam conuertens sit particularis. Simpliciter conuertuntur solum vniuersalis negatiua, & particularis affirmatiua. Exemplum vni

E

uer-

uerſalis negatiuæ eſt *nullus homo eſt equus ; ergo nullus equus eſt homo*. Exemplum particularis affirmatiuæ eſt *aliquis homo eſt animal ; ergo aliquod animal eſt homo*.

Conuerſio per accidens eſt, in qua mutatur quantitas, ita vt ex vniuerſali inferatur particularis, vel è conuerſo. Per accidens conuertuntur omnes vniuerſales. Exemplum vniuerſalis affirmatiuæ eſt *omnis homo eſt animal ; ergo aliquod animal eſt homo*. Exemplum negatiuæ eſt: *nullus homo eſt equus ; ergo aliquis equus non eſt homo*.

Conuerſio per contrapositionem eſt, in qua retinetur quantitas, ſed infinitantur extrema, prædicatum nimirum, & ſubiectum. Per contrapositionem conuertuntur vniuerſalis affirmatiua, & particularis negatiua. Exemplum vniuerſalis affirmatiuæ eſt *omnis homo eſt animal ; ergo omne non animal eſt non homo*. Exemplum particularis negatiuæ eſt *aliquod animal non eſt homo ; ergo aliquis non homo non eſt non animal*.

Iſtæ regulæ continentur iſtis quatuor verſibus.

Aſſerit A, negat E, ſunt vniuerſaliter amb.e.

Aſſerit I, negat O, ſunt particulariter amb.e.

Simpliciter feci, conuertitur Eua per acci;

Aſto per contra, ſic fit conuerſio tota.

Senſus eſt: vocalis A ſignificat vniuerſalem

ſalem affirmatiuam ; vocalis E ſignificat vniuerſalem negatiuam ; vocalis I ſignificat particularem negatiuam . Vniuerſalis negatiua, & particularis affirmatiua ſignificatæ vocalibus E & I dictionis *Feci* conuertuntur ſimpliciter . Vocales A, E, hoc eſt vniuerſalis affirmatiua , & negatiua ſignificatæ per *Eua* conuertuntur per accidens . Vniuerſalis affirmatiua , & particularis negatiua ſignificatæ per A, O dictionis *Aſto* cōuertūtur per cōtrapoſitionē .

Obijcies : iſta propoſitio *nullus ſenex erit puer* eſt vniuerſalis negatiua , & tamen non poteſt conuerti ſimpliciter in hanc ; ergo *nullus puer erit ſenex* ; ergo non omnis propoſitio vniuerſalis negatiua conuertitur ſimpliciter .

Reſpondeo quod poteſt conuerti tranſponendo integram prædicatum . Integrum autem prædicatum non eſt *puer*, ſed *futurus puer* : ſenſus enim propoſitionis eſt *nullus ſenex eſt futurus puer* ; & valet conuerſio ſimplex ; ergo *nullus futurus puer eſt ſenex* . Idem contingit in hac propoſitione *nullus puer fuit ſenex* : conuertitur enim ; ergo *nullus qui fuit ſenex eſt puer* .

De Propositionibus disiunctiuis, & copulatiuis . Cap. XLII.

EGimus de propositionibus simplicibus : iam breuiter agendum est de compositis .

Propositio copulatiua comparatur ad disiunctiuam , sicut vniuersalis ad particularem ; ideo propositio vniuersalis per descensum resoluitur in propositionem copulatiuam, particularis in disiunctiuam, vt dictum est cap. 26. Sicut ergo ad veritatem propositionis vniuersalis requiritur, vt prædicatum conueniat singulis inferioribus seorsim , ad veritatem autem particularis sufficit , quod prædicatum conueniat vni tantum, sic ad veritatem propositionis copulatiuæ ex parte subiecti requiritur , vt prædicatum conueniat singulis copulatis seorsim ; ad veritatem disiunctiuæ sufficit, vt conueniat vni: ex. gr. vt sit vera hæc propositio copulatiua *Petrus, & Paulus currunt*, vterque debet currere; vt autem sit vera hæc propositio disiunctiua *Petrus, vel Paulus currit*, sufficit quod cursus conueniat vni, & ita eo ipso, quod Petrus currit, licet Paulus non currat, propositio est vera. Ideo est axioma commune: *ad veritatem disiunctiuæ sufficit, quod verificetur una pars: ad veritatem copulati-*

uæ

u. e. verificari debent omnes partes.

Quæres an disiunctiua sit vera, cum verificatur vtraque pars; ex. gr. an hæc propositio verificetur *Petrus vel est diues, vel est doctus*, si sit simul diues, & doctus.

Respondeo esse veram, nisi aliunde constet, quod ex mente proferentis subintelligitur *tantum*; & sensus est *Petrus vel est solum diues, & non doctus, vel est solum doctus, & non diues*. Explicatur exemplo præceptorum. Præceptum enim disiunctiuum regulariter impletur faciendo vtrumque: ex. gr. præceptum illud ut mulieres in purificatione offerrent domino par turturum, aut duos pullos columbarum, implebatur à muliere, etiam si offerret simul turtures, & columbas. At verò si princeps præciperet Oecono-
mo, ut donaret alicui vel prædium, vel palatium principis, profecto non impleretur dando vtrumque.

Quia propositio copulatiua habet quantitatem vniuersalem, disiunctiua particularem, possunt statim inferri regulæ oppositionum. Duæ copulatiuæ, atque adeo vniuersales differentes qualitate, sunt contrariæ, & non possunt esse simul veræ, possunt esse simul falsæ. Duæ disiunctiuæ, atque adeo particulares differentes qualitate sunt subcontrariæ, & possunt esse simul veræ, sed non simul falsæ. Copulati-

ua, & disiunctiua, atque adeo differentes quantitate, si differant etiam qualitate, sunt contradictoriae, & neque possunt esse simul verae, nec simul falsae. Copulatiuae, & disiunctiuae si sint eiusdem qualitatis sunt subalternae, & ideo si copulatiua est vera, etiam disiunctiua est vera, & è contra. Exempla sequens figura monstrabit.

Quia ad veritatem disiunctiuae requiritur, ut verificetur vna pars, possumus ex falsitate vnius partis inferre veritatem alterius, & ita concludit hoc argumentum *Petrus vel est diues, vel est doctus; non est diues; ergo est doctus*, nec concessis praemissis potest negari consequentia. E contra quia sufficit veritas vnius partis, ineptè ex veritate vnius, infertur veritas alterius partis. Ideo ineptum est argumentum *Petrus vel est diues, vel est doctus; sed est diues; ergo est doctus*. Similiter *Petrus vel est, vel non est; sed est; ergo non est*.

De Propositione conditionali, & causali.

Caput XLIII.

Propositio conditionalis alia est connexiua, alia purae concomitantiae. Connexiua est, in qua affirmatur connexio inter conditionem, & obiectum conditionatum, seu sit connexio causae cum effectu, seu connexio effectus cum causa: ex.gr. cum Martha
dice-

dicebat Christo ; *si fuisset hic non fuisset mortuus frater meus*, affirmabat connexionem inter præsentiam Christi, & non mortem Lazari tanquam effectum præsentie Christi. Conditionales saltem per modum coniunctivum habent suam veritatem, vel falsitatem etiam cum non impletur conditio. Ita hæc propositio S. Augustini ; *si Stephanus non orasset, Ecclesia Paulum non habuisset*, habet suam veritatem, etiamsi impleta non fuerit conditio quæ tamen veritas sæpe est nota soli Deo.

Conditionalis connexiva est copulativa ex parte obiecti conditionati, quia copulat duas propositiones, per quas affirmat quod obiectum conditionatum daretur, & quod esset connexum cum conditione: ex. gr. Martha affirmabat, quod si Christus adfuisset & Lazarus non fuisset mortuus, & præsentia Christi fuisset causa cur non moreretur. Et quia ut dictum est cap. 42. ut contradicatur propositioni copulativæ debent disiungi quæ copulabantur, ideo ut contradicatur conditionatæ *si Christus adfuisset, Lazarus non fuisset mortuus*, debet dici *si Christus adfuisset, vel Lazarus non fuisset mortuus, vel præsentia Christi non fuisset causa cur non moreretur*. Hoc autem fit præponendo negationem toti propositioni, ac dicendo *non si Christus adfuisset, Lazarus non fuisset mortuus*: quæ propositio

æquiualeat disiunctiuæ explicatæ. Conditionalis connexiona alia affirmat essentialem connexionem inter conditionem, & conditionatum; vt cum dicitur *ſi Petrus eſt prædeſtinatus, ſaluabitur*: repugnat enim, quod Petrus ſimul ſit prædeſtinatus, & non ſaluetur: alia affirmat connexionem ſolum contingentem; vt *ſi Stephanus non oraffet, Eccleſia Paulum non habuiſſet*; & tamen poterat Stephanus non orare, & adhuc Eccleſia Paulum habere.

Côditionales puræ concomitantie ſunt, in quibus non affirmatur quod conditio habeat connexionem cum obiecto conditionato; vt cum aliquis dicit, *ſi Papa uigilat Turca dormit*. Neque enim affirmo, quod uigilia Papæ habeat vllam connexionem cum dormitione Turcæ.

Exiſtimo in intellectu dari non poſſe conditionatas puræ concomitantie. Ratio eſt, quia intellectus non poteſt alligare affirmationem obiekti alicui conditioni impertinenti, ita vt ſiue ſit, ſiue non ſit talis conditio, obiektum debeat eodem prorsus modo ſe habere; ſed talis eſt conditio concomitans; ergo non poteſt affirmatio obiekti conditionati alligari conditioni purè concomitanti. Tales ergo propoſitiones cum vocaliter proponuntur, ſunt ludicræ, & ad riſum excitandum; veluti cum quis dicit, vox blitri habet
ma-

magnam virtutem. Si quis enim illam, profert, & simul lapidem iaciat in canem, canis statim fugiet. Sic cum dicitur *si Papa vigilat, Turca dormit*: si propositio verè sit conditionata, debet subintelligi, *si Papa vigilat, & datur alia causa dormitionis Turcæ, Turca dormit*.

Ex propositionibus conditionalibus duo modi argumentandi sunt vſitatiffimi. Primus est ex positione, seu purificatione conditionis, seu antecedentis ad positionem conditionati, seu consequentis; ex. gr. *si Petrus est homo, est animal; sed Petrus est homo; ergo est animal*.

Secundus est ex destructione, seu contradictione consequentis, hoc est conditionati, ad destructionem, seu contradictionem antecedentis, hoc est conditionis; ex. gr. *si Iudas fuisset prædestinatus, fuisset salvatus; sed Iudas non fuit salvatus; ergo non fuit prædestinatus*. Similiter *si daretur infinitum pars esset æqualis toti; consequens est absurdum; ergo & antecedens*.

Notandum est autem, quod sicut à positione absoluta antecedentis valet argumentum ad positionem absolutam consequentis, sic à positione conditionata antecedentis valet argumentum ad positionem conditionatam consequentis. Ex. gr. valet hoc argumentum: *si est homo, est animal; si est rationale est homo; ergo si est ratio-*

nale est animal . Similiter à destructione conditionata cōsequentis valet argumentum ad destructionem conditionatam antecedentis ; ex. gr. *si est homo , est animal , sed si est lapis non est animal ; ergo si est lapis non est homo* . Isti duo modi, & quasi figure argumentandi possunt multipliciter variari mutando quantitatem, & qualitatem tum antecedentis , tum consequentis ; sed quia concludunt omnes eodem modo, non est immorandum .

Quoad propositiones causales proportionaliter ad dicta de conditionalibus assero, quod illis contradicatur, præponendo negationem toti propositioni: ex gr. huic propositioni *quia cras pluet, Tyberis exundabit*, contradicatur dicendo, *non quia cras pluet Tyberis exundabit* . Sensus autem est *vel cras non pluet, vel Tyberis non exundabit, vel pluvia non erit causa exundationis* .

Addo, quod etiam causales aliquando significant causam essentialiter connexam cum effectu ; vt cum dicitur, *quia Deus voluit creauit mundum* : aliquando causam connexam contingenter, vt *quia Stephanus orauit, Paulus est conuersus*: oratio enim Stephani potuit non exaudiri, atque adeo connexa fuit contingenter cum conuersione Pauli .

De Propositionibus exponibilibus.

Caput XLIV.

Propositiones exponibiles sunt quæ indigent expositione, ut penetretur earum vis, & significatio. Illæ verò propositiones, per quas exponuntur, vocantur exponentes. Vñtatissimæ sunt exclusivæ, exceptivæ, & reduplicativæ. Exclusivæ sunt per quas vel alia subiecta excluduntur à prædicato, vel alia prædicata saltem eiusdem generis excluduntur à subiecto, quæ exclusio fit per particulas tantum, dumtaxat, solum, &c. quæ idcirco vocantur signa exclusiva. Exemplum exclusivarum ex parte subiecti est, *solus Deus est æternus*; excluduntur enim à prædicato æterni alia subiecta, quæ non sunt Deus. Exemplum exclusivarum ex parte prædicati est, *Petrus est nequam tantum*, excluduntur enim à Petro prædicata furis, latronis, astuti, & aliarum qualitatatum similium.

Cauendum est ne confundantur exclusivæ ex parte prædicati cum exclusivis ex parte subiecti. Sæpe enim vna exclusiva est vera, altera falsa. Ex. gr. si Petrus nullam aliam facultatem didicerit, quam Logicam, vera erit exclusiva ex parte prædicati, *Petrus est Logicus tantum*: ac falsa erit exclusiva ex parte subiecti *tantum Pe-*

trus est Logicus, quia sunt alij Logici præter Petrum.

Propositiones exclusivæ ex parte subiecti sunt vel affirmativæ signi, & copulæ, vel negativæ signi, & copulæ, vel affirmativæ signi, & negativæ copulæ, vel negativæ signi, & affirmativæ copulæ.

Exemplum affirmativæ simul signi, & copulæ est, *tantum Deus est æternus*: exponitur per istam copulativam *Deus est æternus, & nihil aliud est æternum*: contradicitur per hanc disiunctivam *vel Deus non est æternus, vel aliquid aliud est æternum*.

Exemplum negativæ signi, & copulæ est, *non tantum Deus non est mortalis*: exponitur per hanc *Deus non est mortalis, & etiam aliquid aliud non est mortale*: contradicitur per hanc *vel Deus est mortalis, vel nihil aliud non est mortale*.

Exemplum affirmativæ signi, & negativæ copulæ est: *tantum Deus non incepit*: exponitur per hanc *Deus non incepit, & omnia alia inceperunt*: contradicitur per hanc *vel Deus incepit, vel aliquid aliud non incepit*.

Exemplum negativæ de signo, & affirmativæ de copula est *non tantum Deus est intellectivus*: exponitur per hanc *Deus est intellectivus, & aliquid aliud est intellectivum*: contradicitur per hanc *vel Deus non est intellectivus, vel nihil aliud est intellecti-*
le-ti-

lectivum. Eodem pacto quivis poterit facile exponere exclusivas ex parte prædicati; ex. gr. hæc propositio *Petrus est Logicus tantum*, exponitur per hanc *Petrus est Logicus, & nullam aliam facultatem callet.*

Propositio exceptiva est, per quam aliquid inferius subiecto, & sub illo contentum excipitur à participatione prædicati, quod fit per particulas *præter, nisi, &c.* quæ idcirco vocantur exceptivæ. Exemplum est: *omnes homines præter Christum fuerunt peccabiles.* In hac propositione Christus, qui est terminus contentus sub homine, excipitur à prædicato peccabilis. Exponitur *Christus non est peccabilis, & omnes alij homines sunt peccabiles.* Contradicitur *vel Christus est peccabilis, vel aliquis alius homo non est peccabilis.* Propositio ergo exclusiva ex parte subiecti per hoc differt ab exceptiva, quod per exceptivam excluditur à prædicato aliquid contentum in subiecto: ita in exemplo posito excluditur Christus, qui cum sit homo, continetur in homine, quod est subiectum: at in exclusiva excluduntur alia, quæ non continentur in subiecto; ex. gr. per hanc propositionem *tantum homo est visibilis* excluduntur à participatione prædicati quæ non continentur in homine.

Propositio reduplicativa est, in qua
præ-

prædicatum enunciatum de subiecto in quantum est tale, quod fit per particulas prout, in quantum, quatenus, &c. quæ idcirco dicuntur reduplicatiue; ex. gr. cum dicitur homo quatenus homo est capax felicitatis. Porro tales reduplicatiue non semper habent eandem significationem, ac plerumque significant vnum ex his duobus. Primo significant, quod prædicatum sit de essentia subiecti, vt cum dico homo in quantum homo est rationalis significo quod rationalitas est homini essentialis; & ideo illa propositio exponitur, homo est rationalis, & rationalitas est de essentia hominis. Secundo significant, quod forma importata per subiectum est ratio cur illi conveniat prædicatum. Ex. gr. hæc compositio homo quatenus homo est risibilis, exponitur per hanc, homo est risibilis, & esse risibilem conuenit homini ratione naturæ humanæ. Similiter hæc propositio Christus est mortuus, quatenus homo significat quod mors conuenit Christo ratione naturæ humanæ.

Aduerte, quod in propositione reduplicatio est semper pars prædicati, nunquam est pars subiecti. Ratio est quia significat modum quo prædicatum conuenit subiecto; ergo est pars prædicati, & spectat ad illud.

Propositio specificatiua est, per quam prædicatum conuenit subiecto, sed non in
quan-

quantum est tale ; & hæc propositio opponitur reduplicatiuæ : ex. gr. album est dulce specificatiuè , quia non est dulce inquantum est album, neque ratione albedinis, sed ratione subiecti communis .

Ad propositiones exponibiles reducuntur falsificantes se ipsas, de quibus dicitur questione 60. *Logicæ.*

De Propositionibus Modalibus .

Caput XLV.

Propositiones aliæ dicuntur modales, aliæ de inesse . Modales sunt, in quibus explicatur modus, quo prædicatum inest, aut non inest subiecto . De inesse sunt, in quibus talis modus non explicatur : ex. gr. hæc propositio *homo est animal*, est propositio de inesse : hæc alia, *homo est animal necessario*, est propositio modalis .

Quatuor sunt modi, necessarium, impossibile, possibile, & contingens . Propositio, quæ modificatur, vocatur dictum . Dictum verò potest proferri dupliciter . Primo per modum indicatiuum, addendo deinde modum aduerbialiter ; vt cum dico *homo est animal necessario* ; secundo per modum infinitum, addendo modum nominaliter tanquam prædicatum ; vt cum dico *necesse est hominem esse animal* . Propositiones eundem habent sensum, seu modus
pro-

proferatur aduerbialiter, seu nominaliter; ex. gr. idem est dicere, *homo est animal necessario, ac necesse est hominem esse animal*. Excipitur modus contingentis. Neque enim idem significat *Petrus currit contingenter, ac contingens est Petrum currere*; nam in prima asseritur, quod currit actu, secus in secunda.

Explicanda sunt aliqua de materia, quantitate, qualitate, oppositione, & equipollentia propositionum modalium.

Quoad materiam omnes modales sunt in materia necessaria, vel impossibili. Ratio est, quia quod est possibile, necessario est possibile, & non potest non esse possibile; ergo propositio, per quam affirmatur *possibile est Petrum currere*, est in materia necessaria. Quod non est possibile necessario, non est possibile; ergo propositio, qua affirmatur *Deum currere non est possibile est* in materia impossibili; cum prædicatum necessario repugnet subiecto. Idem dic de reliquis modis, ut ex se patet, & alibi demonstrabitur.

Quoad quantitatem, dicta, seu propositiones modificate possunt esse vniuersales, vel particulares, vel indefinitæ, vel singulares, ut ex se constat. Ex. gr. in hac propositione; *necesse est omnem hominem esse animal*; dictum est vniuersale affirmatiuum. Ex modis duo, nimirum necessarium,

rium, & impossibile dicuntur vniuersales. Ratio est, quia si addantur propositionibus indefinitis, illas faciunt vniuersales. Ita si hæc propositio *necesse est hominem esse animal*, est vera, est etiam vera hæc vniuersalis *omnis homo est animal*. Idem dic de impossibili. Contingens est modus particularis, quia si modificat propositionem indefinitam verificare solet particularem, vt patet in hac *contingens est hominem esse album*. Possibile est modus indefinitus, quia si addatur propositioni indefinitæ non semper reddit illam vniuersalem, nec semper particularem, sed id pendet ex materia propositionis modificatæ.

Quoad qualitatem modorum *necessarium* est modus affirmatiuus, quia si modificet propositionem affirmatiuam relinquit illam affirmatiuam. Impossibile est modus negatiuus, quia si modificat affirmatiuam, reddit illam negatiuam: ex. gr. cum dico *impossibile est Deum moueri*, redditur vera hæc negatiua *Deus non mouetur*.

Quoad qualitatem propositionum modalium quedam sunt affirmatiuæ dicti, & modi; ex. gr. *impossibile est Petrum currere*: quedam negatiuæ vtriusque, ex. gr. *non est possibile Deum non esse*: quedam affirmatiuæ modi, negatiuæ dicti, vt *necesse est Deum non incipere*. Absolutè tamen sunt affirmatiuæ, cum modus affirmatur, licet dictum

dictum negetur. Ita hæc propositio *ne-
cesse est Deum non incipere*, est affirmatiua,
de dicto negatiuo. Absolutè sunt negatiuæ,
cum modus negatur, licet dictum affir-
metur. Ratio est, quia prædicatum princi-
pale est modus; sed qualitas pendet ab af-
firmatione, vel negatione prædicati prin-
cipalis; ergo &c.

Quoad oppositionem modalium, vt illis
contradicatur dictum non debet mutari,
sed solum debet mutari qualitas modi. Ita
contradictoria istius *Deum non incipere est
necesse*, est hæc alia *Deum non incipere non
est necesse*.

Quoad oppositionem modorum: mo-
dus impossibilis opponitur tribus reli-
quis, sed non eodem pacto. Cum modo
possibili habet oppositionem contradic-
toriam, quia inter possibile, & impossibile
non datur medium positium, cum idem
non possit esse simul possibile, & impos-
sibile: nec datur medium negatiuum,
quia quodlibet vel est possibile, vel impos-
sibile. Cum modis necessarij, & contin-
gentis opponitur contrariè, quia licet
idem non possit esse simul necessarium, &
impossibile, potest tamen idem esse nec
necessarium, nec impossibile, sed contin-
gens: & similiter licet idem non possit
esse simul contingens & impossibile,
potest nec esse contingens, nec impos-
sibile, sed necessarium. Pos-

Possibile comparatur ad necessarium, & contingens sicut genus ad speciem, & sicut animal ad hominem, equum &c: si quidem omne necessarium est possibile, non omne possibile est necessarium. Necessarium, & contingens comparantur sicut duę species oppositę sub eodem genere possibilis, ex. gr. sicut rationale, & irrationale sub genere animalis.

Quoad æquipollentiam optima regula est ut attendatur sensus. Quis enim non videat equipollere istas propositiones *necesse est Deum non moueri: impossibile est Deum moueri.*

TRACTATUS TERTIVS DE SYLLOGISMO.

*Quid sit Syllogismus.
Cap. XLVI.*

Syllogismus est præcipua argumentationis species, ad quam reliquę reducuntur tanquam argumentationes imperfectę ad perfectam. Definitur ab Aristotele primo prior. cap. primo: *Oratio in qua quibusdam positis alterum quid à positis necesse est contingere.*

re, eo quod hæc sint. Sensus est quod Syllogismus est oratio composita ex pluribus propositionibus, in qua ex præmissis sequitur necessario, & infallibiliter conclusio distincta à præmissis ratione dispositionis, ita ut semper sequatur, cum datur talis dispositio propositionum, & terminorum.

Collige primo, quod sicut ad essentiam propositionis non refert quod sit vera, vel falsa, unde æquè est propositio hæc *Deus est trinus*, quæ est de fide, & hæc alia *Deus non est trinus*, quæ est hæretica: & sicut ad essentiam rotundi nihil refert quod sit aurum, vel argentum, dummodo habeat rotunditatem; sic ad essentiam syllogismi nihil refert, quod constet ex propositionibus veris, vel falsis, dummodo sint ita dispositæ, ut ex ijs conclusio sequatur necessario, ita ut præmissis concessis non possit negari consequentia. Ideo hic, *omne A est B; omne C est A; ergo omne C est B* est optimus syllogismus, licet omnes propositiones sint falsæ.

Collige secundo ad syllogismum non sufficere, quod conclusio sequatur necessario ex præmissis, sed requiri, ut sequatur ex dispositione præmissarum, & terminorum, quæ dispositio est forma syllogismi. Ut hoc intelligatur aduerte proprietates posse convenire alicui rei tripliciter.

citer : primo ratione solius forme ; secundo ratione solius materiae ; tertio ratione vtriusque . Tunc aliqua proprietas conuenit ratione solius materiae , quando conuenit tali materie , quamcumque formam habeat : ex. gr. globo aureo conuenit ponderare centum libras ratione auri , quod est materia ; non ratione rotunditatis , quia tale aurum in quamcumque figuram conformetur , semper ponderabit centum libras .

Tunc proprietas conuenit ratione solius forme , quando conuenit tali forme in quacumque materia ; ex. gr. proprietas habendi centrum conuenit auro rotundo ratione solius rotunditatis , quia rotunditas in quacumque ponatur materia semper habet centrum .

Tunc proprietas conuenit ratione vtriusque , quando nec conuenit forme in quacumque materia , nec materiae in quacumque forma : ex. gr. proprietas secandi conuenit ferre non ratione solius ferri , quia ferrum non secabit , si sit rotundum , neque ratione solius figure dentate , quia lignum dentatum non secabit , sed ratione ferri , quod est materia , & ratione figure dentate , que est forma .

Iam in casu nostro conclusio debet sequi ratione solius forme syllogisticę , hoc est ratione solius dispositionis premissa-

missarum, & terminorum, ita vt posita tali dispositione, conclusio necessario sequatur semper in quacumque materia, eo pacto, quo posita rotunditate, semper sequitur centrum. Si verò posita dispositione aliquando conclusio sequitur, aliquando non sequitur, non est syllogismus: ex. gr. argumentum ex puris affirmatiuis in secunda figura, etiam quando conclusio sequitur, non est syllogismus, quia non sequitur semper.

Collige tertio differentiam consequentiae formalis à materiali. Consequentia formalis est, quæ sequitur ratione formæ: consequentia materialis est, quæ sequitur ratione materie solius: ex gr. in hac conuersione; *omnis homo est risibilis; ergo omne risibile est homo* consequentia est solum materialis, quia non omnes vniuersales affirmatiue ita possunt conuerti.

Collige quarto non esse syllogismum, cum consequentia infertur per conuersionem, dicendo ex. gr. *aliquis homo est animal; ergo aliquod animal est homo*. Ratio est, quia in syllogismo debet inferri aliquid aliud à præmissis; at verò quod infertur in conuersione. propriè non est aliud, sed idem,

De materia, & forma syllogismi.

Caput XLVII.

SIcut materia domus sunt lapides, & ligna, ita materia syllogismi sunt propositiones, & termini. Propositiones sunt materia proxima, & immediata, quia syllogismus componitur proximè, & immediatè ex propositionibus. Termini sunt materia remota, & mediata, quia prius ex terminis debent componi propositiones, deinde ex propositionibus syllogismus.

Propositiones in syllogismo simplici debent esse tres, nec plures, nec pauciores: conclusio nimirum, quæ infertur per particulam *ergo* vel aliam æquivalentem; maior, hoc est illa præmissa, quæ quia continet maius extremum, debet poni primo loco; & minor, hoc est illa præmissa, quæ quia continet minus extremum, exigit poni secundo loco. Sicut autem propositio, quæ infertur etiamsi ponatur primo loco, semper est conclusio, sic illa propositio, quæ continet maius extremum semper est maior, etiamsi ponatur secundo loco.

Termini in syllogismo simplici debent esse solum tres; nimirum prædicatum, conclusionis, subiectum conclusionis, & me-

medius terminus, hoc est terminus, qui non ponitur in conclusione, & ponitur in vtraque præmissa. Medius terminus definitur terminus, cuius enunciatio de alijs duobus in præmissis est ratio, cur illi inuicem enuncientur in conclusione: ex. gr. in hoc syllogismo: *omne rationale est risibile; omnis homo est rationalis; ergo omnis homo est risibilis*; tres sunt termini, hoc est *risibile*, quod est prædicatum conclusionis; *homo* qui est subiectum conclusionis, & *rationale*, quod est medius terminus, quia ponitur in vtraque præmissa, & non ponitur in conclusione, & in præmissis ita enunciat de homine, & risibili, ut sit ratio, cur in conclusione enuncientur inter se. Singuli tres termini replicantur bis, & ita implent sex loca trium propositionum, cum in quacumque propositione duo sint loca, alter prædicati, alter subiecti.

Prædicatum conclusionis regulariter est maius extremum. Ratio est, quia ut dixi capite quarto in propositione maius extremum est prædicatum. Excipiuntur modi indirecti, in quibus prædicatum conclusionis est minus extremum, subiectum est maius extremum. Ratio est, quia subiectum conclusionis prædicatur de medio; ergo connaturaliter exigit prædicari de prædicato conclusionis, quod

quod continetur sub medio; ergo licet oppositum contingat innaturaliter, adhuc habet præeminentiā, ratione cuius dicitur maius extremum. Ideo in modis indirectis maior est in qua ponitur subiectum conclusionis.

Quæres, potest ne dari syllogismus constans ex pluribus propositionibus, ac terminis, quam tribus.

Respondeo syllogismum compositum, hoc est resolubilem in pures syllogismos posse constare ex quatuor, quinque, & pluribus in infinitum propositionibus, ac terminis, ita ut conclusio sequatur necessario. Exemplum sit: *omne rationale est risibile; omnis homo est rationalis; omne admirativum est homo; ergo omne admirativum est risibile.* Hic syllogismus constat ex quatuor terminis, & propositionibus, & tamen concludit necessario ex vi forme, sed est syllogismus compositus, ac resolubilis in duos. Primus est: *omne rationale est risibile; omnis homo est rationalis; ergo omnis homo est risibilis.* Secundus est: *omnis homo est risibilis; omne admirativum est homo; ergo omne admirativum est risibile.* Aristoteles dum dicit syllogismum constare ex tribus tantum propositionibus, ac terminis, loquitur de simplici, & clarissimo, ad quem cum reducuntur compositi, concludunt clarius, & manifestius.

Sicut forma in domo est dispositio, per quam materia, hoc est ligna, lapides &c. disponuntur ita, vt resultet ædificium aptum ad habitandum, sic forma syllogismi est dispositio terminorū, ac propositionum, ex qua conclusio sequitur infallibiliter. Forma igitur complectitur figuram, & modū. Figura est dispositio terminorum secundum subiectionem, & predicationem. Modus est dispositio propositionum secundum quantitatem, & qualitatem.

*De Figuris Syllogismi. Cap.
XXXVIII.*

Figura est dispositio trium terminorum secundum subiectionem, & predicationem, ex qua necessario, & per se sequatur conclusio. Tot ergo sunt possibiles figure, quot sunt possibiles modi, quibus dicti tres termini possunt disponi, ita vt conclusio sequatur necessario, & per se; sed tales modi sunt solum tres; vel enim medius terminus in vna præmissa subiicitur, & in alia prædicatur, vel in vtraque prædicatur, vel in vtraque subiicitur, ergo tres tantum sunt figure nec plures, nec pauciores.

Prima est, in qua medius terminus semel prædicatur, semel subiicitur. Exemplum sit: *Omne rationale est visibile; omnis homo est rationa-*

tionalis; ergo omnis homo est risibilis. Rationale est medius terminus, & in maiori est subiectum, in minori prædicatum.

Prima figura potest concludere vel directè, & naturaliter, vel indirectè, & in-naturaliter. Tum concludit directè, & naturaliter, quando extrema in conclusione occupant eandem sedem, quam occupant in præmissis, ita ut prædicatum conclusionis sit etiam prædicatum in præmissis, subiectum conclusionis sit etiam in præmissis subiectum; ex. gr. in syllogismo posito conclusio est directà, quia *risibile* quod est prædicatū conclusionis, etiam in maiori est prædicatum, *homo* etiam in minori est subiectum.

Tum concludit indirectè, quando extrema in conclusione habent oppositam sedem, ac habeant in præmissis, ita ut prædicatum conclusionis in præmissis sit subiectum, subiectū conclusionis in præmissis sit prædicatum. Exemplum sit: *omne rationale est animal; omnis homo est rationalis; ergo aliquod animal est homo.* Conclusio est indirecta, quia *animal*, quod in conclusione est subiectum, in minori est prædicatum &c.

Secunda figura est, in qua medius terminus prædicatur in utraque præmissa. Exemplum potest esse: *omnis homo est risibilis; nullus equus est risibilis; ergo nullus equus est homo.* *Risibile* quod est medius terminus, prædicatur in utraque præmissa.

Secunda figura semper concludit partim directè, partim indirectè. Concludit directè ex parte subiecti; concludit indirectè ex parte prædicati. Ratio est, quia, cum medius terminus occupet vtrumque locum prædicati, reliquæ sunt solum duæ sedes subiecti; ergo subiectum conclusionis debet etiam esse in præmissis subiectum & poni directè, prædicatum conclusionis in præmissis non potest esse prædicatum, & sic nec potest poni directè.

Tertia figura est, in qua medius terminus in utraque præmissa subiicitur. Exemplum sit *omnis homo est intellectualis; omnis homo est animal; ergo aliquod animal est inintellectuale*; homo, qui est medius terminus utraque vice subiicitur.

Tertia figura semper concludit directè ex parte prædicati, indirectè ex parte subiecti, quia medius terminus relinquit vacuas duas sedes prædicati; nullam subiecti.

Galenus apud Auerroem docuit modos indirectos constituere figuram diuersam à modis directis, atque adeo dari quatuor figuras. Fundamentum est, quia tum est diuersa figura, cum datur diuersa dispositio medii cum extremis; sed in modis indirectis datur diuersa dispositio medii cum extremis: nam in directis medius terminus subiicitur prædicato

conclusionis , & prædicatur de subiecto conclusionis ; in indirectis subiicitur subiecto conclusionis , & prædicatur de prædicato conclusionis , vt patet in exemplis allatis ; ergo dantur quatuor figure .

Respondeo negando maiorē . Vt enim patet ex definitione figuræ , non sufficit , quod sit diuersa dispositio , sed requiritur vt concludat per se , hoc est plerumque , etiam si non fiat reductio ad aliam figuram : at modi indirecti per se , & plerumque non concludunt ; ex . gr . *omne rationale est risibile ; omnis homo est rationalis ; ergo aliquod risibile est homo* per se , & plerumque non concludit talem conclusionem , sed conclusionem in Barbara , quæ est summè naturalis ; nempe *ergo omnis homo est risibilis* : deinde verò per conuersionem concluditur ; *ergo aliquod risibile est homo* . E conuerso secunda , & tertia figura concludunt per se , & plerumque , etiam non facta reductione ad primam figuram . Quis enim proposito hoc argumento ; *omnis homo est risibilis ; nullus equus est risibilis ; ergo nullus equus est homo* non statim concedat consequentiam , etiam si nesciat quod reducatur ad primam figuram : sit enim reductio vt concludant maiori euidencia , & perfectione .

Collige à fortiori non esse quartam figuram , cum solum trasponuntur præmis-

ſæ, proferendo prius minorem, in qua
 eſt minus extremum, deinde maiorem.
 Ratio eſt, quia tunc non ponitur diuerſa
 diſpoſitio mediꝝ cum extremis; ergo
 non fit noua figura. Abſurdum porro
 eſt dicere, quod ſolum variando ordi-
 nem, quo proferuntur eadem propoſitio-
 nes, varietur figura; alioquin ſi conſuſio
 poneretur primo loco, eſſet quinta figu-
 ra, ſi poneretur ſecundo, eſſet ſexta &c.

De Modis Syllogiſmi. Cap. XXXXIX.

Quia modus eſt *diſpoſitio propoſitionum
 ſecundum quantitatem; & qualitatem*,
 tot ſunt poſſibiles modi in vnaquaque fi-
 gura, quot ſunt poſſibiles variationes in
 quantitate, & qualitate. Et quia in prima
 figura cum concludit directè ſunt poſſibi-
 les ſexdecim cōbinationes, alię ſexdecim
 cum concludit indirectè: alię ſexdecim
 in ſecunda figura: alię ſexdecim in tertia;
 ſequitur quod computando omnes, ſint
 poſſibiles ſexaginta quatuor cōbinationes
 partim vtilis, partim inutiles.

Quod autem in quacumque figura ſint
 poſſibiles ſexdecim combinationes patet;
 nam ex quantitate ſunt poſſibiles ſolum
 quatuor. Prima eſt ſi vtraque præmiſſa
 ſit vniuerſalis: ſecunda ſi vtraque ſit par-
 ticularis: tertia ſi maior ſit vniuerſalis
 minor particularis: quarta ſi maior ſit
 par-

particularis minor vniuersalis .

Singula ex istis combinationibus quadrupliciter variantur per qualitatem . Prima variatio est, si vtraque sit affirmatiua ; secunda si vtraque negatiua ; tertia si maior affirmatiua, minor negatiua ; quarta si maior negatiua , minor affirmatiua ; ergo quatuor multiplicando per quatuor in vnaquaque figura possibiles sunt sexdecim solum combinationes , & modi . Exempla sexaginta quatuor modorum sequens tabula ostendet .

Ex sexaginta quatuor modis nouem decim tantum sunt vtilis , hoc est tales , vt ex illis sequatur necessario aliqua conclusio , reliqui quadraginta quinque sunt inutiles ita vt nulla ex ijs sequatur conclusio . Vtilis explicantur his versibus .

*Barbara, Celarent, Darij, Ferio, Baralipron
Celantes, Dabitis, Fapesmo, Frisomorum
Cesare, Camestres, Festino, Barocco, Darapti
Felapton, Disamis, Datisi, Broccardo, Ferison*

Memoria tenenda est significatio quatuor vocalium A, E, I, O , contenta his versibus .

Afferit A negat E: sunt vniuersaliter ambe

Afferit, I negat O: sunt particulariter ambe

Nam A significat vniuersalem affirmatiuam . E vniuersalem negatiuam . I particularem affirmatiuam . O particularem negatiuam .

Singulae dictiones significant singulos modos. Vocalis primae syllabae significat quantitatem, & qualitatem maioris : vocalis secundae syllabae quantitatem, & qualitatem minoris : vocalis tertiae syllabae quantitatem, & qualitatem consequentiae aliae syllabae, quae adduntur, sunt mera complementa carminum, ac nihil significant ; ex. gr. in barbara tria A significant tres esse propositiones vniuersales affirmatiuas, & ita argumentum in barbara est syllogismus directus primae figurae constans ex tribus vniuersalibus affirmatiuis : argumentum in celarent est syllogismus constans maiori vniuersali negatiua, minori vniuersali affirmatiua, & conclusione vniuersali negatiua. Celaret igitur est syllogismus directus primae figurae ; ex. gr. *nullum rationale est equus ; omnis homo est rationalis ergo nullus homo est equus.*

Exempla aliorum modorum videri possunt in tabula supra posita Ex decem, & nouem modis nouem contenti primis duobus versibus spectant ad primam figuram ; quatuor primi sunt directi, quinque reliqui indirecti : Cesare, Camestres, Festino, & Barocco spectant ad secundam figuram ; reliqui sex ad tertiam.

Quod omnes decem & nouem modi concludant necessario demonstratur primo à posteriori Tunc aliqui modi concludunt

neccessario, cum nunquam per illos ex
premissis veris inferitur conclusio falsa;
indiciu enim fallacię in modo argu-
mentandi est, cum ex vero sequitur fal-
sum, sed nunquam in decem, & nouem
modis ex premissis veris sequitur con-
clusio falsa, & à tempore Aristotelis vsque
ad nos per annos plusquam bis mille
nullus talis casus inuentus est; ergo om-
nes decem, & nouem modi concludunt
neccessario.

Demonstratur etiam à posteriori, quod
quadraginta quinque reliqui non conclu-
dant. Omnis enim modus argumentandi,
in quo ex premissis simul veris sequitur
aliquando falsa conclusio, est fallax, & in-
utilis, quia falsum sequi non potest ne-
cessario ex vero, licet verum sequatur a-
liquando ex falso: sed omnes quadraginta
quinque modi sunt tales, vt aliquando ex
premissis simul veris sequatur conclusio
falsa, vt videre est in exemplis allatis in
tabula; ergo omnes quadraginta quinque
sunt inutiles.

Vt vtrumque demonstretur à priori,
quatuor facit Aristoteles. Primo proponit
duo principia regulatiua omniũ syllogis-
morum, quę vocantur *Dictum de omni*,
dictum de nullo. Secundo per hæc princi-
pia ostendit concludere quatuor primos
modos primę figurę. Tercio probat quin-

decim reliquos reduci ad illos quatuor ,
atque adeo concludere . Quarto demum
ostendit quadraginta quinquē esse inutiles

*Ostenditur primos quatuor directos mo-
dos necessario, & perfectè conclu-
dere. Cap. L.*

Primum principium dictum de omni est
affirmatiuum. Sensus est: quod affirma-
tur vniuersaliter distributiue de aliquo subie-
cto, potest etiam affirmari de eo, quod contine-
tur in tali subiecto, eo pacto quo continetur;
sed per syllogismum in Barbara prædica-
tum conclusionis affirmatur vniuersaliter
de medio termino, dicendo ex. gr. *omne
rationale est risibile*; in minori asseritur
quod subiectum conclusionis continetur,
vniuersaliter in medio termino, dicendo
omnis homo est rationalis; ergo sequitur eui-
denter quod prædicatum conclusionis af-
firmetur vniuersaliter de subiecto conclu-
sionis, dicendo; *ergo omnis homo est risibilis*.

Similiter in Darij prædicatum con-
clusionis affirmatur vniuersaliter de me-
dio, dicendo, *omne rationale est risibile*; in
minori asseritur, quod subiectum conclu-
sionis continetur particulariter in medio,
dicendo *aliquod animal est rationale*; ergo
sequitur quod prædicatum conclusionis
affirmetur particulariter de subiecto, di-
cen-

cendo; ergo aliquod animal est risibile.

Secundum principium est dictum de nullo. Sensus est, quod negatur vniuersaliter de aliquo subiecto negari debet de eo, quod continetur in tali subiecto, eo pacto quo continetur; sed per syllogismum in Celarent prædicatum conclusionis negatur vniuersaliter de medio, dicendo ex. gr. *nullum binnibile est risibile*; in minori asseritur quod subiectum conclusionis continetur vniuersaliter in medio dicendo, *omnis equus est binnibilis*; ergo sequitur, quod prædicatum conclusionis negatur vniuersaliter de subiecto conclusionis, dicendo, *ergo nullus equus est risibilis*. In Ferio quia prædicatum conclusionis negatur vniuersaliter de medio, dicendo, *nullus equus est risibilis*; & in minori asseritur quod subiectum conclusionis continetur particulariter in medio, dicendo, *aliquod animal est equus*; sequitur conclusio, in qua prædicatum conclusionis negatur particulariter de subiecto, dicendo; *ergo aliquod animal non est risibile*.

Ex istis duobus principiis colliguntur tres regulæ principales, in quibus fundantur omnes reliquæ, quas tradam capite 52.

Prima est; medius terminus saltem in aliqua præmissa sumi debet vniuersaliter distributiue; alioquin syllogismi non

nituntur dicto de omni, dicto de nullo.

Secunda est: nullus terminus, qui non fuit distributus in præmissis debet distribui in conclusione; alioquin sumetur vniuersalius in conclusione, quam in præmissis.

Tertia est: aliqua præmissa debet esse affirmatiua: nam ex puris negatiuis nihil sequitur. Ratio est, quia saltem præmissa, in qua asseritur, quod subiectum conclusionis continetur in medio, debet esse affirmatiua; ex eo enim quod aliquid affirmetur, aut negetur de medio potest affirmari, aut negari de contentis sub medio: de exclusis autem à medio non eo ipso potest affirmari, vel negari.

Nec solum isti quatuor modi sunt necessarii, sed etiam perfecti. Syllogismus enim perfectus definitur ab Aristotele primo prior cap. primo qui nulla alia propositione indiget præter præmissas assumptas, ut evidentissime appareat quod necessario concludit. Ex. gr; hic syllogismus in Barbara. *Omne rationale est risibile; omnis homo est rationalis, ergo est risibilis* est perfectus syllogismus, quia ut manifestum sit, quod concludit, non debet addi alia propositio. Idem dic de tribus reliquis.

Syllogismus imperfectus definitur ibidem: qui ut appareat euidenter perfectissima euidencia quod concludit, necessario indiget a-

liqua

liqua alia propositione, quæ sequitur necessario ex præmissis, sed nondum est posita in syllogismo. Omnes quindecim reliqui modi sunt imperfecti, ut iam patebit.

Ostenditur per reductionem ostensivam modos imperfectos concludere.

Cap. LI.

DVplex est reductio, qua ostenditur modos imperfectos concludere. Prima vocatur ostensiva, seu conversiva, de qua capite præsentis. Secunda dicitur reductio ad impossibile, de qua capite sequenti.

Reductio ostensiva, seu conversiva est per quam addendo aliquam propositionem unam, aut plures, quæ sequitur immediate ex præmissis per conversionem, vel per modum directum, fit manifestum, quod conclusio sequatur necessario.

Omnes quindecim modi, exceptis Barocco, & Broccardo reduci possunt ostensivè. Ut autem dignoscantur ad quos modos perfectos debeant reduci, & quo pacto fieri debeat reductio duæ sunt regulæ.

Prima est: omnes modi reducuntur ad eum modum, à cuius prima littera incipiunt. Ex. gr. Baralipton reducitur ad Barbara: Celantes, Cesare, Camestres ad Celarent.

Secunda regula continetur his versibus:

*Simpliciter verti vult S. P vero per acci
M vult transponi: C per impossibile duci*

Notandę sunt quatuor consonantes S. P. M. C. Nā S. significat propositionē significatam per vocalem præcedentem debere conuerti simpliciter: ex. gr. in Celantes, & Dabitur, quia littera S sequitur post tertiā vocalem, significat quod conclusio denotata per vocalem illam debet conuerti simpliciter. Ita argumentum in Celantes est *nullum rationale est binnibile ; omnis homo est rationalis ; ergo nullum binnibile est homo.* Conuertendo simpliciter conclusionem, & dicendo, *ergo nullus homo est binnibilis ; ergo nullum binnibile est homo.* Facta erit reductio, & ostensum quod conclusio sequitur euidenter in Celarent per conuersionem. Idem dic de Dabitur.

Littera P. significat propositionem significatam per vocalem præcedentem debere conuerti per accidens: ex. gr. vt Baralipson reducatur ad Barbara conuerti debet per accidens conclusio, & facta erit reductio.

Littera M significat præmissas debere transponi ita vt maior fiat minor, & minor fiat maior. Ita ad reductionem Fapesmo, & Frisefomorum, Camestres, Disamis &c. transponi debent præmissæ.

De-

Demum littera C in medio dictionis, quæ inuenitur in Barocco, & Broccardo significat modos illos non posse reduci ostensiuè, sed solum per impossibile.

Hinc habetur quomodo singuli modi debeant reduci. In Baralipton ex quatuor consonantibus est solum P ante tertiam vocalem: ideo sufficit conuerti per accidens conclusionem, & erit facta reductio. In Celantes, & Dabitise est solū S post tertiam vocalem; & ideò sufficit conuerti conclusionem simpliciter.

In Fapesmo post primam vocalem est P, & ideo maior debet conuerti per accidens: post secundam vocalem est S: ideo minor debet conuerti simpliciter. Additur littera M: ideo præmissæ debent transponi ex. gr. *omnis homo est animal; nullus equus est homo; ergo aliquod animal non est equus*, reducitur in Ferio dicendo *nullus homo est equus; aliquod animal est homo; ergo aliquod animal non est equus*.

In Frisefomorum est duplex S, alterum post primam, alterum post secundam vocalem: ideo debet conuerti simpliciter maior, & minor, & propter M præmissæ debent transponi.

In Cesare, & Festino est vnicum S post primam vocalem: ideo conuertendo simpliciter maiorem, facta erit reductio.

In Camestres datur duplex S, alterum post

post secundam, alterum post tertiam vocalem; ideo conuerti debet simpliciter minor, & conclusio; & propter M debent transponi præmissæ.

In Darapti, & Felapton est P post secundam vocalem, & ideo minor debet conuerti per accidens.

In Datisi, & Ferison est vnicum S post secundam vocalem: ideo minor conuerti debet simpliciter.

Demum in Disamis est duplex S, alterum post primam, alterum post tertiam vocalem; ideo maior, & conclusio debent conuerti simpliciter, & propter M transponendæ sunt præmissæ.

Ostenditur per reductionem ad impossibile modos imperfectos concludere.

Caput. LII.

Reductio ad impossibile fundatur in hoc principio, seu regula bonæ consequentiæ. Tunc aliqua conclusio euidenter est bona, & necessaria, cum ex opposito, seu cōtradictorio cōsequentis sequitur euidenter oppositum, seu contradictorium antecedentis, hoc est alicuius præmissæ, ex qua inferitur. Ratio est, quia tunc qui negat consequentiam non potest concedere omnes præmissas, quia sibi contradicet; ergo qui concedit omnes præmissas non

non potest negare consequentiam, quin sibi contradicat ; ergo consequentia sequitur necessario ex præmissis, atque adeo est bona, nec potest negari, concessis præmissis .

Reductio ergo ad impossibile est per quam ostenditur quod ex opposito, seu contradictorio consequentis sequitur euidenter oppositum seu contradictorium antecedentis, hoc est alicuius præmissæ, atque adeo negans consequentiam non potest concedere utramque præmissam ; eo enim ipso sequitur, quod concedens utramque præmissam non potest negare consequentiam .

Barocco, & Broccardo reduci non possunt ostensuè, & per conuersionem . Ratio est quia duæ ex tribus eorum propositionibus sunt particulares negatiuæ, atque adeo conuerti non possunt nisi per contrapositionem, quæ conuersio non est ad rem ; tertia verò propositio est vniuersalis affirmatiua, quæ conuerti non potest nisi per accidens in particularem affirmatiuam : facta autem tali conuersione utraque præmissa erit particularis, & ex paris particularibus nihil sequitur, ut dicitur cap. 53. Reducuntur ergo solum per impossibile ad Barbara, à cuius prima littera incipiunt .

Barocco reducitur ostendendo quod ex maiori, & contradictorio conclusio-
nis

nis sequitur in Barbara contradictorium minoris, atque adeo quod negans consequentiam non potest concedere vtramque præmissam, & concedens vtramque præmissam non potest negare consequentiam. Sit ex.gr. hic syllogismus in Barocco: *Omnis homo est animal; aliquod intellectuum non est animal; ergo aliquod intellectuum non est homo*: sumo eandem maiorem, *omnis homo est animal*: addo contradictorium conclusionis, *omne intellectuum est homo*; inferitur in Barbara, ergo *omne intellectuum est animal*, quæ est contradictoria minoris, *aliquod intellectuum non est animal*.

Eodem pacto reliqui modi secundæ figuræ reducuntur per impossibile ad aliquem modum primæ figuræ, sed non ad illum, à cuius prima littera incipiunt.

Regula reductionis ad impossibile secundæ figuræ continetur hoc versu.

Stat maior, trahit oppositum de sede minorem.

Sensus est: retinetur eadem maior: contradictorium conclusionis fit minor, & inferitur contradictorium minoris.

Pro Broccardo, & aliis modis tertiæ figuræ regula est.

Stat minor, oppositum transit maioris ad eadem.

Sensus est: contradictorium conclusionis

nis fit maior, retinetur eadem minor,
& infertur contradictorium maioris: ex.
*gr. aliquod animal non est homo; omne animal
est sensitiuum; ergo aliquod sensitiuum non est
homo*: reducitur ad Barbara faciendo
contradictorium conclusionis maiorem,
ac retinendo eandem minorem, & infe-
rendo contradictoriā maioris, ac dicendo
*omne sensitiuum est homo; omne animal est
sensitiuum; ergo omne animal est homo*: quæ
propositio est contradictoria maioris:
aliquod animal non est homo.

Pro modis indirectis regula est:

*Maiolem oppositum pellis, maiorque mi-
nore in*.

Excipe Celantes, in quo contraria res est


Nam minor opposito cedit, maiorque minori

Sensus est: contradictoria cōsequentia,
fit maior: maior euadit minor, & infertur
contradictoria minoris saltem mediātē,
& per conuersionem: ex. *gr. omnis homo est
animal; omne rationale est homo; ergo aliquod
animal est rationale*: reducitur ad celarent
*Nullum animal est rationale; omnis homo est
animal; ergo nullus homo est rationalis; ergo
aliquod rationale non est homo*, quæ est con-
tradictoria minoris: *omne rationale est
homo*.

Celantes reducitur modo opposito. Mi-
nor enim fit maior, contradictorium con-
clusionis fit minor, & infertur contradi-
ctorium

Coriū maioris: ex gr. nullus homo est equus, omne rationale est homo; ergo nullus equus est rationalis; reducitur ad Darij omne rationale est homo; aliquis equus est rationalis; ergo aliquis equus est homo; ergo aliquis homo est equus: quæ est contradictoria maioris: nullus homo est equus.

Aristoteles primo prior. cap. 6. reducit etiam Darij, & Ferio ad Barbara; & Celarent; Nam isti duo modi per impossibile reducuntur ad Cesare siquidem ex contradictoria conclusionis Darij, & Ferio, adiuncta maiori, sequitur in Cesare contradictoria minoris eorundem Darij, & Ferio; sed Cesare reducitur ostensivè ad Celarent; ergo Darij, & Ferio reducuntur mediatè ad Celarent; sed Celarent reduci potest ad Barbara, sumendo loco maioris propositionem infinitam æquivalentem: ex gr. *Nullum rationale est hinnibile; omnis homo est rationalis; ergo nullus homo est hinnibilis: Si dicatur, omne rationale est non hinnibile; omnis homo est rationalis; ergo omnis homo est non hinnibilis, reducitur ad Barbara; ergo omnes decem, & octo modi reduci possunt ad Barbara.*



Quedam regulę sunt communes omnibus figuris, alię particulares singularum. Communes sunt sex.

Prima est: medius terminus saltem in una præmissa sumi debet vniuersaliter distributiue distributione completa. Rationem attuli cap. 50. Vt autem sciatur an sumatur distributiue, duę sunt regulę traditę cap. 21. Prima est: subiectum distribuitur in omni, & sola vniuersali. Secunda est: prædicatum distribuitur in omni, & sola negatiua. Contra hanc regulam præter alia multa peccant omnia argumenta in secunda figura ex paribus affirmatiuis: ex. gr. *omnis homo est animal; omnis equus est animal; ergo omnis equus est homo*: *Animal* enim, quod est medius terminus neque distribuitur in maiori, neque in minori, cum vtraque sit affirmatiua. Contra eandem peccat, *omne animal fuit in arca Noe; meus canis est animal; ergo meus canis fuit in arca Noe*. Nam *animal* in maiori distribuitur solum incompletè.

Secunda regula est: terminus qui non fuit distributus in præmissis, nec debet distribui in conclusionē. Rationem attuli capite 50. Contra hanc regulam peccant modi directi primę figurę, in quibus minor est negatiua: ex. gr. *omnis homo est animal;*

mal; nullus equus est homo; ergo nullus equus est animal. Nam animal, quod non distribuitur in maiori affirmatiua, in qua est prædicatum, cum prædicatum distribuatur in sola negatiua, distribuitur in conclusiōne negatiua, in qua est prædicatum.

Tertia regula est: ex puris negatiuis nil sequitur, nisi syllogismus reducatur ad conditionalem. Rationem attuli eodem cap. 50. Ideo non concludit hoc argumentum; nullus homo est equus; nullum hinnibile est homo; ergo nullum hinnibile est equus. Concludit tamen hoc aliud, nulla res non actu alba disgregat actu visum; nulla res, quæ cæli ambitu continetur, est actu alba; ergo nulla res, quæ cæli ambitu continetur, disgregat actu visum. Maior non æquualet huic Omne actu album disgregat actu visum, quia hæc affirmatiua esset falsa, si nullum album existeret; illa verò negatiua esset vera. Concludit ergo, quia reducitur ad hunc syllogismum conditionatum, quodlibet si non est actu album, non disgregat actu visum; sed quodlibet si cæli ambitu continetur, non est actu album; ergo quodlibet si cæli ambitu continetur, non disgregat actu visum; in quo syllogismo à positione conditionata antecedentis arguitur ad positionem conditionatam consequentis.

Quarta regula est: ex puris particularibus nihil sequitur; quia eo ipso vel medius
ter-

terminus non distribuitur, vel distribuitur in conclusione aliquis terminus non distribuitus in præmissis. Exemplū sit *aliquod animal est homo; aliquod irrationale est animal; ergo aliquod irrationale est homo*

Quinta regula pro conclusione est ; conclusio sequitur debiliorem partem ; hoc est si vna præmissa sit particularis , etiam conclusio debet esse particularis , si vna præmissa sit negatiua, etiam conclusio debet esse negatiua .

Sexta regula est: medius terminus nunquam ponitur in conclusione . Quatuor postremæ regulæ continentur his versibus .

Partibus ex puris sequitur nil , siue negatis :

Si qua præit partis sequitur conclusio partis .

Si qua negata præit conclusio fitque negata .

Lex generalis erit , medium concludere nescit .

Pro prima figura duæ sunt regule . Prima est: ex maiori particulari non sequitur conclusio directa: ex. gr. *aliquod animal est homo; omnis equus est animal; ergo aliquis equus est homo .*

Secunda est: ex maiori negatiua non sequitur conclusio directa: ex. gr. *omnis homo est animal; nullus equus est homo; ergo nullus equus est animal .*

Pro

Pro secunda figura, prima regula est: ex puris affirmatiuis nil sequitur. Exemplum allatum est supra, cum est tradita, prima regula vniuersalis.

Secunda est: ex maiori particulari nil sequitur; ex. gr. *aliquod animal est homo; nullus equus est homo; ergo aliquis equus non est animal.*

Pro tertia figura prima regula est: conclusio semper debet esse particularis: ex. gr. *omnis homo est animal; omnis homo est intellectualis; ergo aliquod intellectuale est animal, & non sequetur, ergo omne intellectuale est animal.* Nam eo ipso intellectuale distribuitur in conclusione, cum non distributum fuerit in premisis.

Secunda est: ex minori negatiua nihil sequitur; ex. gr. *omnis homo est animal: nullus homo est equus; ergo nullus equus est animal.*

Ostenditur ex Regulis quadraginta quinque modos esse inutiles.

Caput LIV.

Demonstro id sic: omnes modi, qui peccant contra aliquam ex allatis regulis sunt inutiles; sed omnes quadraginta quinque ultra decem, & nouem, contentos quatuor versibus peccant contra aliquam ex regulis allatis; ergo quadragin-

draginta quinque sunt inutiles . Probatur
minor , & primo demonstratur quod in
prima figura ex sexdecim possibilibus ,
duodecim vltra quatuor peccant , & non
concludunt directè . Nam in quantitate
purè vniuersali si vtraque præmissa sit vni-
uersalis affirmatiua , est Barbara : si vtraque
præmissa sit negatiua nihil sequitur , quia
ex puris negatiuis nihil sequitur : si maior
sit affirmatiua , minor negatiua , non sequi-
tur conclusio directæ , quia ex minori ne-
gatiua in prima figura non sequitur con-
clusio directæ : si maior sit negatiua , minor
affirmatiua est Celarent .

Si vtraque præmissa est particularis ,
omnes quatuor modi sunt inutiles , quia
ex puris particularibus nihil sequitur .

Si maior sit vniuersalis , minor sit par-
ticularis , si vtraque affirmatiua , est Darij ;
si vtraque negatiua , nihil sequitur ; si maior
affirmatiua , minor negatiua , nihil sequi-
tur propter minorem negatiuam ; si maior
negatiua , minor affirmatiua , est Ferio .

Demum si maior sit particularis , minor
vniuersalis omnes quatuor modi sunt inu-
tiles , quia ex maiori particulari non se-
quitur conclusio directæ ; ergo ex sexdecim
modis directis , Barbara , Celarent , Darij , &
Ferio sunt utiles ; alij duodecim peccant
contra aliquam regulam .

In modis indirectis si ambæ præmissæ

G

sint

sint vniuersales, si vtraque sit affirmatiua, est Baralipton : si vtraque negatiua nihil sequitur : si maior affirmatiua, minor negatiua, est Fapesmo: si maior negatiua, minor affirmatiua, est Celantes . .

Si vtraque sit particularis, omnes quatuor modi sunt inutiles, quia ex paribus particularibus nihil sequitur .

Si maior sit vniuersalis, minor particularis, si vtraque affirmatiua est Dabitur ; si vtraque negatiua, nihil sequitur ; si maior affirmatiua, minor negatiua nihil sequitur, quia subiectum minoris, quod in minori particulari non distribuitur, distribuitur in conclusione negatiua, in qua esset prædicatum ; si maior negatiua, minor affirmatiua, idem est vitium .

Demum si maior sit particularis, minor vniuersalis, si vtraque affirmatiua, nihil sequitur, quia medius terminus nec distribuitur in maiori particulari, in qua est subiectum, nec in minori affirmatiua, in qua est prædicatum ; si vtraque negatiua nihil sequitur ; si maior affirmatiua, minor negatiua, est Frisefomorum ; si maior negatiua, minor affirmatiua, medius terminus non distribuitur in vlla præmissa ; ergo ex sexdecim indirectis Baralipton, & alii quatuor concludunt, vndecim reliqui peccant contra aliquam regulam .

In secunda figura in vtraque præmissa
vni-

vniversalis, si vtraque sit affirmatiua, vel vtraque negatiua nihil sequitur, quia in secunda figura neque sequitur conclusio ex puris affirmatiuis, neque ex puris negatiuis: si maior sit affirmatiua, minor negatiua, est Camestres: si maior negatiua, minor affirmatiua, est Cesare.

Si vtraque præmissa sit particularis omnes quatuor modi sunt inutiles, quia ex puris particularibus nihil sequitur.

Si maior sit vniversalis, minor particularis, seu vtraque sit affirmatiua, seu vtraque negatiua, nihil sequitur: si maior affirmatiua, minor negatiua est Baroco: si maior negatiua, minor affirmatiua est Festino. Demum si maior sit particularis, minor vniversalis omnes quatuor modi sunt inutiles, quia in secunda figura nihil sequitur ex maiori particulari.

In tertia figura in vtraque præmissa vniversalis si vtraque est affirmatiua, est Darapti: si vtraque negatiua, nihil sequitur: si maior affirmatiua, minor negatiua, nihil sequitur propter minorem negatiuam: si maior negatiua, minor affirmatiua est Felapton. Si vtraque præmissa sit particularis omnes quatuor modi sunt inutiles. Si maior sit vniversalis, minor sit particularis, si vtraque affirmatiua est Dabitis: si vtraque negatiua, nihil sequitur: si maior affirmatiua, minor negatiua, nihil sequitur

propter minorem negatiuam, si maior negatiua, minor affirmatiua est Ferison. Denique si maior est particularis, minor vniuersalis, si vtraque est affirmatiua est Disamis; si vtraque negatiua nihil sequitur; si maior affirmatiua, minor negatiua nihil sequitur ex minori negatiua: si maior negatiua minor affirmatiua est Broccardo; ergo in tertia figura ex sexdecim modis omnes decem vltra sex enumeratos sunt inutiles; ergo ex sexaginta quatuor modis possibilibus soli nouemdecim sunt vtilis, alii quadraginta quinque sunt inutilis, quod erat propositum demonstrandum.

Comparatio figurarum, & modorum.

Caput. LV.

INter figuras præstantissima est prima concludens directè ex pluribus. Primo quia est clarius, & euidentior cæteris, & per illam alię perficiuntur, & clarificantur. Secundo quia est sufficientissima ad probandas omnes conclusiones, singulares, & vniuersales, affirmatiuas, & negatiuas, cum secunda figura non possit probare vllam affirmatiuam, tertia non possit probare vllam vniuersalem. Tercio quia habet perfectam rectitudinem, & naturalitatem, cum alię semper habeant aliquam
inna-

innaturalitatem in eo termino, qui non potest occupare eandem sedem in præmissis. Quarto quia medius terminus etiâ positione est medius inter maius, & minus extremum; est enim vno extremo minor, quia illi subiicitur, & est maior altero, quia de illo prædicatur.

Secundum locum obtinet secunda figura, quæ præstat tertiæ præcipuè ex eo, quia possunt per illam probari conclusiones vniuersales, atque adeo scientificæ, cum per tertiam probentur solæ particulares, quæ non sunt scientificæ.

Tertium locum obtinet tertia figura. Quartum videntur occupare modi indirecti, quia non concludunt per se, vt dictum est cap. 48.

Ex modis perfectissimus est Barbara, nam nulli cedit euidentiæ, & omnes vincit præstantia conclusionis, quam probat. Vniuersalis enim affirmatiua est conclusio maximè scientifica, ideoque omnes scientiæ, ac præsertim mathematicæ fere semper argumentantur in Barbara. Sed sicut vniuersalis affirmatiua est perfectissima, ita est difficillima probatu, cum probetur per vnicum modum; facillima impugnatu, cum impugnetur per omnes modos negatiuos, qui sunt tredecim.

Secundus est Celarent, qui probat clarissimè vniuersalem negatiuam, quæ se-

cundum locum obtinet inter cōclusiones
scientificas:& huic affines sunt Camestres,
& Cesare. Conclusio vniuersalis nega-
tiua probatur per quatuor modos, impu-
gnatur per omnes sex affirmatiuos.

Tertius est Darii probans particularem
affirmatiuam, quæ probari potest sex mo-
dis,& impugnari per quatuor concluden-
tes vniuersaliter negatiuè.

Quartus est Ferio probans particulare
negatiuam, quæ probatur per tredecim
modos,impugnatur per vnicum Barbara.

Ex modis aliqui probant plures, aliqui
pauciores conclusiones. Barbara probat
tres solum,nimirum vniuersalem affirma-
tiuam, & particularem eius subalterna-
tam, & alteram particularem affirma-
tiuam,in quam istę conuertuntur. Celarent,
Celantes, Cesare, & Camestres probant
quatuor conclusiones, vniuersalem nega-
tiuam, & particularem illius subalterna-
tam, & præterea vniuersalem, & parti-
cularem negatiuas,in quas fit conuersio.

Darii,& alii modi affirmatiui particu-
lares duas probant conclusiones, nempè
particularem affirmatiuam, & eius con-
uersam.

Ferio,& particulares negatiui probant
unicam conclusionem, cum particularis
negatiua non conuertatur.

De syllogismo expositorio , & eius reductione. Caput. LVI.

SYllogismus expositorius est qui constat ex omnibus terminis, vel saltem ex medio singulari; ex. gr. *Petrus currit; Petrus est filius Francisci; ergo filius Francisci currit*. Vocatur expositorius, tum quia singularia sunt exposita sensibus, tum quia sicut propositiones de terminis communibus resolvuntur, & exponuntur per propositiones de terminis singularibus, sic syllogismus de terminis communibus exponitur per syllogismum de singularibus.

Ut tradam regulas, primo explicandum quo pacto conuertantur propositiones singulares.

Dico primo: cum uterque terminus est singularis, tam affirmatiua, quam negatiua conuertuntur in aliam singularem: ex gr. *Petrus non est filius Francisci; ergo filius Francisci non est Petrus*.

Dico secundo: cum prædicatum est terminus communis, singulares affirmatiua conuertuntur in solam particularem, negatiua in vniuersalem, & particularem: ex. gr. hæc affirmatiua: *Petrus est animal*, conuertitur in hanc; *ergo aliquod animal est Petrus*; hæc negatiua *Petrus non est equus* conuertitur in istas duas *ergo nullus equus*

est Petrus:ergo aliquis equus non est Petrus.

In syllogismo expositorio sunt tres figure; in prima etiam modi indirecti. Cum vterque terminus est singularis, & non potest sumi nisi vniuersaliter, in singulis figuris sunt tres tantum modi vtilis. Primus cum vtraque præmissa est affirmatiua: secundus cum maior affirmatiua, minor negatiua: tertius cum maior negatiua, minor affirmatiua: quartus est inutilis, cum vtraque præmissa est negatiua.

Cum verò terminus singularis potest sumi modo vniuersaliter, modo particulariter, tum totidem sunt modi in syllogismo expositorio, quot in communi, & eadē regulæ.

Quæres quid est terminum singularem sumi vniuersaliter, vel particulariter? Respondeo sumi vniuersaliter est sumi pro omni, quod est illud; sumi particulariter est sumi pro aliquo tantum, quod est illud: ex gr. cum dico: *hic Deus est pater*; terminus singularis *hic Deus* sumitur particulariter tantum, hoc est non pro omni persona, quæ est Deus, sed pro aliqua tantum. Sensus enim est *aliqua persona, quæ est hic Deus, est Pater*. E conuerso cum dico *hic Deus creauit mundum*, sumo hunc Deum vniuersaliter, & sensus est: *omnis persona, quæ est hic Deus, creauit mundum*. Termini singulares creati semper sumuntur vni-

vniuersaliter; soli termini diuini propter
mysterium Trinitatis aliquando sumuntur
particulariter .

Collige primo solutionem sophismatum
contra mysterium Trinitatis . Hoc argu-
mentum ; *Pater est hic Deus ; Filius non est*
Pater; ergo filius non est hic Deus , non con-
cludit, quia Deus in conclusione sumitur,
vniuersaliter , in maiori particulariter ,
cum sensus maioris sit , *Pater est aliqua*
persona, quæ est hic Deus; sensus conclusionis
sit *filius nulla est persona , quæ sit hic Deus* .
Hoc argumentum . *Hic Deus est Pater ; hic*
idem Deus est filius, ergo filius est Pater ; non
concludit, quia medium, hoc est *hic Deus* in
nulla præmissa sumitur vniuersaliter . Sen-
sus enim præmissarum est : *aliqua persona,*
quæ est hic Deus, est Pater ; aliqua persona,
quæ est hic Deus est filius; ex puris autem
particularibus nihil sequitur . Idem dic de
aliis argumentis hæreticorum : peccant
enim omnia contra regulas Aristotelis .

Collige secundo etiam syllogismum
expositorium niti principiis dictum de
omni, dictum de nullo, hoc est, quod affirma-
tur, aut negatur vniuersaliter de aliquo
singulari, affirmari etiam debet, aut negari
de omni, quod est illud . Idcirco etiam syl-
logismus expositorius reducitur ad com-
munem .

De reductione aliarum argumentationum. Caput. LVII.

PRIMA argumentationis species post syllogismum est inductio. Definitur oratio, in qua ex singularibus, vel inferioribus pluribus, aut uno tantum infertur aliquid vniuersale, vel superius.

Inductio duplex est; alia quæ fundatur in sola apprehensione terminorum; alia, quæ fundatur in experientia. Prima est, per quam ad hoc ut intellectus cognoscat prædicatum conuenire uni, vel pluribus singularibus, sufficit quod apprehendat tale prædicatum, & talia singularia, etiamsi nullam faciat experientiam: ex. gr. cum ego probo hoc principium, omne totum est maius sua parte, ex eo quod hoc totum est maius, & hoc aliud est maius &c, facio inductionem, fundatam in sola apprehensione terminorum, quia terminis apprehensis ut possibilibus, & nulla facta experientia, cognosco quod hoc totum est maius sua parte. Talis inductio vocatur metaphysica, & mathematica, quia omnia principia vniuersalia metaphysica, & mathematica ex terminis nota colliguntur per hanc inductionem. Sicut enim apprehensio vniuersalis abstrahitur ab apprehensione singularium; sic propositio vniuersalis colligitur ex
pro-

propositione singularium.

Inductio fundata in sola apprehensione potest reduci ad syllogismum, sed non necessario reducitur actu. Potest reduci, quia potest fieri hic syllogismus: *predicatum quod conuenit alicui singulari in quantum est tale, conuenit omnibus, quae sunt talia; sed maius sua parte conuenit huic toti in quantum est totum; ergo conuenit omnibus totis, atque adeo omne totum est maius sua parte: sed non necessario reducitur actu; alioquin de ea maiori vniuersali predicatum, quod conuenit alicui in quantum est tale &c. redit difficultas; nam colligitur per inductionem sine syllogismo fundato in alia propositione vniuersali, de qua rediret argumentum, & procederetur in infinitum. Nititur inductio illo principio, in quantum intellectus non potest illi contradicere, eo pacto, quo syllogismus nititur dicto de omni, dicto de nullo, in quantum intellectus non potest illis contradicere.*

Collige, quod sicuti syllogismus fundatur in dicto de omni, dicto de nullo, sic inductio fundatur in dicto de vno, quatenus tali, & negato de vno quatenus tali. Sicut enim intellectus syllogizans, ex eo, quod aliquid dicatur de omni, infert, quod dici debet de contentis in illo; sic intellectus inducens, ex eo, quod aliquid dicatur de vno quatenus tali, infert, quod dici debet

de omnibus continentibus talem rationē. Ideo inductio est veluti syllogismus inuersus: syllogismus est veluti inductio inuersa.

Inductio, quæ fundatur in experientia, est per quam ut intellectus cognoscat prædicatum conuenire singularibus uni, vel pluribus, non sufficit apprehensio, sed requiritur experientia: ex. gr. cum probo quod omnis ignis est calidus ex eo, quod hic ignis est calidius, hic alius ignis est calidus &c, non sufficit quod apprehendam, aut videam istos ignes, sed debeo calorem experiri per tactum: ut probem quod omnis canis est latrabilis, non sufficit, quod videam canes singulares, sed debeo latratum experiri per auditum. Hęc inductio vocatur physica, quia in illa fundatur omnia principia vniuersalia physicę.

Inductio experimentalis reducitur necessario, & actu ad syllogismum, in quantum subintelligitur principium, quo addito fit syllogismus. Hoc autem principium, quod colligitur per inductionem metaphysicam est: quotiescunque aliquod prædicatum conuenit singulis conuenientibus in aliqua ratione, de quibus per longum tempus facta est experientia, & non est indicium, quod conueniat ex mero accidente, conuenit etiam omnibus, de quibus non est facta experientia, atque
adeo

adeo est naturale subiecto; sed esse calidum
conuenit omnibus ignibus, de quibus fa-
cta est experientia per longum tempus;
ergo conuenit absolutè omnibus ignibus,
& est naturale igni.

Quod autem talis syllogismus debeat
actu fieri ab intellectu, probatur, quia
alioquin non apparet quomodo ex iis, quæ
experitur, possit interre idem prædicatum
de alijs, de quibus non fecit experientiã.
Quomodo enim concludit: *hic ignis est ca-
lidus; hic alius est calidus; ergo omnes sunt
calidi.*

Dices: concludit, quia subintelligitur,
& sic de reliquis. Sed contra, quia cum
dicitur, & sic de reliquis, vel intelligitur so-
lum de iis, de quibus facta est experien-
tia, & redit difficultas: quo enim pacto in-
fero tale prædicatum de alijs, quæ non
sum expertus: vel intelligitur etiam de
reliquis, quæ non sum expertus, & quero,
quo pacto ex ijs, quæ sum expertus, infero,
quod etiam alia eodem pacto se habent,
nisi habeo in mente illud principium insi-
tum nobis à natura.

Tertia species argumentationis est
enthymema, quod sumitur dupliciter.
Primo pro syllogismo truncato, & defini-
tur oratio, in qua posita una præmissa, altera
verò omissa, & subintellecta, festinata inferitur
conclusio; ut cum dico *Petrus est homo; ergo
est*

est animal; subintelligitur omnis homo est animal. Reducitur ad syllogismum, addendo propositionem omissam. In mente non datur hoc enthymema, quia intellectus ut inferat conclusionē, debet habere utramque præmissam.

Secundo sumitur enthymema ab Aristotele primo Rhetor. caput. 2. pro syllogismo rhetorico, siue morali. Definiri potest oratio, in qua quibusdam positis alterum quid ex ijs, quæ posita sunt, non necessario, sed verisimiliter accidit, eo quod hæc sint; ex. gr. *pleræque matres amant filios; hæc est mater; ergo hæc amat filios*: conclusio sequitur ex præmissis non necessario, cum in aliquibus casibus fallat, eo quod quædam matres non ament filios, sed verisimiliter, & plerumque. Hic syllogismus non potest perfectè reduci ad syllogismum logicum, cum non possit fieri maior vniuersalis dicendo *omnes matres amant filios*. Reducitur igitur imperfectè in quantum plerumque idem significat, ac *quasi semper*, & *pleræque matres* idem significat, ac *fere omnes*: sed ly *quasi* tollit perfectionem syllogismi. Similiter hic syllogismus non nititur dicto de omni, & de nullo, sed dicto de fere omni, ac dicto de fere nullo. Vocatur autem syllogismus rhetoricus, moralis, & politicus, quia in rebus rhetoricis, moralibus, & politicis solemus argumētari non ex pro-

posi-

positionibus vniuersalibus, sed ex iis, quæ plerumque contingunt.

Quarta species argumentationis est exemplum, quod ab Aristotele loco citato vocatur inductio rhetorica. Definitur autem oratio, in qua ex pluribus singularibus infertur aliquid quasi vniuersale; ex gr. hæc mater amat filios; hæc alia amat; ergo pleræque matres amant. Sicut autem syllogismus rhetoricus est syllogismus imperfectus, quia procedit ex maiori non vniuersali, sed quasi vniuersali, ita inductio rhetorica est inductio imperfecta, quia procedit non ex omnibus, sed ex quasi omnibus singularibus, & infert conclusionem non vniuersalem, sed quasi vniuersalem. Ratio autem est, quia matres licet habeant inclinationem ad amandum, tamen amant liberè, ideoque aliquando non amant. At singularia, de quibus fit inductio perfecta, non solum habent inclinationem, sed etiã necessitatem ad prædicatum; ex gr. ignis habet necessitatem ad calorem, ideoque semper est calidus, & sic fieri potest inductio, non solum ex fere omnibus, sed etiã ex omnibus, quæ experimur, secluso miraculo, & potest fieri conclusio vniuersalis. Exemplum reducitur ad syllogismum proportionaliter sicut inductio.

Quinta species argumentationis est paritas. Definiri potest oratio, in qua ex eo, quod

quod aliquod prædicatū conuenit uni, infertur quod conueniat etiam alteri, in quo videtur valere eadem ratio: ex g. Cælum lune est incorruptibile; ergo etiam solis: videtur enim esse eadem ratio vtriusque. Quando paritas desumitur ex aliquo simili, in quo sit eadem ratio necessario connexa cum prædicato, tum reducitur ad inductionem: possumus enim inferre consequentiam vniuersalem: ergo omne tale habet idem prædicatum. Quando paritas desumitur ex aliquo simili, in quo sit eadem ratio non necessario, sed plerumque connexa cum prædicato, argumentū reducitur ad exemplum: si quidem potest inferri consequentia quasi vniuersalis; ergo pleraque talia habent idem prædicatum: ex. gr. hæc mater magis amauit filium, quam fratrem; ergo etiam hæc alia magis amauit filium, quam fratrem: potest enim inferri, ergo plerumque matres magis amant filios, quam fratres, quia amor naturaliter descendit. Quando paritas desumitur ex aliquo nō plerumque, sed raro connexo cum prædicato, tum argumentum est captiosum, & sophisticum: ex. gr. sophisticum est hoc argumentum. hæc mater magis amauit fratrem, quam filium; ergo etiam hæc alia: nam raro, & contra inclinationem naturę accidit, ut mater magis amet fratres, quam filios.

Sexta species argumentationis est conuersio

uersio . Reducitur ad syllogismum in quantum est oratio, in qua posito antecedente sequitur necessario consequens, licet non perfectè distinctum ab antecedente, per quod deficit à perfectione syllogismi, vt dictum est cap. 46.

Syllogismus conditionatus, cuius regulas tradidi cap. 43. perfectè participat definitionē, & rationem syllogismi. Quare syllogismus in genere diuiditur in absolutum, & conditionatum tanquam in suas species.

De cōditionato sufficiunt duæ regulæ ibi positæ. De absoluto requiritur accuratior distinctio figurarum, & modorum, vt separentur modi vtilis ab inutilibus. Adde plerumque syllogismos absolutos posse reduci ad conditionatos: ex. gr. hic syllogismus in Barbara *omne rationale est risibile; omnis homo est rationalis; ergo omnis homo est risibilis*; æquiualeat huic conditionato: *omne intelligibile si est rationale est risibile; omne intelligibile si est homo est rationalis; ergo omne intelligibile si est homo est risibile*; in quo ex positione cōditionata antecedentis arguitur ad positionem conditionatam consequentis. Idem dic proportionaliter de reliquis.

De Syllogismo sophistico, & de fallacijs. Caput. LVIII.

Syllogismus sophisticus definitur ab Aristotele primo Elenchorum capit. 5. qui videtur procedere ex præmissis probabilibus, & veris, nec sunt: vel videtur concludere, & non concludit. Procedens ex præmissis, quæ videntur veræ, & probabiles, & non sunt, est sophisma ex parte materiæ, & hæc dissolvere spectat ad scientias, & facultates agentes de iis materiis: qui videntur concludere, & non concludunt sunt sophismata ex parte formæ, & hæc dissolvere spectat ad logicam, quæ agit de forma syllogismi. Et quidem fallacias fundatas in equiuocatione, vel analogia; in variatione suppositionis; in ampliacione, statu, & restrictione; in diminutione, alienatione, ac remotione; in apparenti contradictione; in confusione oppositionum; in non penetrata vi propositionum copulatiuarum, disiunctiuarum, conditionalium, casualium, exponibilium, modalium; in non seruatis regulis syllogismorum; & alias plures dissoluimus suis locis. Proponendæ remanent, vel potius indicandæ tredecim fallaciæ, quarum sex sunt in dictione, septem extra dictionem.

Primæ tres consistentes in dictionibus,

seu

seu vocibus valde affines sunt fallaciæ
æquiocationis, amphibologiæ, & variationis
accentus, vel dyphongi. Exemplum
æquiocationis est : *omnis canis latrat; aliqua
constellatio est canis; ergo aliqua constella-
tio latrat.*

Exemplum amphibologiæ consistentis
in diuerso sensu est, *omnes episcopi sunt
sacerdotes; isti equi sunt episcopi; ergo isti equi
sunt sacerdotes.*

Exemplum variationis accentus, seu
dyphongi est; *omnia leuissima feruntur
sursum; hoc marmor est leuissimum; ergo hoc
marmor fertur sursum.*

Soluuntur vno verbo negando conse-
quentiam, & detegendo æquiocationem,
vel amphibologiam, vel variationem ac-
centus, aut dyphongi.

Quarta, & quinta fallacia est composi-
tionis, ac diuisionis. Fallacia compositio-
nis est, in qua ex eo, quod aliqua prædi-
cata conueniant subiecto diuisim, hoc est
vnum sine alio, infertur quod possint con-
uenire coniunctim; ex. gr. *omnis sedens po-
test ambulare; Petrus est sedens; ergo potest si-
mul sedere, & ambulare.*

Fallacia diuisionis est, per quam ex eo,
quod aliqua prædicata non possint subie-
cto conuenire coniunctim, infertur quod
neque diuisim; ex. gr. *impossibile est vigilan-
tem dormire; Petrus vigilar; ergo impossibile
est*

est Petrum dormire. Soluuntur distinguendo sensum compositum, & diuisum.

Sexta vocatur fallacia figure dictionis, & est in qua propter similitudinem dictionū significantium diuersa, arguitur ac si significarent idem; exm. gr. *quidquid emissi, comedisti; emissi carnes crudas; ergo comedisti carnes crudas: ly quidquid* significat substantiam rei emptæ, non verò qualitatem crudi, & cocti, & tamen arguitur ac si significaret, quod emissi, comedisti cum ea qualitate, quam habebat dum emerēs.

Prima extra dictionem est fallacia accidentis, cum ex eo, quod aliquod prædicatum conueniat subiecto ratione accidentis, arguitur, quod illi conueniat secundum se; vel ex eo, quod conueniat secundum se, arguitur quod conueniat ratione accidentis; ex. gr. *album est concretum accidentale; Petrus est albus; ergo Petrus est concretum accidentale.* Ex eo quod album sit concretum accidentale prout sumitur cū albedine, arguitur quod Petrus secundum se sit concretum accidentale. E conuerso cum dicitur, *Petrus est in peccato mortali; cognosco hunc, quem video, esse Petrum; ergo cognosco hunc, quem video esse in peccato mortali:* ex eo quod cognoscam Petrum secundum se, arguitur, quod cognoscam illum secundum accidens peccati mortalis.

Secunda est fallacia à *secundum* quid
ad simpliciter, de qua egi cap. 29.

Tertia ex ignoratione elenchi, seu cō-
tradictionis, cum inferūtur tanquam con-
tradictoria quæ non sunt, & de hac egi
cap. 28.

Quarta est fallacia antecedentis, &
consequentis, cum infertur consequens
non seruando leges consequentię, ex gr.
*omnis homo est animal; ergo omne animal est
homo*. Vniuersalis enim affirmatiua con-
uertitur simpliciter, cum possit conuerti
solum per accidens.

Quinta est, fallacia petitionis principii,
cū petitur in pramissis vt cōcedatur prin-
cipium quæstionis, hoc est id, de quo est
controuersia, cum debeat probari.

Sexta est cum assumitur causa partialis
alicuius effectus ac si esset totalis: ex gr.
*ideo Petrus videt se ipsum, quia habet ante
oculos speculum; sed etiam cæcus habet ante
oculos speculum; ergo etiam cæcus videt se
ipsum*. Ratio adæquata, & totalis, cur
Petrus videat se ipsum, non est, quia
habet ante oculos speculum, sed etiam
quia habet potentiam visiuam expedi-
tam, oculos apertos, speculum illumina-
tum &c.

Vltima est secundum plures interro-
gationes vt vnam: vt dum queritur *ho-
mo, & equus suntne risibiles an non?* & in-
statutur

statum, ut vel concedatur absolute propositio, vel negetur; & tamen debent distinguere responsiones *homo est risibilis, equus non est risibilis*. Hec sufficiat indicare: nam sunt explicata in mea explanatione operum Aristotelis, lib. 1. & 2. Elenchorum.



QVAE-

QVAESTIONES

PROOEMIALES AD

PHILOSOPHIAM

ET SCIENTIAS

*Explicatur ordo disputan-
dorum.*



TRADITVRI quæstiones logicas,
physicas, ac metaphysicas præ-
mittendas duximus quæstiones
prooemiales non solum ad logi-
cam, sed ad omnes scientias. Quia igitur
res cognosci non possunt perfectè, nisi per
suum causam præsertim specificatiuâ; cau-
sa autem specificatiua actuum, & habi-
tuum intentionalium est obiectum, natura
scientiarum cognosci debet per earum
obiecta. Rursus quia obiecta specie diuer-
sa sunt penè innumerabilia, adeoque spe-
cificant innumerabiles actus, atque habi-
tus cognoscitiuos specie diuersos, ex quo-
rum multitudine inordinata sequeretur
confusio, necessaria fuit aliqua diuisio ar-
tifi-

tificialis, per quam tum habitus, tum obiecta distribuerentur in certas classes, ideoque facta fuit à sapientibus celebris illa diuifio facultatum in physicam, mathematicam, metaphysicam, & logicam His præmissis in quatuor primis quæstionibus, quæst. 5. procedimus ad examinandum, an allata diuifio sit bona, & fundata in rerum natura; an quatuor facultatibus correspondeant quatuor abstractiones diuersæ quo pacto tum ipsis, tum logicæ prædictæ sint assignanda obiecta attributionis, materialia, & formalia; quis inter illas datur ordo tum inuentionis, tum doctrinæ, tum dignitatis, tum certitudinis; an omnes aliæ scientiæ speculatiuæ, & artes, seu scientiæ prædictæ subordinentur primis quatuor, ita vt quædam sint propriè subalternatæ, quædam non, ex qua occasione explicamus scientias physico-mathematicas subalternatas partim physicæ, partim mathematicæ.

Iam quia hætenus supposuimus diuisionem actuum, & habituum in speculatiuos, & practicos, quæst. 10. incipimus agere de tali diuisione, ac primo querimus, vtrum quædam veritates obiectiuæ sint speculatiuæ, quædam practicæ; deinde proponimus definitionem cognitionis practicæ, ac speculatiuæ, ex eaque deducimus definitionem habitus practici, ac speculatiui, explicantes

cantes etiam, quo pacto actus practici, ac speculatiui differant ex obiecto, vel ex modo tendendi; quinam actus sint vltimè practici, ac directiui ad operandum; quid sit speculatio, & consultatio; quomodo differant, & quos actus includant; an cognitio speculatiua sit nobilior practica; vtrum ad executionem requiratur imperiū rationis consequens imperium voluntatis; ac deinde descendimus ad examinandum, an quatuor facultates primariæ sint speculatiuæ, vel practicæ, vel partim speculatiuæ, partim practicæ.

Demum quia supposuimus, quatuor facultates esse scientias, scientia verò est virtus intellectus, quæst. 15. incipimus agere de virtutibus intellectus, ac præmissa, & explicata definitione virtutis intellectuales, eiusque diuisione in quinque virtutes, hoc est intellectum, scientiam, sapientiam, prudentiam, & artem, quarum primæ tres sunt speculatiuæ, duæ sequentes sunt practicæ, quærimus, an primæ tres virtutes, intellectus, scientia, & sapientia sint habitus speciales, quid sint, & quomodo differant inter se; deinde de duabus virtutibus, practicis, prudentia nimirum, & arte, examinamus quid sint, quo pacto differant inter se; quomodo prudentia differat à scientia morali; & vniuersim quo pacto in artibus pars theórica differat à parte pra-

ctica: cur prudentia, sit vnica, princeps, & architectonica omnium artium, artes verò sint plures, ac penè innumerabiles; quomodo prudentia monastica, œconomica, & politica coalescant in vnā prudentiam; an artes benè diuidantur in actiuas, & factiuas, rationales, & irrationales, atque aliqua expicamus circa artes rationales. Descendimus deinde ad examinandū, an quatuor facultates speculatiuæ primarię sint scientię subalternantes, ac virtutes intellectus; an logica practica etiam secundum partem topicam, & sophisticam sit virtus, scientia, & ars; vtrum logica bene diuidatur in naturalem, & artificialē, docentem, & vrentem. an, & quomodo sit necessaria ad reliquas scientias; ac demū ex omnibus disputatis inferentes definitionem logicæ, quæ definitio secundum Aristotelem est vltimus fructus disputationis, ac demonstrationis, quæstiones proœmiales concludimus.

*Vtrum cognitio perfecta debeat
esse per causam rei.*

Quæstio I.

VIdetur quod non, primo quia Deus cognoscit perfectissimè se ipsum; sed non per causam, cum causam non habeat; ergo.

ergo res potest cognosci perfectè & non per causam. Beat: etià cognoscunt Deum perfectè per visionem beatificam , & non per causam .

2. Si dicatur , quod cognitio perfecta rei habentis causam debet esse per causam , non autem cognitio rei carentis causa , contra est, quia cognitio intuitiva entis causati est valde perfecta: ex gr. cognitio intuitiva , qua angelus cognoscit hominem in se ipso penetrans intimè eius essentiam, & naturam, est valde perfecta, & perfectior quacunque cognitione non intuitiva; sed cognitio intuitiva cognoscit re per se ipsam, & non per causam ; ergo cognitio perfecta non debet esse per causam .

3. A priori entia: præsertim spiritualia , vt angeli, cum sint perfectè intelligibilia , possunt perfectè manifestare se ipsa, totam suam essentiam , & omnes proprietates , sed si se manifestent perfectè, cognoscuntur perfectè ab intellectu proportionato, & non per causam; ergo cognitio perfecta non debet esse per causam .

4. Si per causam res perfectè cognoscerentur, deberent per causam solui omnes quæstiones ad illas pertinentes, præsertim illæ quatuor, ad quas ceteræ reducuntur : *an sit, quid sit, qualis sit, propter quid sit*, cognitio quippe non soluens omnes quæstiones non quietat intellectum, adeoque non

est perfecta; sed per causā soluitur sola quæstio *propter quid res sit*, quæ sola est quæstio causæ, aliæ quæstiones non solvuntur; ergo res non perfectè cognoscuntur per causā.

5. Deberent res cognosci per omnes causas etiam per primam causam, ut perfectè cognoscerentur; sed hoc est falsum: nam nihil cogitantes de Deo, qui est prima causa, possumus perfectè cognoscere veritates præsertim mathematicas; ergo. Addo quod cognitio cognoscens res per omnes causas videtur non esse cognitio humana, quæ possit acquiri in hac vita mortali, sed diuina, vel angelica.

Respondeo manifestum esse à priori, & à posteriori, omnem cognitionem cognoscentem rem, & non per causam seu rationē ipsius rei, esse imperfectam; solam autē cognitionem cognoscentem rem per causam posse esse perfectam. A priori probatur, quia perfecta cognitio nihil est aliud, quam perfecta repræsentatio rei cognite: repræsentatio verò rei cognitæ tunc solū est perfecta, cū per talē repræsentationem res ita ponitur in mente, sicut est à parte rei. Ad hoc autē ut res ita ponatur in mente, sicut est à parte rei, requiritur, ut id quod est ratio, & causa, propter quam res ponitur à parte rei secundū esse reale, sit ratio & causa, propter quā res cognoscitur & ponitur in mente secundū esse intentionale

nale cognitio; ergo ad perfectam cognitionem requiritur, ut cognoscat rem per causam, & rationem, propter quam est; cognitio verò cognoscens causam per effectum est imperfecta, quia per illam res est in mente modo contrario, & inuerso, ac sit à parte rei. Cum enim causa sit ratio, cur effectus sit à parte rei, effectus est ratio, cur causa sit in mente. Cognitio similiter, qua res habens causam cognoscitur & non per causam, est imperfecta, quia causa, quæ est ratio cur res sit à parte rei, non est ratio, cur sit in mente.

Allata ratio à priori confirmatur à posteriori. Nam cognitio relinquens intellectum inquietum, & curiosum, est imperfecta, cognitio verò quietatiua, & ablatiua curiositatis est perfecta: inquietudo enim oritur ex eo, quod intellectus habens cognitionem imperfectam non satiatur, sed aspirat ad perfectam; curiositas etiam, qua intellectus querit cur, quærit cognitionem causæ tamquam satiatiuam, adeoque perfectiuam cognitionis; sed cognitio, qua ita cognoscimus effectum, ut ignoremus causam, relinquit intellectum inquietum, & curiosum circa causam rei; cognitio, qua cognoscimus causam, sed per effectum, relinquit intellectum inquietum de ipso modo cognoscendi causam: è conuerso cum cogno-

scimus effectum per causam eo ipso quietamur, & satisfat curiositati; ergo cognitio cognoscens rem, & non per causam, semper est imperfecta; sola cognitio cognoscens rem per causam potest esse perfecta. Ideò sapienter Aristoteles primo posteriorum textu quinto ad scientiam, hoc est ad cognitionem perfectam rei, requirit ut sit per causam.

Ad 1. In resolutione quæstionis dictum est, quod ut res perfectè cognoscatur debet cognosci per causam, vel per rationē, propter quam res est. Quia igitur nulla creatura est sibi sufficiens ratio essendi, sed habet esse à causa distincta, ideo ut creaturæ perfectè cognoscantur, debent cognosci per causam distinctam. E converso quia Deus est sibi sufficiens ratio essendi, ita ut non habeat esse ab vlla causa, ideo ut perfectè cognoscatur debet cognosci per se ipsum, non autem per causam. Cognitio igitur, qua Deus cognoscit seipsum per seipsum, & per suā essentiam tanquam per adæquatum obiectum formale, est perfectissima, quia cognoscit Deum propter rationem, propter quam Deus est, quæ ratio est diuina essentia. Ex eadem ratione est perfecta visio beatifica, qua Deus cognoscitur in se per suam essentiam tanquam per obiectum formale.

Ad 2.

Ad 2. Cognition intuitiva entis incausati est perfecta, quia cognoscit propter se ipsum quod est propter se ipsum . At cognitio intuitiva entis causati est imperfecta, quia cognoscit propter se ipsum quod non est propter seipsum, sed propter causam distinctam . Talis autem imperfectio patet etiam à posteriori . Nam intuitio entis causati inquietat intellectum , & excitat curiositatem ad quærendam eius causam . Si verò per intuitionem entis causati cognoscatur ipsius causa, inquietatur intellectus propter modum cognoscendi , quo causa cognoscitur per effectum , atque adeo modo inuerso , & excitatur desiderium cognoscendi causam aliter . Falsum est igitur quod cognitio intuitiva, qua Angelus cognoscit hominem per seipsum, sit perfectior non intuitiva hominis . Cognition enim , qua cognoscitur homo per omnes causas, & præsertim per diuinam, essentiam, quæ est causa adæquatissima hominis, est multo perfectior cognitione intuitiva hominis .

Ad 3. Solum ens incausatum potest manifestare se ipsum manifestatione perfecta: at omnis manifestatio , qua ens causatum manifestat se ipsum , est aliquammodo imperfecta, ideoque inquietatiua & excitatiua curiositatis, qua quæritur causa, propter quam est .

Ad 4. Per causam possunt solui omnes quæstiones circa rem, vt Aristoteles docet, & probat initio secundi posteriorum. Cum enim causa sit ratio, cur res sit, cur habeat talé essentiam, prædicata, proprietates, & alia accidentia, potest hæc omnia manifestare, & sic satisfacere quæstionibus, *an sit, quid sit, qualis sit, & propter quid sit*. Addo cum Aristotele, quod nulli quæstioni potest satisfieri perfectè, causa non cognita. Intellectus enim dum nescit, cur res sit, cur habeat talem essentiã, & prædicata, cur tales proprietates, & accidentia, semper remanet inquietus. Ideo æcnicus ille.

Felix qui potuit rerum cognoscere causas quia nimirum felicitas consistit in cognitione primæ causæ, quæ sola est quietatiua intellectus, & sufficiens ad soluendas omnes quæstiones, & satisfaciendum omni curiositati. Notat etiam Aristoteles loco citato secundi posteriorum, quod omnis quæstio, & inquisitio, seu speculatiua, seu practica est quæstio causæ. Ita cum quæro *an Deus sit*, quæro aliquam causam, aut medium terminum, qui possit in me causare hanc cognitionem, ergo *Deus existit*: cum quæro *quid sit homo*, quæro aliquas apprehensiones prædicatorum, quæ causent in me cognitionem definitiuam hominis: cum egrotus consultat de recuperanda
sanita-

sanitate,querit aliquam causam positam,
in sua potestate,quæ possit causare recupera-
tionem sanitatis. Inquisitiones specula-
tiuæ,ac practicæ differunt solum in hoc,
quod per speculatiuas querimus causam,
per quam obiectum merè cognoscamus;
per practicasverò querimus causam,per
quam non solum cognoscamus, sed efficiamus.

Ad 5. Concedo, quod vt res perfectè
cognoscantur,debent cognosci per omnes
causas,etiam per primam causam,quæ est
Deus. Falsum proinde est, quod veritates
etiam mathematicas omnino perfectè co-
gnoscamus nihil cogitantes de Deo. Cum
enim omnes veritates etiam mathematicæ
habeant Deum pro primo principio, &
ultimo fine,& ordinentur ad manifestan-
dam aliquam diuinam perfectionem, non
possunt omnino perfectè cognosci præ-
scindendo à Deo: sicut serra vel gladius,
nō possunt perfectè cognosci, præscinden-
do à fine,ad quem ordinantur. Dum op-
ponitur,quod cognitio cognoscens rem
per omnes causas modo explicato, non
videtur esse cognitio humana: dico quod
quia perfectum est regula sui,& imperfe-
cti, eo pacto,quo secundum Aristotelem
rectum est regula sui & obliqui, definiri
debet cognitio omnino perfecta, quia illa
cognita, seu sit humana & moraliter pos-

sibilis, seu non, facile deinde per ipsam intelligitur cognitio non omnino perfecta. Ita mathematici definiunt circulum perfectum, lineam perfecte rectam, angulum perfecte rectum, seu possint moraliter dari, seu non, quia intellecto circulo perfecto facile deinde intelligitur minus perfectus. Sic ergo nos describimus cognitionem omnino perfectam, quia per illam minus perfecta statim intelligitur. Hinc verò soluitur quod contra Aristotelem obiicitur, quod in libris posteriorum videatur describere scientiam quandam idealem, qualis in homine vix dari potest. Dicendum enim quod describit scientiam omnino perfectam, per quam alia minus perfecta statim innotescit. Cognitio igitur perfecta, quam descripsimus, datur primo in Deo; datur proportionaliter in Angelis, & in hominibus; & in his est magis, vel minus perfecta, prout magis aut minus degenerat ab illa perfectissima.

Vtrum causæ cognitionis sint potentia, & obiectum.

Quaestio II.

Videtur quod non: 1. quia quod purè recipit aliquid nihil ad id influendo,

do, non est causa actiua illius, sed ad summum purè passiuas; sed potentia cognoscitiua purè recipit cognitionem, nihil ad illam influendo; ergo potentia cognoscitiua non est causa actiua cognitionis .

2. Quod nihil est, vel si est aliquid, non est sufficienter applicatum ad causandum, non causat ; sed obiectum cognitionis sæpe non est, nec potest esse, vt cum cognoscimus impossibilia, ex. gr. alterum Deum; sæpe licet possit esse, de facto non est, vt cum intelligimus alterum mundum, & antichrystum; sæpe licet sit, non est sufficienter applicatum, vt cum cogitamus de rebus quæ sunt in India, & aliis regionibus distantissimis; ergo obiectum plerumque non est causa cognitionis .

3. Cognitione diuina nec à potentia causatur, nec ab obiecto, cum sit omnino incausata; cognitio angelica de rebus materialibus non causatur ab obiecto materiali, cum secundum doctrinam Sancti Augustini materialia non habeant vim agendi in spiritualia ; ergo vniuersaliter cognitio non causatur à potentia, & ab obiecto .

Resp. quod omnis cognitio vel causatur à potentia, & obiecto, vel est à potentia, & obiecto, siue à cognoscente, & cognito . Ratio à priori est, quia omnis cognitio saltem creata est expressio, & imitatio,

atque imago vitalis obiecti . In quantum igitur est vitalis, procedit à cognoscente . Implicat enim cognoscentem viuere per aliquid, quod ab ipso non est, sed purè illud recipit ab alio, merè passiuè se habendo, vt dicetur etiam in libris de anima . In quantum verò cognitio est expressio, imitatio, & imago obiecti, procedit ab obiecto . Illud enim, quod ita requiritur ad effectum, vt assimilet sibi talem effectum, requiritur tanquam causa actiua effectus ; cum assimilare sibi effectum sit maximè proprium causę actiuę ; sed obiectum requiritur ad cognitionem, vt assimilet illā sibi ; ergo obiectum est causa actiua & exemplaris cognitionis : actiua, quidem, quia assimilat cognitionem sibi ; exemplaris autem, quia exemplar est, *ad cuius imitationem aliquid fit*, sicut è conuerso imago definitur ab Aristotele, *cuius generatio per imitationem fit* ; sed generatio cognitionis fit per imitationem obiecti ; ergo cognitio creata est imago obiecti : & è conuerso obiectum est exemplar cognitionis, cum imago & exemplar sint correlatiua .

Confirmatur, & explicatur à posteriori inductione, qua constat omnem cognitionem procedere ab obiecto, tanquam à patre, & à potentia, in qua etiam recipitur, tanquam à matre . Ita visio alicuius coloris procedit à potentia visiva, à qua etiā
reci-

recipitur, tanquam à matre, & ab obiecto illuminato, tanquam à patre. Idem dic de aliis sensationibus, & cognitionibus, tum imaginatiuis, tum etiam intellectiuis.

Hinc est vt cognitio intellectiua vocetur conceptus mentis, & intellectio, qua quis intelligit se ipsum, sit quasi filius intelligentis, vt docet Sanctus Augustinus in libris de Trinitate, quem sequuntur communiter Theologi. Ratio, cur nomen conceptus, & quasi filii tribuatur soli cognitioni intellectiue, non autem cognitioni sensuum, & actibus voluntatis est quia filius producit ad hunc finem, vt perfectè repræsentet, & exprimat patrem suum, non solum in exteriori apparentia, & figura, sed etiã in natura, & essentia; sed sola intellectio, qua quis intelligit seipsũ, producit ad hunc finem, vt exprimat intelligentem, non solum in exteriori apparentia, sed etiam in natura & essentia, quam essentiam penetrat solus intellectus: cognitiones verò sensuum & imaginationis producantur, vt exprimant obiectum solum secundum exteriorem apparentiam; actus voluntatis, cum supponant obiectum cognitum, & repræsentatum per cognitionem non producantur, vt obiectum repræsentent, sed solum vt coniungant, & vniant cum obiecto; ergo sola cognitio intellectiua, qua quis intelligit se ipsum

ipsum, est quasi filius intelligentis. Intellectio tamen creata in hoc differt ab intellectione producta increata, quod intellectio producta increata, seu Verbum diuinum propriè est filius patris intelligentis, & producentis; intellectio verò creata non est propriè filius, sed quasi filius. Ratio est, quia filius non solum debet produci ad hunc finem, vt exprimat patrem suum, sed debet in productione accipere naturam & essentiam patris; sed in diuinis intellectio producta, seu Verbum accipit eandem numero naturam, & essentiam patris; ergo propriè est filius, & eius productio est generatio, hoc est *origo viuentis à viuente principio coniuncto in similitudinem nature*. At intellectio creata, qua homo, vel Angelus intelligit se ipsū, est accidens, atque adeo non accipit eandem essentiam, & naturam cum intelligente, ideoque non est filius, sed quasi filius intelligentis. Spiritus Sanctus non est filius, quia licet in productione accipiat naturam producentis, non producit ad hunc finem, vt perfectè representet intelligentem, cum supponat illum perfectè representatum per Verbum; duæ autem productiones ordinatæ ad representationem eiusdem sunt superflue; sed producit ad finem vniendi. Non est igitur filius, nec imago producentis, nec productio

ductio Spiritus Sancti est generatio, quia generatio est origo in similitudinem nature, hoc est ordinata ad hunc finem, ut exprimat producentem .

Ad 1. Iam dictum est, quod potentia intellectiua est causa actiua cognitionis, utpote actus vitalis .

Ad 2 Obiectum cognitionis semper est actu in se ipso, vel in aliquo sui, in quo etiam sufficienter applicatur ad cognitionem causandam. Impossibile igitur, ex. gr. alter Deus est in aliquo possibili & actuali tanquam in obiecto formali mouente ad cognoscendum alterum Deum: idemque dic de purè possibili, & futuro. Obiectum enim, quod actu est, habet vim mouendi intellectum, non solum ad cognoscendum se ipsum, sed etiam ad cognoscendum quod non est, nec potest esse, ut dicetur in quaestione de impossibili. Obiectum quod est distans, & non sufficienter applicatū, ut quæ sunt in India, est præsens, & sufficienter applicatum in obiecto formali mouente ad cognoscendum obiectum distans. Addo, quod sicut plerumque entia causant sibi simile in esse reali, non per se ipsa, sed per semen suis sic plerumque causant cognitionem sibi similem in esse intentionali, non per se ipsa, sed per speciē sui, quæ species est quasi semen obiecti, ordinatum ad illud propagandum
secun.


secundum esse intentionale, sicut semen lactuæ ex gr. ordinatur ad lactucam propagandam secundum esse reale.

In hoc autem est mirabilis conuenientia inter inclinationem & modum, quo entia propagant se secundum esse reale, & secundum intentionale. Primo enim, sicut omnia appetunt esse reale, & realem conseruationem, vt patet ex eo, quod omnia se tuentur à contrariis quantum possunt; sic omnia appetunt esse intentionale, seu cognosci, vt patet inductione vniuersalissima. Nam Deus producit mundum, & cuncta operatur propter suam gloriam, hoc est vt cognoscatur, & innotescat, cum gloria sit clara notitia de aliquo: angeli & homines naturaliter appetunt famam, & gloriam, ac magnam existimant miseriam, si nemo de iis cogitet: entia rationis expertia faciunt quantum possunt, vt innotescant, manifestando se oculis per colores, auribus per sonos, tactui per qualitates tangibiles: ea verò, quæ parum cognoscuntur, vix sunt, & videntur non esse. Ex hac inclinatione, quam habent entia ad hoc vt sint, & cognoscantur, colligitur primo, quod tum esse, tum cognosci est bonum. Bonum enim definitur ab Arist. primo Ethic: & primo Rhetoricorum, quod omnia appetunt, vel appeterent, si haberent intellectum. Secundo inferitur, quod
omnia

omnia entia sunt vera, cum habeant vim manifestandi se intellectui per cognitionem verā. Tertio quod ea sunt perfectiora, quæ magis appetunt cognosci. Cum enim talis inclinatio sit proprietas entis, quo maior est inclinatio, eo maior est entitas. Ex quo sequitur ulterius opera virtutis esse maximè entia & valdè perfectā, quia naturaliter appetimus, ut nostra bona opera sint maximè nota. Sequitur è conuerso quod peccata sint nihil, vel penè nihil, quia qui male agit odit lucem, & qui peccat naturaliter operatur, ut nemo sciat peccatum suum, ne Deus quidem, & propria conscientia, si fieri posset, ac vellet, ut in propria conscientia, & in omnibus rebus aboleretur memoria criminis sui. Demum quod magis spectat ad rem præsentem, entia incorruptibilia, ut angeli quia semper possunt conseruare illud esse, quod habent non producant sibi simile: neque enim sicut equus generat equum, sic angelus generat angelum; entia corruptibilia & mortalia solent producere sibi simile in specie, ut quando ipsa sunt interitura, conseruentur in effectu sibi simili. Sicut igitur solent producere simile secundum esse reale per semen molè minimum, virtute maximum; sic solent producere simile secundum esse intentionale per speciem, quæ est veluti semen obiecti.

Ad

Ad 3. Licet cognitio diuina non cause-
tur à potentia, & obiecto, tamen est à co-
gnoscente, & cognito. Est enim idem cum
essentia diuina, quæ est cognoscens & est
obiectum formale cognitum; sed essentia
diuinæ est à se; ergo cognitio diuina est à
cognoscente, & ab obiecto cognito. Hanc
perfectionem diuinæ essentia, per quam
est à se, imitantur quantum possunt viuen-
tia creata, quæ habent à se ipsis actus vita-
les, & non merè passiuè ab obiecto; licet
imitentur imperfectè, in quantum essentia
diuina est adæquatissimè à se, ideoque
est perfectissimè viuens, immo est ipsa vi-
ta perfectissima: viuentia verò creata ita
habent actus vitales à se, vt habeant etiam
ab alio, hoc est, ab obiecto distincto, ideo-
que sunt viuentia minus perfecta, & in-
finitè distantia à supremo gradu vitæ,
qui est in solo Deo. Ad id, quod dicitur
de cognitione angelica, quæ non causatur
ab obiectis materialibus, respondeo quod
causatur à speciebus inditis à Deo, quæ
vicem gerunt obiectorum.



Vtrum causa specificatiua cognitionis sit potentia vel obiectum.

Quaestio I I I.

I V Idetur quod specificatiuum cognitionis neque sit potentia, neque obiectum, neque vlla causa extrinseca cognitionis. Specificatiuum enim vniuscuiusque rei est illud, per quod talis res formaliter constituitur in sua specie; sed vnaqueque res formaliter constituitur in sua specie, non per causas extrinsecas, sed per sua praedicata intrinseca, hoc est per genus & differentiam, praesertim verò per differentiam vltimam: ex. gr. homo constituitur in specie hominis per hoc, quod sit animal rationale, ac praesertim per rationalitatem, quæ est vltima differentia, non verò per suum patrem, & alias causas extrinsecas; ergo specificatiuum cognitionis sunt praedicata intrinseca cognitionis, non autem potentia, & obiectum, quæ sunt causæ extrinsecæ.

2. Si dicatur quod quaeritur specificatiuum extrinsecum, hoc est illud, à quo cognitio accipit suam essentiam specificam, tamquam ab aliquo extrinseco; videtur quod omnes causæ extrinsecæ cognitionis, & cuiuscumque rei equè specificent illam, cum omnes equè concurrant

ad

ad dandam rei essentiam specificam ; ex-
gr. quod omnes causæ extrinsecæ hominis
specificent hominem, cum omnes concu-
rant ad dandam homini essentiam homi-
ni: quod potentia & obiectum æquè spe-
cificent cognitionem ex eadem ratione.

3. Si dicatur quod specificatiuum pro-
prium cognitionis sit quod illi tribuit vl-
timam differentiam specificam, adhuc vi-
detur, quod cognitio æquè specificetur à
potentia, ac ab obiecto. Potentia enim vi-
siva exem. gr. tribuit cognitioni albedinis
prædicatum visionis, albedo tribuit præ-
dicatum expressiui albedinis, sed æquè
prædicatum visui est differentia expressi-
ui albedinis, ac prædicatum expressiui
albedinis sit differentia visui, cum v-
trumque possit esse sine altero; in visione
liquidem nigredinis datur prædicatum vi-
sui sine prædicato expressiui albedinis;
in intellectu albedinis datur prædica-
tum expressiui albedinis sine prædicato
visui; ergo æquè potentia, ac obiectum
tribuit ultimam differentiam, ac proinde
æquè specificant cognitionem.

4. Causa specificatiua rei non potest esse
imperfectior effectui specificato, sed omnia
objecta sensuum, & imaginationis, ac mul-
ta objecta intellectus sunt imperfectiora
actibus harum potentiarum: objecta enim
sensibilia, vt pote accidentia non vitalia,
sunt

sunt imperfectiora actibus vitalibus sentiendi, & imaginandi; accidentia etiam materialia, quæ contemplatur intellectus, sunt imperfectiora actibus intellectus, qui sunt spirituales; ergo plura obiecta non possunt esse specificatiua cognitionis.

5. Non potest explicari, vtrum cognitiones, & alii actus intentionales specificentur à suis obiectis modo quodam speciali ac magis propriè, quam res aliæ specificentur à suis causis; vtrum etiam accidentia non intentionalia habeant suum specificatiuum; vtrum specificari propriè competat solis accidentibus, an etiam substantiis; vtrum substantiæ specificentur ab accidentibus, an solum accidentia à substantiis; ergo hæc doctrina de causa specificatiua est vndique implicata.

6. Cognitione diuina non specificatur à potentia, nec ab obiecto; ergo cognitio vniuersaliter non debet specificari à potentia, & obiecto.

Respondeo posse nos loqui de specificatiuo intrinseco, & extrinseco, ac rursus de specificatiuo extrinseco communi, & proprio. Specificatiuum intrinsecum est id, per quod res formaliter, & intrinsecè constituitur in sua specie: & quia vnaquæque res formaliter constituitur in sua specie per sua prædicata essentialia; ideo omnia

omnia prædicata essentialia intrinsecè specificant rem: homo exem. gr. intrinsecè specificatur per hoc quod sit substantia corporea, vegetabilis, sensitiva, rationalis. Quia tamen res magis propriè constituitur in sua specie per id, per quod ultimò determinatur ad talem speciē, hoc est per ultimam differentiam, ideo propriè specificatum intrinsecum est ultima differentia, ex. gr. propriè specificatum intrinsecum hominis est rationalitas. Ex hoc patet, quod cognitio nec à potentia, nec ab objecto specificatur intrinsecè, sed solum à suis prædicatis, ac præsertim ab ultima differentia. Verum quia quodlibet ens creatum accipit speciem, & essentiam, ac omnia predicata intrinseca ab aliqua causa extrinseca, hinc est, ut quodlibet ens creatum habeat etiam extrinsecum specificatum, & extrinsecè specificetur à causa, à qua accipit speciem, & essentiam. Et quia specificatum prius est etiam principalius; causa autem extrinseca utpote dans prædicata intrinseca est specificatum prius; ideo specificatum extrinsecum est specificatum principalius, quod solum vocatur specificatum simpliciter; ac proinde cum absolutè quæritur specificatum, quæritur specificatum extrinsecum. Rursus quia, ut dictum est, res magis propriè constituitur in specie per ultimam

timā differentiā quam per prædicata cōmunia, & generica, illud extrinsecum, quod tribuit rei vltimam differentiā, in ea sibi effectum assimilans, magis propriè specificat rem, quam quod tribuit prædicata generica, assimilans sibi effectum in genericis prædicatis; ideoque licet ad generandum hominem concurrat homo & sol, vt docet Aristoteles 2. phys. tamen potius homo, quam sol specificat hominem, quia homo generans tribuit homini genito vltimam differentiam rationalis, in eaque sibi effectum assimilat; sol autem assimilat hominem sibi solum in prædicato generico corporis, ideoque non tam specificat, quam genereizat hominem productum. Ex hoc concluditur, quod obiectum specificat cognitiones, & alios actus intentionales tanquam tribuens illis vltimam differentiam specificam: potentia verò non tam specificat, quam genereizat vtpote tribuens sola prædicata generica. Ratio est, quia cum videmus albedinem exem. gr. potentia visiva assimilat sibi visionem in prædicatis vitalis, visui &c, quæ sunt prædicata generica, & communia pluribus visionibus albi, nigri, rubri, &c. obiectum verò, nimirum albedo tribuit visioni prædicatum differentiale, quod est determinatio visionis ocularis ad hoc vt sit expressio albedinis. Et confirmatur, quia
sicut

sicut cum sol, & semen lactucę producunt lactucam, sol concurrit vt causa vniuersalis, ac genereizans, semen vt causa particularis, & specificans; sic cū potentia visua, & species albedinis, quę est veluti semen albedinis, producunt visionem albedinis, seu albedinem in esse intentionali, potentia visua concurrit vt causa vniuersalis, ac genereizans visionem, species verò albedinis vt causa particularis, & specificans. Nec obstat quod obiiciebatur in tertio argumento, quod sicut prædicatum visui tributum à potentia est indifferens ad visionem albi, & nigri, quæ specie differunt, ideoque est prædicatum genericum, sic prædicatum expressui albedinis tributum ab obiecto est prædicatum indifferens ad hoc, vt conueniat expressioni visuę, vel imaginatiuę, vel intellectiuę albedinis, quę sunt expressiones specie differentes, ideoque pariter est prædicatum genericum; ergo tam potentia, quam obiectum tribuunt cognitioni prædicata solum generica, ac proinde non magis obiectum specificat, quam potentia. Dicendum enim, quod cum obiectum concurrat ad actum potentię vt determinatiuum potentię, & vt illi applicatum, & vnitum, tribuit actui non prædicatum expressui obiecti vtcunque, quod est prædicatum genericum, sed prædicatiuum determinatiui

actus talis potentię ad hoc vt exprimat tale obiectũ, quod est prædicatum differentiale, & vltima differentia cognitionis: ex. gr. albedo tribuit visioni non prædicatum expressiui albedinis vtcumque, sed prædicatum determinatiui visionis ad hoc vt exprimat albedinem, quod prædicatum cum non possit conuenire actui imaginationis, & intellectus, est vltima differentia visionis.

Verum, vt aduertit Caietanus prima parte quęst. 77. art. 3. specificatio hæc, qua effectus accipit prædicata essentialia, & vltimam differentiam à causa, communis est omnibus entibus causatis. At potentię, habitus, & actus intentionales magis propriè specificantur ab obiectis, quam ceteri effectus à suis causis: exem. gr. cognitio albedinis magis propriè specificatur ab albedine, quam homo genitus specificatur à suo patre. Quare explicanda est illa propriissima specificatio, qua actus, habitus, & potentię intentionales specificantur ab obiectis.

Dicendum ea propriè specificari, quę secundum suam essentiam ita commensurantur, & adaptantur alicui extrinseco, vt non possint definiri, nisi per illud, tanquam per regulam, & mensuram priorem. Explicari potest inductione exemplorum desumptorum eum ex rebus artificialibus,

tum ex naturalibus. Vestimenta & arma propriè in suo esse artificiali specificantur à membris, quæ debent ipsis vestiri, & armari. Ex. gr. calceus specificatur à pede: essentia enim calcei ita adaptatur, & commensuratur pedi, vt calceus definiri non possit, nisi per pedem, tamquam per id, cui vestiendo commensuratur, & adaptatur, & qui calceum cognosceret non vt adaptatum, & commensuratum pedi, essentiam, calcei non penetraret: pileus specificatur à capite: idemque dic de ceteris vestimentis, & armis: ex. gr. de galea, quæ definiri non potest nisi vt adaptata capiti muniendo; de lorica, &c. E conuerso membra, quia non specificantur à vestimentis, vel armis, definiri possunt præscindendo ab ipsis, eò pacto, quo definitur caput, nihil cogitando de pileo, vel galea; definitur pes, nihil cogitando de calceo. Similiter instrumenta artificialia definiri non possunt, nisi per opus, ad quod ordinatur, ideoque specificantur ab opere suo: ex. gr. serra non potest definiri, nisi per opus secandi, & qui serram videt, & nescit, quod sit instrumentum ad secandum, essentiam serræ non percipit: idemque valet de malleo, gladio, tormentis bellicis, &c. Imagines etiam artificiales, vt statuæ, picturæ, specificantur ab exemplari: ideoque qui videt statuam alicuius animalis, & non cogitat, quod est eius

eius imago illi commensurata, & adaptata, sed solum contemplatur ipſus figuram, ſtatue naturam non percipit. Exemplaria è conuerſo non ſpecificantur à ſuis imaginibus, ac proindè non eſt neceſſe, vt ad hominem definiendum cogitemus de hominis imagine.

Iam ex artificialibus descendendo ad naturalia, omnia accidentia vtpotè entis ſunt veluti veſtimenta, arma, vel ornamenta ſuarum ſubſtantiarum, illas perſicientia, munientia, & ornantia: ideo ſpecificantur à ſuis ſubſtantiis, & ſubiectis, & tam eſt impoſſibile definire accidentia, & non per ſubſtantiam, quam definire veſtimenta, & non per membra, calceum, & non per pedem. Ideo Ariſtoteles, & ex eo Sanctus Thomas, ac Scotus ſapè docent, accidentia definiri debere per ſuum proprium ſubiectum, tamquam per ſpecificatiuum. Omnes cognitiones ſunt imagines naturales ſuorum obiectorum, ac proindè ab obiectis ſpecificantur, & tam eſt impoſſibile definire cognitiones, & non per obiecta, quam definire imaginem hominis, & non per hominem. Actus etiam appetitiui creati, & coeteri actus intentionales, licet non ſint imagines obiectorum, commenſurantur ſuis obiectis, vt ex ſe patet, ideoque ſpecifican-

tur ab obiectis. Creaturæ omnes videntur
 esse imagines, aut vestigia ordinata ad re-
 presentandam diuinam essentiam secun-
 dum varios gradus, ideoque diuina essen-
 tia est primum specificatiuum omnium
 creaturarum, quæ proinde definiri non
 possunt definitione omnino perfecta, nisi
 per diuinam essentiam; sicut non
 possunt omnino perfectè cognosci, nisi
 per diuinam essentiam, tamquam per
 primam causam, ut dictum est quæst. pri-
 ma, ad quintum. Demum sicut ferra, quia
 est instrumentum secandi, specificatur ab
 actu secandi, sic potentia, & habitus, quia
 sunt instrumenta suorum actuum, ex. gr. in-
 tellectus est instrumentum intelligendi,
 potentia visiva instrumentum videndi, spe-
 cificantur à suis actibus; & quia actus
 specificantur ab obiectis, potentiæ, habitus,
 & actus intentionales ultimò specificantur
 ab obiectis, ita ut non possint definiri, nisi
 per obiecta. Tales porro definitiones, in
 quibus res specificatè definiuntur per sua
 extrinseca specificatiua, vocantur à Sco-
 to in prædicabilibus definitiones per ad-
 ditamentum, quia in iis ultra prædicata
 essentialia rerum definitarum, debet addi
 specificatiuum extrins. cum. Ex. gr. defini-
 tio, qua accidens definitur *ens in alio*, est
 per additamentum, quia ultra essentiam
 accidentis, quæ est *esse in alio*, ponitur *ly*,
aliud

aliud , quod non est essentia accidentis : idemque proportionaliter dic de definitione, qua creatura definitur *ens ab alio* . E conuersodefinitiones , quibus substantia definitur *ens per se*, *Deus ens a se*, sunt definitiones sine additamento , quia nihil in eis ponitur extrinsecum .

Demum debet aduerti , quod specificatiuum proprium, & per se semper est diuersæ rationis à re specificata . Ratio est , quia cum duo sunt eiusdem rationis , vnū nō ita specificatur ab alio, vt debeat definiri per illud:exemp. gr. quia ego , & meus pater sumus eiusdem rationis , ego non debeo definiri per meum patrem : at cum sunt diuersæ rationis , potest vnus essentia ita commensurari, & adaptari alteri, vt non possit definiri, nisi per illud, vt constat in exemplo calcei respectu pedis , & in cæteris exemplis allatis .

Ad 1.2. & 3. Iam dictum est cognitionem intrinsecè specificari à suis prædicatis essentialibus, extrinsecè ab obiecto, à quo accipit differentiam specificam: à potentia verò non tam specificari , quam generalizari, cum ab ea accipiat prædicata generica .

Ad 4. Causa specificatiua adæquata non potest esse imperfectior effectu specificato ; at causa specificatiua inadæquata potest esse imperfectior effectu spe-

cificato. Obiecta sensibilia sunt causa specificatiua inadequata cognitionum sensitiuarum, cum cognitiones sensitiuæ, vrpote accidentia substantiæ sensitiuæ, specificentur etiam à suis substantiis; ergo licet obiecta sensibilia sint imperfectiora actibus sensitiuis, possunt illos specificare secundum rationem imaginis similis obiectis sensibilibus, secundum quam rationem præcisè non sunt perfectiores obiectis, licet illa excedant secundum rationes vitalis &c, secundum quas specificantur à suis substantiis. Idem proportionaliter dic de obiectis specificatiuis actuum imaginationis, & intellectus.

Ad 5. Iam dictum est, quod actus intentionales specificantur ab obiectis modo quodam specialis dictum est etiam, quod omnia accidentia specificantur à suis substantiis, seu subiectis, licet accidentia intentionalia non solum specificentur à subiectis, sed etiam ab obiectis; dictum est, quod substantiæ creatæ, cum sint imagines, aut vestigia diuinæ essentiæ, specificantur à diuina essentia. Solum igitur remanet satisfaciendum ad quartum, & vltimum quæsitum, vtrum substantiæ specificentur ab accidentibus. Ad quod respondeo negatiuè. Sicut enim membra non specificantur à suis vestimentis, & armis, sed specificant sua vestimenta, & arma,

ma, sic substantiæ non specificantur à suis accidentibus, sed specificant sua accidentia. Ex.gr. homo non specificatur à sua felicitate, sed illam specificat, utpotè subiectum, cui felicitas adaptatur, sicut pileus adaptatur capiti, finis qui adaptatur fini cui fundamentalis, ac principaliori. Nec obstat, quod aliquando substantiæ definiantur per accidentia, sicut homo, cum definitur *animal rationale* definitur per accidentia sentiendi, & discurrendi. Tales enim definitiones sunt à posteriori. Sicut enim potest pes describi per calceum, dicendo quod est, cui adaptatur talis calceus, in qua ipsa definitione apparet pedem non specificari à calceo, sed calceum specificare; sic nos, quibus pro statu huius vitæ accidentia sunt manifestiora substantiis, describimus substantias per accidentia dicendo ex.gr. *substantia hominis est, cui adaptantur operationes sentiendi, & discurrendi*, in qua ipsa definitione apparet substantiam hominis specificare tales operationes, non autem ab ipsis specificari.

Ad 6. Diuina cognitio, ac essentia propriè non specificatur, quia non est in vlla specie, vel genere, sed continet in se omnes species, & omnia genera, ut dicetur in questionibus de analogia entis. Addo, quod licet cognitio diuina non specificetur à potentia, & obiecto, adhuc est à co-

gnoscente, & cognito, vt dictum est quæst. 2. ad. 3: esse autem à cognoscente, & cognito est quasi specificari, seclusis imperfectionibus. Demum cognitio diuina sicut non causatur, sed est prima causa, ita non specificatur, sed est primum specificatum, nec est imago, sed primum exemplar omnium obiectorum creatorum. Neque enim cognitio diuina fit ad imitationem obiectorum creatorum, in quo consistit ratio imaginis, sed omnia obiecta creata sunt ad imitationem diuinæ cognitionis, & essentiæ, continentis illa perfectè secundum esse reale, & intentionale, in quo consistit ratio perfectissimi exemplaris.

Vtrum necessaria sit aliqua diuisio artificialis habituum, ac scientiarum.

Quæstio IV.

VIdetur non esse: i. quia quæ sunt diuisa naturaliter non est necesse, vt diuidantur artificialiter; sed actus, habitus, & scientiæ sunt diuisa naturaliter; obiecta enim distincta specificant actus, habitus, & scientias distinctas: ex. gr. sicut cælum distinguitur à terra, sic specificat scientiam de cælo distinctam à scientia de terra: ergo non est necessaria vlla diuisio artificialis habituum, ac scientiarum.

2. Natura non deficit in necessarijs; sed si vltra diuisionem naturalem scientiarum, & habituum esset necessaria aliqua alia diuisio artificialis, natura defecisset in necessarijs; ergo non est necessaria diuisio artificialis.

Respondeo scientias, habitus, & actus secundum diuisionem naturalem esse planè innumerabiles, ac tot, quot obiecta sunt in mundo, ac etiam plures. Vnumquodque enim obiectum specie differens specificat actum specie differentem: ex gr. quia color albus, niger, ruber specie differunt, specificant visiones albi, nigri, & rubri specie differentes: quod est proportionaliter dicendum de sonis, saporibus, & cœteris obiectis sensibilibus, immo etiam de intelligibilibus; homo enim, & equus, & alia animalia specie differentia specificant intellectiones hominis, equi, & aliorum animalium specie differentes; sed actus specie differentes relinquunt habitus, & quasi semina sui specie differentia, sicut herbæ, & plantæ specie differentes relinquunt semina specie differentia; ergo à primo ad vltimum quot in mundo sunt obiecta specie diuersa, tot in intellectu specificare possunt habitus, actus, ac scientias specie diuersas.

Addidi plures etiã posse dari in intellectu, actus & habitus specie diuersos, quam

in mundo sint species rerum. Patet primò; quia idem obiectum cognosci potest pluribus cognitionibus inadæquatis specie diuersis, vt dicetur in quæstione de præcisione obiectiua. Patet secundo, quia sicut per commixtionem plurium seminum, vel per insitionem, in qua copulentur plures virtutes seminales, producuntur flores, fructus, arbores, & animalia specie diuersa: eo pacto, quo ex cane, & lupo nascitur lycisca; ex insitione prunum ceraso fit prunocerasus; sic intellectus, & imaginatio vniendo plures species, ac veluti semina rerum, ac quodammodo vnã rem alteri inferendo, producant cognitionem nouorum obiectorum, vel merè possibilium, vel etiam impossibilium: ex gr. imaginatio vniendo speciem auri, ac speciem montis imaginatur montem aureum non existentem, sed merè possibilem; intellectus vniendo speciem hirci, ac speciẽ cerui concipit hircoceruũ impossibilem; ergò plures generari possunt in intellectu actus, & habitus specie diuersi, quam in mundo sint res specie diuersæ.

Ex quo apparet mirabilis, ac planè diuina vis intellectus producendi in se actus, & habitus, hoc est vnas imagines omnium rerum, quæ sunt in mundo, & etiam aliarum, quæ non sunt in mundo.

Co-

Cognoscendo verò omnia , intellectus quodammodo fit omnia, & trahit ad se perfectionem omnium rerum ; ideoque definitur ab Aristotele 3. de Anima tex. 18. *qui potest omnia fieri*: ex. gr. cognoscendo equum trahit ad se perfectionem equi, immo multo maiorem, cum melius fit equum intelligere, quam esse equum ; cognoscendo cœlum trahit ad se perfectionem cœli. Mirabilis est etiam vis voluntatis, qua amando omnia bona præsertim honesta, fit bona omni bonitate. Hinc est, vt homo præcipuè per intellectum sit microcosmus, hoc est parvus mundus, quia quot species rerum sunt in mundo, tot possunt poni intentionaliter in intellectu ; est etiam imago Dei, quia sicut Deus est pelagus omnis entitatis, ac perfectionis, in quo primo est omnis entitas, & perfectio : sic intellectus est pelagus secundariū, in quod à Deo confluunt omnes perfectiones obiectorum, & rerum .

Verum ex hoc ipso , quod secundum diuisionem naturalem habitus, ac scientiæ sint innumerabiles, ac producantur sine vlllo ordine , prout obiecta casualiter occurrunt intellectui sequitur necessariam esse aliquam diuisionem artificialem, qua redigantur in ordinem . Multitudo enim inordinata causat confusionem, & quo maior est multitudo, eo maiorem

confusionem causat; sed actus, scientiæ, &
 habitus specie diuersi sunt innumerabiles,
 & producuntur inordinatè, prout obiecta
 occurrunt; ergo nisi ordinarentur, cau-
 erent maximam confusionem; sed vt Ari-
 stoteles docet primo Metaph cap. 2. & ex
 o Sanctus Thomas in proœmio primi
 metaph. & primi metaph. munus sapientis est
 omnia ordinare ad confusionem tollen-
 dam; ergo necesse est, vt sapiens etiam in-
 numerabilem multitudinem obiectorum,
 actuum, & habituum in certum ordinem,
 distribuât per diuisionem aliquam artifi-
 cialem; præsertim cum absurdum sit, si sa-
 piens, qui ponit ordinem in cæteris, in
 suis actibus inordinatè procedat; sed or-
 do, vt Aristoteles docet, ac Sanctus Tho-
 mas, est *habitus multitudinis ad vnum*:
 ex.gr. ordo per quem multitudo militum
 ordinatur in vnum exercitum est, per quē
 singuli decem subduntur vni decurioni,
 singuli centum vni centurioni, singuli mil-
 le vni tribuni, & omnes vni imperatori;
 ergo vt ponatur ordo in obiectis, actibus,
 & habitibus, multitudo plurimum obiecto-
 rum debet reduci ad vnum obiectum.
 Diuisio ergo artificialis, quam dicimus,
 esse necessariam, est distributio obiecto-
 rum contemplabilium in aliquas classes,
 cum reductione plurimum ad vnum, ad
 quod cætera certo modo se habeant, alia
 pro-

propinquius, alia remotius. Sicut enim in exercitu datur imperator, ad quem reducuntur omnes milites; propinquissimè ad imperatorem se habent tribuni, quibus imperator præcipit immediatè; post tribunos sequuntur centuriones, quibus præcipit per tribunos; post centuriones decuriones, quibus præcipit per centuriones; & vltimo loco sunt milites gregarii; sic in scientiis debet dari aliquod primū, obiectū, ad quod omnia reducātur; deindè alia quæ se habeant immediatè post primum; post quæ sequantur alia, & sic deinceps, vt magis etiam patebit ex sequentibus.

Agnouerunt prisci sapientes hanc necessitatem diuidendi scientias artificialiter, ideoque diuiserunt illas in quatuor primarias, physicam, seu naturalem, mathematicam, seu disciplinam, metaphysicam, seu transnaturalem, & logicam, seu rationalem. Physica iuxta nominis interpretationem proponit sibi pro obiecto contemplando ens naturale, seu mobile, & mutabile sensibiliter, in quantum est sensibiliter mobile, ideoque contemplatur cœlum, solem, sydera, in quantum mutantur secundum locum, & lucem, dum transferuntur ex vno loco in alium, & luna, nunc tota illuminatur, nunc secundum partem, nunc eclipsata patitur omnimodū luminis defectum; contemplatur etiam
elemen.

elementa, & mixta ex elementis composita, in quantum generantur, & corrumpuntur, calefiunt, & frigeſcunt: conſiderat plantas, & animalia, in quantum creſcunt, & decreſcunt, ægrotant, & ſanantur, & aliis innumeris modis mutantur in ſubſtantia, in quãtitate, in qualitate, & loco. Sequitur verò phyſica in rerũ mutabiliũ conſideratione ductũ ſenſus, per eius inductionẽ colligens principia vniuerſalia, ex quibus conſeſiones inferat. Mathematica eleuatur ſupra ſenſum, & motum, & proponit ſibi contemplandum ens extenſum quatenus extenſum, abſtrahendo ab hoc, quod ſit ſenſibiliter mutabile, vel nullis ſenſibilibus qualitatibus affectum, & nihil curans, an ſit album, vel nigrum, calidum, vel frigidum. Conſiderat igitur ens, in quantum ſi continuẽ extendatur in ſpatio, conſtituit magnitudinem, quẽ continet in ſe miram varietatem punctorum, linearum, angulorum, figurarum, ſuperficierum, ſolidorum. Conſiderat idem ens, in quantum ſi extendatur diſcretẽ, eo pacto, quo milites diſponuntur in campo, licet non conſtituat vnã magnitudinem, conſtituit vnã multitudinem continentem in ſe innumera- biles ſpecies numerorum parium, aut diſparium, quibus competunt proprietates mirabiles. Ad hæc verò indaganda, vtitur mathematica inductione facta non
per

per sensum, sed per imaginationem, & ex ea colligit principia ad conclusiones inferendas.

Metaphysica, seu transnaturalis eleuatur supra omnem materiam, & considerat ens transnaturale, seu immateriale, & insensibile tum præcisiuè, tum negatiuè. Considerat ens immateriale præcisiuè, in quantum considerat rationes, quæ possunt conuenire tum entibus materialibus, tum immaterialibus, quales sunt ratio entis, substantiæ, viuentis, cognoscentis, boni, veri, vniuersalis, quæ conueniunt tum rebus materialibus, & sensibilibus, tum spiritualibus, & insensibilibus. Considerat ens immateriale negatiuè, in quantum considerat rationes, quæ non possunt competere entibus materialibus, quales sunt ratio Dei, angeli, spiritualis &c. Vtitur autem metaphysica inductione non sensus, & imaginationis, quæ potentia vtpote materiales nequeunt attingere rationes immateriales, sed inductione solius intellectus. Logica, demum, seu facultas rationalis considerat ens intentionale vt intentionale, seu cognitum vt cognitum, quod proinde vocatur ens rationis logicum, & contemplantur rationes prædicati, subiecti, prædicamenti, generis, speciei, nominis, verbi, sciti &c, colligens principia ex reflexione supra nostros actus intelligendi, quibus

bus constituimus ens intentionale.

Ad 1. Nego maiorem. Necesse est enim, ut quæ sunt diuisa naturaliter, sed sunt innumerabilia, & inordinata, diuidantur artificialiter aliqua diuisione, qua reducantur ad vnum, ut explicatum est. Confirmari potest exemplo. Loca terræ sunt diuisa naturaliter, cum singula loca specie differant ab aliis locis. Quia tamen loca secundum hanc diuisionem sunt innumerabilia, necessaria est diuisio artificialis, qua terra diuidatur in certas partes, regna, prouincias per certos limites marium, fluminum, ac montium, cum magno fundamento in rerum naturis. Idem dicendum in casu nostro.

Ad 2. Natura non deficit in necessariis, cum dat potentiam prouidendi sibi necessaria. Ita licet homini sint necessaria, vestimenta, quibus tegatur, panis, quo vescatur, natura verò non det homini immediate vestimenta, nec panem, adhuc non deficit in necessariis, quia dedit homini intellectum, & manus, quibus possit vestimenta sibi, panem, domos, & alia artificialiter parare. Sic licet natura non fecerit diuisionem artificialem scientiarum, tamen non deficit in necessariis, quia dedit homini intellectum, quo possit scientias artificialiter diuidere. Addo Deum esse qui habet omnia à se; ergò diuinior est
modus,

modus, quo bona habemus à nobis ipsis, quam quo accipimus merè passiuè à natura. Ideo quia homo, vestimenta, & alia plura necessaria, quæ bruta accipiunt purè passiuè à natura, habet à se ipso per artem, habet modo perfectiore, ac diuiniore.

Vtrum allata diuisione scientiarum in quatuor primarias sit bona, & fundata in rerum natura.

Questio V.

Videtur quod non 1. quia sufficit vnica potentia intellectiua ad intelligendum omne intelligibile; ergo sufficit vnicus habitus, & vnica scientia ad sciendum omne scibile; ergo frustra ponuntur quatuor scientiæ. Et confirmatur, quia omnes scientiæ reduci possunt ad vnicam scientiam, statuendo vnicum obiectum, nimirum ens, seu verum in genere, & reliqua obiecta ad illud ordinatè reducendo; ergo frustra ponuntur quatuor scientiæ.

2. Si scientiæ debent multiplicari, tot debent poni, quot sunt in homine potentie cognoscitiuæ; diuersitas enim obiectorum, quæ sufficit ad hoc, vt natura multiplicauerit potentias cognoscitinas, debet sufficere, vt nos imitantes naturam multiplic-

tiplicemus scientias ; ideoque Aristoteles docet, quod qui caret à natiuitate vno sensu, ex. gr. visu, vel auditu, caret vna scientia de visibili, vel audibili: sed in homine sunt octo potentie cognoscitiue, nimirum quinque sensus exteriores, sensus communis, imaginatio, & intellectus; ergo debent poni non quatuor, sed octo scientie.

3. In angelis, & in Deo non distinguuntur quatuor scientie; ergo nec in homine debent distingui.

4. Ad eandem scientiam, ad quam spectat cōtemplari aliquod obiectum, spectat etiam cōtemplari species, & proprietates ipsius; sed ens naturale, & ens extensum sunt species entis realis, quod est obiectum metaphysicæ; ergo ad metaphysicam spectat contemplari ens naturale, & ens extensū, ac proinde mathematica, & physica non sunt scientie speciales, sed sunt partes metaphysicæ. Rursus extensio est proprietas entis naturalis; ergo ad physicam, ad quam spectat consideratio entis naturalis, spectat etiam consideratio entis extensi, atque adeo mathematica est pars physicæ. Denique ens rationis logicum, est proprietas intellectus; ergo ad scientiam de anima, ad quam spectat consideratio intellectus, spectat consideratio entis rationis logici, ac proinde logica non est scientia specialis, sed pars scientiæ de ani-

anima; quæ est pars physica, vel metaphysica; præsertim cum per idem lumen, per quod considerantur operationes intellectus ab animastica consideretur ens rationis à logica. Nam tam operationes intellectus, quam ens rationis considerantur per lumen; & cognitionem reflexam.

5. Contemplatio obiecti, quod potest inueniri extra materiam, spectat ad metaphysicam; sed numeri possunt inueniri extra materiã: de facto enim inueniuntur in angelis, in Personis diuinis, & in aliis entibus spiritualibus, ac demonstrationes arithmeticae valent equè de numeris materialibus, ac spiritualibus; ergo contemplatio numerorum spectat ad metaphysicam, ac proindè arithmetica, quæ est scientia de numeris, est pars non mathematica, sed metaphysicæ.

6. Aristoteles sexto metap. tex. 2. docet tres esse scientias speculatiuas, mathematicam, physicam, & metaphysicam, quæ à suo præstantissimo obiecto, quod est Deus, sumit appellationem theologiæ. Verba eius sunt: *quare tres utique erunt speculatiue philosophiæ; mathematica, naturalis, ac theologia*; ergo logica non est ponenda inter scientias speculatiuas saltem primarias.

7. Ideo physica, mathematica, & metaphysica sunt diuersæ scientiæ, quia fundan-

dantur in diuersis potentijs ; physica nimirum in sensu , mathematica in imaginatione, & metaphysica in intellectu ; sed logica non potest fundari in potentia diuersa à cœteris scientijs, ergo non est quarta scientia speculatiua .

8. Vel logica considerat omne ens intentionale, vel non ; si considerat omne ens intentionale ; ergo considerat etiam ens morale, quod nimirum ab actibus voluntatis constituitur licitum, vel illicitum, honestum, vel inhonestum, finis, medium, peccatum, & virtus, atque adeo moralis est pars logica, quod est absurdum. Si verò non considerat omne ens intentionale, eo quod non consideret ens morale ; ergo moralis est quinta scientia speculatiua, considerans ens morale .

9. Præter quatuor scientias enumeratas datur etiam theologia, ergo mala diuissio .

10. Est communis doctrina Aristotelis, Sancti Thomæ, & aliorum, quod ad scientiam requiritur abstractio à materia, & quod per diuersos gradus abstractionis constituuntur diuersæ scientiæ ; sed secundum hanc diuisionem diuersæ scientiæ, non constituuntur per diuersos gradus abstractionis à materia ; ergo allata diuissio est mala .

Respondeo, quod omnes diuisiones factæ à sapientibus, licet fundentur in naturis

ris rerū, habent tamen aliquid arbitrarii, & potuissēt alteri fieri. Ex. gr. licet Europa sit ita à Geographis diuisa, vt Italia, Gallia, & Hispania sint tres prouinciæ, & hæc diuisio fundetur in rerum natura, quæ Italiam à Gallia separauit per alpes, Galliam ab Hispania seunxit per Pyreneos, deditque tribus his nationibus habitus corporis, inclinationes animi, indoles, genios, & mores valde diuersos; tamen potuissent iidem geographi Europam aliter diuidere, ita vt ex Italia, & Gallia ex. gr. vnicam prouinciam constituerent. Aliquando tamen contingit naturam ita res per quosdam terminos naturales discriminare, vt statim appareat quænam diuisio sit optima, ita vt melior afferri non possit, si ductum naturæ sequi velimus, eo pacto, quo ex naturalibus limitibus patet Italiam, Galliam, & Hispaniam in vnicam prouinciam non esse confundendas. Si igitur ostenderimus diuisionem allatam, facu tatum contemplatiuarum ita esse conformem naturæ obiectorum contemplabilium, & intellectus contemplantis, vt melior afferri non possit, abundè quæstioni propositæ satisfaciemus. Ostendimus autem sic.

Tot sunt ponendæ facultates contemplatiuæ primariæ, quot sunt ordines obiectorum contemplabilium, ita vt propter
maio-

maiolem eleuationem postulent diuersum modum cognoscendi continentem diuersam difficultatem, præsertim si debeat intellectus in his ordinibus contemplandis uti immediatè lumine, & auxilio diuersarum potentiarum, obiecta verò, quæ non postulant diuersum modum cognoscendi continentem diuersam difficultatem, reduci debent ad vnâ scientiam; sed quatuor sunt huiusmodi ordines, quibus correspondent quatuor facultates enumeratæ; ergo quatuor sunt ponendæ scientiæ, & allata diuisionis est optima.

Minor probatur, explicando tales ordines. Primus, & infimus est ordo rerum naturalium, seu sensibilibus mutabilium, qui primo detegitur à sensibus videntibus res mutari modis innumeris. Postulat modum contemplandi, quo per sensum accuratè res obseruemus, & varias experientias combinantes, colligamus principia; qui modus contemplandi habet specialem difficultatem, ex qua oritur, ut multi licet ad alias scientias aptissimi, quia sunt inepti ad observationes per sensum faciendas, sint inepti ad physicam. Vtitur intellectus in rebus physicis contemplandis præsertim auxilio sensus communis, qui cum sit vnicus percipit omnes mutationes sensibiles, & earum, memoriam retinet. Hic ordo fundat, ac specificat physicam.

Se-

Secundus, & eleuator est ordo entis extensi continuè, vel discretè. Detegitur præsertim ab imaginatione, quæ in ente extenso continuè, ac faciente magnitudinem, deprehendit innumeras species figurarum, linearum, angulorum, quas sensus nunquam percepit; in ente verò extenso discretè, ita vt constituat multitudinem, deprehendit innumeras species numerorum. Postulat modum contemplandi, quo per imaginationem varias figuras, ac numeros fingentes, atque intuentes vt præfentes, de his discurremus; qui modus cognoscendi continet specialem difficultatem, ex qua oritur, vt qui sunt debilis imaginationis sint parum apti ad mathematicam; è conuerso qui viuidam habent imaginationem, plerumque sint valde apti ad mathematicam. Vtitur intellectus in contemplatione entis extensi præsertim, auxilio imaginationis. Hic verò ordo rerum fundat mathematicam.

Tertius ordo sublimior est ordo entis realis immaterialis præcisivè, vel negatiuè, qui primo detegitur ab intellectu eleuante se supra omnia sensibilia, & imaginabilia. Fundat modum cognoscendi, quo intellectus contemplatur obiecta eleuans se supra sensum, & imaginationem; qui continet specialem difficultatem, ex qua oritur, vt multi, qui sunt nimis addicti sensibus

sibus, & imaginationi, percipere nequeant res metaphysicas; alii è conuerso, qui habent intellectum benè dispositum, sint aptissimi ad metaphysicam, licet parum apti sint ad physicam, & mathematicam. Vtitur intellectus in ente immateriali contemplando lumine suo directo. Hic ordo fundat metaphysicam.

Quartus ordo est intentionalis, qui est eleuator, quia prædicata intentionalia cogniti conueniunt non solum enti, sed etiam non enti, cum etiam non ens cognoscatur. Fundat modum cognoscendi, quo intellectus percipit obiecta non directè in se ipsis, sed reflexè, & in cognitione; qui modus cognoscendi continet specialem difficultatem, ex qua oritur, vt multi, qui habent magnam facilitatem contemplandi res secundum prædicata realia, & metaphysica, maximam experiantur difficultatem in iisdem contemplandis secundum prædicata intentionalia, ac logica. Non utitur intellectus in contemplatione entis intentionalis lumine potentiè realiter, sed solum virtualiter distinctè, vt dicetur in responsione ad septimum. Hic ordo fundat logicam. Constat igitur hanc diuisionem esse maximè conformem naturis obiectorum contemplabilium, & eleuationum, & intellectus obiecta contemplantis cum diuersa difficultate, atque adeo

adeo esse optimam, vt melius patebit ex solutione argumentorum.

Confirmatur, nam natura ad diuersas difficultates superandas ponit plures habitus, & cum voluntati proponuntur plura obiecta formalia honesta continentia diuersas difficultates, multiplicantur virtutes morales; ergo dum diuidimus scientias per obiecta eleuatiore, & eleuatiore habentia diuersam difficultatem, imitatur naturam.

Ad 1. Argumentum ex eo, quod sufficit vna potentia intellectiua ad intelligendum omne intelligibile; ergo sufficit vnica scientia ad sciendum omne scibile, est simile his: sufficit vnica tabula ad hoc, vt recipiat innumeras imagines rerum plurimarum; ergo sufficit vnica imago ad hoc, vt exprimat innumerabiles res: sufficit vnica papyrus, vt recipiat omnes characteres; ergo sufficit vnicus character: in quibus conclusio nullatenus sequitur. Intellectus enim est vna potentia, quæ potest fieri omnia, recipiendo imagines omnium rerum, tum actuales, quæ cito transeunt, ac delentur, tum habituales, quæ permanent, adeoque est veluti tabula, ac papyrus viuæ, in qua possunt describi characteres, & imagines omnium rerum; ergo ex eo, quod intellectus sit vnicus, non sequitur, quod sufficiat vnica imago, sed

K quod

quod requiratur tot imagines, ac scientiæ, quot obiecta specie diuersa describuntur in intellectu. Hinc verò potest ex Aristotele intelligi differentia inter intellectum, qui nescit aliquod obiectum, ex. gr. demonstrationem eclipsis; intellectum, qui scit habitualiter, sed de illo non cogitat; & intellectum, qui scit, & cogitat. Intellectus, qui nescit, est sicut tabula, in qua aliquod obiectum non est descriptum, potest tamen describi; ideo talis intellectus scit solum potentia, actu nescit. Intellectus, qui scit habitualiter, est sicut tabula, in qua obiectum est depictum, sed nemo cōtemplatur; ideoque scit habitu, & in actu primo, non autem in actu secundo. Demum intellectus, qui scit, & cogitat, est sicut tabula, in qua obiectum est depictum, & aliquis contemplatur. Ad confirmationem ex eo, quod omnes scientiæ possent reduci ad vnicam, quæ contempletur ens, seu verum in vniuersali: respondeo non posse conaturaliter reduci ad vnicam, cum plures sint ordines rerum, vt explicatum est.

Ad 2. Distinguo minorem; tot debent poni scientiæ, quot sunt potentiæ, quarum auxilio intellectus vtitur immediatè in contemplatione obiectorum scibilium concedo; quarum auxilio non vtitur immediatè, nego. Intellectus in contemplatione obiectorum scibilium non vtitur
imme-

immediatè sensationibus ipsorum, cum raro contempletur, præsentibus obiectis, sed utitur memoria talium obiectorum, ac sensationum; sed de obiectis sensibilibus datur vnica memoria, eaque non in sensibus externis, sed in sensu interno; ergo de obiectis sensibilibus datur vnica scientia. Quod in sensibus externis non detur memoria, patet, quia omnes sensationes sensuum externorum sunt de obiectis vt præsentibus; sed memoria non est de obiecto vt præsentis; ergo in sensibus externis non datur memoria. Ex defectu memoriæ sequitur sensus externos non percipere formaliter mutationem. Ratio est, quia mutatio non potest formaliter cognosci, nisi cognoscatur rem aliter se habere nunc, ac antea; sed *ly ante* includit memoriã modi, quo res ante se habebat; ergo mutatio formaliter non potest cognosci sine memoria, ac proinde sensus externi non percipiunt formaliter mutationem. Aristoteles docens, quod deficiente vno sensu, deficit vna scientia, loquitur de scientia partiali vnus sensibilis, quæ comprehenditur in physica tamquam in scientia totali.

Ad 3. Nego consequentiam. Intellectus diuinus non habet aliam scientiam, quam theologiam. Ratio est, quia scientia cognoscens obiectum solum ex motiuo,

& obiecto formali Deitatis, seu diuinę essentię est theologia; sed Deus utpote per suam essentiam sufficientissimus ad cognoscendum omnia cognoscibilia cognoscit vniuersa etiam creata ex vnico motiuo, & obiecto formali diuinę essentię; ergo Deus cognoscit omnia cognoscibilia per theologiam, atque adeo datur in Deo vnica scientia continens in se eminenter omnes scientias, eo pacto, quo diuina essentia est obiectum continens eminenter omnia obiecta. Opposito igitur modo se habent Deus, & creaturę. Creaturę enim naturaliter cognoscunt Deum per metaphysicam, quia cognoscunt Deum per creaturas tanquam per obiectum formale, iuxta illud Pauli: *inuisibilia Dei per ea quę facta sunt intellecta conspiciuntur*; Deus cognoscit creaturas per theologiam, quia per motiuum formale diuinę essentię. Quo ad angelos sicut quia habent intellectum valde perfectum non indigent sensu, imaginatione, & alia potentia cognoscitiua, ita non indigent pluribus scientiis, sed omnia cognoscunt per vnicam scientiam, quę potest vocari metaphysica angelica, nec habent maiorem difficultatem ad cognoscendas veritates mathematicas, quam logicas, physicas, & metaphysicas; ex quo fundamento varias in homine scientias distinguimus. Habet autem metaphysica
an-

angelica pro obiecto formali entia, in quantum relucet in angelorum essentia, in qua descripta sunt per species illis ingenuitas à Deo. Ex quo patet metaphysicam angelicam esse diuersæ rationis à nostra, quia habet diuersum obiectum motiuum. Nostra enim habet pro obiecto motiuo quidditatem rei materialis, quia intellectus humanus etiam spiritualia cognoscit per similitudinem rerum materialium; at angelica habet pro obiecto formali quidditatem cuiuscumque obiecti, prout est descripta in eorum essentia.

Ad 4. Distinguo maiorem: ad eandem scientiam, ad quam spectat contemplari aliquod obiectum, spectat considerare species, & proprietates ipsius; si constituent nouum ordinem rerum postulantium diuersum modum cognoscendi, & habentem specialem difficultatem, nego; si non constituent talem ordinem, concedo. Ens naturale, & ens extensū, licet sint species entis realis, tamen cōstituunt nouū ordinem rerum, habentque ceteras condiciones requisitas ad fundandam specialem scientiā; ergo non spectant ad considerationem metaphysicam, sed fundant scientias speciales, nimirum physicam, & mathematicam. Similiter extensio licet sit proprietas entis naturalis, constituit nouum ordinem rerum, ac proinde non spectat ad

physicam, quæ est scientia de ente naturali, sed fundat mathematicam, quæ est scientia specialis. Demum ens rationis, seu intentionale, licet sit proprietas intellectus, constituit nouum ordinem rerum; ergo non spectat ad considerationem animasticæ contemplantis intellectum, sed fundat logicam, quæ est scientia specialis.

Dum vrgetur: per idem lumen, per quod animastica cōsiderat operationes intellectus, logica considerat ens rationis: tam enim operationes intellectus, quam ens rationis cognoscuntur per reflexionem: distinguo illam propositionem; tam ens rationis, quam operationes cognoscuntur per reflexionem in eodem sensu, nego; in diuerso sensu, concedo. Reflexio propria, quæ est specialis modus cognoscendi habens specialem difficultatem, est, quæ obiectum cognoscitur vt cognitum, & non in se ipso, sed in cognitione tendente in ipsum. Hac reflexione non considerat animastica operationes. Neque enim considerat illas vt cognitæ, sed considerat directè in se ipsis secundū prædicata realia, licet dicatur cognoscere reflexè, in quantum omnis cognitio cognoscens nostros actus dicitur aliquantulum reflexa. Sed talis reflexio non est specialis modus cognoscendi, nec habet specialem difficultatem, illa altera reflexio

flexio continet, ideoque fundat logicam ,
quę sit scientia specialis .

Ad 5. Distinguo maiorem : contem-
platio obiecti, quod potest inueniri extra
materiam, si prius debeat per imaginatio-
nem cognosci in materia, superando spe-
cialem difficultatem imaginationis, spectat
ad metaphysicam, nego ; si non debeat
prius cognosci in materia, concedo. Licet
numeri possint inueniri extra materiam ,
ex.gr.in personis diuinis, & angelis , ta-
men intellectus humanus vt veniat in
cognitionem numerorum , debet prius
imaginari numerum in rebus materiali-
bus, & cognoscere principia, & propieta-
tes numeri materialis , superando specia-
lem difficultatem talis imaginationis , vt
constat experientia. Et confirmatur à si-
gno. Nam qui sunt debilis imaginationis,
licet sint optimi metaphysici, sunt parum
capaces Arithmeticę ; ergo contemplatio
numerorum spectat ad mathematicam ,
cuius specialis difficultas est vincenda ,
non autem ad metaphysicam ; ac proinde
arithmetica est pars mathematicę , non
metaphysicę .

Ad 6. Aristoteles diuidens scientias
speculatiuas non diuidit scientias vniuer-
sim, sed supponens famosam diuisionem
Platonis, qua scientiam vniuersim diuisit
in rationalem, moralem, & realem, subdi-

uidit realem in tres, physicam, mathematicam, & metaphysicam. At Sanctus Thomas nunquam Aristoteli cōtrarius scientias vniuersim diuidens etiam logicam, seu rationalem enumerat.

Ad 7. Distinguo minorem: logica non fundatur in potentia diuersa formaliter, concedo; æquiualerter, nego. Potentia reflexiua est æquiualerter diuersa à potentia cognoscitiua directè: quod patet, nam nulla potentia cognoscitiua, vel appetitiua inferior intellectu, ac voluntate, est reflexiua supra suos actus, sed ad hanc reflexionem datur potentia superior. Ex gr. oculus percipit colorem, & lucem directè, suam visionem, & obiectum vt visum non percipit: quod valet etiam in cæteris sensibus. Ad percipienda verò reflexiue obiecta vt sensata per sensus exteriores, hoc est vt visa, audita &c. datur sensus internus; qui pariter non reflectit supra suos actus, sed ad percipiendum reflexiue actus sensus interni datur phantasia, seu imaginatio; ad percipiendos reflexiue actus imaginationis, quos phantasia non percipit, datur intellectus. Et quia non potest dari processus in infinitum in potētis cognoscitiuis, & necessaria est aliqua potentia perceptiua omnis veri, & appetitiua omnis boni; actus verò intellectus sunt aliquod verum, actus voluntatis sunt aliquod

aliquid bonum; ideo debent dari potentie reflexive supra suos actus, in quibus licet potentia cognoscendi directe, & cognoscendi reflexe non distinguantur realiter, distinguuntur equiuacenter, atque adeo fundare possunt plures scientias: preteritum quia modus cognoscendi directus, ac reflexus habent diuersam difficultatem.

Ad 8. Sicut metaphysica considerat ens reale, non tamen secundum species entis naturalis, & extensi, quia in eorum contemplatione est specialis difficultas, ut dictum est ad quartum: sic logica considerat ens intentionale, non tamen secundum speciem entis moralis, quia in contemplatione entis moralis est specialis difficultas, atque ultra lumen reflexum requiritur lumen sensus interni, atque experientia sensibilis. Quod requiratur lumen experimentale, patet: nam actiones humane sunt honeste, vel inhoneste, licite, vel illicitae ex circumstantiis singularibus; ergo ut intellectus sit idoneus ad iudicandum de moralitate actionum, debet esse expertus earum cum suis circumstantiis singularibus. Quod in contemplatione entis moralis inueniatur specialis difficultas, probatur: nam ut quis recte iudicet de rebus moralibus, debet habere animum non obnubilatum passionibus: passiones enim

licet non peruertant iudicium de rebus mathematicis, ac metaphysicis, tamen peruertunt iudicium de rebus moralibus; sed in habendo animum non obnubilatum passionibus datur specialis difficultas; ergo &c. Ideo Aristoteles 1. ethic. cap. 3. docet iuuenem non esse idoneum auditorem moralis, tum quia non habet experientiam, tum quia passionibus abundat, ergo Aristoteles ad rectè iudicandum de rebus moralibus, requirit & experientiam, & animum non obnubilatum passionibus.

Si vrgeatur, quod hinc sequitur moralem esse quintam scientiam speculatiuam: primo posset concedi, dicendo, quod iuxta famosam diuisionem Platonis scientiæ speculatiuæ primariæ sunt quinque: rationalis seu logica, moralis, & tres reales. Secundo dico moralem non esse facultatem primariam, sed mixtam: hoc autem loco diuisimus solum facultates primarias. Est autem facultas mixta, quia procedit ex coniunctione duplicis luminis, reflexi, seu logici, & experimentalis, seu physici. Sicut autem præter colores primarios, qui non generantur ex mixtione plurium colorum, dantur secundarii, qui generantur ex mixtione plurium colorum: sic præter facultates primarias, quæ non procedunt ex coniunctione plurium luminum, dantur

dātur secundarię procedentes ex coniunctione plurium luminum, vt dicetur etiam quęst. 8.

Ad 9. Duplex est theologia, naturalis, ac supernaturalis. Prima quę contemplatur Deum per solam lumen naturę, est pars metaphysicę, & in ipsa continetur. Supernaturalis non fuit comprehendenda in diuisione scientiarum naturalium. Vt tamen aliquid de ipsa indicem theologia supernaturalis est quę contemplatur Deum, & alia spectantia ad Deum per lumen supernaturale, & diuinum. Lumen autem diuinum est duplex. Primum est lumen fidei; secundum, & nobilius est lumen glorię, quod contemplatur Deum per se ipsum, & in se ipso, ita vt non habeat aliud motium intelligendi, & assentiendi, nisi diuinam essentiam. Per hoc lumen beati cognoscunt Deum in se ipso, & facie ad faciem, non per similitudines creatas, & cætera cognoscunt in Deo, & hoc lumen est scientia perfectissima, quę habet summam euidenciam sine vlla obscuritate. Lumen fidei est, quod contemplatur Deū per similitudines creatas, tamen ita, vt non habeat aliud motium assentiendi rebus reuelatis, quam veracitatem Dei reuelantis. Hoc lumen non est scientia, quia est obscurum, cum ad scientiam requiratur euidencia. Sicut ergo datur du-

plex lumen diuinum, sic datur duplex theologia supernaturalis; theologia, nimirum beata, quæ est scientia perfectissima, & omnino quietans intellectum, atque adeo beatificans per cognitionem primæ causæ continentis perfectè omnes alias causas, & per cognitionem primæ veritatis continentis perfectè omnes alias veritates; & theologia fidei, quæ non est scientia, cum sit obscura, nec quietat intellectum, sed excitat desiderium sciendi, & perfectè cognoscendi in patria quod credimus, & imperfectè cognoscimus in via. Præter fidem, quæ à Sanctis Patribus vocatur theologia, datur theologia scholastica, quæ procedit ex coniunctione duplicis luminis, naturalis nimirum, ac fidei, & coniungens principiis reuelatis principia nota lumine naturæ, infert multas conclusiones. E. G. est notum per fidem, quod Christus habuit omnes proprietates hominum, excepto peccato, & peccabilitate: est notum per lumen naturæ, quod risibilitas est proprietas hominis: hinc theologia infert; *ergo Christus habuit risibilitatem*. Ex quo patet theologiam esse facultatem amplissimam, cum coniungat duplex lumen amplissimum, naturale nimirum, & supernaturale, atque ex iis desumat innumera principia ad inferendas innumeras conclusiones.

Ad

Ad 10. Explicandum, quo pacto iuxta axioma Aristotelis, ac Sancti Thomæ ad scientiâ requiratur abstractio à materia, & quomodo per diuersos gradus abstractionis à materia constituentur diuersi gradus scientiarum.

Materialitas est multitudo recedens ab unitate: immaterialitas est unitas recedens à multitudine. Multitudo tunc maximè recedit ab unitate, cum est infinita, & inordinata: cum enim ordo sit habitudo multorum ad vnum, eo ipso ponit in rebus aliquam unitatem, vt patet in exercitu, in quo ponitur unitas per ordinem ad vnum imperatorem; ergo è conuerso multitudo per carentiam ordinis recedit ab unitate, atque adeo fit maximè materialis. Hinc habetur, quis sit primus gradus materialitatis, & quid sit ipsa materia: est enim infinita multitudo partium actualium, vel potentialium primi subiecti, secundum se præcisè non habentium ordinem. Quod verò ponit in hac multitudine unitatem, ac ordinem est forma. Ex. gr. in exercitu materia est multitudo militum: forma est ordo dans unitatem: in domo materia est multitudo lapidum, forma dispositio, per quam ponitur in illis ordo, & unitas: in hac tabula materia est multitudo partium primi subiecti, forma, quæ ponit in tali tabula unitatem, & ordi-

ordinem, eo pacto, quo vbicatio, seu forma localis ordinat partes in loco. Formę quo magis participant de vnitate, & ordine, eo minus sunt materiales. Ex. gr. quia in plantis datur maior ordo partium, quam in rebus inanimatis, formę plantarum sunt minus materiales, quam formę inanimatorum. Formę animalium, in quibus datur maior ordo, & vnitatis; vt patet quia cum læditur vna pars, per consensum dolent, & mouentur omnes partes; sunt minus materiales, quam formę plantarum. Anima rationalis quia est omnino indiuisibilis, ac partibus carens, ac potest manere extra materiam, est immaterialis. Angeli sunt magis immateriales, quam anima rationalis, quia sunt indiuisibiles, vt anima, & præterea non debent vnquam materiæ vniri. Quia tamen in Angelis datur multiplex compositio ex essentia, & existentia; ex natura, & subsistentia; ex substantia, & accidentibus; ideo Angeli non habent summum gradum immaterialitatis, qui gradus conuenit soli Deo, vt pote omnino simplici, & carente quacunque compositione.

Iam infinita multitudo partium carens ordine non est scibilis ab humano intellectu, cum sit summe confusa; ergo materia quæ consistit in hac multitudine, non est scibilis; sed in singularibus, quæ sensibus obiciuntur.

obiiciuntur, datur materialitas, hoc est infinita hæc multitudo; ergo singularia sensibilia non sunt ab homine scibilia; ergo vt intellectus habeat scientiam de sensibilibus, & materialibus, debet abstrahere à materialitate, hoc est ab infinita multitudine partium & contemplari sensibilia in vniuersali. Hic est ergo sensus axiomatis: *scientia fit per abstractionem à materia.*

Sunt autem quatuor gradus abstractionis correspondentes quatuor scientiis. Primus & infimus est physicus. Physica enim abstrahit à materia singulari, sed non à sensibili; cum consideret sensibilia, & materialia vt materialia, non tamen in singulari, sed in vniuersali, abstrahendo ab infinita multitudine, & materialitate singularem. Secundus gradus sublimior est mathematicus. Nam abstrahit non solum à materia singulari, sed etiam à materia sensibili, & mutabili, & considerat solam compositionem extensiuam, alias compositiones ex materia, & forma, ex mutato, mutatione, tempore, in quo fit mutatio, & partibus temporis non considerat. Ideo obiectum mathematicæ est simplicius, adeoque minus materiale, quam obiectum physicæ. In mathematica obiectum arithmetice est simplicius obiecto geometriæ, quia arithmetica considerat solam multitudinem, quæ consistit in sola compositione ex

vnita-

vnitatibus; geometria considerat magnitudinem, in qua, præter multitudinem partium extensarum, datur etiam compositio in ordine ad locum. Tertius gradus abstractionis est metaphysicus, qui abstrahit ab omni materia, & considerat ens immateriale præcisiuè, vel negatiuè, vt dictum est. Quartus & vltimus est logicus, qui cōsiderat esse cogniti, quod est immaterialius, quam esse reale. Nam esse reale non consistit in ipsa eleuatione à materia; at esse cogniti consistit in hac ipsa eleuatione; cum idem sit cognosci, ac habere esse eleuatum à materia, idem sit cognosci cognitione perfectiore, & perfectiore, ac habere esse eleuatius, & eleuatius à materia. Debet tamen aduerti, quod non quicunque gradus abstractionis eleuator sufficit ad constituendam scientiam specialem, sed illi soli gradus, qui correspondent diuersis ordinibus rerum, postulantis diuersum modum cognoscendi, cum diuersa difficultate, quales sunt quatuor explicati. Ideo licet supra gradum metaphysicum considerantem rationes communes enti materiali, & immateriali, detur gradus considerans rationes proprias entis immaterialis, qui est eleuator, tamen non sunt ponenda duæ scientiæ ex ratione allata.

Verum

Vtrum quatuor facultatibus conuenienter assignetur obiectum attributionis, materiale, & formale.

Quæstio VI.

V Idetur quod non conuenienter assignetur physicę quidem vt obiectum attributionis ens naturale, in quantum naturale, hoc est in quantum mutabile sensibiler: obiectum formale ipsa materialitas, seu mutabilitas sensibilis: obiectum materiale ipsum ens mutabile sensibiler: mathematicę vt obiectum attributionis ens extensum, quatenus extensum: obiectum formale ipsa extensio: materiale illud ens, quod extenditur: metaphysicę obiectum attributionis ens reale transnaturale, in quantum transnaturale, seu potens esse extra materiam: obiectum formale ipsa immaterialitas, seu potentia essendi extra materiam: obiectum materiale illud ens, quod potest esse extra materiam: logicę obiectum attributionis ens intentionale, in quantum intentionale, seu ens rationis logicum: obiectum formale esse intentionale: obiectum materiale illud, quod habet esse intentionale: i. quia obiectum attributionis debet constitui ex obiecto materiali, & formali, quę realiter distinguantur; sed

sed ens naturale nō constituitur ex obiecto materiali, & formali realiter distinctis: nam mutabilitas entium naturalium non distinguitur ab ipsis entibus naturalibus, ex. gr. mutabilitas equi non distinguitur ab equo; similiter ens transnaturale, seu potens esse extra materiam non distinguitur à potentia essendi extra materiam; ergo inconuenienter physicæ & metaphysicæ assignantur obiecta.

2. Assignatio, qua obiectum assignatur sub genere proximo, & vniuoco, est melior assignatione, qua assignatur sub genere non vniuoco; sed assignando obiectum physicæ sub his terminis: *corpus naturale*, assignatur sub genere proximo; assignando sub istis aliis terminis *ens naturale*, assignatur sub genere remoto, & non vniuoco, cum ens sit genus remotum, & non vniuocum; ergo conuenientius assignatur obiectum physicæ sub his terminis *corpus naturale*. Eodem argumento probatur quod mathematicæ conuenientius assignatur obiectum sub his terminis: *corpus extensum*, quam sub istis: *ens extensum*.

3. Vel dum dicitur, quod ens naturale est obiectum attributionis in physica, intelligitur, quod obiectum attributionis sit ens naturale, in quantum est ratio communis substantiæ, & accidenti, ita vt etiam accidentia sint obiecta attributionis partialia,

tialia; & contra est, quia est innaturale, quod accidentia, quæ merè sunt entis ens, & habent totum suum esse in ordine ad substantiam, considerentur per se, & non in ordine ad substantiam: vel intelligitur quod obiectum physicæ sit ens naturale, in quantum ens naturale est sola substantia, ita ut accidentia sint merè obiecta attributa; & contra est, tum quia accidentia habent cognoscibilitatem gratia sui; ergo considerantur gratia sui, & non merè in ordine ad substantiam: tum quia illud, quo non cognito, & cognitis aliis perfectè, adhuc scientia non esset contenta, est obiectum consideratum gratia sui, atque adeo non merè attributum; sed physica cognitis perfectè substantiis, & nō cognitis accidentibus, non esset contenta; ergo accidentia cōsiderātur gratia sui, & ut partialia obiecta attributionis.

4. Ens rationis cum realiter non existat, nec possit existere, non potest fundare, causare, & specificare scientiam realiter existentem; sed logica est scientia realiter existens; ergo non potest habere ens rationis pro obiecto, à quo specificetur. Et confirmatur, quia cum esse intentionale cogniti sit tenuissimum, & imperfectissimum, non meretur scientiam specialem; ergo non datur logica, quæ sit quarta scientia specialis primaria.

Respondeo, quod sicut diuifio scientiarum vtpote artificialis habet aliquid arbitrarij, & potuiffet aliter fieri, vt dictum est quæstione 5. sic assignatio obiectorum habet aliquid arbitrarij, & possent aliter assignari. Rursus sicut datur aliqua diuifio artificialis, quam statim apparet esse optimam, & maximè conformem naturis rerum; sic datur aliqua assignatio obiectorum, quam statim apparet esse optimam, & maximè conformem naturis scientiarum. Dicendum igitur allatam assignationem obiectorum esse maximè conformem nature, & diuifioni quatuor facultatum primariarum, adeoque optimam. Probatur ex ipsa definitione obiecti attributionis, obiecti materialis, & formalis. Obiectum attributionis est *obiectum saltem genere vnũ, quod connaturaliter primo proponitur scientie, ad quod cetera ordinatim reducuntur, alia propinquius, alia remotius*: ea verò, quæ quomodocumque considerantur in ordine ad obiectum attributionis, vocantur obiecta communis. Est igitur obiectum attributionis in scientia sicut imperator in exercitu. Nam sicut imperator est vnus, & primus, ad quem ceteri ordinatè reducuntur, & est principium totius ordinis, qui est in exercitu: sic obiectum attributionis est vnum, & primum in scientia, ad quod cetera ordinatè reducuntur,

et

et est principium totius ordinis, qui est in scientia. In obiecto attributionis distinguitur duplex ratio, seu duplex obiectum, materiale, & formale. Obiectum formale est illa ratio, quæ primo connaturaliter mouet ad contemplationem obiecti attributionis: obiectum materiale sunt, quæ considerantur ratione obiecti formalis. Sicut enim quia marmor constituitur statua ratione figuræ, marmor est materia statuæ, figura est forma; sic quia in obiecto attributionis ab vna ratione mouemur ad considerandam aliam, illa ratio, quam consideramus propter aliam, est veluti materia, & obiectum materiale; illa, ratione cuius contemplamur, est veluti forma, & obiectum formale.

Sed ens naturale est obiectum vnum genere, & est primum, quod cōnaturaliter proponitur physicæ; scientia enim naturalis quid aliud sibi primo contemplandum proponat, quam ens naturale, seu mobile, & mutabile sensibilibiter, omnia considerando in ordine ad illud, & contemplando principia, causas, proprietates, species, & mutationes entis naturalis; ergo ens naturale est obiectum attributionis in physica. Et quia id, quod excitat curiositatem ad contemplandum ens naturale, est mutabilitas ipsius: homines enim videntes per sensum, & experientiam omnia corpora

pora sensibiliter moueri secundum locum, secundum qualitatem, dum calefiunt, & frigeſcunt; secundum quantitatem, dum crescunt, & decrescunt; secundum substantiam, dum nascuntur, & intereunt; aerem, ex sereno fieri pluuium, ex pluuiis serenum; post æstatem sequi autumnum, deinde hyemem, ac ver, ac rursus æstatem, & vniuersa subiecta esse mutationibus innumeris, cœperunt admirari, & ens mutabile proposuerunt sibi contemplandum; ergo mutabilitas est obiectum formale physice, ens verò mobile obiectum materiale.

Similiter ens extensum est vnum genere, & est primum, quod cōnaturaliter proponitur mathematicæ. Scientia enim, quæ eleuat se supra sensum, & motum, quid aliud sibi connaturaliter proponat contemplandum, quam ens discretè extensum in numeros, continuè verò in magnitudines, contemplando in ordine ad illud species, proprietates, & passionēs numerorum, puncta, lineas, superficies, figuras, angulos, solida contenta in magnitudinibus, eorū proprietates, & proportionēs. Et quia in ente extenso ipsa extensio, ex qua resultat incredibilis varietas numerorum, figurarum, linearum, & angulorum, mouet ad contemplandum, ideo extensio est obiectum formale, ens verò extensum obiectum materiale.

Rursus

Rursus ens reale transnaturale est vnū genere, & metaphysica, quę eleuat se supra materialia sensibilia, & imaginabilia ad considerandum immaterialia, & insensibilia, hoc est quę possunt esse extra materiam, connaturaliter sibi proponit contemplandum ens reale, in quantum potest etiam inueniri extra materiam, considerando in ordine ad illud rationes communes enti materiali, & immateriali, quę dicuntur immateriales præcisue, quales sunt ratio entis, substantię viuētis &c. et præterea ipsa entia immaterialia, nimirum Deum, angelos. Et quia ipsa ratio transnaturalis, seu potentis esse extra materiam est id, quod primo mouet intellectum ad hoc, vt eleuando se supra sensum, & motum contempletur transnaturalia, ideo transnaturalitas, seu potentia essendi extra materiam est obiectum formale metaphysicę, ens verò transnaturale est obiectum materiale.

Denique ens intentionale suam habet vniratem, & connaturale fuit, vt homines reflectentes supra suos actus, & aduertentes, quod dant obiectis esse intentionale cogniti, prædicati subiecti, generis speciei, clari, obscuri, noti, ignoti, principii, conclusionis, proposuerint sibi contemplandū ens intentionale, cætera considerando in ordine ad illud. Nam res considerantur
non

non secundum prædicata realia, sed secundum intentionalia prædicamenti, prædicabilis, vniuersalis, generis, speciei &c; operationes etiam intellectus considerantur, non in quantum sunt actus vitales, spirituales &c, sed solum in quantum dant rebus esse cogniti, prædicati &c; ergo ens intentionale est obiectum attributionis in logica. Et quia ipsum esse intentionale primo mouet ad contemplandum, ideo esse intentionale est obiectum formale, ens intentionale est obiectum materiale.

Confirmatur conclusio, nam obiecta, debent ita scientiis primariis assignari, vt comprehendant omne scibile, explicent ordinem scientiarum primariarum inter se, & correspondeant nominibus scientiarum, & rerum; sed hæc omnia verificatur in facta assignatione: nam ens reale, & intentionale manifestè comprehendunt omne scibile; explicatur optimè ordo quatuor scientiarum, & quo pacto scientiæ eleuentur ordinatim ad contemplandum obiectum eleuatius, & abstractius à materia: correspondent etiam hæc obiecta nominibus scientiarum: nam physicæ, seu naturali correspondet ens naturale; metaphysicæ, seu transnaturali correspondet ens transnaturale; logicæ, seu rationali correspondet ens intentionale, quod vocatur etiam ens rationis logicum; ergo &c. Sola mathema-

thematica, quæ habet nomen genericum, disciplinæ, habet obiectum non specialiter correspondens nomini; ergo optima est allata assignatio.

Ad 1. Obiectum attributionis debet quidem constitui ex obiecto materiali, & formali, sed nihil refert ad obiectum formale facultatum speculatiuarum, quod distinguatur realiter, vel solum formaliter, & per præcisionem intellectus ab obiecto materiali. Sicut enim intellectus per operationem præcisivam in ente mutabili distinguit mutabilitatem ab eo, quod est mutabile; ita mouetur ad contemplandum à mutabilitate cognita præcisivè, & per hoc mutabilitas constituitur obiectum formale, ens mutabile constituitur obiectum materiale. Debet autem vitari equivo-
catio. Aliud enim est, quod aliqua ratio, quæ realiter inuenitur in obiecto, constituatur obiectum formale per operationem præcisivam intellectus: aliud, quod operatio intellectus sit obiectum formale: primum enim est verum, secundum falsum; & in casu nostro mutabilitas constituitur obiectum formale per operationem præcisivam, & tamen non operatio præcisiva, sed mutabilitas præcisa est obiectum formale.

Ad 2. Aliqui fusissime disputant, utrum obiectum physicæ debeat assignari sub his terminis, *ens naturale*: an sub istis, *corpus*

naturale. Sed quaestio est parui momenti, & videtur prae habenda sententia Sancti Thomae, quod debeat assignari sub his terminis, *ens naturale*. Ratio est, quia obiectum physice debet assignari sub tali ratione, sub qua sit statim manifestum, quod comprehendat omnia entia naturalia; sed statim est manifestum, quod ens mutabile comprehendat omnia entia naturalia, seu sensibilibus mobilia; non est statim manifestum, quod corpus mutabile comprehendat omnia entia naturalia: posset enim aliquis primo aspectu dubitare, an detur aliquod ens mutabile, quod non sit corpus, licet deinde demonstraretur in physica, quod omne ens mutabile sensibilibus est corpus, & quod omne corpus est mutabile sensibilibus; ergo obiectum physicae debet assignari sub his terminis *ens mutabile, seu naturale*. Adde, quod sicut quatuor scientiae conueniunt in ratione scientiae, differunt deinde in suis differentiis, ita quatuor scientiis debent obiecta ita assignari, ut exprimat ratio entis, in qua conueniunt, & ratio naturalis, extensi &c, in quibus differunt: quod non contingeret, si physice assignaretur obiectum sub ratione corporis. Hinc verò respondetur ad argumentum oppositum. Obiectum melius assignatur sub genere proximo, & uniuoco, quam sub remoto, & non uniuoco, di-

distingui: si datur aliquod genus proximum, & vniuocum, in quo conueniant obiecta quatuor scientiarum, concedo; si non datur, nego. Obiecta quatuor scientiarum conueniunt solū in ratione entis; ergo cum debeant obiecta ita assignari, vt exprimatur ratio, in qua conueniunt, debent assignari sub ratione entis. Addo, quod si assignetur *corpus naturale*, corpus non est genus naturalis, sed ratio conuertibilis cum naturalis; ergo non exprimitur genus, & differentia obiecti, quæ debent exprimi. Noto etiam, quod ens naturale est genus vniuocum respectu omnium entium naturalium; ergo physice assignatur obiectum vniuocè vnum: licet hoc non sit necessarium ad scientiam, sed sufficiat, vt habeat obiectum vnum analogicè, vt Aristoteles docet.

Ad 3. Licet aliqui censeant obiectum attributionis in physica esse ens naturale, in quantum comprehendit tum substantiam, tum accidentia, existimo obiectum attributionis esse ens naturale, in quantum comprehendit solas substantias completas, ex. gr. hominem, leonem, equum, & substantias incompletas, vt materiam, & formam, manum, & pedem &c, ac similiter accidentia esse obiecta merè attributa. Ratio est, quia obiectum attributionis est illud, quod physica primo sibi

proponit contemplandum iuxta naturalem modum intellectus humani : at intellectus humanus iuxta naturalem modum contemplandi sensibilia proponit sibi primo substantias completas , illarum verò partes, & accidentia considerat in ordine ad substantias completas. Cum enim aliquis videt figuram, aut motum alicuius rei, non sistit in contemplatione figure, ac motus, sed statim quærit, *quid est id, quod mouetur, & ita est figuratum*; cum videt hominis manum, quærit *quis est hic, cuius est hæc manus*, ac inde motum, figuram, & partes considerat in ordine ad illud, cuius sunt; eo pacto quo cum quis videt famulos, & aulicos, statim quærit quis sit ille princeps, quem comitantur, famulos verò, & aulicos considerat in ordine ad principem; ergo obiectum attributionis, quod sibi primo contemplandum proponit physica, est substantia completa naturalis; accidentia verò, & substantiæ partiales considerantur in ordine ad substantiam completam. Accidentia igitur respectu intellectus sunt sicut diaphanum, ex. gr. chrystallus, aut vitrum respectu visus. Sicut enim proposita chrystallo, visio non sistit in illa, sed progreditur ad aliud obiectum nō diaphanum, seu transparens, sed opacum, in quo sistit, & ad quod terminatur; sic cum intellectui proponitur
acci-

accidens, non sistit in illo, sed progreditur ad substantiam, quam primo, & per se contemplatur: ideoque S. Thomas docet obiectum intellectus humani, in quo nimirum sistit, non esse accidens, sed substantiam, seu quidditatem rei materialis. Solæ ergo substantiæ completæ sunt obiecta attributionis, ita ut substantia completa *ut sic* sit obiectum attributionis adæquatum, substantiæ completæ particulares, de quibus prædicatur substantia naturalis *ut sic*, ex. gr. plantæ, animalia, elementa, cæli &c. sint obiecta attributionis partialia, substantiæ partiales, accidentia, & reliqua, de quibus non prædicatur substantia naturalis *ut sic*, sint obiecta merè attributa.

Hinc ad ea, quæ opponebantur in contrarium. Accidentia habent cognoscibilitatem expetibilem gratia sui, ita ut intellectus connaturaliter in illis sistat tanquā in obiecto fundamentalis, nego: ita ut non sistat in illis, sed consideret in ordine ad substantiam, tanquam ad obiectum fundamentale, concedo; & nego consequentiam. Similiter dum opponitur: physica cognita perfectè substantia, & non cognitis accidentibus, non esset contenta; ergo considerat accidentia per se, & ut obiecta attributionis; nego suppositum. Supponitur enim, quod possit perfectè cognosci substantia, non cognitis accidentibus,

quod est apertè falsum, cum ad perfectam cognitionem substantiæ requiratur, ut cognoscantur accidentia ad ipsam spectantia. Si vrgeatur: si per impossibile physica cognosceret perfectè substantiam, & non cognosceret accidentia, non esset contenta; ergo &c. distinguo, non esset contenta, & simul esset contenta, concedo; solum non esset contenta, nego. Ex vna parte esset contenta, quia cognosceret perfectè substantiam: ex alia parte non esset contenta, quia eo ipso, quod non cognosceret accidentia, non cognosceret perfectè substantiam. Non est autem nouum, quod ex suppositione impossibili sequatur vtraque pars contradictionis.

Ad 4. Ens rationis metaphysicum, hoc est impossibile non potest specificare, & causare scientiam realiter existentem, adeoque scientia de impossibili specificatur ab ente reali, quod mouet ad cognitionem sui, & impossibilis, ut dictum est questione 2. ad 2.: at ens rationis logicum, nimirum cognitum realiter existit: non minus enim obiecta à parte rei sunt cognita, quam sint alba, & esse cogniti non minus datur, quam esse albi; ergo ens rationis logicum, utpote realiter existens, adhuc potest causare, & specificare scientiam.

Dum vrgetur: quia ens intentionale
cogni-

cogniti est tenuissimum , & vilissimum ,
ideoque indignum scientia speciali : re-
spondeo esse cogniti non esse ita imper-
fectum, sicut quibusdam videtur . Primo
enim est esse, quod omnia appetunt, vt di-
ctum est quaestione 2. ad 2. Secundo esse
reale, & substantiale , quod simul non sit
esse cogniti, eo ipso est imperfectum , & è
conuerso esse substantiale , quod simul sit
cogniti, est infinitè perfectum . Ideo esse
angeli , & cuiuscumque substantiæ creatæ
est imperfectum, quia non dat esse cogni-
ti neque angelo, neque alteri rei, cum nul-
la substantia creata possit esse cognitio .
At substantia diuina est infinitè perfe-
cta, quia cū sit sua cognitio, vt demonstrat
Aristoteles 12. metaph. dat esse cogniti
Deo , & omnibus aliis cognoscibilibus .
Tertio omne esse reale creatum est poste-
rius esse cogniti, & ab eo causatur, & spe-
cificatur tanquam ab adæquata causa , &
specificatiuo. Primum enim esse cuius-
cumque creaturæ est esse cogniti, quod ha-
bet in mente diuina , & dum creatura à
parte rei producitur , accipit esse reale
causatum, & specificatum ab esse cogniti ,
quod erat in mente diuina. Demum etiam
in arte humana artificiata causantur ab
esse cogniti, per quod sunt in mente artifi-
cis. Qui enim facit statuam imitatur sta-
tuam idealem, quam habet in mente Non

est igitur esse intentionale ita imperfectum, ut non possit fundare scientiam specialem.

Vtrum quatuor scientia habeant inter se aliquem ordinem. Quæstio VII.

Primo videtur, quod inter scientias non detur ex natura rei ordo inuentio nis, aut doctrinæ, nisi forte per accidens. Si enim vna scientia inuenta fuit prius quam alia, id accidit merè casualiter, cum æquè connaturaliter potuisset illa, quæ est inuenta posterius, inueniri prius. Similiter æquè bene potest mathematica addisci ante, vel potest logicam, & physicam, atque adeo non datur ex natura rei ordo doctrine.

2. Videtur quod neque detur ordo dignitatis, vel saltem non possit determinari. Sectatores enim vniuscuiusque scientiæ præferunt eam tanquam digniorem ceteris.

3. Videtur, quod neque detur ordo certitudinis. Certitudo enim consistit in indiuisibili, & non suscipit magis, & minus. Eo enim ipso, quod vna scientia esset altera certior, minus certa haberet aliquam incertitudinem, atque adeo non esset scientia, cum scientiæ repugnet omnis incertitudo.

Re-

Respondeo, quod ultra ordinem abstractionis, de quo egimus quaestione 5. ad 10. possunt considerari quatuor alii ordines, nimirum inuentionis, doctrinae, dignitatis, & certitudinis.

Secundum ordinem inuentionis primo inuenta fuit physica: secundo mathematica: tertio metaphysica: quarto logica. Nec id accidit omnino casualiter, sed connaturaliter, ita ut si oppositum accidisset, accidisset casu, & praeter naturam. Ratio est, quia cum occurrant sensibus sensibilia, quae innumeris modis mutantur, ita ut diei succedat nox, & nocti dies, hyemi ver &c. aeri sereno succedat nubilus, in quo fiunt pluuie, tonitrua, fulmina, nubilo rursus succedat serenus &c. connaturale fuit, ut homines ab hac sensibili mutabilitate excitati fuerint in admirationem, & curiositatem contemplandi ens sensibilibiter mutabile, & sic primo inuenta est physica. Deinde connaturale fuit, ut non sistentes in contemplatione corporum, sed eleuantes se supra sensum, & motum, atque imaginationem figentes in extensionem, & in ea deprehendentes incredibilem varietatem numerorum, figurarum &c, excitata fuerit curiositas ad contemplandum ens extensum, & sic secundo inuenta sit mathematica. Tardius inuenta est metaphysica. Eius enim obiectum non

constat dari per sensum, & imaginationē, sicut constat dari immediatē per sensum, & imaginationem ens mutabile, & extensum, sed per solum discursum. Obiectum siquidem metaphysicę est ens potens esse extra materiam. Quod autem præter entia materialia detur aliquod ens immateriale, ac potens esse extra materiam, demonstrari debet à physica ex rebus sensibilibus; ergo serius homines aduertentes præter entia materialia dari aliqua immaterialia, excitati fuerunt ad ea contemplanda, & inuenerunt metaphysicam. Ultimo loco inuenta fuit logica. Nam homines inuentis scientiis realibus, connaturaliter cœperunt reflectere supra suos actus, & aduertentes, quod tribuant obiectis esse intentionale, excitati fuerunt ad id contemplandum, & sic inuenerunt logicam.

Quoad ordinem doctrinę primo tradenda est logica. Cognitio enim reflexa dirigit directam. Nam sicut considerando saltus, aduertimus quandonam bene, quando malè saltemus, & sic dirigimur ad saltandum; ita considerando res ut cognitæ, aduertimus quandonam benè, quando malè cognoscantur, & sic dirigimur ad cognoscendum; ergo logica utpotè reflexiua habet vim dirigendi alias scientias, adeoque debet illis præmitti. Secundo

tra-

tradenda est mathematica . Nam mathematica pura ex vna parte non supponit physicam: ex alia parte principia mathematica possunt intelligi per lumen imaginationis, nec pendent ab experientia sensuum, quæ requirit longum tempus; ergo statim post logicam tradenda est mathematica; præsertim cum conclusiones mathematicæ demonstrantur clarissimè, nec contra illas proponantur difficultates, & sophismata, quorum solutio est valde implicata. Tertio tradenda est physica, quæ fundatur in inductione experimentalis requirente longum tempus. Ultimo tradenda est metaphysica, quippe cuius obiectum non est per se notum, sed demonstrandum à physica, vt Aristoteles docet. Adde quod secundum naturalem modum intelligendi à sensibilibus ascendimus ad insensibilia; ergo est connaturale, vt post considerationem sensibilibus per physicā, ascendamus ad considerata insensibilia per metaphysicam. Hic tamen ordo debet seruari per se: per accidens enim poterit alius ordo seruari. Ideo quia hac ætate iuuenes optant cito à studiis expediri, receptus est mos, vt post logicam tradatur simul physica, & mathematica, quæstiones vero metaphysicæ logicis, ac physicis admisceantur iuxta opportunitatem, & connexionem materiarum.

Quoad ordinem dignitatis præstantissima scientiarum est metaphysica, quia contemplatur ens immateriale, quod est præstantissimum, & maximè scibile; & præsertim quia contemplatur Deum continentem in se cum infinito excessu perfectionem omnium obiectorum, ad cuius contemplationem, utpote contemplationem optimi, & pulcherrimi, adeoque delectabilissimam, intellectus summo impetu fertur. Secundum locum tenet physica, cum contempletur entia valde perfecta, cælum, nimirum, elementa, plantas, animalia, hominem, quæ multo magis delectant, & alliciunt curiositatem, quam numeri, & magnitudines, quas mathematica contemplatur. Physica ergo propter nobilitatem obiecti simpliciter est nobilior mathematica, licet à mathematica vincatur in certitudine, & in multitudine conclusionum demonstratarum. Tertiū locum tenet mathematica. Quartum logica, cum ens intentionale sit tenuè, nec valde curiositatem alliciat.

Quoad ordinem certitudinis, logica speculatiua quoad aliquas conclusiones habet summam certitudinem, ita ut nulla scientia possit habere certitudinem maiorem circa vllam conclusionem. Demonstrat enim logica syllogismum concludere; sed quæcunque veritas demonstrabilis
à scien-

à scientia demonstratur per syllogismum; ergo implicat, quod de tali veritate habeatur certitudo maior, quam de hoc, quod syllogismus concludat. Nititur verò logica principiis certissimis, quæ sunt, *dictum de omni, & dictum de nullo*. Post logicam, in quantum demonstrat formam syllogisticam, summa certitudo est in metaphysica. Principia enim nota per immediatum lumen intellectus, qualia sunt metaphysica, sunt eidentiora illis, quæ indigent lumine imaginationis, aut sensus, qualia sunt mathematica, & physica: nam ex minori eidentia oritur, quod intellectus iuvari debet imaginatione, vel sensu. Mathematica tamen habet certitudinem extensiuè maiorem, quàm metaphysica, quia demonstrat plures conclusiones. Physica habet certitudinem minorem, quam mathematica, quia principia nota per sensum sunt minus eidentia, quam nota per imaginationem. Nam quod intellectus ad ea intelligenda indigeat etiam sensu oritur ex defectu eidentia in ipsis.

Ad 1. Patet ex dictis.

Ad 2. Sicut in regno vnusquisque litigans iudicat rationem esse pro sua causa, & tamen standum est sententiæ supremi iudicis, ex. gr. regis, licet iudicet in fauorem causæ propriæ: sic in controuersia dignitatis scientiarum standum est iudi-

cio

cio metaphysicæ, quæ est scientia suprema licet adiudicet sibi principatum.

Ad 3. Ex eo, quod vna scientia sit certior, non sequitur, quod minus certa habeat aliquam incertitudinem, sed solum, quod careat maiori certitudine, & firmiori adhesionem ad obiectum, licet nihil de ipso dubitet: incertitudo verò non consistit in mera carentia certitudinis maioris, sed in aliqua dubitatione de obiecto.

Utrum omnes scientiæ speculatiuæ, & facultates practica subordinentur quatuor primarijs. Quæstio V I I I.

V Idetur quod non 1. quia si omnes reliquæ scientiæ, & artes subordinarentur primis quatuor, omnes essent facultates subalternatæ, cum subalternari idem sit ac subordinari, sed non omnes sunt facultates subalternatæ, ergo, &c.

2. Moralis tum speculatiua, tum practica nulli subordinatur ex quatuor scientiis: immo quatuor scientiæ speculatiuæ subordinantur morali, ad quam utpote habentem pro fine felicitatem spectat omnibus scientiis speculatiuis imperare, ac illas ad suum finem dirigere.

3. Artes, & facultates practice videntur adæqua-

adæquatè diuidi in rationales, quæ versantur circa actus rationis, & eorum signa, quales præcipuè sunt præter logicam, grammaticam, rhetoricam, poeticam, geometriam, & arithmetica præctica: in corporales versantes, circa res corporeas, vt statuaria, lignaria: & irrationales, de quibus agitur quæstione 21; sed nullæ ex istis subordinantur quatuor scientiis; ergo &c.

Respondeo omnes alias scientias, & artes quatuor principalibus scientiis aliquantulum subordinari, sed diuerso modo subordinationis. Quædam præsertim, speculatiuæ subordinantur tanquam scientiæ mixtæ scientiis simplicibus, in quantum procedunt ex cognitione luminum, & principiorum propriorum plurium scientiarum. In hoc sensu theologia scholastica subordinatur fidei, & scientiæ naturali, quia coniungit lumen fidei, & lumen naturale, & assumens quædam principia nota per fidem, quædam nota per lumen nature, atque ipsa coniungens suas infert conclusiones. Moralis videtur scientia mixta, quia vt dictum quæstione 5 ad 8. procedit ex coniunctione luminis reflexi, ac luminis experimentalis. Inter scientias tamen mixtas celeberrimæ sunt physico-mathematicæ, de quibus aliqua dicit Aristoteles 2. physic. tex. 6. & 8. Duæ enim scientiæ sunt purè mathematicæ, hoc est agen-

tes de ente extenso, abstrahendo ab omni mutabilitate, & sensibilitate, nimirum arithmetica, & geometria; quibus addi potest tertia utraque sublimior, & eleuatior, scilicet algebra praesertim recens, quae vocatur speciosa, & agit de proportionibus quantitatum, abstrahendo à numeris, & magnitudinibus, atque eoque resoluens problemata, ac theoremata arithmetica, ac geometrica. Aliæ, videlicet musica, prospectiua, cosmographia, quæ complectitur astronomiam, & geographiam, & baryometria, cui subordinatur mechanica, non sunt puræ mathematicæ, sed mixtæ etiam ex physica, quia contemplantur quantitatem in materia sensibili.

Atque ut de singulis aliquid delibem: prima est musica, quæ definitur *scientia contemplans numeros ut sonoros, seu sonos ut habentes proportionem numerorum, ex qua proportionem resultat harmonia, ac consonantia*. In quantum considerat sonos est physica, in quantum contemplatur numeros est arithmetica, & utitur utriusque principiis; dum consonantiam, ac dissonantiam numerorum demonstrat, tum à posteriori per experientias sensibiles, ac physicas, tum à priori per principia arithmetica. Datur musica tam practica, quam speculatiua.

Secunda est perspectiua, seu optica, quæ definitur *scientia de superficiebus, ac lineis ut visibi-*

De ordine scientiarum ad primarias 257
visibilibus. In quantum considerat superficies, ac lineas est geometria; in quantum contemplatur visibilia est physica, & demonstrat suas conclusiones à priori per principia geometrica, & à posteriori per principia physica nota per experientiam oculi. Est optica partim practica, partim speculatiua.

Tertia est cosmographia latè sumpta, quæ agit de magnitudine mundi, & eius partiū præcipuarum, ac de motibus earūdem. Diuiditur in astronomiam, & geographiam. Astronomia est *scientia de magnitudine, numero, motu, ac cōfiguratione corporum cœlestium.* In quantum agit de magnitudine est geometria; in quantum de corporibus cœlestibus, atque adeo de sensibilibus est physica. Vtitur lumine sensuum ad colligenda principia ex obseruationibus factis circa cælum, & coniungens talia principia nota per sensum cum principijs geometricis, & arithmeticis, demonstrat suas conclusiones. Videtur magis esse physica, quam mathematica, quia principia propria desumuntur ex obseruationibus sensibilibus, atque adeo physicis.

Geographia est *scientia de magnitudine globi ex terra, & aqua compositi, cum quadam coordinatione ad sphaeram cœlestem.* Vtitur principijs physicis ex obseruatione, & etiam mathematicis, & videtur esse
magis

magis physica, quam mathematica.

Affinis astronomiæ est astrologia. Definitur facultas, quæ ex syderum natura, positu, motibus, & eorumdem varijs inter se configurationibus, & aspectibus futuros euentus præcognoscere conatur. In quantum præcognoscere conatur euentus merè naturales circa tempestates, pluuias, ventos &c. habet aliquod fundamentum, licet saltem in hominibus sit omnino dubia, & incerta propter multitudinem planè innumerabilem causarum, ex quibus pendent tales euentus. At in quantum præcognoscere conatur certo euentus liberos, caret omni fundamento, & ipsius principia neque sunt nota per rationem mathematicam, neque per physicas experientias, quæ potius ostendunt astrologorum prædictiones fere semper esse fallaces, ac proinde, si quando sunt veræ, veras esse casualiter. Astrologi, qui se mathematicos vocabant, immeritò nomen mathematicorum infame reddiderunt apud multos imperatores etiam ethnicos, apud plures Sanctos Patres, & iurisperitos, qui tales homines non discernebant à veris mathematicis.

Quarta est statica, grecè Baryometria, quæ est scientia de grauibus, seu de magnitudine ponderosa, ac de ponderibus; & in quantum agit de magnitudine, est geometria, in quantum de pondere, seu grauitate
sensi-

De ordine scientiarum ad primarias 259
sensibili est physica. Staticæ subordina-
tur mechanica, quæ est scientia de ponde-
ribus vt mobilibus per machinas. Præte-
rea sunt plures alię facultates, ac scientię
que resultant ex istarum mixtione.

Ex istis facultatibus aliquę non solum,
subordinantur vtcunque primis quatuor,
sed subalternantur propria subalternatione.
Quamuis enim omnis facultas, cuius obie-
ctum continetur sub obiecto alterius, tan-
quam inferius sub superiore, & ad demon-
strandas suas conclusiones vtitur aliquibus
principiis illius scientiæ, subordinetur
aliquahter tali scientiæ; in quo sensu om-
nes scientiæ subordinantur aliquahter
metaphysicæ, in quantum obiecta omnium
scientiarum continentur sub ente, quod
est obiectum metaphysicę, & vtuntur ali-
quibus principiis metaphysicę, cuiusmodi
sunt: *non potest idem esse, & non esse; omne
totum est maius sua parte &c.* tamen hoc nõ
sufficit ad propriam subalternationem,
sed scientia propriè subalternata est, que
considerat obiectum saltem partiale alterius
cum aliqua limitatione, & ad suas conclusio-
nes demonstrandas vtitur tanquam principiis,
propositionibus non per se notis, sed demonstra-
tis in facultate superiori. In hoc sensu mu-
sica subalternatur arithmeticæ, quia con-
siderat numeros vt sonoros, atque adeo
cum aliqua limitatione, & supponit tam-
quam

quam principia quasdam propositiones per se nō notas, sed demonstratas ab arithmetica. Perspectiua subalternatur geometriæ, quia considerat superficies, & lineas ut visuales, utens tanquam primis principiis propositionibus demonstratis in geometria. Astronomia, ac geographia subalternatur geometriæ, quia considerant magnitudines, non utcumque, sed ut limitatas ad coelum, & terras, & utuntur tanquam primis principiis propositionibus demonstratis in geometria. Eidem subordinatur statica ex eadē ratione. Tales verò scientiæ subalternantur etiam physicæ, in quantum utuntur principiis demonstratis in physica. Medicina subalternatur physicæ, quia considerat corpus ut sanabile, & assumit tanquam primum principium, *contraria contrarijs curanda*, quod demonstratur in physica. Aliquo etiam pacto subalternatur mathematicæ, dum assumit, quod *vulnus rotundum difficillimè curatur*, quod probatur à mathematica ex eo, quia in figura circulari partes circumferentiæ sint maximè distantes.

Vniuersim omnes artes, & facultates practice subordinantur speculatiuis, in quantum sunt per extensionem speculatiuarum. Ut enim docent ex Aristotele Sanctus Thomas, Scotus, & alii, habitus speculatiui extensione sunt practici; hoc

est

est habitus habentes pro fine scientiam, extensione fiunt practici, hoc est operatiui & generant facultates, & artes, habentes pro fine aliquod opus efficiendum, & ad id tradentes sua praecepta, eo pacto, quo statuaria habet pro fine statuam, & tradit praecepta ad illam efficiendam. Hæc autem extensio consistit in descensu ex contemplatione obiecti in vniuersali ex fine sciendi ad contemplandum idem obiectum magis in particulari ex fine alicuius operis efficiendi, tradendo praecepta, per quæ tale opus effici possit. Hac ratione quatuor scientiæ contemplatiuæ iam assignatæ extensione possunt fieri practicae, & generare innumeras artes, ac facultates practicas. Ex. gr. physica dum ex contemplatione corporis humani ex fine scientiæ descendit ad idem contemplandum ex fine conseruandi, ac producendi in illo sanitatem, fit practica, & generat medicinam; dum ex contemplatione metallorum transit ad inquirendum, quo pacto possint ab homine produci quædam metalla, generat alchimiam; atque eodem pacto generat innumeras alias artes. Mathematica, dum ex contemplatione numerorum descendit ad considerandum, quo pacto possint facile fieri supputationes, fit practica, & generat arithmeticam practica, siue artem computatoriam: dum ex contemplatione

ma-

magnitudinum descendit ad considerandum, quo pacto etiam res remotę possint à longè mensurari, fit practica, & generat geometriam practicam. Metaphysica dum ex contēplatione Dei, ac perfectionum diuinarum descendit ad considerandum, quo pacto possimus Deo in omnibus conformari, eidemque placere, fit practica, & generat moralem. Sic etiam logica speculatiua (quod verò detur logica speculatiua, probabitur inferius) dū ex contemplatione entis intentionalis descendit ad inuestigandum, quo pacto res possint rectè cognosci, fit practica, & generat logicam practicam.

Ad 1. Licet omnes reliquę facultates subordinentur primis quatuor, non tamen propriè subalternantur, quia propria subalternatio est non quęcunquę subordinatio, sed qualis est definita in resolutione quæstionis.

Ad 2. Moralis aliquammodo subordinatur logicę, & physicę, in quantum utitur simul lumine reflexiuo, seu logico, & experimentalis, seu physico. Nec obstat, quod etiam logica, & physica, sicut alię scientię subordinentur morali, ac prudentię: quia hæc mutua subordinatio in diuerso genere, & sub diuersa ratione non repugnat.

Ad 3. Facultates rationales subordinantur

nantur aliququaliter logicæ in quantum intellectus à cōtemplatione actuum rationis in vniuersali, quæ spectat ad logicam speculatiuam, extenditur ad eosdem contemplandos magis in particulari in ordine ad ipsos dirigendos in se, & in suis signis, quæ consideratio, & directio spectat ad logicam practicam, grammaticam, poeticam, rhetoricam. Geometria, & arithmetica practica subordinatur geometriæ, & arithmeticæ speculatiuæ, vt explicatum est. Facultates corporales, ex. gr. lignaria, statuaria & c. subordinantur physicæ, in quantum intellectus à consideratione vniuersali marmorum, lignorum, & aliorum corporum, quæ spectant ad physicam, descendit ad considerationem practicam eorundem, in ordine ad varia opera efficienda.

Vtrum conuenienter assignetur obiectum attributionis, materiale, & formale logicæ practicæ.

Questio IX.

V Idetur, quod logicæ practicæ, quam hic supponimus, & inferius probabimus dari, non conuenienter assignetur vt obiectum attributionis ens rationis logicum, seu recte cognitum: vt obiectum formale, cognitiones rectæ: vt obiectum
ina-

materiale, res in esse obiectivo, seu in quantum possunt rectè cognosci : 1. quia in facultatibus practicis obiectum attributionis est, quod consideratur ut finis adæquatus, & ut opus ponendum: obiectum materiale, quod consideratur ut materia talis operis: obiectum formale ; quod consideratur ut forma ; eo pacto, quo in statuaria obiectum attributionis est statua, quia est ipsius finis, marmor, quod est materia statuæ, est obiectum materiale, figura quæ est forma, est obiectum formale ; sed non rectè cognitum, sed intellectus rectè intelligens consideratur in logica ut finis, & ut opus ponendum; ergo obiectum attributionis in logica non est rectè cognitum, sed intellectus rectè intelligens: obiectum materiale non sunt res, sed intellectus, ut multi recentiores docent contra omnes antiquos.

2. Nulla facultas practica habet pro fine, & obiecto attributionis aliquod opus constitutum per formam extrinsecam materiæ, & nihil perficientem talem materiam: cuius ratio est, quia eo ipso totum artificium artis, quod consistit in faciendo opere, & in inducenda forma in aliquam materiam, esset vanum, & inutile, si forma nihil materiam perficeret, & melioraret : sed è conuerso omnes facultates practicæ habent pro fine, & obiecto attributionis aliquod

aliquod opus, in quo forma intrinsecè perficit materiam, eo pacto, quo statuarial habet pro fine statuâ, in qua forma intrinsecè perficit marmor, sed res rectè cognitæ sūt opus, in quo forma cognitionis respicit res omnino extrinsecè, intellectus rectè intelligens est opus, in quo intellectio maximè intrinsecè perficit intellectum; ergo finis, & obiectum attributionis in logica non est rectè cognitum, sed intellectus rectè intelligens.

3. Intellectus rectè intelligens debet esse finis alicuius facultatis practicae, sicut voluntas rectè operans est finis moralis, non alterius quam logicae, ergo debet esse finis logicae.

4. Idem est finis instrumenti, ac habitus, cuius est instrumentum; sed logica est organum, seu instrumentum scientiarum, finis autem scientiarum est, ut intellectus rectè intelligat, non autem ut res rectè intelligantur; ergo finis logicæ, ac obiectum attributionis est intellectus rectè intelligens.

5. Illud, quo habito, facultas est contenta, quo non habito, remanentibus per possibile, vel impossibile omnibus aliis, facultas non est contenta, includitur in obiecto attributionis; sed logica, habito intellectu rectè intelligente, est contenta, non habito intellectu rectè intelligente, etiam si

per impossibile remanerent res rectè cognitæ, non esset contenta: quid enim iuaret rem rectè cognosci, si nullus intellectus perficeretur res rectè cognoscendo, ergo intellectus intelligens includitur in obiecto attributionis.

6. Si obiectum logicæ ponantur res rectè cognitæ, obiectum statuariæ debebunt assignari res rectè figuratæ, picture res rectè per colores expressæ, cum eadem sit ratio. Ideo enim obiectum attributionis logicæ est rectè cognitum, quia artificium logicæ consistit in hoc, ut conformet operationes cum rebus; sed artificium statuariæ, & picturæ, consistit in hoc, ut conformet suas imagines marmoreas, vel coloratas cum rebus; ergo obiectum ipsarum erit rectè figuratum: quod est absurdum.

7. Si dicatur, quod intellectus non est obiectum materiale logicæ, quia licet sit subiectum receptivum operationum, non est tamen subiectum consideratum à logica, videtur esse vera sententia communis plurium antiquorum, & recentiorum, quod obiectum attributionis logicæ sit operatio recta, obiectum materiale ratio communis operationis, obiectum formale rectitudo operationis. Nam si aliquid obstaret, maximè quia in operatione ratio operationis non distinguitur realiter à ratione rectitudinis; sed sicut nõ requiritur

etur in facultatibus speculativis, quod obiectum materiale distinguatur realiter à formali, vt dictum est quæstione 6. ad 1. ita non requiritur in practicis, cum sit eadem ratio: ideoque in saltatoria obiectum attributionis est rectus saltus, in quo rectitudo non distinguitur realiter à saltu: in musica rectus cantus &c; ergo etiam in logica obiectum attributionis poterit assignari recta operatio: præsertim cum ex allatis exemplis constet non esse verum, quod obiectum materiale debet considerari vt præexistens, non vt ponendum, cum saltus, & cantus considerentur vt aliquid ponendum. Confirmatur, quia illud est obiectum attributionis, quo habito, facultas est contenta; sed habita recta operatione, logica est contenta; ergo &c.

8. Si dicatur, quod obiectum materiale musicæ sunt voces, seu toni, obiectum formale est certa dispositio vocum, & tonorum, in qua dispositione consistit præcipuum artificium musicum: obiectum materiale saltatoriæ sunt saltus, formale dispositio saltuum realiter distincta, poterit pariter dici, quod obiectum materiale logicæ sint operationes, obiectum formale dispositio operationum, per quam constituitur syllogismus demonstratio, &c; ergo excludi poterunt res ab obiecto materiali proximo.

9. Si obiectum materiale logicę essent res, operationes formale, logica esset ars factiua, quod est absurdum. Probatur sequela: ars enim factiua est, quę inducit suam formam in externam materiam; sed logica induceret operationes in res, quę sunt materia externa; ergo esset ars factiua.

10. Vel logica habet pro fine, & obiecto formali attributionis quamcunque operationem rectam, seu sit prima, seu secunda, seu tertia; vel habet pro fine solam secundam, & tertiam, in quibus solis datur veritas, exclusa prima, in qua veritas non datur; vel habet pro fine solam tertiam, per quam solam habemus scientiam discursiuam; vel solum syllogismum, immo nec omnem syllogismum, sed solam demonstrationem, quę est syllogismus scientialis, excluso syllogismo topico, & probabilis nullum ex his videtur dici posse: nam ex vna parte, cum logicę assignetur vt obiectum attributionis operatio recta vt sic, videntur omnes includi; ex alia cum logica sit instrumentum scientiarum, quę habent pro fine veritatem, videtur obiectum logicę esse sola secunda, & tertia operatio, in quibus solis datur veritas; immo quia finis scientię est veritas cognita per discursum, hoc est per tertiam operationem, sola tertia operatio videtur esse

esse obiectum attributionis , immo sola demonstratio , cum finis scientiarum sit veritas cognita per discursum , non quemcumque , sed demonstratiuum , seu per syllogismum scientialem.

Respondeo in logica practica obiectum attributionis esse ens rationis , seu rectè cognitum , obiectum formale operationes rectas , materiale res in esse obiectiuo . Totum enim artificium & facultatum practicarum in eo versatur , vt adaptent aliquam formam alicui materiæ , eo pacto , quo totum artificium statuariæ consistit in eo , vt adaptet marmori varias figuras . Obiectum proinde formale artis est forma , quæ debet adaptari materiæ ; obiectum materiale est materia , cui debet adaptari forma , ita vt tota , vel præcipua difficultas ab arte superanda per sua præcepta consistat in tali adaptatione , ideoque ad eam difficultatem vincendam debeat ars considerare , & materiam in ordine ad illi adaptandam formam , & formam in ordine ad ipsam adaptandam materiæ ; obiectum verò attributionis est opus constans ex tali materia , & tali forma . Nihil deinde refert , quod hæc materia perficiatur , vel nō perficiatur , recipiat formam intrinsecè , vel non recipiat intrinsecè , sed hæc omnia per accidens se habent ad obiectum materiale . Neque enim est obiectum mate-

riale, quia perficitur, ac recipit intrinsecè
formam, sed quia totum artificium artis
consistit in adaptanda forma tali materiæ,
ideoque ad difficultatem superandam de-
bet considerari & materia in ordine ad
formam, & forma in ordine ad materiam.
Cæterum pleraque artes per suas formas
non perficiunt, sed deteriorant materiam
secundum se, ut illam adaptent vsibus hu-
manis. Quis enim non videt, quod coqui-
naria occidendo, & coquendo animalia,
herbas &c non tam illa perficit, quam
corrumpit. Similiter lignaria dum arbo-
res, quæ viuebant in sylvis, aut campis,
cadit, & quodammodo interficit, dum
exsiccans eripit illis naturalem humidita-
tem, dū decorticat, dum priuat naturali fi-
gura, quam exigunt ex sua natura, pro-
fecto non perficit, sed deteriorat. Mar-
mora etiam deteriorantur à statuaria, dū
ex montibus excisa, ubi melius suas ope-
rationes exercebant, conformantur in fi-
guras illis innaturales. Jam in casu nostro
totum artificium logicum consistit in hoc,
ut operationes conformentur cum rebus:
ad hanc verò difficultatem superandam
debet considerare tum res in ordine ad
operationes, sicut in libro prædicabilium,
& prædicamentorum considerat res in
ordine ad operationes prædicandi; tum
operationes in ordine ad res, sicut consi-
de-

derat in libris perihermenias, ac reliquis, definiendo, & contemplando operationes in ordine ad res tanquam in ordine ad suum specificatum, regulam, & mensuram, ut patet: nam definitio dicitur: *oratio explicans naturam rei*, diuisio *oratio explicans partes rei*, argumentatio, *in qua una res infertur ex alia*; scientia, *cognitio rei per causam* &c; ergo obiectum materiale logicę sunt res, formale operationes rectę, attributionis rectę cognitum. Quia verò superata difficultate, quę consistit in operationibus conformandis cum rebus, non remanet difficultas in hoc, quod intellectus recipiat operationes rectas, sed in illas statim prorumpit impetu nature, ideo intellectus licet recipiat operationes, non debet à logica considerari, nec de facto consideratur, immo vix nominatur in tota logica Aristotelica, nec vnquam operationes definiuntur in ordine ad intellectum, ac proinde non est obiectum, cum absurdè ponatur obiectum, quod nec obiicitur, nec consideratur. Similiter quia posito, quod sciamus operationes conformare cum rebus, non remanet difficultas in hoc, quod in operationes introducat rectitudo, nec in hoc, quod operationes disponantur in intellectu, ut melius etiam patebit in responsione ad octauum, ideo non bene ope-

rationes assignantur vt obiectum materiale, rectitudo, vel dispositio in intellectu vt formale. De vocibus, quas ex Græcis Ammonius, Simplicius, & Philoponus dixerunt esse obiectū, manifestè patet non esse obiectum attributionis, sed communitalis. Nam artificium proprium logicæ non consistit in vocibus conformandis cum rebus significatis, sed in conformandis conceptibus cum rebus; ergo res rectè cognitæ, non voces sunt obiecta attributionis; licet quia voces sunt signa conceptuum, considerari debeant vt obiecta communitalis. Ex quo sequitur, quod surdus à natiuitate posset habere logicam perfectam intensiuè, non autem extensiuè, cum non posset habere cognitionem vocum, quæ includuntur in obiecto communitalis. Ex his rationibus hanc sententiā sequuti sunt plerique antiquiores, licet sub variis terminis illam tradiderint; Auerroes, Auicenna, Iamdunus, quos sequitur Zabarella libro primo de natura logicæ, dum dixerunt res omnes in esse obiectiuo, hoc est res vt cognitæ esse obiectum logicæ; plures alii, dum asseruerunt obiectum logicæ esse secundas intentiones, quæ nil aliud sunt, quam ens intentionale, seu cognitum; Sanctus Thomas pluribus locis, sed clarissimè quarto metaph. lect. 4. docet ens rationis esse propriū obiectum.

obiectum logicę. Sequuntur S. Thomam Thomistæ, Sotus, Iauellus, Caietanus, Herueus, & ex nostris Ruuius, & alii. Pro eadem etiam allegantur Albertus magnus 1. metaph. tract 1. & Durandus in 1. dist. 19. quæst. 6.

Confirmari potest ex Aristotele. Nam artes debent, & solent ita tradi, vt primo agatur de obiecto materiali, deinde de formali; sed Aristoteles ita tradidit logicam, vt primo egerit de rebus in ordine ad operationes in libro prædicamentorum, deinde de operationibus in reliquis libris; ergo censuit obiectum materiale logicę esse res, formale operationes. Certe si censuisset intellectum esse obiectum materiale, mirum esset, quod nullum in logica, non dico librum, sed ne caput quidem, de intellectu scripsisset, immo vix nominasset, & nunquam operationes definiuisset in ordine ad intellectum, sed semper in ordine ad res.

Ad 1. Obiectum attributionis est quod consideratur vt finis, & vt opus ponendum; sed intellectus rectè intelligens, non rectè cognitum consideratur vt finis, & vt opus ponendum in logica; ergo &c. Nego minorem. Ostensum est enim, quod illud consideratur vt finis, & opus ponendum, quod constat ex materia, & forma, ita vt totum artificium artis consistat in

adaptanda forma tali materie; sed artificium logicæ consistit in adaptandis operationibus, non intellectui, sed rebus; ergo &c.

Ad 2. Transeat quod omnes aliæ facultates practicæ habeant pro obiecto opus constitutum per materiam, & formam intrinsecam. Dico tamen id esse per accidens, & non quia obiectum formale debeat esse intrinsecum materiali, sed quia artificium ipsarum, & difficultas consistit in adaptanda materie forma non extrinseca, sed intrinseca; sed artificium logicæ consistit in adaptandis operationibus non cum intellectu intrinsecè recipiente, sed cum rebus extrinsecè denominatis; ergo &c. Nec est verum, quod eo ipso, quod artificium artis versetur in adaptanda materie aliqua forma non meliorante intrinsecè materiam, sit vanum, & inutile. Nam ut ars sit utilis, non debet meliorare materiam, sed hominem, eo pacto, quo coquinaria, lignaria, statuaria; licet materiam non meliorent, sed deteriorescent, tamen quia meliorant hominem, sunt artes utiles; sed logica adaptando operationes cum rebus, licet non melioret res, meliorat hominem ergo est ars utilis. Non tamen inferitur ex eo, quod non res meliorescentur, sed homo, quod homo sit obiectum logicæ, sicut ex eo quod non cibi melio-

melioventur per coquinariam, sed homo, non sequitur quod non cibi, sed homo sit obiectum coquinarię, & aliarum artium, vt fusius dicetur in responsione ad 5.

Ad 3. Intellectus recte intelligens debet esse finis alicuius facultatis practicę: sed hæc facultas non est logica, sed moralis, habens pro fine, & obiecto attributionis hominem vt felicem: & quia homo secundum doctrinam Aristotelis fit felix per hoc, quod intellectus recte intelligat, & voluntas recte operetur, ideo habet pro fine intellectum recte intelligentem, & voluntatem recte operantem. Hinc est, vt Aristoteles in ethica non solum agat de virtutibus moralibus, quibus voluntas bene operatur, sed etiam ex professo de intellectualibus, quibus verum anima dicit, seu recte intelligit, ac doceat, quod sicut medicina quia habet pro fine vt corpus bene se habeat per sanitatem, debet agere de corpore, sic moralis quia habet pro fine, vt anima bene, & feliciter se habeat per virtutes, debet agere de anima, tamquam de obiecto materiali, ac de illa, & de intellectu, & voluntate agit de facto. Hinc patet, quod si Aristoteles putasset intellectum esse obiectum materiale logicę, egisset de illo in logica, sicut egit in morali. Secundo patet, quod cum homo recte intelligens per intellectum, & ho-

nestè operans per voluntatem, sit obiectum attributionis in morali, homo rectè intelligens non est obiectum logicę, sicut homo rectè operans non est obiectum alterius facultatis practicę, quæ non sit moralis.

Ad 4. Distinguo maiorem: idem est finis intrinsecus, nego; idè est finis extrinsecus instrumenti, ac finis intrinsecus habitus, cuius est instrumentũ, concedo; concedo minorẽ, & distinguo consequens, ergo intellectus rectè intelligens est finis extrinsecus logicę, qui finis extrinsecus non est obiectum attributionis, concedo consequentiam; ergo intellectus rectè intelligens est finis intrinsecus logicę, qui finis est obiectum attributionis, nego consequentiam. Pater inductione omnium artium, quæ sunt instrumenta aliarum facultatum, vel artium, quod id, quod est finis intrinsecus artis, cui ars altera deseruit vt instrumentum, non est finis intrinsecus artis deseruiantis, sed merè extrinsecus. Ex.gr. frangifactoria est instrumentum equestris, & tamen equitatio, quæ est finis intrinsecus equestris, est finis solum extrinsecus frangifactorię, quæ frantum contemplatur solum tanquam opus à se efficiendum, ita vt totum eius artificium consistat in adaptando cum ferro figuram frani. Similiter ars nauifactoria est instru-

strumentum nauticę, & tamen nauigatio, quę est finis intrinsecus nauticę, est finis solum extrinsecus nauifactorię. In casu nostro licet logica sit instrumentum scientiarum, in quantum dat præcepta definiendi, diuidendi, argumentandi: scientię enim vtuntur definitionibus, diuisionibus, & argumentationibus, eo pacto, quo equestris vtitur freno; tamen logica non habet pro fine intrinseco, sed solum extrinseco intellectum benè intelligentem. Differentia verò finis extrinseci ab intrinseco melius explicabitur in responsione ad sextum. Si verò adducantur exempla mallei, qui quia est instrumentum versatur circa idem opus, ac artifex, vtens malleo & aliorum instrumentorum materia: respondeo exempla non esse ad rem Logica enim non est instrumentum scientiarum, sicut malleus, & alia huiusmodi sunt instrumentum artificis, sed sicut vnus habitus est instrumentum alterius; ergo non debet comparari malleo, sed aliis habitibus, qui dicuntur instrumenta.

Ad 5. Distinguo maiorem illud, quo non habito, facultas non esset contenta, præsuppositiuè, & extrinsecè, includitur in obiecto attributionis, nego; quo non habito, facultas, non esset contenta formaliter, & intrinsecè, concedo: distinguo eodem pacto minorem, & nego consequentiam.

tiam. Aliud est opus, & finis intrinsecus, & formalis artis, aliud est utilitas operis, & perfectio, quam debet homo ex opere omnium artium decerpere, quæ perfectio sapè est finis merè extrinsecus, & præsuppositus ab arte, non ab illa formaliter intentus, sed intentus ab aliqua arte superiori, vel à prudentia, quæ est suprema, architectonica, ac princeps omnium artium: ex. gr. opus, ac finis intrinsecus statuariæ est statuas utilitas operis est, quod homo videns statuam decerpât delectationem, ex tali visione, quæ visio, & delectatio non est finis intrinsecus, & formaliter intentus à statuaria, sed merè extrinsecus, à c. præsuppositus, intentus autem à prudentia, quæ intendens felicitatem, & bonum vniuersale hominis, ad illud dirigit omnes artes. Idem dic de pictura, edificatoria, frenifactoria &c. In logica igitur aliud est opus, ac finis intrinsecus ipsius, quod est *rectè cognitum*, cum in eo consistat logicum artificium; aliud utilitas operis, quæ utilitas est, ut intellectus rectè intelligat, quæ utilitas est finis merè extrinsecus, ac non consideratus, nec intentus formaliter à logica, sed præsuppositus, ac intentus formaliter à prudentia, seu morali. Iam artes, habito fine intrinseco, & non habito extrinseco, sunt contentæ formaliter, quia habent totum, quod in-

ten-

tendunt formaliter ; non sunt contentæ præsuppositiuè, quia non habent quod præsupponunt intentum à facultate superiori, sine qua opus illarum est prorsus inutile : ex.gr. statuaria habita perfectissima statua, & non habitis hominibus potentibus statuam contemplari, eo quod omnes homines essent cæci, est contenta formaliter, non præsuppositiuè ; idemque dic de pictura, frénifactoria, & cæteris artibus. Nec ex eo inferitur, quod potentia visiva hominis includatur in obiecto statuariæ, picturæ &c. alioquin homo secundum varias potentias includeretur in obiecto attributionis omnium artium. In casu igitur nostro licet logica habitis rebus rectè cognitis, & non habito intellectu rectè intelligente, non esset contenta præsuppositiuè, tamen intellectus rectè intelligens est finis solum extrinsecus logicæ, ac proinde non includitur in obiecto attributionis. Ratio vniuersalis est, quia obiectū attributionis, & finis intrinsecus artis est solū illud opus, in quo consistit artificium artis, vt explicatum est; utilitas operis est solum finis extrinsecus, ac præsuppositus.

Ad 6. Ex eo, quod res rectè cognita sint obiectum attributionis in logica, non sequitur, quod res rectè depictæ, vel rectè figuratæ in marmore sint obiectum attributionis in pictura, vel statuaria. Dispa-

ritas est manifesta . Nam ideo res rectè cognitæ, & non intellectus rectè intelligens sunt obiectum attributionis in logica, quia artificium, ac difficultas logica consistit solum in adaptandis operationibus cum rebus, qua difficultate superata, nulla deinde remanet difficultas in operationibus introducendis in intellectu; sed præcipua difficultas statuariæ non consistit in sciendo, quo pacto figuræ conformentur rebus, sed in adaptandis talibus figuris in marmore, ideoque debet marmor considerari in ordine ad illud figurandû: præcipua difficultas picturæ consistit in coloribus ita disponendis, vt obiectum exprimant; ergo, obiectum materiale statuariæ est marmor, picturæ colores; obiectum attributionis statuariæ est statua, picturæ imagines depictæ, res verò ad summum considerantur vt materia remota.

Ad 7. Fortasse tunc potest assignari obiectum attributionis, in quo obiectum materiale non distinguatur realiter à formali, cum artificium artis non consistit in adaptanda forma alicui materiæ distinctæ, sed merè in faciendâ aliqua operatione, in qua possint per intellectum distinguî ratio materialis, & ratio formalis, eo pacto, quo artificium saltatoriæ non videtur consistere in adaptandis saltibus cum pede, sed merè in faciendâ saltatione recta, in qua
ratio

ratio saltus potest considerari tanquam materia, ratio recti tanquam forma; sed artificium logicum consistit in operationibus conformandis cum rebus, quæ sunt materia distincta; ergo in logica debent assignari res tanquam obiectum materiale, operationes tanquam formale. Dum opponitur: logica habita recta operatione, est contenta; ergo recta operatio est adæquatum obiectum attributionis; distinguo antecedens, logica habita recta operatione, est contenta tanquam de toto opere, nego; tanquam de complemento operis, concedo; & nego consequentiam. Ex eo enim, quod sit contenta tanquam de complemento operis, sequitur quod operatio recta sit solum complementum operis, atque adeo forma, & obiectum formale. Confirmatur solutio: nam etiam aduersarii debent illa uti, si quis ad probandum, quod figura statuæ sit obiectum totale attributionis statuariæ, arguat: statuariæ habita recta figura statuæ, est contenta; ergo figura statuæ est adæquatum obiectum attributionis.

Addo falso dici ab aduersariis, quod in musica, sonatoria &c. obiectum materiale non distinguatur realiter à formali. Sicut enim, quia præcipuum artificium picturæ consistit in coloribus ita disponendis in tabula, ut resultet imago, obiectum
mate-

materiale sunt colores, formale dispositio colorum realiter distincta à coloribus; sic cum præcipuum artificium musicæ consistat in variis vocibus, vulgo tonis ita disponendis, interceptis debitis morulis, ut fiat harmonia, obiectum materiale sunt voces, seu toni secundum se, formale dispositio vocum realiter distincta; in saltatoria obiectum materiale sunt singuli saltus, & motus, formale, eorum dispositio proportionalis dispositioni soni, qui solet saltationem præire & regulare.

Ad 8. Dum ex doctrina modo tradita vrgetur: obiectum materiale musicæ sunt voces, formale dispositio vocum; ergo etiam obiectum materiale logicæ sunt operationes, formale dispositio operationum ab operationibus distincta, cum artificium logicæ consistat in operationibus certo modo disponendis in intellectu: nego consequentiam. Neque enim est vlla dispositio operationum in intellectu, in qua consistat artificium logicum. Nam non est dispositio, qua disponantur in intellectu, sicuti in spatio; nec dispositio, qua disponantur tempore, ita ut vna operatio fiat prius, alias posterius, cum in definitione simul tempore cognoscatur genus, & differentia, in propositione simul tempore cognoscatur prædicatum, & subiectum, in syllogismo simul tempore dentur præmissæ,

missæ, & conclusio . Remanet igitur tantum dispositio , per quam obiecta certo modo disponuntur, ex-gr. per quam in propositione hoc quidem obiectum prædicatur, hoc autem subiicitur, in syllogismo primæ figuræ medius terminus subiicitur, prædicatum conclusionis prædicatur de subiecto conclusionis &c. quæ verè est dispositio logica . At hæc dispositio consistit in adaptatione cognitionis cum rebus. Per illam enim cognitiones adaptantur obiectis, ita vt hoc quidem subiiciatur, illud verò prædicetur, vt postulat obiectorum natura; ergo totum artificium logicum consistit in adaptatione cognitionis cum obiectis; ergo obiectum attributionis in logica est rectè cognitū, formale operationes rectæ, materiale res in esse obiectiuo .

Ad 9. Ars factiua est, quæ versatur circa operationes transeuntes in externam materiam, quales sunt operationes ædificandi, pingendi &c, quæ transeunt in rem ædificatam, pictam, & non remanent in agente. Ars actiua est, quæ versatur circa operationes immanentes, hoc est remanentes in operante, quales sunt saltatio, visio, intellectio, volitio . Cum igitur logica versetur circa operationes intelligendi, quæ manifestè sunt immanentes, non transeuntes, manifestè est ars actiua, non factiua, licet

licet per suam formam, hoc est per cognitiones, denominet extrinsecè res. Neque enim sufficit ad artem factiuam, quod per operationem immanentem denominet externam materiam.

Ad 10. Multi fusissimè disputant, vtrum logica habeat pro fine, & obiecto formali attributionis omnes tres operationes, an solum secundam, & tertiam, an solum tertiam, an solum syllogismum, an potius solum demonstrationem. Ego breuiter dico logicam esse instrumentum vniuersale rectè cognoscendi res, atque adeo habere pro fine, & obiecto vniuersali attributionis omnem cognitionem rectam, seu sit prima, & secunda operatio, seu tertia. Ratio est, quia connaturale fuit, vt homines proponerent sibi hunc finem per se expetibilem rectè cognoscendi res; ergo talem finem sibi proposuit logica. Dum opponitur: scientiæ habent pro fine veritatem; logica est instrumentum scientiarum; ergo logica habet pro fine veritatem; ergo illas tantum operationes, in quibus veritas inuenitur, quales sunt secundæ, & tertiæ, exclusa prima: distinguo minorem; logica est vnicè instrumentum scientiarum, nego; logica est instrumentum scientiarum, non vnicè, sed ita, vt sit instrumentum vniuersale rectè cognoscendi, & principaliter sit instrumentum

tum scientiarum, concedo; & nego consequentiam. Quia logica est instrumentum scientiarum non vnicè, habet pro fine non solas operationes scientiarum, sed alias etiam per se expetibiles, & capaces ut dirigantur per præcepta, cuiusmodi est etiã prima operatio, præsertim definitio, ac diuisio, quæ spectant ad primam^{am} operationem. Intendit tamen principaliter operationes scientiales, utpotè digniores, ideoque principaliter est instrumentum scientiarum.

Vtrum aliqua veritates obiectivæ sint practicae, aliæ speculative.

Questio X.

Videtur quod non 1. quia differentie practici, & speculativi sunt differentie cognitionum, non autem obiectorum; ergo non debent tribui obiectis.

2. Vel veritas practica est practica respectu sui, vel solum respectu operis, quod proponit ut faciendum; respectu sui non est practica, ergo solum respectu operis; ergo est practica simul, & speculativa; speculativa respectu sui, practica respectu operis.

3. Omnis veritas speculabilis est speculativa, sed omnis veritas, ac proinde etiam

veritas

veritas practica est speculabilis; ergo omnis veritas, ac proinde etiam veritas practica est speculatiua simul, & practica; quod repugnat, sicut repugnat, quod eadem cognitio sit speculatiua simul, & practica, idem animal sit homo simul & equus: differentie enim speculatiui & practici sunt sicut differentie rationalis, & irrationalis.

4. Veritates speculatiue deberent realiter distingui à practicis. non distinguuntur; ergo non dantur veritates speculatiue, & practice.

Respondeo aliquas veritates esse speculatiuas, alias practicas. Duplex enim genus veritatum potest considerari. Quædam sunt, quæ cognitæ habent vim immediatam inclinandi, dirigendi, ac regulandi cognoscentem ad operandum, ac faciendum aliquod opus per ipsas propositum. Aliæ sunt, quæ merè inclināt, ac mouent ad contemplandum, & immediatè non inclināt ad operandum. E. G. istæ veritates, quod felicitas æterna debet præponi omnibus bonis temporalibus; quod ea, quæ nobis nolumus, alteri non sunt facienda, ea quæ volumus nobis, facienda sunt aliis, & plures aliæ, si cognoscantur, manifestissimè inclinant cognoscentem ad faciendum id, quod per ipsas proponitur, hoc est ad præferendam felicitatem æternam omnibus bonis temporalibus &c. E

con-

conuerso istę veritates, quod Cælum est incorruptibile, elementa sunt quatuor, Deus est optimus, non inclināt immediatē ad faciendum vllum opus per ipsas propositum; sed practicum idem sonat ac operarium, speculatiuum idem ac contemplatiuum; ergo veritates immediatē inclinatiuæ ad operandum sunt practica; veritates inclinatiuæ non ad operandum, sed ad contemplandum sunt speculatiuæ.

Confirmatur, quia communiter dicimus quod principia moralis ex. gr. *quod tibi nō vis fieri alteri ne feceris* &c. sūt practica, sed nomine principiorum absolutē prolatorum intelliguntur veritates obiectiuę; ergo iuxta communem sensum dantur veritates practica.

Si verò queratur, quęnam veritates vniuersim sint practica, dico, quod illę, quibus proponitur, quod bonum est aliquid facere. Cum enim veritas practica sit veritas inclinatiua ad operandum; nihil autem inclinet ad operandum, nisi bonum, omnes, & solę veritates, quibus proponitur bonitas operandi, sunt practica. Ex veritatibus tamen practicis alię sunt practice tanquam principia vniuersalia, quibus proponitur in vniuersali, quod bonū est aliquid facere, ex. gr. *quod tibi nō vis fieri alteri, ne feceris*; alię sunt practice tanquam conclusiones

par-

particulares, in quibus ex principiis vniuersalibus infertur in particulari, quod bonum est aliquid facere in singularibus circumstantiis loci, temporis, personarum &c, qualis est hæc conclusio; *ego debeo dare nunc huic pauperi eleemosynam, quæ infertur ex his præmissis; quæ nobis volumus, facienda sunt aliis; sed in his circumstantiis ego vellem dari mihi eleemosynam* &c.

Ad 1. Prædicata, quæ primo conueniunt cognitionibus, tanquam principali analogato, tribui solent etiam obiectis, tanquam analogatis minus principalibus propter ordinem, quem habent ad cognitiones, ut causæ specificatiuæ cognitionum. Ex.gr. licet primo cognitio dicatur vera, vel falsa, clara, vel obscura, certa, vel incerta, euidens, vel ineuidens, quia est proprium subiectum veritatis, ac falsitatis, claritatis, & obscuritatis, certitudinis, & incertitudinis, euidentiæ, & ineuidentiæ, tamen etiam obiecta dicuntur vera, vel falsa, clara, vel obscura, certa, vel incerta, euidētia, vel ineuidētia, in quantum sunt apta causare hæc omnia in cognitione. Sic igitur in casu nostro licet primo cognitio sit speculatiua, vel practica, tamen hæc prædicata tribuuntur veritatibus obiectiuis, in quantum sunt aptæ causare cognitiones speculatiuas, vel practicas.

Ad 2. Repugnat, quod veritas sit practica,

De veritate speculatiua, & practica. 289
Etica, & effectiua respectu sui, cum non
possit inclinare, ac mouere cognoscentem
ad ponendum se. Cognoscens enim ali-
quam veritatem, supponit, ac cognoscit
illam vt positam: ex.gr. cognoscens, quod
nunquam est peccandum, cognoscit hanc
veritatem vt iam positam; sed cognitio,
qua aliquid cognoscitur vt positum, non
potest inclinare cognoscentem ad illud
ponendum, sed solum ad contemplandum;
ergo nulla veritas potest inclinare cogno-
scentem ad se ponendum, sed solum ad se
contemplandum, adeoque respectu sui non
est practica, sed speculatiua. Solum ergo
potest aliqua veritas esse practica res-
pectu operis, quod non supponit vt factum,
sed proponitur vt faciendum. Dum oppo-
nitur, ergo eadem veritas est speculatiua
simul, & practica; distinguo: respectu eius-
dem, nego: respectu diuersorum, concedo.
Est enim speculatiua respectu sui, practica
respectu operis propositi, quod non repu-
gnat, sicut non repugnat, quod eadem co-
gnitio respectu vnius obiecti sit practica,
respectu alterius speculatiua. Hæc enim
cognitio *Deus est amandus*. respectu Dei est
speculatiua, respectu amoris practica.

Ad 3. Distinguo maiorem; omnis ve-
ritas speculabilis ex eo, quod ipsa non sit
inclinatiua ad opus, est speculatiua res-
pectu operis, concedo; omnis veritas spec-

N

cula-

culabilis ex eo, quod possit considerari à non potente facere tale opus, vel per cognitionem id supponentem vt positum, est speculatiua respectu operis, nego: distinguo eodem pacto minorem, & nego consequentiam. Veritas speculatiua simpliciter est, quæ secundum se præcisè non est inclinatiua ad operandum, sed solum ad contemplandum; veritas verò, quæ cum secundum se præcisè sit inclinatiua ad operandum est cognoscibilis cognitione speculatiua ratione subiecti, vel ratione suppositionis, qua talis cognitio supponit opus vt factum, est secundum se practica & ad summum potest dici speculatiua secundum quid, & respectiue ad subiectum, vel cognitionem. Non autem repugnat quod eadem veritas secundum se sit practica, respectiue ad subiectum, vel cognitionem speculatiua, sicut non repugnat, quod aliquid ex natura sua sit per se notum, respectiue ad nos non sit per se notum. Quid verò sit cognitio speculatiua ratione subiecti, vel ratione suppositionis, qua supponit opus vt factum, explicabitur questione sequenti.

Ad 4. Veritas speculatiua non est necesse, vt realiter distinguatur à practica, sed sufficit, vt distinguatur ratione, & per præcisionem intellectus. Hoc autem est manifestum in sententia, quam sequimur, quod

De cognitione speculatiua, & practica. 291
quod omnes veritates necessariae, & eter-
nae sint idem realiter cum diuina essentia,
atque adeo inter se. Sequitur enim, quod
omnes veritates necessariae, & eterne tū
speculatiuae, tum practicae realiter iden-
tificentur, ac distinguantur solum ratione,
ex. gr. quod haec veritas practica aeterna,
bonum est faciendum identificetur cum
haec speculatiua, *homo est animal rationale*;
ac distinguatur sola ratione.

*Vtrum cognitio practica bene de-
finiatur. Quaestio XI.*

Videtur non bene definiri cognitio
practica cognitio iudicans. quod bonum
est facere aliquod opus positum in potestate co-
gnoscentis, quod non supponit *ui factum* 1.
quia ex doctrina Aristotelis 3. de anima,
tex. 3. quem sequitur S. Thomas, & ceteri
scholastici, cognitio practica & speculati-
ua differunt fine, ac proinde cognitio spe-
culatiua ex secundo Metaph. tex. 3. defi-
nitur, *quae habet pro fine veritatem*, practica
quae habet pro fine opus; sed allata definitio
neque est eadem cum Aristotelica, neque
est illius explicatiua, ergo non est bona.
2. Cognitio practica communiter defini-
tur, *quae dirigit cognoscentem ad operandum*;
sed haec definitio videtur clarior, & me-

liori; ergo allata definitio est reiicienda.

3. Non requiritur ad cognitionem practicam, ut iudicet quod bonum est facere aliquod opus: multæ enim cognitiones id non iudicantes sunt propriissimè practicæ, quales sunt cognitiones iudicantes, quod syllogismus in Barbara faciendus est ex tribus propositionibus, vniuersalibus, affirmatiuis &c quales sunt etiam, quibus artifices iudicant, quod sua opera sunt ita, & ita facienda.

4. Sequeretur, quod plurimæ cognitiones artium, & facultatum practicarum non essent practicæ, cum non iudicent, quod bonum est facere aliquod opus, sed affirmant alia obiecta: ex gr. dantur in medicina innumere cognitiones circa naturas morborum, & medicamentorum, nō iudicantes quod bonum est facere aliquā actionem.

5. Videtur nec ad cognitionem practicam requiri, quod opus sit in potestate operantis. Si quis enim putans se posse volare, consultet de modo, ac statuatur, *bonum est hic, & nunc volare*, hæc cognitio est practica, & tamen est de opere, quod non est in potestate cognoscentis.

6. Videtur non sufficere ad cognitionem practicam, quod sit cognitio, qualis definitur, sed vltcrius requiri, quod habeat specialem modum tendendi, quem experimur,

et

De cognitione speculatiua, & practica 293
& exprimimus per gerundium in dum,
dicendo ex.gr. *facienda est elemosyna*, *facienda est statua*. Quod verò requiratur
specialis iste modus tendendi, probatur;
nam cognitio practica nō potest differre
à speculatiua per obiectum: nullum enim
obiectum cognoscitur per cognitionem
practicam, quod non possit cognosci per
speculatiuam; ergo debet differre per mo-
dum tendendi; iste modus tendendi con-
sistit in hoc, vt dicat, *est faciendum*; ergo
cognitio practica requirit hunc modum
tendendi. Confirmatur, quia omnis co-
gnitio per modum indicatiuum habet pro
fine veritatem, quam affirmat: sicut enim
cognitio dicens, *calum est incorruptibile*,
habet pro fine veritatem, ita cognitio di-
cens, *bonum est dare elemosynam* habet pro
fine hanc veritatem; sed omnis cognitio
habens pro fine veritatem est speculatiua,
cū cognitio speculatiua definiatur, *que ha-
bet pro fine veritatē*; ergo cognitio per modū
indicatiuū est speculatiua sed cognitio pra-
ctica nō potest esse speculatiua; ergo nulla
cognitio practica est per modū indicatiuū,
sed per gerundium in dum: cognitio verò
dicens, *hoc est faciendum*, non habet pro fi-
ne veritatem, cum omnis veritas cognita
sit antecederet per cognitionem haben-
tem modum indicatiuum; sed habet pro
fine opus, & dirigit cognoscentem ad o-

perandum per modum imperii.

7. Deberet explicari, quid sit speculari, quid consultare, quinam actus includantur in consultatione, vel speculatione: an, & quo pacto tales actus sint speculatiui, vel practici; sed hæc non explicantur; ergo &c.

8. Sequitur quod in Deo detur, & nō detur cognitio practica. Sequitur quod detur: nam omnis cognitio iudicans quod bonum est facere aliquod opus positū in potestate cognoscentis non supponens illud vt factum est practica; sed in Deo datur cognitio iudicans, quod bonum est mundum creare & redimere, non supponens talia opera vt facta, sed vt posita in potestate Dei; ergo datur in Deo cognitio practica. Sequitur, quod non detur, quia cognitio practica debet habere pro fine opus ex Aristotele, & omnibus; sed nulla cognitio diuina utpote identificata cum diuina essentia habet pro fine opus, sed ipsa est vltimus finis omnium rerum, non habens alium finem, quam se ipsam; ergo nulla cognitio diuina est practica.

Respondeo optimam esse allatam definitionem cognitionis propriè practice. Cum enim cognitio specificetur ab obiecto, & à subiecto, seu cognoscente, in definitione cognitionis practice debet explicari, quale sit tum obiectum, tum subiectum

ctum ipſius. Cum rursus non ſufficiat ad hoc, vt cognitio habeat aliquod prædicatum, quod obiectum habeat proportiona- liter idem prædicatum, ſed requiratur, vt cognitio imitetur obiectum in eo prædi- cato; in definitione cognitionis practicæ debet explicari prædicatum obiecti pra- ctici, quod quia cognitio imitatur, etiam ipſa eſt practica. Hæc autem omnia opti- mè præſtantur in allata definitione. Primò explicatur obiectum per illa verba *cogni- tio iudicans, quod bonum eſt facere aliquod opus*; ſed veritas proponens, quod bonum eſt facere aliquod opus, eſt veritas pra- ctica, vt dictum eſt quæſt. 10; ergo con- gruentiſſimè assignatur vt obiectum co- gnitionis practicæ veritas practica. Se- cundo explicatur quale debeat eſſe subie- ctum cognitionis practicæ per illa verba; *quod eſt in poteſtate cognoscentis*; ſignificatur enim, quod cognoscentis debet habere in ſua poteſtate opus, quod proponitur; nam cognitio non poteſt inclinare, ac dirigere cognoscentem ad faciendum opus, quod facere non poteſt ſed cognitio practica debet eſſe inclinatiua, ac directiua cogno- ſcentis ad faciendum opus; ergo cognitio practica debet eſſe tanquam in ſubiecto in cognoscente habente opus propoſitum in ſua poteſtate. Tertio exprimitur præ- dicatum, in quo cognitio practica debet

imitari obiectum practicum, vt accipiat
 esse practici, seu directiui, & inclinatiui.
 Veritas enim practica non supponit opus
 vt factum, sed ad opus supponitur: ex. gr.
hæc veritas, bonum est facere mundum, non
 supponit mundum creatum, sed supponi-
 tur ad creationem mundi, cum mundus
 ideo fuerit creatus, quia bonum erat, vt
 crearetur, non ideo bonum fuerit, vt mun-
 dus crearetur, quia fuit creatus. Vt igitur
 cognitio accipiat ab obiecto practicitate-
 tem, non solum debet obiectum exprime-
 re, sed præterea debet nō supponere opus
 vt factum: eo enim ipso, quod supponeret
 opus vt factum, non posset inclinare, ac di-
 rigere cognoscentem ad opus faciendum,
 alioquin inclinaret ad faciendum factum.
 Quod si quærat, quid requiratur, vt co-
 gnitio cognoscentem, quod *bonum est facere*
aliquod opus existens in potestate operantis,
 non supponat illud factum, dico requiri,
 ac sufficere, quod abstrahat ab existentia,
 vel non existentia operis. Eo enim ipso,
 quod ego cognosco, quod *bonum est dare*
eleemosynam, cognitione, quæ abstrahat ab
 hoc, quod dem, vel non dem, talis cognitio
 non supponit eleemosynam vt factam: si
 verò non abstrahat, supponit determina-
 tam alteram partem contradictionis, ideo-
 que non potest dirigere. Ex defectu con-
 ditionis requisite ex parte subiecti co-
 gnitio,

De cognitione speculatiua, & practica 297
gnitio, quia dico, *bonum est creare mundum*,
licet cognoscat veritatem practicam, non
est practica, quia non potest me dirigere
ad creandum, cum non possim creare. Ex
defectu conditionis requisitæ ex parte
cognitionis, cognitio, qua quis experiens
se peccare, iudicat experimentaliter, quod
bonum est non facere tale peccatum, non est
practica respectu peccati, quod tunc fit,
quia licet cognoscat veritatem practicam,
non potest inclinare, vel dirigere ad non
faciendum peccatum, quod supponit, ac
experitur vt factum.

Ex cognitionibus, & iudiciis practicis
quædam sunt ultimo practica, quædam
non. Iudicia ultimo practica sunt, *quæ ul-
timo dirigunt ad electionem, atque executio-
nem*. Iudicia practica non ultimò sunt *quæ
dirigunt, sed non ultimo, ita vt requiratur ali-
quod aliud iudicium*. Sed explicandum, quæ-
nam iudicia sint ultimo directiua ad ele-
ctionem (nam de iis quæ ultimo dirigunt
ad executionem agetur quæst. 12.) Di-
cendum quod iudicium ultimo directiuū
ad electionem est *iudicium prudentiæ, quo
iudicatur, quid omnibus pensatis hic, & nunc
sit optimum in ordine ad obtinendum finem
ultimum, quid teneat secundum locum, quid
tertium, & sic deinceps: ex.gr. cum quis hic,
& nunc deliberat de statu vitæ eligendo,*
iudicium ultimo directiuum est, quo iudi-

dicat: *hic status vite omnibus pensatis est mihi optimus ad consequendam salutem eternam, hic alius tenet secundum locum, hic tertium &c.* Iudicium verò ultimo directiui in ordine ad finem artis est, quo iudicatur quid optimum sit hic, & nunc in ordine ad finem artis, ex. gr. ad statuam faciendam, quid teneat secundum locum &c. Patet: nam eo ipso, quod ego uideo, quid hic, & nunc omnibus pensatis est optimum in ordine ad felicitatē, vel in ordine ad finē artis, quid teneat secundū locum, quid tertium, sufficientissimē dirigor ad operandum, vel per prudentiam in ordine ad finem vltimum, vel per artem in ordine ad finem particularem: qui verò non sufficienter dirigitur, non videt adhuc quid optimum sit &c. Licet autem quidam existiment iudicium dictans aliquid esse optimum in ordine ad finem, eo ipso determinare voluntatem ad electionem optimam, eo quod nequeat voluntas relicto optimo, vel meliori, eligere minus bonū: certum tamen est posse voluntatem creatā propter suam defectibilitatē eligere deterius, relicto meliori, & de facto quorū peccamus, eligimus peccatum, iudicantes, quod melius est non peccare: vnde cecinit ille,

*Video meliora proboque,
Deteriora sequor*

Si tamen quis ante consultationem, statuisset firmiter eligere optimum, & perseveraret in tali determinatione, eo ipso iudicium representans aliquid esse optimum determinaret electionem, quæ proinde non esset libeta, saltem noua libertate.

Definita veritate, & cognitione practica, ac speculatiua, facile est definire facultates practicas, & speculatiuas, atque earum differentiam explicare. Facultas igitur speculatiua est quæ contemplatur obiectum, quærens circa illud veritates speculatiuas ex fine sciendi: practica est quæ contemplatur obiectum, quærens circa illud veritates practicas, quibus dirigi possit ad faciendum opus propositum. Ex gr. facultas contemplans cælum est speculatiua, quia contemplatur cælum, quærens circa illud veritates speculatiuas, quales sunt, *an Cæli sint animati, an sint corruptibiles &c.* ex fine illas sciendi: è conuerso statuaria est facultas practica, quia contemplatur statuam, inquirens circa illam veritates practicas, ex gr. quomodo marmor sit elaborandum &c. quibus dirigi possit ad statuam faciendam. Ex hoc diuerso fine sciendi, & operandi, quem habent facultates speculatiuæ, & practicae, sequitur in illis diuersus modus procedendi. Quia enim finis speculatiuarum est scire; vni-

uersalia verò magis sunt scibilia, quam singularia, quærunť præcipuè cognitionē vniuersalem, & vtuntur inductione singularium ad acquirendam cognitionem vniuersalium, in qua quiescunt. E conuerso quia finis practicarum est opus; singularia autem sunt operabilia, non vniuersalia: neque enim efficitur statua vniuersalis, sed singularis, nec sanatur homo vniuersalis, sed singularis, vt sæpè Aristoteles docet; ideo facultates practicę quærunť cognitionem singularium, cognitionibus verò vniuersalibus vtuntur tanquam principiis ad acquirendam cognitionem singularium, in qua quiescunt, tanquam in cognitione proximè directiua ad operandum.

Ad 1. Optimè docet Aristoteles locis citatis, quod intellectus speculatiuus, & practicus differunt fine, quia intellectus speculatiuus contemplatur obiectum, quærens veritates speculatiuas ex fine sciendi; practicus contemplatur, quærens practicas, vt dirigatur ad operandum. Optimè etiam docet, quod intellectus speculatiuus contemplatur quę aliter se habere non possunt respectu nostri; practicus, quę aliter se habere possunt. Nam intellectus speculatiuus quærit veritates speculatiuas, quę ante scientiam quęstā supponuntur iam esse ita determinatę,

vt

De cognitione speculatiua; & practica 301
vt non possint aliter se habere : exem. gr.
dum quæro, an Petrus sit mortuus, sup-
pono, quod iam sit ita determinata altera
pars contradictionis *est mortuus, non est*
mortuus, vt saltem necessitate consequente
non possit aliter se habere: at intellectus
practicus contemplatur præcipuè opus fa-
ciendum, quod supponitur posse aliter se
habere, ac in nostra esse potestate illud fa-
cere, vel non facere. Optimè docet, quod
intellectus speculatiuus cōtemplatur vni-
uersalia, practicus singularia, intelligendo
quod quia ille habet pro fine scientiam,
querit præcipuè cognitionē vniuersaliū,
quæ sunt maximè scibilia, licet ad eam,
acquirendam vtatur etiam cognitione, &
inductione singularium; hic verò quia ha-
bet pro fine opus, & cognitionem ad id
dirigentem, querit præcipuè cognitionem
singularium, quæ est maximè directiua, li-
cet ad eam obtinendam vtatur etiam co-
gnitione principiorum vniuersalium.
Demum optimè definit, cognitionem
speculatiuam, *qua habet pro fine veritatem*,
subintellige *sistendo in ea*, practicam, *que*
habet pro fine opus. Nam, cognitio practica,
eo ipso, quod est inclinativa, & directiua
ad operandum, in quantum cognoscit o-
biectum inclinatum ad faciendum opus
propositum, habet naturaliter, & intrin-
secè pro fine opus, eo pacto, quo grauitas
incli-

inclinatiua ad centrum habet pro fine centrum; cognitio uero speculatiua eo ipso, quod non est inclinatiua ad operandum, habet pro fine, in quo quiescat, ueritatem cognitam. Allata igitur definitio non est contraria Aristotelice, sed est eius explicatio, dum declarat, quale obiectum, ac subiectum debet habere cognitio, ad hoc ut habeat naturaliter pro fine opus, uel ad hoc, ut habeat naturaliter pro fine solam ueritatem.

Ad 2. Optima est definitio cognitionis practice, *quæ est directiua ad operandum*: sed in nostra explicatur obiectum, ac subiectum, quæ debet habere cognitio, ut sit directiua.

Ad 3. Sensus illarum propositionum. *Syllogismus in Barbara est ita faciendus; marmor est ita elaborandum est ad faciendum syllogismum in Barbara bonum, ac necessarium est querere, & inuenire tres propositiones uersales affirmatiuas, & tres terminos, illosque disponere in prima figura: ad faciendam statutam bonum, ac utile est ita marmor elaborare, ac tales motus exercere; ergo uerè affirmant, quod bonum est facere aliquas actiones, sumendo ly bonum, in quantum comprehendit etiam bonum utile, ac necessarium ad finem obtinendum.*

Ad 4. Ultra cognitionem practicam ex obiecto, & fine intrinseco, ac naturali, quam

quam solam hic definimus, datur etiam cognitio practica ex fine extrinseco voluntatis. Ex.gr. cum quis ex fine faciendi statuum contemplatur, an marmor sit durum, vel molle, cognitio, qua iudicat id esse durum, quæ ex obiecto est speculatiua, est practica ex fine extrinseco, quia licet, cum non cognoscat bonum operandi, quod solum habet vim inclinandi, non sit inclinatiua ad operandum, atque adeo naturaliter, & intrinsecè non habeat pro fine operationem, adhuc extrinsecè habet pro fine operationem, in quantum ordinatur à voluntate ad finem operandi. Multæ autem ex istis cognitionibus practicas non ex obiecto, sed ex fine extrinseco voluntatis, aut habitus, dantur in artibus, quæ cognitiones utpote ex obiecto speculatiuæ, per se spectant ad scientias speculatiuas, eo pacto, quo cognitiones speculatiuæ de febribus, ac de marmoribus, per se spectant ad physicam, sub cuius obiecto continentur.

Ad 5. Cum quis putans volatum esse in sua potestate dicit, *bonum est volare sic, vel sic*, talis cognitio est practica solum putatiuè, quia putatur directiua, sed verè non est practica, quia verè non est directiua ad volandum. Adde talem cognitionem posse esse practicam respectu conatus volandi, qui verè est in potestate,

state, & respectu plurium mediorum existentium in potestate, quæ media possent poni, licet frustra ad obtinendum finem volatus naturaliter inconsequibilem.

Ad 6. Ad cognitionem, & iudicium ultimo practicum sufficit, quod proponat, quid hic, & nunc omnibus pensatis sit optimum, quid teneat secundum locum, quid tertium, quia eo ipso, quod homo id sciat, perfectissimè dirigitur ad eligendum; ergo non requiritur specialis modus tendendi explicatus per gerundium *in dum*, sed tales propositiones, *hoc est faciendum*, nihil aliud significant, quam istæ *bonum, aut necessarium est hoc facere, vel simpliciter, vel ad finem propositum*. Dum opponitur ad probandum, quod requiritur specialis modus tendendi: cognitio practica non differt ab omni speculatiua ex obiecto; ergo ex modo tendendi; ergo ex eo, quod practica habeat modum tendendi per gerundium *in dum*. Respondeo directè nego ultimam consequentiam. Licet enim differat ex modo tendendi, non differt ex hoc, sed ex alio, qui facile posset afferri.

Sed ut satisfaciam interrogationi, utrū cognitio practica differat à speculatiua ex obiecto, an ex modo tendendi; primo dico quod differt & ex obiecto, & ex modo tendendi. Differt ex obiecto, in quantum cognitio practica accipit ab obiecto mo-
dum

De cognitione speculatiua, & practica 305
dum tendendi, & intrinsecam differen-
tiam, per quam differt à speculatiua, &
talis differentia debet explicari per obie-
ctum, tanquam per suum specificatum,
extrinsecum. Differt etiam ex modo ten-
dendi, in quantum differentia intrinseca,
per quā quælibet cognitio differt ab alia,
est tendentia in obiectum, quæ vocatur
modus tendendi. Secundo dico, quod si
sensus quæsitus sit, an quæcunque co-
gnitio practica habeat aliquod obie-
ctum diuersum à quacunque speculatiua,
probabile est, quod quælibet cognitio pra-
ctica habeat aliquod obiectum materiale,
vel formale diuersum à quacunque spe-
culatiua, ita vt repugnet, quod ex duabus
cognitionibus habentibus idem obiectum
materiale, & formale, altera sit practica,
altera speculatiua. Ex.gr cognitio, qua
ego dico, *bonum est non peccare*, si non sup-
ponat peccatum, adeoque sit practica, dif-
fert ex obiecto formali à cognitione spe-
culatiua qua dico *bonum est non peccare*,
ita vt supponat peccatum. Nam prima
habet pro obiecto formali motiuo non
peccatum ipsum, neque aliquid connexum
essentialiter cum existentia peccati, sed
potentiam peccandi, vel aliquid aliud
coniungibile & cum peccato, & cum ne-
gatione peccati; secunda verò habet pro
obiecto formali vel peccatum, vel aliquid

essentialiter connexum cum eius existentia: Ex hac verò differentia obiecti formalis oritur differentia ex modo tendendi. Nam quia cognitio non supponens peccatum habet obiectum formale coniungibile etiam cum non existentia peccati habet modum cognoscendi abstrahentem ab existentia, vel non existentia peccati; quia verò altera cognitio habet obiectum formale connexum cum peccato, habet modum tendendi non abstrahentem. Vno igitur verbo ad interrogationem, utrum cognitio practica differat ab omni speculativa ex obiecto, vel ex modo tendendi, dico, quod ab aliquibus differt ex obiecto materiali, ab aliis ex obiecto formali, ab aliis ex modo tendendi practico variarum formalitatum, vel per quem una abstrahat ab existentia operis altera non abstrahat, à nulla per modum tendendi specialem explicandum per gerendum in dum, non equivalentem propositioni de bono, nec necessario explicabili per modum indicativum.

Dum opponitur, quod omnis cognitio per modum indicativum habet pro fine veritatem, quam affirmat, distinguo: habet pro fine, in quo quiescat, nego; habet pro fine, in quo non quiescat, sed ordinetur ad ulteriorem finem operandi, concedo. Ut enim dictum est cognitio per modum

indi.

De cognitione speculatiua, & practica 307
indicatiuum, quę est inclinatiua ad operandum, non quiescit in veritate practica, quam cognoscit, sed habet pro fine vltiori operationem, ad quam est inclinatiua, eo pacto, quo grauitas, quia est inclinatiua ad centrum, habet pro fine centrum. Hinc patet differentia inter hanc cognitionē, *cælum est incorruptibile*, & hanc, *bonum est dare eleemosynam*. Vtraque habet pro fine veritatem cognitam; sed prima, quia non est immediatē, & ex obiecto inclinatiua ad operandum, habet ita pro fine veritatem cognitam, vt in ea sistat, ac quiescat, ideoque est speculatiua; secunda quia ex obiecto est inclinatiua, habet ita pro fine veritatem cognitam, vt in ea non sistat, ideoque est practica.

Ad 7. In quo petitur, vt explicetur, quid sit speculatio, & quid consultatio, & quos actus includant, dico quod speculatio est *inquisitio apprehensionum, iudiciorū, ac mediorum*, ex quibus sequatur aliqua veritas speculatiua; ex. gr. cum quis speculatur, an Cælum sit incorruptibile, inquit media, & cognitiones, ex quibus sequatur vel hęc conclusio speculatiua; ergo *Cælum est incorruptibile*, vel hęc alia; ergo non est incorruptibile. Dixi *apprehensionum*, vel *iudiciorum*, quia aliquando speculamur, quęrentes principia per se nota, & tunc quarimus apprehensiones, ex quibus sequan-

tur

tur cognitiones principiorum, non tamquam conclusiones ex præmissis, sed tamquam iudicia immediata ex apprehensionibus. Duplex autem potest assignari speculatio Prima est, qua speculamur aliquod obiectum, nulla certa quæstione proposita: ut cum quis speculatur celum, non proposita certa quæstione; & hæc solum est speculatio inchoata. Ut enim perficiatur debet proponi aliqua certa quæstio, ex.gr. *quid sit celum, an sit animatum &c.* & hic est secundus modus speculationis, cum speculamur certa quæstione proposita, sed indifferentes ad utramque partem contradictionis. Tertius est, cum quærimus cognitiones, ex quibus inferatur una pars determinata contradictionis; ex.gr. cum quis conatur demonstrare diuinam existentiam, quærens cognitiones, ex quibus sequatur hæc determinata conclusio; ergo *Deus existit.*

Consultatio est *inquisitio cognitionum*, ex quibus sequatur cognitio practica, & directiua ad faciendum aliquod opus, quod supponitur esse in nostra potestate hic, & nunc. Ex.gr. cum quis consultat, an ineat vitam ecclesiasticam, vel militarem, supponit id esse in sua potestate, & quærit cognitiones practicas, quibus ad electionem dirigatur. Ad consultationem sufficit suppositio per meram suspicionem, quod id, de quo

quo consultatur, sit in potestate, nec requiritur suppositio per cognitionem euidentem. Paret: cum enim quis consultat de modo acquirendi dignitatem à principe, non cognoscit euidenter, quod in sua potestate sit obtinere, cum non habeat dominium supra libertatem principis, sed solum habet suspicionem, quod possit obtinere. Cum verò euidenter cognoscimus aliquid non esse in nostra potestate, non possumus de eo consultare. Vt enim Aristoteles docet, *an Ilium sit captum, consultat nemo*, quia euidentis est id à nobis non pendere. Similiter non potest aliquis proponere vt speculatiuam, aliquam quæstionem, de qua euidentis est, quod hic, & nunc pendet à sua potestate: ex. gr. miles in bello non potest speculari, an in his circumstantiis fugiat, nec uè, sed solum potest de eo consultare, quia euidenter experitur id esse in sua potestate. Si verò sit suspicio, quod aliquid non pendeat à nostra electione præseti hic, & nunc, possumus circa illud proponere quæstionem speculatiuam, eo pacto, quo multi speculatiuè inquirunt de suis electionibus futuris, vt an sint electuri vitam ecclesiasticam, vel militarem, & ad id sciendum adhibent etiam media astrologiæ, magiæ, & alia illicita, & superstitionosa.

In consultatione, & speculatione plures actus volūtatis, & intellectus includuntur. Primus actus inclusus, vel præsuppositus ante ingressum speculationis est, quod aliqua veritas sit independens à nostra electione hic, & nunc. Neque enim possū speculari, vtrum nunc ambulem, vel non, quia video euidenter id pendere hic, & nunc à mea electione. Secundus est curiositas sciendi aliquam veritatem, & applicatio intellectus ad inquirendum. Tertius inquisitio per excitationem specierū, ac phantasmatum. Quartus inuentio, & iudicium de variis principiis, quæ suspicamur conducere ad soluendam propositam quæstionem. Vltimus inuentio veritatis, & illius sciētia: ex. gr. speculatio, an cælum sit incorruptibile, terminatur actu scientiæ, quo concluditur; *ergo est incorruptibile.*

In consultatione primus actus est suppositio saltem suspiciatiua, quod opus propositum pendeat à nobis. Secundus desiderium aliquid circa ipsum determinandi, & applicatio intellectus ad inquirendum ea, quæ possint dirigere ad determinationem. Tertius inuentio, & iudicium de multis ad determinationem conducentibus. Quartus collatio omnium inter se, & vltima determinatio, vel dilatio determinationis ad aliud tempus. Speculatio habet pro fi

De cognitione speculatiua, & practica 311
ne scientiam, ideoque omnes actus in ipsa
inclusi sunt speculatiui. Consultatio habet
pro fine electionem voluntatis, ideoque
omnes actus in illa inclusi sunt practici,
saltem extrinsecè. Omnes actus practici
sunt consultatiui.

Ad 8. Cognitio, quam Deus habet de
se ipso, est speculatiua, cum non sit directi-
ua ad ponendum Deum. Cognitio etiam,
quam habet de creaturis, videns, quod
aliqua existunt, aliqua non existunt,
que vocatur scientia visionis, est similiter
speculatiua respectu illarum creaturarum
quæ videtur vt existentes, vel vt non exi-
stentes, quia non potest dirigere ad ponen-
das creaturas, quas videt iam positas, li-
cet fortasse visio vnius creaturæ vt posita
sit practica respectu alterius, à cuius exi-
stentia vel non existentia abstrahit. De-
mum cognitio, qua Deus cognoscit crea-
turas, abstrahendo ab earum existentia
actuali, (quæ cognitio si cognoscat verita-
tes necessarias, vocatur scientia simplicis
intelligentiæ, si veritates contingentes, &
liberas, qualis est, quod *si miracula facta*
a Christo in Capbarna facta fuissent in Tyro,
& Sydone, *pœnitentiam egissent*, vocatur
scientia media, est perfectissimè practica,
& directiua, quia per illam Deus videt,
qua bonitate sit bonum facere, vel non fa-
cere quamcumque creaturam in quibus-
cunque

cunque circūstantiis, & quę bona, vel mala sunt secutura ex positione, vel non positione cuiuscumque creaturę; ergo perfectissimē dirigit, & est perfectissimē practica. Non tamen est consultatiua, quia Deo repugnat consultatio, utpote quę includit quamdam inquisitionem, & quemdam motum, quę inquisitio repugnat Deo, qui cognoscit omnes veritates simplici intuitu sine vlla inquisitione, ac motu. Dum opponitur: ex Aristotele cognitio practica habet pro fine opus; cognitio Diuina non habet pro fine opus; ergo &c. Respondeo, quod cognitio practica habet pro fine opus, vel electionem determinatiuam operis: sic enim Aristoteles debet intelligi. Cognitio autem diuina, licet non habeat pro fine opus externum ex ratione allata, tamen habet pro fine electionem operis identificatam cum diuina essentia. Eo enim ipso, quod habeat pro fine diuinam essentiam, habet pro fine omnia identificata cum diuina essentia.



Vtrum ad executionem requiratur imperium rationis consequens electionem.

Quaestio X I I.

VIdetur non requiri, ut docent plures recentiores contra S. Thomam, 1. 2. quæst. 17. artic. primo. 1. quia eo ipso, quod aliquis potens currere, velit efficaciter currere, determinatur proximè ad currendum, sine vlllo alio actu intellectus consequente actum voluntatis; sed imperium rationis esset actus intellectus consequens imperium voluntatis; ergo imperium rationis non requiritur.

2. Imperare est proprium voluntatis; ergo intellectus non imperat, nec datur imperium rationis.

3. Hoc imperiū explicaretur per verba imperatiui modi, quibus postquam voluntas fecit determinationem efficacem currendi, intellectus diceret *curre*; sed actus, quo intellectus diceret *curre*, haberet specialem modum tendendi non resolvablem in affirmationem, qua per modum indicatum affirmetur aliqua veritas consistens in compositione prædicati cum subiecto, qui modi tendendi non debent admitti ergo &c.

4. Si requireretur imperium rationis

O

quod

quod vocatur etiam imperium intima-
tium, maximè ut intimaret potentiis
executivis imperium voluntatis; sed po-
tentiæ executivæ, ex. gr. potentia motiva
non possunt percipere imperium volun-
tatis; frustra autem intimatur aliquid nõ
potenti illud percipere; ergo non requi-
ritur imperium rationis.

5. Imperium rationis deberet esse co-
gnitio practica; sed cognitio practica pro-
ponit bonum operandi; ergo imperium
rationis deberet proponere bonum exe-
quendis sed cognitio de bono exequendi
non dirigit ad exequendum, nisi medio
actu voluntatis; ergo post imperium ratio-
nis requiritur actus voluntatis, & procedi-
tur in infinitum.

6. Postquam intellectus cognoscit, quid
bonum sit facere per ultimum iudicium
practicum, ut voluntas id eligat, non re-
quiritur alia intimatio per cognitionem
habentem specialem modum tendendi, ac
dicentem, *hoc est faciendum*; ergo post-
quam voluntas elegit, ut potentia exte-
riores exequantur, non requiritur alia
intimatio per actum intellectus dicentem,
exequere.

7. Si postquam homo vult currere, nè
exequatur cæco modo imperium volunta-
tis, requiritur actus rationis, quo dicat sibi
imperium voluntatis, ac dirigat ad cur-
rendum;

rendum cum homo vult facere actum si dei, nè cæco modo exequatur tale imperium, requiritur actus rationis, quo cognoscens se velle credere, dirigatur ad credendum, cum vult facere actum contritionis, nè faciat cæco modo, requiritur actus intellectus, quo cognoscens se velle, dirigatur ad faciendum actum contritionis. Ex hoc autem sequuntur plura incommoda, ac præsertim quod cognitio reflectat supra seipsam, & quod actus contritionis habeat aliquod motuum creatum.

Respondeo, quod ut homo exequatur humano modo imperium voluntatis, requiritur imperium rationis consequens imperium voluntatis, quo sibi ipsi denunciet imperium voluntatis. Probatur: nam ut homo exequatur humano modo imperium voluntatis, debet exequi sciens, quid voluntas velit, & directus à tali scientia; co enim ipso, quod exequeretur nesciens, vel non directus à scientia, exequeretur modo cæco, atque adeo non humano: ex. gr. si exequeretur motum, vel nesciens se velle, vel non directus à tali scientia, exequeretur quod voluntas vult modo cæco, & irrationali. Quod si exequatur imperium nesciens, exequatur cæco modo, per se patet. Quod verò si exequatur sciens quidem, sed non directus à scientia, adhuc exequatur irrationabiliter, &

cæcè, probatur; quia ut operatio fiat rationabiliter, & modo non cæco, non sufficit, quod procedat à sciente, sed requiritur etiam, ut reguletur à tali scientia: ita licet operationes nutritionis ex. gr. procederent ab aliquo sciente, & cogitante quo pacto nutriatur, adhuc quia non dirigerentur à tali scientia, procederent modo cæco, & irrationali; ergo etiam si executio imperii voluntatis procedat à sciente imperium, tamen nisi dirigatur à scientia, procedet cæco modo, & irrationali; ergo ut exequamur imperiū humano modo, hoc est non cæco, & irrationali, requiritur, ut exequamur sciētes quid voluntas velit, & directi à tali scientia; sed hæc scientia, & cognitio cognoscens quid voluntas velit, ac dirigens ad exequendum, est imperium rationis consequens imperium voluntatis, quo nobis ipsis denunciamus imperium voluntatis: imperium enim est actus, quo subditus dirigitur ad exequendum, intimando illi voluntatem superioris; homo verò cognoscens quid voluntas velit, intimat sibi ipsi imperiū voluntatis, quæ dominatur in homine, & per hoc se dirigit ad exequendum; ergo ut homo exequatur humano modo imperiū voluntatis, requiritur imperiū rationis consequens imperium voluntatis, quo sibi ipsi denunciaret tale imperium.

Confir-

Confirmatur, nam cum homo vult currere ex gr. vel aliquid aliud facere, cognoscit, & experitur se velle: volitio enim, cum sit intimè præsens intellectui, necessario mouet illum ad cognitionem experimentalem sui, sicut obiectum visibile præsens oculo mouet illum necessario ad visionem sui: alioquin sequeretur, quod posset aliquis peccare nesciens se peccare, nec habens conscientia remorsum, si actus peccati, qui est actus voluntatis, non necessario moueret ad cognitionem experimentalem sui: nec esset verum, quod conscientia accuset nos de omnibus peccatis, & quod Deus iudicabit vnumquemque secundum accusationem, & testimonium propriæ conscientia. Si enim aliquis peccaret nesciens se peccare, non posset conscientia testimonium perhibere de peccato, quod nescit. Rursus hæc cognitio, qua aliquis volens currere experitur se velle currere, dirigit ad currendum. Cognitio enim regulæ, cui debet conformari operatio, dirigit ad operationem; sed volitio currendi est regula, cui debet conformari operatio currendi, cum homo debeat currere prout vult; ergo cognitio talis volitionis est directiua ad currendum, præsertim quia nisi dirigeret cursum, conformaretur volitioni currendi cæco modo; sed eo ipso, quod

detur talis cognitio de actu voluntatis, & sit directiua, est imperium rationis, cum illi conueniat tota definitio imperii intimatiui; ergo requiritur imperium rationis.

Ad 1. Sicut cum Deus imperat aliquid angelo, imperium diuinum non determinat proximè angelum ad executionem, sed media intimatione, qua innotescat angelo, quam intimationem imperium diuinum essentialiter trahit; sic cum voluntas vult currere, imperium voluntatis non determinat proximè hominem ad exequendum, sed medio imperio rationis, siue intimatione, qua homo cognoscens imperium voluntatis dicit, atque intimat illud sibi, quam intimationem sua vi causat actus voluntatis, utpote mouens intellectum ad cognitionem experimentalem sui. Nec frustra ponitur talis intimatio, cum requiratur, ut exequamur quod volumus modo non ceco, sed scientes.

Ad 2. Licet imperium primo determinatiuum ad operandum sit proprium voluntatis, quæ est domina; imperium tamen denunciatiuum est proprium rationis. Denunciare enim est actus rationis, & homo cognoscens, quid voluntas velit, dicit, ac denunciat sibi voluntatis imperium, & sic exercet imperium denunciatiuum.

Ad 3.

Ad 3. Licet hoc imperium exprimat per verba imperatiui modi, *fac hoc, curre, exequere*, tamen potest explicari per modum indicatum, quo quis sibi dicat, voluntas vult, ut curram. Talis enim actus cum intinet imperium voluntatis, & dirigat ad exequendum, est imperium rationis.

Ad 4. Sicut quando quis imperat seruo dicens, *vade in plateam*, denunciat seruo suam voluntatem, & licet seruus debeat ire in plateam per potentiam motiuam, denunciat imperium suę voluntatis non potentie motiue, quę non percipit, sed seruo, qui percipit, & est operans, atque exequens principale *ut quod*, licet vtatur potentia motiua tanquam instrumento operante *ut quo*; sic cum homo vult currere, denunciat per rationem imperium voluntatis non potentie motiue, quę non percipit, sed sibi ipsi, qui percipit, & est principale operans *ut quod*, exequens quod vult per potentiam motiuam, tanquam per instrumentum operans *ut quo*.

Ad 5. Cognitio practica dirigens ad electionem, quę mouetur à solo bono, debet proponere bonum; ac cognitio practica supponens iam electionem boni, & dirigens ad executionem eius, quod iam est electum, ac determinatum, non debet proponere bonum, sed imperium, ac electionem, purè denunciando, quid voluntas velit.

Ad 6. Omnis actus intellectus cum certificet de sua existentia, est denuncia-
tio sui ipsius, atque adeo non debet inti-
mari per alium actum; quid intellectus
iudicet faciendum: at tactus voluntatis
cum non sit cognitio, non potest per se ip-
sum certificare de sua existentia; ergo
ut homo sciat quid velit, requiritur co-
gnitio consequens voluntatem, qua co-
gnoscat ipsum suum velle, quæ cognitio
est denunciatio imperii. Quod verò actus
intellectus certificet de existentia sui ip-
sius, probatur, quia omnis actus intellectus
relinquit memoriã suã sed memoria est de
obieto ut ante cognito; ergo actus in-
tellectus, quando existit, cognoscitur non
per alium actum, nam de hoc alio actu re-
dit difficultas, quæ pacto relinquat memo-
riam suã nisi cognoscat se ipsum; ergo
actus intellectus, cum existit, per se ipsum
certificat de sua existentia. Confirmatur,
& explicatur argumentum: nam memo-
ria est de obieto ut cognito; ergo non
solum est memoria obiecti, sed etiam co-
gnitionis habitus de obieto; sed quod
cadit sub memoriã, cadit ut ante co-
gnitum; ergo ipsa cognitio cadit sub me-
moriã ut ante cognita; ergo nisi cog-
nitio cadit sub memoriã ut ante cognita
per se ipsam, cadit ut cognita per aliam
cognitionem reflexam; ergo etiam illa

cognitio reflexa cadit sub memoriam ; ergo vt cognita per aliam reflexam , & sic in infinitum, atque adeo datur memoria de infinitis cognitionibus reflexis , quod implicat. Nec verò repugnat, quod cognitio habens suum obiectum fundamentale reflectat supra se ipsam, licet repugnet, quod cognitio cognoscat se ipsam & nihil aliud: ex. gr. repugnat , quod cognitio cognoscat se cognoscere , & nunquam afferatur obiectum fundamentale , quod cognoscit: at quod cognitio cognoscens Deum cognoscat etiam se existere , non repugnat, nec est inexplicabilis, sed explicatur vno verbo, dicendo , quod est cognitio cognoscens directè Deum existere , & reflexè quod existit talis cognitio Dei .

Ad 7. Verum est, quod sicut cum homo vult currere , dirigitur ad currendum à cognitione de voluntate currendi , quam habet , sic cum vult credere, dirigitur ad credendum à cognitione , quam habet de sua voluntate credendi , & cum vult facere actum contritionis , à cognitione de voluntate faciendi talem actum contritionis ; alioquin exequeretur imperium voluntatis cæco modo , vel nesciens quid velit, vel sciens, sed non directus à scientia ad exequendum . Iam potest quari , quo pacto cognitio de imperio voluntatis

tatis dirigat actum imperatum tum fidei, tum contritionis (idemque valet de cæteris actibus imperatis intellectus, aut voluntatis) an dirigat ita, ut sit obiectum actus imperati directi, an ita, ut non sit obiectum. Probabilius est, quod dirigat ita, ut non sit obiectum. Primo quia ut homo exequatur imperium modo non cæco, sufficit, quod ipse cognoscat imperium, non requiritur, ut executio cognoscat imperium; nam profectò executiones, quæ non sunt actus intellectus, non cognoscunt imperium. Secundo quia cum voluntas imperat efficaciter aliquem actum, ex. gr. actum fidei, vel contritionis, imperat actum circa motium, & obiectum adequatum iam sufficienter propositum, non autem proponit volitionem ut novum obiectum, aut motium; ergo debet resultare actus imperatus circa obiectum, & motium præscriptum à voluntate, non autem circa actum voluntatis; sed imperium rationis dirigit merè ad executionem actus imperati à voluntate; ergo dirigit merè ad faciendum actum circa obiectum præscriptum à voluntate, non autem circa imperium præscribens, vel eius intimationem. Ex hoc verò cessant difficultates indicatæ in argumento, quod actus fidei, & contritionis haberent obiectum formale saltem parziale crea-

creatum, hoc est ipsum imperium rationis, & voluntatis, ac reflecterent supra se ipsos, cum haberent pro obiecto imperium imperantes actus, quæ supponunt, quod imperium sit obiectum.

*Vtrum quatuor facultates primariæ
sint speculatiuæ, vel practicæ .*

Questio X I I I .

Primo videtur, quod nulla ex iis sit partim practica, sed omnes totaliter speculatiuæ. Metaphysica enim, & physica sunt totaliter speculatiuæ; sed eadem est ratio de duabus reliquis; ergo omnes sunt totaliter speculatiuæ.

2. Facultates speculatiuæ, & practicæ non possunt habere vnitatem, cum non habeant vnum finem, & vnum obiectum attributionis, à quo desumitur vnitas facultatis; sed omnes quatuor facultates primariæ habent vnitatem; ergo vel sunt totaliter speculatiuæ, vel totaliter practicæ.

3. Videtur, quod logica sit totaliter practica. Moralis enim versans circa ens morale est totaliter practica; ergo etiam logica versans circa ens rationis.

4. Videtur, quod logica sit totaliter speculatiua. Si enim esset partim practica,

haberet pro fine proximæ; sed actus intellectus, quos logica habet pro fine, non sunt praxis; ergo logica secundum nullam partem est practica. Probatur minor, quod nimirum actus intellectus non sint praxis triplici argumento Scoti. Primo praxis est actus alterius potentie ab intellectu, naturaliter posterior intellectione, uolens elici iuxta regulas rationis; ergo actus intellectus non sunt praxis. Secundo ex Aristotele intellectus extensione fit practicus; sed non potest extendi ad actus proprios, sed solum ad actus aliarum potentiarum; ergo actus intellectus non sunt praxis, sed solum sunt praxis actus aliarum potentiarum. Tercio nulla speculatio est praxis: praxis enim, & speculatio videntur opponi; omnis actus intellectus est speculatio; ergo nullus actus intellectus est praxis. Confirmari potest, quia habitus habens pro fine speculationem veritatis est speculativus; logica habet pro fine speculationem veritatis, ad quam dirigitur; ergo est speculativa.

Respondeo quatuor facultates primarias esse speculativas saltem partialiter. Obiecto enim speculabili per specialem modum cognoscendi, habentem speciale difficultatem correspondet facultas speculativa illius; sed obiecta attributionis quatuor scientiarum, nimirum ens naturale,

turale; extensum, transnaturale, & intentionale sunt speculabilia, cum contineant multas veritates speculatiuas, hoc est nō inclinatas ad operandum, vniuersales, & à nobis independentes; & sunt speculabilia speciali modo cognoscendi habente specialem difficultatem, vt dictum est quæst. 6; ergo quatuor facultates illis correspondentes sunt saltē partialiter speculatiuæ, & ita sua obiecta contemplantur, vt querant circa illa veritates speculatiuas ex fine sciendi. Confirmatur, quia negari non potest, quin in logica Aristotelica sint plures speculationes; sed illæ non spectant ad animasticam, vel aliam scientiam, vt dicunt aduersarii, sed ad facultatem specialem, vt probatum est; ergo logica saltem partialiter est speculatiua, vt docent Thomistæ, & Scotistæ contra plures recentiores existimantes illam esse totaliter practicam.

2. Dico mathematicam, & logicam esse partim speculatiuas, & partim practicas. Probatur quia facultates, quæ non solum contemplantur obiectum, querentes circa illud veritates speculatiuas ex fine sciendi, sed etiam extenduntur ad querendas veritates practicas, quibus dirigi possint ad operandum, hac extensione fiunt practicae, ideoque sunt partim practicae; sed logica extenditur etiam ad querendas ve-

ritates practicas, quibus dirigatur ad definiendum, diuidendum, argumentandum, demonstrandum: mathematica à contemplatione speculatiua numerorum per arithmetica[m] extenditur ad quærendas veritates, regulas, & præcepta practica, quibus dirigatur ad computandum, & adprehendēdos numeros resultātes ex additione, subtractione, multiplicatione, & diuisione; à contemplatione speculatiua magnitudinum extenditur ad quærendas veritates practicas, regulas, & præcepta, quibus dirigatur ad ducendas lineas, faciendos angulos, & figuras, deprehendendas mensuras rerum, & locorum; ergo logica, & mathematica sunt partim practica. Et confirmatur, quia communiter ultra arithmetica[m], & geometriam speculatiuam, ponitur practica, & mathematici in suis libris solent distinguere partem speculatiuam à practica. Quod dixi de scientiis mathematicis puris, quales sunt arithmetica, & geometria, proportionaliter est dicendū de mixtis enumeratis capite 8.

3. Dico physica[m], & metaphysica[m] esse totaliter speculatiuas. Quærunt enim circa suum obiectum veritates purè speculatiuas ex fine sciendi, nec extenduntur ad quærendas practicas, sed talem extensionem relinquunt facultatibus inferiori-

terioribus , eo pacto,quo physica relinquit medicinæ extensionem ad quærendas veritates practicas conducentes ad sanandum corpus humanum .

Infertur obiter theologiam scholasticā esse partim speculatiuā, & partim practicam. Nam non solum quærit veritates speculatiuas ex fine sciendi , sed etiam extenditur ad quærendas practicas , quibus dirigatur ad benè operandum.

Ad I. Physica , & metaphysica sunt totaliter speculatiuæ,quia non extenduntur ad quærendas veritates practicas, quibus dirigantur ad operandum , sed totam extensionem relinquūt facultatibus inferioribus habentibus aliud nomen, ex. gr. medicinæ, alchimix, statuariæ. At logica , & mathematica ipsamet retinentes nomen extenduntur ad quærendas cognitiones practicas . Si verò quærat, cur logica , & mathematica extendantur ad quærendas veritates practicas , non verò physica. Respondeo rationem esse , quia extensio à veritatibus physicis ad praxim ex. gr. ad medicandum , ad exercendam alchimiam &c. continet difficultatem valde diuersam à difficultate contemplandi, & postulat institutum valdè diuersum ab instituto contemplantis, vt per se patet. At extensio logicæ , & mathematicæ à quærendis veritatibus contemplatiuis ad

opus computandi, mensurandi, dicendi lineas, definiendi argumentandi &c. non continet difficultatem valdè diuersam, nec postulat diuersum institutum vitæ.

Ad 2. Facultates speculatiuæ, & practicæ non possunt habere vnitatem perfectam, quæ desumitur ex fine: at possunt habere vnitatem quandam per continuationem doctrinæ, qua paulatim à speculatione descendatur ad præcepta; hæc autè sola vnitas datur in logica, & mathematica, in quantum integrantur ex parte speculatiua, & practica.

Ad 3. Non est absurdum, quod etiam moralis sit partim speculatiua, cum ens morale, quod est eius obiectum, sit speculabile per specialem modum cognoscendi habentem specialem difficultatem, vt dictum est quæst. 6. ad 8. Addo posse dici, quod moralis sit totaliter practica, quia eius obiectum attributionis, quod est ens morale, est ens practicum, hoc est inclinatum ad operandum, cum contineat formaliter ipsam rationem boni, vel mali agibilis, quæ sunt rationes inclinatiuæ ad operandum: at ens rationis secundum se præcisè, cum non contineat rationem boni, non est practicum.

Ad 4. Logica habet pro fine praxim, quia actus intellectus, quos habet pro fine, nimirum definitio, syllogismus &c.

sunt

sunt praxis. Dum Scotus opponit definitionem praxis, qua definitur, *operatio alterius potentie ab intellectu*, dico hanc particulam gratis additam à Scoto, ab aliis auctoribus reiici. Definitur ergo praxis *operatio regulabilis per praecepta rationis*. Et quia non solum operationes aliarum potentiarum, ex. gr. operatio saltandi, pingendi, scribendi &c. sunt regulabiles per praecepta rationis, sed etiam operationes intellectus definiendi, diuidendi, argumentandi &c. sunt regulabiles, & defacto regulantur per praecepta logicae; ideo etiam operationes intellectus sunt praxis. Dum secundo opponit intellectus extensione fit practicus; non extenditur ad actus proprios; ergo &c. Distinguo minorem; non extenditur ab vno actu proprio ad alium, nego; ab vno ad eundem, concedo. Explicatum est, quo pacto intellectus fiat practicus, dum à quærendis veritatibus speculatiuis extenditur ad quærendas practicas per actus, qui proinde sunt practici. Dum tertio opponit: nulla speculatio est praxis, distingo: nulla speculatio est praxis respectu obiecti, quod speculatur, concedo; respectu praecepti, à quo dirigitur, nego. Syllogismus demonstratiuus de cælo non est praxis respectu cæli, ac respectu praecepti, quo regulatur est praxis. Repugnat igitur, quod

quod idem sit speculatio, & praxis respectu eiusdem: at non repugnat quod sit speculatio obiecti, in quantum contemplatur illud ex fine sciendi; & simul sit praxis, & executio precepti, in quantum regulatur per preceptum.

Ad confirmationem: habitus habens pro fine speculationem veritatis est speculatiuus, distinguo; habitus habens pro fine speculationem veritatis ut regulabile per sua precepta est speculatiuus, nego: habitus habens pro fine speculationem veritatis ut actum eliciendum, concedo: distinguo eodem pacto minorem; & nego consequentiam. Diuerso modo habet pro fine speculationem veritatis physica ex. gr. ac logica practica. Physica habet pro fine speculationem ut eliciendam; cum ipsa eliciat actus contemplatiuos ex fine sciendi, ideoque est speculatiua. Logica habet pro fine speculationem veritatis, non ut eliciendam, sed ut regulandam per sua precepta; sed speculatio ut regulabilis est praxis; ergo habet pro fine proximam; ergo est practica; presertim cum actus elicit sint precepta, quæ sunt cognitiones practice; ergo elicit cognitiones practicas; ergo est practica.

*Vtrum cognitio speculatiua sit nobi-
lior practica . Quaestio X I V.*

V Idetur quod non 1 quia vel cognitio speculatiua est nobilior ex toto genere, ita vt omnis cognitio speculatiua sit nobilior qualibet practica, eo pacto, quo intellectiuium est perfectius non intellectiui ex toto genere, quia quodcunque intellectiuium est perfectius quolibet non intellectiui; vel est perfectior solum ex genere, eo quod detur aliqua cognitio speculatiua perfectior qualibet practica, eo pacto, quo incorruptibile est perfectius corruptibili ex genere, eo quod licet calum incorruptibile sit imperfectius homine corruptibili, datur aliquid incorruptibile, nimirum Deus, & angeli, perfectiores quocunque corruptibili; non est perfectior ex toto genere; datur enim aliqua cognitio practica perfectior aliqua cognitione speculatiua de obiecto vilissimo: non est perfectior ex genere; nam in Deo datur cognitio practica; sed nulla cognitio est perfectior cognitione diuina vtpote infinite perfecta; ergo nulla cognitio speculatiua est perfectior qualibet practica. Si verò dicatur sermonem esse

esse de solis cognitionibus creatis: contra est, quia visio beatifica est practica, cum per illam beati cognoscant, quod bonum est faciendum, malum fugiendum; sed nulla cognitio creata est perfectior visione beatifica; ergo nulla cognitio creata speculatiua est perfectior qualibet practica creata.

2. Cognitio speculatiua ita cognoscit veritatem, vt sit inutilis ad operandum: cognitio practica ita cognoscit; vt sit utilis; sed vtile est perfectius; & melius inutiles; ergo cognitio practica est perfectior, & melior speculatiua.

3. Nullum obiectum est perfectius ipso bono; cognitio practica cognoscit ipsam rationem boni; ergo cognoscit obiectum perfectissimum, ac proinde est perfectissima: præsertim, cum veritates practicæ, cuiusmodi sunt, *bonum est faciendum, malum est fugiendum* sint necessarie, & æternæ, ac proinde cum Deo identificate, vt dicitur in quæstionibus de possibilitate.

4. Quod imperat alteri perfectius est illi: prudentia, quæ est practica, imperat etiam scientiis speculatiuis; ergo est perfectior scientiis speculatiuis.

Respondeo, quod cum cognitiones speculatiuæ non sint perfectiores practicis ex toto genere, vt bene probatur in 1. argumento, solum possunt esse perfectiores

ex genere. Quia tamen cognitio diuina, & fortasse etiam visio beatifica creata, est speculatiua simul, & practica, dum dicitur, quod aliqua cognitio speculatiua est perfectior qualibet practica, debet intelligi de practica, quę non sit simul speculatiua, ita vt sensus sit; datur aliqua cognitio creata purę speculatiua, & non practica perfectior quacumque cognitione purę practica. Probatur autem: cognitiones, quę tantam continent bonitatem, vt seclusa quacumque utilitate, quam afferant, ratione sui præcisę sint valde expetibiles, sūt multo perfectiores cognitionibus, quę seclusa utilitate parum, aut nihil sunt à nobis expetibiles; sed cognitiones purę speculatiuę physicę, metaphysicę, & mathematicę, seclusa omni utilitate, sunt vehementissimę expetibiles, ideoque ex sola curiositate sciendi alliciunt homines ad has scientias ingentibus laboribus comparandas: cognitiones purę practicę, quod bonum sit facere hoc, & illud, expetuntur tantum vt utiles ad opus, nec multum mouent curiositatem ratione sui præcisę; ergo cognitiones purę speculatiuę sunt ex genere perfectiores cognitionibus purę practicis. Ideo hoc argumento vtitur Aristoteles in metaphysicę ad probandum scientias speculatiuas esse perfectiores practicis, quia
spe-

speculatiuæ quærentur gratia sui, practice & gratia sui parum, aut nihil expetuntur, sed quærentur solum gratia operis. Hinc infert scientias speculatiuas esse quasi liberas, quia liber est gratia sui; practicas quasi seruas, quia seruus est gratia alterius.

Ratio à priori est, quia cognitiones cognoscentes veritates priores, ac radicales, ex quibus aliæ inferuntur, sunt perfectiores cognitionibus cognoscētib; veritates secundas, & quæ inferuntur ex aliis; sed hæc veritas *bonū est hoc, vel illud facere*, est veritas secundaria illata ex aliis veritatibus prioribus, quibus exprimitur natura rerum; ex. gr. hæc veritas *bonum est amare Deum*, infertur ex alia veritate, *Deus est optimus, & perfectissimus*; ergo cognitiones practice vtpote repræsentantes veritates secundarias, sunt minus perfecte speculatiuis cognoscentibus primarias; ideoque cognitiones practice minus expetuntur ratione sui, & minus alliciunt curiositatē, quam speculatiuæ.

Ad 1. Iam dictum est comparari cognitiones purè speculatiuas cum purè practicis, quales non sunt cognitio diuina, & visio beata, quæ supponuntur speculatiuæ simul, & practice respectu diuersorum.

Ad 2. Cognitio utilis est melior inutili

cili, si cætera sint paria: ac in casu nostro cætera non sunt paria: multæ enim cognitiones speculatiue ratione sui præcisè sunt expetibiliores omnibus cognitionibus purè practicis, quia cognoscunt veritates priores, ac magis radicales, ut dictum est.

Ad 3. Distinguo maiorem: nullum obiectum est perfectius ad contemplandum bono primario, & radicali, concedo; bono illato, nego: distinguo eodem pacto minorem, & nego consequentiam. Dum quærimus, quænam veritas necessaria sit perfectior, nõ quærimus, quænam veritas necessaria secundum se sit perfectior, cū omnes supponantur identificate inuicē, & cū essentia diuina, ut dicetur questione 47. de possibilitate obiectiua; sed quærimus, quænam sit perfectior ad contemplandum secundum nostrum modum contemplandi præcisum, quo vnā veritatem inferimus ex alia distincta solum per intellectum. In hoc sensu veritates priores, & magis radicales sunt perfectiores. Et quia veritates practicæ, quibus exprimitur bonum operandi, sunt secundariæ, & inferuntur ex aliis, ideo non sunt perfectissimæ ad contemplandum, sed perfectissima omnium est veritas speculatiua, qua exprimitur dari Deum, & esse optimum, ac pelagus omnium omninò perfectio-

ctionum. Hinc patet, quod licet veritates practicæ sint necessariæ, & identificate cum speculatiuis, tamen sunt imperfectiores speculatiuis, non secundum se, sed ad contemplandum, in quantum fundant contemplationem præcisivam sui imperfectiorem contemplatione præcisiva speculatiuarum.

Ad 4. Quod imperat alteri perfectius est illo, distinguo: quod imperat alteri habens id pro fine, nego; quod imperat alteri non habens id pro fine, sed ordinans ad alium finem, transeat; distinguo eodem pacto minorem; & nego consequentiam. Quod imperat alteri habens id pro fine, eo pacto, quo Præfectus sacrarum ceremoniarum imperat Pontifici, habens pro fine ipsum Pontificem, in cuius bonum imperat, non semper perfectius est illo: at quod imperat alteri ordinans ad alium finem, eo pacto quo dominus præcipit seruo, est perfectius illo. Prudentia imperat aliis facultatibus practicis, ordinans illas ad suum finem, hoc est ad felicitatem: ideo imperat sicut domina servis, & perfectior est cæteris artibus. At eadem imperat facultatibus speculatiuis tanquam constituens suum finem, & felicitatem in operationibus facultatum speculatiuarum, ac præsertim in cognitione speculativa Dei, in quantum

tum est optimum; ergo imperat sicut præfectus ceremoniarum Pontifici, hoc est imperat subseruiendo. Cognitio verò speculativa, in qua constituitur finis, præstat practicę, quę habet illam pro fine, quia finis præstat iis, quę non sunt finis.

*Utrum bona sit definitio, ac diuisio
virtutum intellectualium.*

Quæstio XV.

Primo videtur non esse bona definitio, qua virtus, in quantum est genus commune virtuti intellectuali, & morali, definitur ex Aristotele 2. Eth. cap. 6. *habitus, qui facit bonum habentem, & opus eius bonum reddit*; & ex eodem septimo Physicor. tex. 17. *dispositio perfecti ad optimum*. Deus enim est incapax habitus, ac dispositionis, & tamen habet virtutes; ergo &c.

2. Si aliquis habitus faciat bonum habentem, & tamen non sit operatiuus, atque adeo non faciat opus eius bonum, est virtus: similiter est virtus, si disponat ad benè operandum, licet non faciat habentem bonum; ergo non requiritur ad virtutem, vt faciat bonum habentem, & opus eius bonum reddat.

3. Videtur, quod virtus intellectus non

P

benè

benè definiatur ex Aristotele 2. Eth. cap. 6. *habitus quo affirmando, aut negando verum anima dicit*. Nam etiam per habitus fallibiles, ex. gr. per fidem humanam, & opinionem aliquando dicimus verum; sed habitus fallibiles non sunt virtus, ut Aristoteles docet; ergo non sufficit ad virtutem, ut sit habitus, quo affirmando, aut negando verum anima dicit.

4. Videtur mala diuisio virtutis intellectualis in sapientiã, intellectum, scientiam, prudentiam, & artem. Sapientia enim continetur sub scientia tamquam sub genere; sed est mala diuisio, in qua vnum mēbrum continetur in alio; ergo est mala diuisio virtutis intellectualis in scientiam, intellectum, sapientiam, & prudentiam, & artem.

5. Fides diuina est virtus, cum per illam infallibiliter verum dicamus; sed non reducitur ad vllam ex quinque numeratis; ergo virtutes sunt sex.

6. Etiam fides humana, qua credimus quod dicunt tot testes, ut faciant moralē euidentiã, ex. gr. quod datur Cōstantinopolis, est virtus; sed non reducitur ad vllam ex quinque; ergo &c.

Respondeo, ac primo dico optimam esse allatam definitionem, qua virtus describitur: *habitus, qui facit bonum habentem, & opus eius bonum reddit*. Probatur; nam
 expli-

explicat genus proximum virtutis, quod est *habitus*, & eius propriam differentiam, qua differt à vitio, & habitibus mediis inter virtutem, & vitium. Nam vitium facit malum habentem, & opus eius malum reddit; habitus mediis aliquando faciunt bonam, & aliquando malam operationem; virtus verò semper disponit ad bonam operationem, & facit bonum habentem. Et quia bonitas vniuscuiusque subiecti consistit in hoc, vt sit aptum ad finem: calamus enim tunc est bonus, cum est aptus ad scribendum, qui finis est calami; equus tunc est bonus, cum est aptus ad currendum, ad gestandum commodè fessorem, ad sustinendos hostes in bello, & ad alias operationes exercendas, quæ sunt finis equi, oculus tunc est bonus, cum est aptus ad videndum; ideo virtus est, quæ reddit subiectum aptum ad finem. Quia rursus operatio subiecti tunc est bona, cum vel est finis, vel est apta ad finem, ideo virtus disponit subiectum ad faciendam operationem, quæ vel sit finis, eo pacto, quo lumen gloriæ disponit beatum ad visionem beatificam, quæ finis est hominis; vel conducat ad finem, eo pacto, quo ceteræ virtutes disponunt ad operationes, quæ conducunt ad finem felicitatis. In idem recidit altera definitio, quæ virtus dicitur, *dispositio perfecti ad optimū.*

Sensus enim est, quod virtus sit *dispositio habitualis*, hoc est permanens, & immobilis; *perfecti*, hoc est subiecti, quod per illam redditur perfectum, siue aptum ad finem; & quod sit *dispositio ad optimum*, hoc est ad operationem, quæ vel est finis, atque adeo optimum rei, vel conducit ad finem, siue optimum rei.

Hinc patet secundo optimam esse definitionē, qua virtus intellectualis definitur, *habitus, quo affirmando, aut negando, verum anima dicit*. Cum enim finis intellectus sit affirmando, vel negando verum dicere, eo ipso, quod habitus disponat ad dicendum verum, facit intellectum bonū, hoc est aptum ad finem, & opus eius bonum reddit, hoc est verum, adeoque est virtus intellectus. Vitium verò intellectus est *habitus, quo anima affirmando, vel negando dicit falsum*. Habitus mediū sunt, quibus aliquando dicit verum, aliquando falsum. Qui si plerumque dicunt verum, participant aliquid de ratione virtutis, ideoque sunt probabiles, & expetibiles intellectui, licet non attingant perfectionem virtutis, quæ consistit in hoc, ut per illam anima semper dicat verum, nunquam falsum.

Tertio dico optimam esse allatam diuisionem virtutis in quinque enumeratas

cum

cum possit reduci ad membra contradi-
ctoria . Velenim est virtus intellectus
speculatiui, vel practici: si speculatiui, vel
considerat solum veritates per se notas,
vel solum veritates per se non notas, vel
simul veritates per se notas, & per se non
notas, ordinans omnes omnino veritates;
si solum veritates per se notas, quæ vo-
cantur prima principia, est intellectus, siue
habitus principiorum, qui considerat etiã
singularia, vt per eorum inductionem in-
ferat prima principia vniuersalia; si solum
veritates per se non notas, sed inferibi-
les per syllogismum, est scientia; si simul
veritates per se notas, & per se non no-
tas, est sapientia, vt etiam melius explica-
bitur quæst. 16. 17. & 18. Si verò est vir-
tus practica, adeoque considerat veritates
practicas, vel considerat veritates practi-
cas dirigentes ad finem vltimum, vel ad
finem non vltimum, sed ad aliquod opus
particulare; si considerat conducentes ad
finem vltimum, est prudentia; si ad non
vltimum, est ars; ergo omnis virtus intel-
lectus vel est intellectus, vel scientia, vel
sapientia, vel prudentia, vel ars.

Ad 1. In Deo non datur virtus forma-
liter ac strictè, sed eminenter, & latè, ac
seclusis imperfectionibus. Virtus enim,
propriè, est perfectio supponens subiectũ
imperfectum. Cum enim sit habitus fa-

ciens habentem bonum, ac disponens ad operandum benè, supponit, quod subiectum per se ipsum non sit optimum, & perfectissimè determinatum ad optime operandum. Sed diuina essentia per se ipsam est optima & perfectissima, imò est omnis bonitas, & perfectio, & est determinatissima ad optime operandum; ergo est incapax virtutis. Possumus tamen definire virtutem, abstrahendo ab omni imperfectione ita, vt definitio competat Deo, dicentes, *virtus est, qua aliquid est bonum, & eius operatio est bona*: & quia Deus est optimus per diuinam essentiam, per quam etiam diuinæ operationes sunt optimæ; ideo Deus est omnis sua virtus. Virtus etiam intellectualis vt Deo competat definiri potest, *qua intellectus dicit verum*; & quia Deus per suam essentiam cognoscit omne verum, ideo essentia diuina est perfectissima virtus.

Ad 2. Virtus dicitur à *vi*, ideoque debet esse operatiua, ac proinde si daretur habitus non operatiuus, qui faceret subiectum bonum, qualem habitum putat S. Thomas esse gratiam sanctificantem, talis habitus non esset virtus. Virtus etiam eo ipso quod disponit subiectum ad operationem bonam disponit ad finem, adeoque conducit ad faciendum subiectum bonum, & aptum ad finem; nisi tamen
inue-

inveniat in subiecto aliquod impedimentum, in quo casu non facit subiectum bonum per accidens, cum tamen per se, impedimento secluso, conducat ad faciendum bonum, & ad meliorandum in ordine ad finem.

Ad 3. Virtus est habitus intellectus, quo verum anima dicit semper, & infallibiliter. Sicut enim virtus voluntatis numquam potest efficere actum malum, & peccaminosum, ita virtus intellectus numquam potest efficere actum falsum; ideoque opinio, & fides humana non sunt virtus, quia contingit, ut per ipsas erremus, ac falsum dicamus, ut Aristoteles docet.

Ad 4. In hac divisione intellectus sumitur pro habitu contemplante solas veritates per se notas; scientia est habitus contemplans solas veritates per se non notas; sapientia contemplatur veritates per se notas, & per se non notas, ideoque non continetur sub scientia, & sub intellectu tamquam species sub genere, sed potius continet eminenter & scientiam, & intellectum, ut colligitur ex Aristotelis doctrina.

Ad 5. Aristoteles enumerat solum virtutes naturales: fides autem diuina est quidem virtus intellectus, cum per illam dicamus verum infallibiliter, sed supernaturalis.

Ad 6. Fides humana, qua credimus aliquid propter testes faciētes euidentiā, reducitur ad scientiam à posteriori, qua ex effectu inferimus causam. Quia enim dari non potest hic effectus, vt tot testes dicant dari Constantinopolim, quin detur Constantinopolis; datur autem hic effectus; ideo credo dari Constantinopolim, nihil, aut parum quoad hoc curans de veracitate dicentium. Propria verò fides est, qua credimus præcipuè propter veracitatem dicentis; ideoque cum quis credit quod aliquis dicit dormiens, non credit per fidem, quia non credit propter eius veracitatem, sed quia hic effectus, *vt hic dicat*, videtur dari non posse quin res fuerit.

Vtrum intellectus sit habitus specialis colligens prima principia per inductionem singularium.

Quæstio XV I.

Videtur quod non, i. quia prima principia sunt per se nota; sed si colligerentur ex inductione singularium, non essent per se nota, sed innotescerent per discursum, quo à singularibus procederemus, ad vniuersalia; ergo prima principia non colliguntur per inductionem singularium.

Vel

2. Vel ex inductione singularium colliguntur principia nota ex terminis ante omnem experientiam, cuiusmodi sunt principia metaphysica, & mathematica, ex.gr. *omne totum est maius sua parte; si ab equalibus equalia demas, quæ remanent sunt equalia;* & hæc cum sint ex terminis nota, non indigent inductione; vel colliguntur solum principia nota per experientiam, qualia sunt physica, ut *omnis ignis est calidus,* & non apparet, quo pacto hæc colligantur per inductionem singularium; vel enim inducuntur omnia singularia, & hoc est impossibile, cum sint infinita; vel solum inducuntur aliqua, & ex aliquibus non potest euidenter inferri de omnibus; ex.gr. ex eo quod centum ignes, de quibus feci experientiam, sunt naturaliter calidi, quo pacto possum euidenter inferre, quod alii infiniti, de quibus experientiam non feci, sunt calidi. Quod enim aliqui dicunt illationem fieri hoc pacto: *hic ignis est calidus, hic est calidus, & sic de reliquis; ergo omnes sunt calidi,* non soluit difficultatem. Hoc enim ipsum quæritur, quo pacto ex eo, quod ignes, quos sum expertus, sunt calidi, euidenter inferam, quod alii infiniti, quos expertus non sum, sint calidi; ergo prima principia non possunt colligi ex inductione singularium.

3. Principia sunt plura, & diuersæ rationis,

tionis, cum alia sint physica, alia mathematica, alia metaphysica, alia logica; sed ad principia diuersę rationis non sufficit vnicus habitus; ergo dantur plures habitus principiorum.

4. Per eundem actum, per quem intellectus assentitur conclusioni per se non notę, assentitur etiam pręmissis, ac principiis per se notis, ex quibus conclusionem infert; sed intellectus per habitum scientię assentitur conclusioni per se non notę; ergo per eundem assentitur principiis, per se notis; ergo habitus scientię est habitus assentiendi principiis simul, & conclusionibus; ergo frustra ponitur specialis habitus intellectus assentiens solis principiis.

5. In assensu veritatum per se notarum, nulla est difficultas, cum per se ipsas moueant intellectum ad assensum; ergo non requiritur habitus principiorum.

Respondeo prima principia necessario colligi per inductionem singularium, vt ex professo docet, ac probat Aristoteles secundo post. tex. 101. & quinque sequentibus, concludens tex. 106. per hęc verba: *manifestum igitur est, quoniam nobis prima inductione cognoscere necessarium est: namque & sensus sic vniuersale facit.* Ratio, quam Aristoteles indicat, est. Non possumus formare apprehensionem vniuersalis, nisi

id abstrahamus ab apprehensione singularium; ex. gr. non possumus abstrahere apprehensionem propriam albedinis, nisi experti simus hanc, & illam albedinem singularem; ergo non possumus formare iudicium de veritate vniuersali, quin colligamus ex iudiciis de veritatibus singularibus; ex. gr. non possumus formare hoc iudicium, *omne totum &c.* quin colligamus ex iudiciis, quod hoc totum est maius; & hoc aliud est maius; sed prima principia sūt veritates vniuersales; definitur enim primū principium, *veritas vniuersalis, ac necessaria, quæ potest seipsam manifestare certo, & euidenter, absque eo quod inferatur per syllogismū ex notitijs aliarū veritatum*; ergo prima principia necessario colliguntur per inductionē singularem. Hinc sequitur, quod intellectus, siue habitus principiorū est habitus per inductionem singularem colligens prima principia, hoc est veritates vniuersales, & necessarias potentes se manifestare, absque eo quod inferantur per syllogismum. Sequitur rursus, quod talis habitus sit specialis, ac non idem cum habitu scientiæ. Cum enim est diuersa difficultas, poni debet diuersus habitus; sed est diuersa difficultas in colligendis principiis ex inductione singularium, ac sit in conclusionibus inferendis ex principiis vniuersalibus; ergo di-

uersus est habitus scientiæ inferens conclusiones, ac habitus intellectus colligens principia.

Quod verò magna sit difficultas in principiis colligendis, probatur primo à posteriori, quia paucissimi auctores sunt, qui inuenerint, ac statuerint prima principia artium, ac scientiarum, & hi censentur diuino plane ingenio fuisse: qui verò ex principiis inuentis conclusiones inferentes promouerint scientias, & artes, sunt plurimi, & censentur multo inferiores primis; ergo difficilius, ac diuinius est prima principia per inductionem inuenire, quam ex primis principiis conclusiones inferre; ac proinde habitus principiorum, utpote diuiniore, est distinctus ab habitu conclusionum. Secundo probatur, explicando quomodo se habeat intellectus in primis principiis colligendis: statim enim apparebit quāti laboris, ac ingenii negotium sit. Vt intellectus prima principia colligat, primo debet illa inquirere, & ut Aristoteles loquitur, venari per inductionem singularem, utendo quatuor luminibus, *sensus, imaginationis &c.* Secundo, debet principiis inuentis assentiri certo & euidenter. Dum inquit principia per inductionem, similis est cani venatico querenti feram. Sicut enim canis huc illuc discurrens, prout odorem percipit, secta-

señtatur feram; sic intellectus huc illuc discurrens per quendam motum cogitationis, prout ducitur, & regulatur à naturali sagacitate, quę est quasi odoratus mentis ad discernendum connexa ab inconnexis, señtatur prima principia. Dum verò primis principiis assentitur certo, & euidenter, similis est cani feram inuentam apprehendenti. Ad hanc principiorum venationem requiruntur duę perfectiones intellectus. Prima est celeritas cognitionis, qua citissimè discurrat per plura obiecta. Secūda est sagacitas, qua discernat connexa ab inconnexis, sine qua frustra laboraret venando principia per obiecta inconnexa, sicut canis non discernens odorem ferę frustra currit huc, & illuc. Duo porro sunt genera principiorum. Quędam nota sunt omnibus, & passim occurrunt: ex. gr. *omne totum est maius sua parte: quodlibet vel est, vel non est.* Alia principia non passim occurrunt, nec nota sunt omnibus, sed solis sapientibus. Ad discernendam connexionem prædicti cum subiecto requiritur magna perspicacia, & subtilior, atque accuratior inductio multorum, quę licet sint connexa, primo aspectu videntur inconnexa. Perfectio habitus principiorum consistit præsertim in venandis principiis secundi generis; sicut perfectio canis venatici consistit

sistit in venanda fera, cum odor est tenuis, & vix sentitur. Et sicut aliquando contingit, ut vbi vnus canis non percipit odorem feræ, alius canis odoratu perfectione præditus, percipiat; sic intellectus perspicacior, & habens perfectionem habitum principiorum percipit connexionem inter quosdam terminos, inter quos intellectus minus perspicax connexionem non percipit. Hinc oritur, ut Aristoteles, & S. Thomas dixerint quasdam propositiones esse euidenter, quæ tamen ab aliis negantur: fortasse quia Aristoteles, & S. Thomas utpote perspicacissimi, videbant connexionem inter terminos, quam alii non aduertunt ex defectu perspicaciæ. Cum igitur hoc negotium venandi principia sit adeo difficile, non est mirum, si requiratur specialis habitus principiorum.

Confirmatur ex diuisione principiorum: fiet enim manifestum, quod in quibusdam venandis sit magna difficultas. Diuiduntur primo ab Aristotele in principia communia, & propria. Communia sunt, quæ ita passim occurrunt, ut nota sint omnibus, ideoque indiscriminatim illis vtantur omnes scientiæ. Huiusmodi est illud: *omne totum* &c. Licet enim ex obiecto spectet ad metaphysicam, tamen est commune scientiarum propter rationem indicatam. Propria sunt, quæ
sunt

sunt applicata subiectis particularibus unius scientiæ, & cognoscibilia per speciale lumen ipsius, ideoque non omnibus nota, sed professoribus talis scientiæ. Talia multa sunt in geometria, arithmetica, physica &c. Principia scientiarum propria subdividuntur ab Aristotele in axiomata, seu dignitates, suppositiones, seu petitiones, & definitiones. Axioma, seu dignitas definitur ab Aristotele primo post. tex. 78. quod necesse est esse verum, & necesse est videri: ex. gr. si ab æqualibus æqualia demas, quæ remanent sunt æqualia, est axioma, quia non solum necesse est talem propositionem esse veram, sed etiam necesse est primo aspectu videri veram. Suppositio est propositio, quam necesse est esse veram, sed non necesse est primo aspectu videri veram omnibus, sed perspicacioribus post longiorem inductionem. Tales suppositiones solent etiam vocari postulata. Quia enim possunt tironibus videri falsa, postulatur, ut ipsas concedant; futurum enim, ut post aduertant eorum euidentiā: & de his præsertim verificatur: oportet addiscentem credere. Exemplum postulatorum sunt postulata mathematica, ex. gr. quo petunt sibi concedi quod a puncto ad punctum potest duci linea recta. Definitiones sunt, quibus explicatur essentia eorum, de quibus agitur in scientia, ex. gr. essentia circuli in geometria, essentia

naturæ in physica, quæ penetrantibus terminos sunt per se notæ. Licet autem definitiones non contineant affirmationem formaliter, continent tamen æquiuvalenter, ideoque possunt poni in syllogismo præmissæ, in quibus definitio prædicatur de definito, vel definitum de definitione. Hinc igitur apparet necessitas habitus principiorum. Nam in venandis definitionibus, ac discernendis prædicatis essentialibus magna requiritur perspicacia, ac multiplex inductio.

Ad 1. Etiam si prima principia innotescant per quendam discursum latè sumptum, quo intellectus à singularibus procedit ad vniuersalia, adhuc sunt veritates per se notæ, quia in hoc discursu intellectus non infert vnā veritatem ex alia, sed solum aduertit, quod prædicatum est connexum cum subiecto in singulari, & deinde procedit ad aduertendum, quod est connexum cum subiecto in vniuersali: exem. gr. prius aduertit, quod esse maius parte est prædicatum connexum cum hoc toto, deinde quod est connexum cum toto in quantum est totum, adeoque omne totum est maius parte.

Ad 2. Etiam principia nota ex terminis ante omnem experientiam colliguntur ex inductione, quæ requiritur, quia cum vniuersale sit multitudo singularium,

larium, non potest connexio cognosci de vniuersali, quin prius cognita fuerit de aliquo singulari, vt modo est dictum. Addo probabile esse, quod principia physica, in quibus connexio prædicati cum subiecto non innotescit ex terminis, colligantur per hunc syllogismum: *quoties aliquod prædicatum conuenit singulis conuenientibus in aliqua ratione, & non habemus indicium, quod conueniat solum per accidens, est per se connexum cum tali ratione, & conuenit omnibus, in quibus inuenitur talis ratio; sed esse calidum conuenit singulis ignibus, de quibus facta est experientia, & non est indicium, quod conueniat solum per accidens; ergo esse calidum est prædicatum per se connexum cum igne, adeoque omnis ignis est calidus; & sic pater, quo pacto ex eo, quod ignes, quos sum expertus, sint calidi, inferam omnes esse calidos. Principia igitur collecta per inductionem experimentalem non sunt simpliciter per se nota, cum inferantur per syllogismum; sed dicuntur per se nota, quia talis syllogismus fit ab omnibus tempore imperceptibili ductu naturæ: ex qua ratione plures aliæ veritates illatæ per syllogismum dicuntur prima principia per se nota.*

Ad 3. Sicut sunt plures scientiæ, sic plures habitus principiorum, ac singulis scientiis correspondet specialis habitus prin-

principiorum, colligens principia per lumen speciale illius scientiæ, & cum speciali difficultate: ex.gr.habitus principiorum deferuiens physici colligit principia physica per inductionem experimentalem cum speciali difficultate vtens lumine sensus; idemque dic de aliis scientiis proportionaliter ad dicta quæst. 5.

Ad 4. Habitus scientiæ assentitur principiis secunda vice, & assensu supponente alium assensum factum per habitum intellectus assentientem principiis, & præmissis secundum se; talis autem assensus supponens essentialiter alium assensum, nullam continet difficultatem, sed supponit totam difficultatem superatam per assensum priorem. At primus assensus, quo principiis assentimur, continet magnam difficultatem in penetranda connexionepredicati cum subiecto, & in venando primo principio, vt explicatum est; ergo ad primum assensum requiritur specialis habitus.

Ad 5. Licet assensus principiis communibus sit facillimus, tamen assensus pluribus principiis proprijs habet difficultatem, & multo maiorem difficultatem, habet eorum venatio per inductionem singularium, ideoque requiritur habitus specialis.

*Vtrum scientia sit habitus inferens
conclusiones ex principiis.*

Quaestio XV I I.

V Idetur quod non. i. quia in Deo datur scientia perfectissima; sed Deus cognoscit veritates non inferens illas ex principiis per syllogismum; ergo non requiritur ad scientiam, vt sit habitus inferens notitiam certam, & euidentem veritatum vniuersalium, & necessariarum per se non notarum ex primis principiis per syllogismum.

2. Scientia definienda est ex Aristotele 2. Post. tex. 5. *habitus cognoscens rem per causam, propter quam est, & quod illius causa est, & quod non contingit aliter se habere;* sed definitio allata non coincidit cum Aristotelica, nec est illius explicatio; ergo est mala.

3. Si scientia colligeret conclusiones ex principiis, haberet pro obiecto formali assensus ipsa principia, seu veritates per se notas. Sicut enim voluntas amat media non amabilia gratia sui propter finem amabilem gratia sui; sic intellectus assentitur veritatibus per se notis propter veritates per se notas; sed etiam habitus principiorum habet pro obiecto formali princi-

principia, seu veritates per se notas, cum illis assentiatur propter se; ergo habitus intellectus, & habitus scientiæ haberent idem obiectum formale; sed habitus habentes idem obiectum formale non distinguuntur; ergo habitus intellectus non distingueretur ab habitu scientiæ.

Respondeo scientiam, & intellectum in aliquo conuenire, & in aliquo differre, & vtrumque esse explicandum, vt ex conuenientia, ac differentia constituatur integra definitio scientiæ. Conueniunt in hoc, quod vterque habitus assentitur certo, & euidenter veritatibus vniuersalibus, ac necessarijs, in quibus nimirum prædicatū cōuenit subiecto vniuersaliter, ac necessario, atque ita, vt non possit non conuenire. Euidencia porro obiectiua causans certitudinem, & euidenciam in actu scientiæ, atque intellectus, est *apparentia obiecti sua vi trahens intellectum ad assensum sine vlla dubitatione*: exem. gr. mihi euidentis est quod nunc existo, quia hoc obiectum ita mihi apparet, vt trahat me ad assentiendū sine vlla dubitatione. Certitudo assensus est *ipsa firmitas, per quam assentimur obiecto sine vlla dubitatione propter præstantiam motiui*. In actibus naturalibus euidencia semper comitatur certitudinem, vt causa illius, ita vt tanta sit certitudo, quanta euidencia. At in fide diuina datur certitudo

tudo sine, euidencia, quia prima veritas habet hanc vim, vt etiam obscure propofita poffit mouere ad affenfum firmum, sine dubitatione.

Differunt scientia & intellectus in hoc, quod intellectus affentitur veritatibus per fe notis, scientia veritatibus per fe non notis. Est autem veritas per fe nota, *veritas habens vim manifestandi fe ipsam intellectui immediate, absque eo quod inferatur per illationem syllogisticam ex alia veritate*, ex. gr. hæc: *omne totum est maius sua parte*. Veritas per fe non nota est, *quæ non potest per fe ipsam immediate se manifestare, sed eius notitia certa, & euidens debet inferri ex alijs veritatibus per fe notis*: ex. gr. hæc veritas, *cuiuscumque trianguli tres anguli sunt æquales duobus rectis*, est veritas per fe non nota, quia non potest immediate mouere intellectum ad notitiam sui certam, & euidens, sed debet inferri per syllogismum ex alijs notitijs. Sunt autem veritates connexæ quadam serie. Quemadmodum enim datur quædam series causarum, secundum quam vna res causatur ab alia, & hæc ab alia vsque dum deueniatur ad primam causam incausatam: sic veritates sunt ita connexæ, vt vna inferatur ex alia, & hæc ex alia, vsque dum inueniatur prima veritas per fe nota, quæ est primum principium. Ex hac connexa,

nientia, ac differentia scientiae cum intellectu infertur integra definitio scientiae. Est enim *habitus colligens cognitionem certam, & evidentem veritatum uniuersalium, ac necessariorum, per se non notarum exprimis principijs per syllogismum*. Infertur rursus duplex esse munus scientiae, proportionaliter ad duplex munus intellectus. Sicut enim intellectus dum venatur principia, primo quaerit terminos connexos, deinde assentitur veritati propter connexionem terminorum; sic habitus scientiae dum venatur conclusiones, primo quaerit propositiones ita connexas, ut possit vna ex alijs inferri, quod est venari medium, terminum; deinde verò assentitur, inferendo per syllogismum. Et sicut intellectus in venatione principiorum inducit varios terminos, sic scientia in venatione conclusionum inducit varias propositiones: & sicut ad venationem principiorum requiritur praecipue sagacitas discernendi connexa ab inconnexis, & celeritas cogitationis, sic requiritur in venatione conclusionum. In hac autem venatione scientia procedere potest duplici via, ac methodo, compositiua nimirum, & resolutiua: quae ut explicentur, declarandum quid sit compositio, ac resolutio, de quibus saepe agunt auctores ex Aristotele.

Compositio est *progressus a principijs, ex*
quibus

quibus aliqua res constat, ac pendet, ad ipsam rem. Resolutio est regressus rei ad principia, ex quibus constat, ac pendet: ex. gr. compositio domus est progressus, per quem ex lapidibus, ac cémentis, ex quibus domus constat, progredimur ad domum. Resolutio domus est regressus, per quem ex domo regredimur ad lapides, & cémenta. In compositione progredimur à simplicioribus ad magis composita, quia causæ sunt simplices effectibus, quandoquidem effectus adduntur causis. In resolutione progreditur à magis compositis ad simpliciora ex eadem ratione. Præter compositionem, ac resolutionem realem, quæ ponitur in ipsa re, qualis est compositio, ac resolutio domus, datur compositio, ac resolutio rationis, quæ ponitur in ratione nostra: & hæc est duplex, speculatiua nimirum, & practica. Resolutio practica, seu consultatiua est, cum quis proposito fine progreditur ad querenda media, causas, & principia, quibus finem consequatur: ex. gr. cum proposito fine salutis æternæ, progreditur ad querenda media, quibus saluetur. Compositio practica est, per quam disponit ordinatim media ad finem consequendum, dicens ex. gr: ad consequendam salutem primo faciendum est hoc, deinde hoc aliud &c. quæ cum iam executioni mandantur, non est amplius compositio rationis, sed realis.

realis. Resolutio speculatiua est, cum proposita aliqua conclusione, progredimur ad principia, ex quibus inferitur. Compositio speculatiua est, per quam ex principijs progredimur ad conclusionem inferendam. Vniuersim autem compositio, ac resolutio procedunt ordine inuerso, ita vt quod est primum in compositione, sit vltimum in resolutione, & quod est primum in resolutione, sit vltimum in compositione. Ex. gr. cum ex conclusione progredimur ad principia via resolutiua, conclusio est primum, principia sunt vltima; cum ex principijs progredimur ad conclusionem via compositiua, principia sunt prima, conclusio est vltima, eo pacto, quo gradus scalæ, qui est primus in ascensu, est vltimus in descensu, & è conuerso.

Iam scientiæ in venatione conclusionū procedunt vtraque via. Aliquando enim proposita certa conclusione, quærunt propositiones cum illa connexas, ex quibus possit inferri, procedendo vsque ad prima principia: aliquando propositis principis, quærant cum quibus aliis propositionibus connectantur, ita vt possint ex ipsis inferri. Regulariter tamen quærentes procedunt via resolutiua; inuentis verò propositionibus connexis cum conclusione vsque ad prima principia, procedunt ab assensu principiorum ad assensum conclusionis.

clutionis via compositiua.

Diuiditur scientia in perfectam, & imperfectam. Perfecta, seu à priori est cognitio certa, & euidens veritatis uniuersalis, ac necessaria. per se non nota, per causam, propter quam est, & propter quam aliter se habere non potest. Talis autem scientia est perfecta, quia per illam obiectum ponitur in mente, sicut est à parte rei, vt dictum est quæst. 1. Imperfecta, & à posteriori est, qua cognoscimus certo, & euidenter veritatem per se non notam, non per causam, sed per effectum, vel per aliud quomodolibet connexum cum tali veritate. Est autem imperfecta, quia per illam obiectum ponitur in mente aliter, ac est à parte rei, vt dictum est eadē quæst. 1.

Ex definitione, ac diuisione scientiæ inferitur definitio demonstrationis, & eius diuisio in demonstrationem perfectam, siue à priori, & imperfectam, siue à posteriori. Demonstratio definitur ab Aristotele primo post. tex: 8. syllogismus pariens scientiam conclusionis. Demonstratio perfecta, & à priori est syllogismus pariens scientiam perfectam, & d priori. Demonstratio imperfecta est syllogismus pariens scientiam perfectam, & a posteriori. Conditiones autem quæ requiruntur ad demonstrationem causantem scientiā perfectam, explicantur ab Aristotele 1. post. tex. 9. sic per illas demonstrationem perfectam de-

Q

fini-

finiente. Demonstratio est syllogismus constans ex præmissis certis, & evidentibus, primis, immediatis, seu per se notis, notioribus, & prioribus, & causis conclusionis. Præmissæ debent esse certæ, & evidentes, quia conclusio certa, & evidens, qualis debet esse scientifica, non potest inferri nisi ex præmissis certis, & evidentibus. Debent esse primæ, & immediatæ, & per se notæ, quia conclusio utpote veritas scibilis, adeoque per se non nota, debet innotescere per veritates per se notas. Debent esse priores, & notiores, quia id, quod est ratio, cur innotescat aliud, magis, ac prius innotescit, quam illud. Demum debent esse causæ conclusionis, quia scientia perfecta est cognitio per causam; sed est cognitio conclusionis per præmissas; ergo præmissæ debent esse causæ conclusionis, ita ut veritas affirmata in præmissis sit causa, & ratio veritatis affirmatæ in conclusione.

Demonstratio imperfecta habet ceteras conditiones perfectæ, sed habet præmissas, quæ non continent causam conclusionis, ideoque causat scientiam imperfectam, & non per causam.

Ad 1. Hoc loco definimus solam scientiam discursivam, quæ non datur in Deo. Scientia verò latè sumpta abstrahens ab imperfectione discursus, quæ sola datur in Deo, definita fuit quæst. 1. dicendo; quod

quod est cognitio certa , & evidens rei : propter rationem , propter quam est .

Ad 2. Aristoteles loco citato 1. post. definit solum scientiam perfectam , quæ addit supra scientiam ut sic definitam à nobis , quod cognoscat veritatem necessariam per causam , propter quā est , & aliter se habere non potest , ut modo est dictū .

Ad 3. Habitus intellectus , cum assentitur primis principijs , habet pro obiecto formali connexionem terminorum . Ideo enim assentitur , quia videt connexionem prædicati cum subiecto . At habitus scientiæ dum assentitur conclusioni propter principia , habet pro obiecto formali connexionem principiorum cum conclusione . Ideo enim assentitur conclusioni , quia videt veritatem conclusionis esse connexam cum veritate principiorum ; ergo intellectus , & scientia habent obiectum diuersum .

*Vtrum sapientia sit habitus specialis,
ac benè definiatur . Quæ-
stio X V I I I .*

V Idetur , quod sapientia non sit habitus specialis cognoscens certò , & evidenter res præstantissimas per altissimas causas , & ordinatius veritatum in intel-

lectu, prout sunt ordinate à parte rei 1.
quia contemplatio rerum præstantissimarum per altissimas causas spectat ad metaphysicam, quippe quæ considerat Deum, & Angelos, quibus nihil est præstātius, & altius; ergo sapientia non est habitus specialis. Et confirmatur, quia Aristoteles 1. metaphys. videtur docere, quod sapientia sit metaphysica; sed metaphysica est una ex scientiis; ergo sapientia non est habitus specialis contradistinctus à scientia.

2. Ex Aristotele 7 eth. cap. 7. sapientia est intellectus, ac scientia, & quasi caput habens scientia rerum præstantissimarum, ergo ex Aristotele sapientia est aggregatum ex habitu intellectus, ac scientiæ; sed hoc aggregatum non est habitus specialis contradistinctus ab intellectu, ac scientia; ergo sapientia non est habitus specialis contradistinctus ab intellectu, ac scientia.

3. Quatuor facultates speculatiuæ cum habitu principiorum ipsis correspondente contemplantur omnes veritates speculabiles; ergo præter illas, & habitum principiorum non potest dari alia facultas speculatiua, nisi fortasse subalternata; sed sapientia non est facultas subalternata; ergo non datur sapientia, quæ sit habitus specialis.

Respondeo, quod ultra scientias partu-

ticu-

culares, & habitus principiorum ipsis correspondentes, quæ contemplantur veritates particulares ad ipsas spectantes, & non alias, dari debet aliqua facultas vniuersalis, & suprema supponens omnes scientias, & in ipsis fundata, quæ contempletur omnes omninò veritates, & ordinet illas in mente, prout sunt ordinatæ à parte rei; sed hæc facultas est sapientia; ergo debet dari sapientia, quæ sit habitus specialis. Quod verò dari debeat facultas hæc vniuersalis, & suprema, probatur primo, quia omnes veritates sunt ita connexæ, & ordinatæ arcanis quibusdam nodis, sicut annuli connectuntur in catena. Sicut enim vnus annulus est connexus cum alio, & hic cum alio vsque dum perueniatur ad primum annulum, ad quem omnes consequuntur, ita ratio vnius veritatis est alia veritas, & huius alia veritas, vsque dum perueniatur ad primam veritatem, quæ est ratio, & veluti caput omnium aliarum veritatum. Sed istum ordinem, quo connectuntur omnes omnino veritates non contemplatur vlla scientia particularis, vtpote restricta ad specialem materiam; ergo debet dari aliqua facultas vniuersalis, ac suprema, contemplatiua omnium omninò veritatum vt inuicem connexarum, atque ordinatarum. Secundo omnes veritates sunt ita

connexę, vt faciant mirabilem quamdam consonantiam, atque ex ipsis resultet collectio digna speciali contemplatione, eo pacto, quo harmonia resultans in musica ex pluribus vocibus consonantibus est digna speciali contemplatione; sed collectionem omnium veritatum physicarum, mathematicarum, metaphysicarum, & logicarum, in quantum faciunt mirabilem quamdam consonantiam nulla scientia particularis contemplatur; non enim physica, utpote restricta ad veritates naturales; non mathematica ex eadem ratione &c; ergo dari debet alia facultas vniuersalis, & suprema contemplatiua talis collectionis. Tertio debet dari aliqua facultas, quę contempletur ipsum optimum, hoc est Deum, quærens de ipso cognitionem perfectissimam, quam possimus naturaliter habere; sed cognitio perfectissima de Deo nequit obtineri per ullam scientiam particularem; ergo præter scientias particulares dari debet facultas aliqua vniuersalis. Minor probatur: nam natura optimi consistit in hoc, vt habeat in se vnitas, & identificatas omnes perfectiones; ergo vt cognoscamus illud perfecte in quantum possumus, debemus cognoscere omnes perfectiones creaturarum, vt ex eis ascendamus ad easdem seclusis imperfectionibus considerandas in optimo; sed nulla scientia

tia particularis considerat omnes perfectiones creaturarum; ergo nulla scientia particularis potest optimum perfectè cognoscere. Confirmatur, quia ut Deus perfectè cognoscatur, cognosci debet per omnia entia, & per omnes veritates creatas; cum omnia entia sicut habent aliquā specialem perfectionem, ita sint manifestatiua alicuius specialis perfectionis diuinæ, & eandem vim habeant omnes veritates etiam mathematicæ de circulis, de quadratis &c. utpote profluentes à Deo, tanquam à prima veritate, eo pacto, quo rotunditas circuli ex.gr. exprimit diuinā infinitatem; sed nulla scientia particularis cognoscit Deum per omnia entia, & per omnes veritates; ergo præter scientias particulares dari debet aliqua facultas vniuersalis.

Hinc verò sequitur, quod hæc facultas vniuersalis supponit omnes scientias, & in iis fundatur. Non enim posset contemplari veritates physicas, nisi iam per physicam superasset specialem difficultatem, in iis contemplandis; & ex eadem ratione supponit mathematicam, metaphysicā & logicā. Superatis igitur difficultatibus, quæ inueniuntur in contemplandis specialibus obiectis scientiarum, sapientiæ munus est primo contemplari connexionē, quæ datur inter omnes omnino veritates,

etiamsi aliquę primo aspectu videantur omnino disparate: secundo querere primam veritatem, quę est radix, ac caput omnium aliarum. Explicat autem Aristoteles 1. Metaph. cap. 2. quę sit hęc veritas, dicens, *hoc autem est bonum cuiusque, & universaliter, quod in omni natura optimum est.* Nam omnes veritates necessariae ita sunt ordinatę, sicut optimum, & pulcherrimum est ordinari, atque adeo ipsum optimum, & pulcherrimum est prima radix omnium veritatum. Tertio conatur per omnes veritates cognoscere ipsum optimum, ac perfectissimum, hoc est Deum. Quarto per ipsum optimum, tamquam per caput, & primam radicem, conatur reddere rationem omnium aliarum veritatum, & sic veritates prestantissimas contemplatur per ipsum optimum, tamquam per altissimam causam. Quinto demum ordinat veritates in intellectu, sicut sunt ordinatę à parte rei. Cum enim perfectio cognitionis consistat in eo, ut res ponantur in intellectu, sicut sunt à parte rei, sapientia, quęrens cognitionem perfectissimam, conatur ponere talem ordinem in cognitionibus, qualis est in rebus, ita ut sicut una veritas est ratio alterius, sic cognitio unius veritatis sit ratio cognoscendi alteram.

Hinc patet primo, quod sapientia sic habi-

habitus specialis. In contemplatione enim ordinatiua omnium veritatum est specialis difficultas requirens intellectum planè comprehensuum. Secundo patet, quod sapientie conueniat definitio allata, & quod sit habitus cognoscens &c. Tertio, patet quod de sapientia verificantur quæ de ipsa dicuntur ab Aristotele tum 1. Metaph. tum 6. eth. Primo metaph. capit. 2. ait: *opinamur sapientem maxime omnia ut possibile est scire: & cap. 1. sapientiam circa primas causas, & principia omnes arbitrantur versari: & addit: sapientiam esse ordinatiuam, ac munus sapientis esse ordinare. 6. Eth. dicit: sapientem non solum circa ea, quæ ex principiis sunt dicere oportet, sed etiam circa principia ipsa verum dicere oportet. Quare sapientia erit intellectus, ac scientia, ac veluti caput habens scientia. Sed sapientia prout à nobis definita, vtpotè facultas vniuersalis, contemplatur omnes omnino veritates per optimum, hoc est per altissimam causam, & ordinat veritates in intellectu, prout sunt ordinatæ à parte rei; ergo de sapientia à nobis explicata verificantur omnia, quæ dicuntur ab Aristotele. Quarto patet, quod naturalis felicitas consisteret in contemplatione Dei procedente ab habitu sapientie. Talis enim contemplatio esset operatio præstantissima, præstantissimæ potentie,*

de præstantissimo obiecto, ac proinde maximè secundum naturam hominis, ac delectabilissima, & vltimus eius finis. Verum ad hoc, vt homo esset aptus ad hanc contemplationem, debèret etiam secundum voluntatem esse optimè dispositus ad amorem optimi, & aliorum bonorum honestorum per habitus omnium virtutum. Qui enim est malè dispositus ad bonum non potest rectè iudicare de illo, ideoque ad sapientiam perfectam præter scientias requiruntur etiam omnes virtutes morales. Quinto demum infertur, quod hæc sapientia naturalis absolutè est imperfecta, quia cum cognoscat Deum per creaturas, & causam per effectum, cognoscit modo inuerso, ideoque si daretur, non omnino satiaret, ac felicitaret. Idcirco Deus eleuauit homines ad visionem beatificam, quæ est perfecta sapientia, quia Deum, qui est à se, cognoscit per se; creaturas, quæ sunt à Deo, cognoscit per Deum.

Ad 1. Licet metaphysica contempletur præstantissimas veritates per altissimas causas, tamen non est sapientia simpliciter, quia non est ordinatiua omnium veritatum, & non contemplatur primam veritatem contemplatione perfectissima per omnes veritates. Est tamen metaphysica valde affinis sapientiæ. Ideo Aristoteles 1. metaph. videtur docere, quod sit sa-

prien-

piencia secundum quid . Ceterum quod sapientiam simpliciter distinguat à metaphysica patet . Nam 6. Eth. agens ex professo de virtutibus intellectus , ponit sapientiam , tamquam habitum perfectionem scientia , & tamen metaphysicam recenset inter scientias .

Ad 2. Sapientia non est intellectus , & scientia formaliter , sed eminenter . Nam intellectus considerat solas veritates per se notas ; scientia solas per se non notas ; sapientia considerat omnes , illas ordinando inter se . Requiritur autem habitus contemplans omnes veritates coniunctim ex rationibus allatis . Non est igitur sapientia merum aggregatum intellectus , ac scientiæ , sed est vnicus habitus superior .

Ad 3. Scientiæ speculatiuæ contemplatur omnes veritates absolutas speculabiles seorsim : at nulla contemplatur omnes coniunctim , & earum ordinem ; ideo præter scientias debet dari sapientia , quæ est facultas vniuersalis .

*Vtrum prudentia differat ab arte ,
& à scientia morali . Qua-
estio X I X.*

Primo videtur , quod prudentia non differat ab arte . Facultas enim ; quæ

est ars non contradistinguitur ab arte; sed prudentia est ars quædam benè viuendi, ac consequendi vltimum finem; ergo non contradistinguitur ab arte, ac proinde malè ponitur in diuisione virtutis tamquā membrū contradistinctū ab arte.

2. Si prudētia differret ab arte, differret hoc, quod prudentia versaretur circa actiones, & circa agibilia, ars circa factiones, & circa factibilia; sed etiam artes actiuæ versantur circa actiones, & circa agibilia; ergo non satis explicatur differentia prudentiæ ab arte.

3. Videtur, quod prudentia non distinguitur à facultate morali. Facultates enim practicæ distinguuntur ex eo, quod intendunt diuersū finem, & opus ipsarū sit diuersū; sed idē est finis, atque opus moralis, ac prudentiæ: intendūt enim pro fine felicitatem, & ad illam hominem conducunt; ergo prudentia nō distinguitur à morali.

Respondeo facultates practicas distinguī per diuersitatem finium, quos intendunt, eo pacto, quo statuaria, & pictoria distinguūtur, quia statuaria habet pro fine statuam, pictoria picturam. Et quia prima diuisio finium est in finē vltimum, ad quē omnia ordinantur, ipse verò non ordinatur ad vltiorem finem, & finem non vltimum: ideo prima diuisio facultatis practicæ est in prudentiam, quæ intendit finem

nem vltimum hominis, hoc est felicitatem; & artē, quę intendit fines particulares, & non vltimos. Ex diuersis finibus prudentię, & artis colligitur diuersa vtriusque definitio. Prudentia enim definitur ex Aristotele 6. eth. cap. 5. *habitus cum vera ratione actiuus circa ea, quę bona, vel mala homini sunt*, in ordine ad finem vltimum. Ars definitur: *habitus cum vera ratione effectiuus circa ea, quę conducunt ad fines particulares*. Sensus est: prudentia, est habitus, quo verum anima dicens circa actiones, in quantum conducunt ad finem vltimum, vel ab illo retrahunt, disponitur ad operandum benē, hoc est aptē ad ipsum vltimum finem, qui est felicitas. Ars est habitus, quo verum anima dicens circa operationes, in quantum conducunt ad fines particulares, disponitur ad operandum aptē ad tales fines: ex. gr. disponitur ad operandū aptē ad faciendam statuum, ad obtinendam victoriam &c. Progreditur prudentia ad suum finem per tres actus præcipuos. Primus est consultare de agendis; secundus iudicare; tertius præcipere. Est autem præceptum iudicium, vltimo practicum, quo statuitur quid hic, & nunc sit optimum factu in ordine ad finem vltimum, quid teneat secundum locum, quid tertium &c. Et quia omnes alii actus ordinantur ad hoc præceptum, seu

seu iudicium vltimo practicum, ideo prudentia principaliter consistit in habitu præceptiuo, addit verò tanquam partes minus principales eubuliam, hoc est consultatiuam, & synesim, ac gnomen, quæ rectè iudicant, vt ex Aristotele docet Sanctus Thomas 1.2. quæst. 57. art. 6. in corpore. In artibus etiam dantur tres habitus proportionales; consultatiuus de opere, iudicatiuus, ac præceptiuus, qui est principalis, & ad quem ceteri ordinantur.

Ex diuersa essentia prudentiæ, & artis deducit Aristoteles quasdam earum proprietates diuersas. Primo proprium prudentiæ est, vt non possit esse perfecta in homine malo: è conuerso proprium est artis, vt possit esse perfecta etiam in homine malo. Homo enim quamuis vitiosus potest esse perfectus poeta, vel musicus, ita vt perfectè iudicet de iis, quæ sunt facienda in ordine ad finem poeticæ, aut musicæ. At non potest esse perfectè prudens, ita vt bene iudicet de iis, quæ sunt facienda in ordine ad finem vltimum. Ratio est; quia vitia corrumpunt iudiciũ prudentiæ, vnde scriptum est; *obscuratum est insipiens cor eorum, & vt videntes non videant*. Sicut enim qui habet palatum, & stomachum malè affectum, non benè iudicat de saporibus, ac cibis, sic qui habet voluntatem malè dispositam circa bona, non

non rectè iudicat de bonis : Idcirco quamuis homines vitiosi cognoscant mala non esse facienda, cognoscunt id cognitione, quæ sufficit ad obligandum, non sufficit ad inclinandam voluntatem ad obediendum obligationi, cum iudicium prudentiæ debeat esse inclinatiuum. Præcipuè tamen prudentiam corrumpunt vitia intemperantiæ versantis circa delectationes gustus, & tactus, ideoque nomen græcum temperantiæ idem significat ac *conseruans prudentiam*, vt Aristoteles aduertit. E conuerso vitia non corrumpunt iudicium artis. Quamuis enim homo sit vitiosissimus, tamen optimè iudicabit de his, quæ spectant ad faciendam statuam, aut poemam. Secundo proprium prudentiæ est, quod vt quis habeat prudentiam perfectam, per quam rectè iudicet de omnibus agendis, debet habere voluntatem optimè dispositam per omnes virtutes morales : & quantum crescunt virtutes morales, tantum crescit prudentia, quantum ipsæ minuantur, tantum prudentia minuitur, nec deperditur obliuione, sed malè agendo vna cum virtutibus moralibus. E conuerso artes vt sint perfectæ, non requirunt in homine virtutes morales, nec secundum earum proportionem crescunt, aut decrescunt, & obliuione deperduntur. Tertio proprium prudentiæ,

tia, est, vt qui contra prudentiam peccat sponte, peior fit, quam qui peccat per ignorantiam: è conuerso in artibus peior est qui peccat per ignorantiam, quam qui sponte; ex. gr. si aliquis reprehendatur, quod peccauerit contra grammaticam, faciendo solæcismum, & se excuset, dicens *sponte feci*, affert idoneam excusationem; si verò se excuset dicens *ignorabam*, affert excusationem plane ineptam. E conuerso cum quis reprehenditur, quod peccauerit contra prudentiam, si dicat, *sponte peccaui*, affert excusationem ineptam, & vt afferat excusationem idoneam debet dicere, *peccaui per ignorantiam vel vix sponte propter vehementiam passionis*.

Explicato discrimine prudentiam inter, & artem, explicandum est discrimen inter prudentiam, & scientiam moralem. Dico, quod prudentia differt à morali, sicut in artibus experientia, quæ dicitur practica, à theorica, quæ absolutè vocatur ars. Ex doctrina Aristotelis 1. Metap. cap. 1. experientia, seu practica est *habitus*, quo aliquis ex memoria plurium, quæ acciderunt in similibus circumstantiis, regulatur ad discernendum quid sit faciendum hic, & nunc. Theorica, seu ars est *habitus*, quo aliquis ex eo, quod sciat vniuersaliter quid sit agendum in aliquibus circumstantiis, regulatur ad determinandum, quid sit faciendum hic, & nunc.

nunc. Ex. gr. potest aliquis curare ægrotum ex arte sine experientia, vel ex experientia sine arte. Curabit ex arte sine experientia, cum ex eo, quod per medicinam sciat, quid profit tali morbo, regulatur ad decernendum, quo pacto curari debeat hic ægrotus, licet nunquam, vel raro fecerit experientiam. Curabit per experientiam sine arte, si licet medicinam nesciat, diu tamen curam gesserit ægrotorum, & ex memoria eorum, quæ profuerunt similiter egrotantibus, regulatur ad decernendum, quo pacto sit curandus hic ægrotus. Ad agendum autem melior est practica, quam theórica, vt Aristoteles aduertit, quia practica versatur circa singularia, theórica circa vniuersalia; actiones autem sunt circa singularia, exem. gr. curatur hic ægrotus.

Proportionaliter prudentia est *habitus*, quo quis ex memoria eorum, quæ bene gessit in similibus *circumstantiis*, regulatur ad decernendum, quid sit agendum hic, & nunc. Scientia moralis est *habitus*, quo ex eo, quod aliquis sciat vniuersaliter, quid sit agendum in aliquibus *circumstantiis*, regulatur ad decernendum, quid sit agendum hic, & nunc. Ad operandum magis conducit prudentia, quam scientia moralis, vt patet experientia. Nam experti melius gubernant se ipsos, & rempublicam, quam habentes scien-

scientiam moralem sine experientia, & prudentia. At ad sciendum magis confert scientia, quippe quæ est de vniuersalibus, & per causam, vt aduertit Aristoteles eodem capite. Præterea prudentia in moralibus, & experientia in artibus non possunt addisci disciplina, sed assuetudine operandi: at ars, & scientia moralis addisci possunt disciplina, per quam traduntur ab aliis. Sicut tamen illi sunt omnium aptissimi ad opera artium, qui non solum habent experientiam, sed etiam theoricā & artem: sic illi sunt aptissimi ad opera prudentiæ, qui non solum habent prudentiam, sed etiam scientiam moralem.

Ad 1. Prudentia propriè non est ars, licet aliquando vocetur ars benè viuendi propter proportionem, quæ intercedit inter prudentiam, & artem: sicut è conuerso quædam artes, ex gr. militaris vocantur prudentiæ, & dicitur aliquis habere prudentiam militarem.

Ad 2. Actio & effectio diuerso modo sumuntur, in quantum distinguunt prudentiam ab arte, ac in quantum distinguunt artes actiuas à factiuis. In quantum enim distinguunt artes actiuas à factiuis, actio est operatio immanens in operante, ex gr. saltatio, visio, intellectio: factio est operatio transiens in externam materiam, ex gr. edificatio. In quantum
verò

verò distinguunt prudentiam ab arte, actio est operatio humana, seu immanens, seu transiens, in quantum conducit ad vltimum finem: factio est operatio humana in quantum conducit ad fines particulares. Circa easdem igitur operationes humanas versatur prudentia, & ars. Ex. gr. circa operationem transeuntem pingendi versatur prudentia, præscribens quo pacto sit exercenda in ordine ad vltimum finem, ac dicens quod non sunt pingendæ imagines turpes, non ex fine malo &c; & circa eandem versatur ars pictoria præscribens quo pacto sit exercenda, vt resultet pulchra pictura. Illa eadem operatio, in quantum regulatur à prudentia, dicitur actio, in quantum regulatur ab arte, vocatur effectio. Si verò aliquis exequatur præcepta artis, transgrediens præcepta prudentiæ, ac peccans, benè pingit, sed malè agit, est bonus pictor, sed malus homo.

Ad tertium. Theorica, & practica habituum non differunt ex fine, sed ex eo, quod theorica regulatur ad operandum à cognitione vniuersali, practica à memoria singularium, vt dictum est. Cum igitur prudentia, & scientia moralis differât, sicut theorica, & practica, differre non debent ex fine.

*Vtrum prudentia sit vna, & architectonica,
seu princeps artium.*

Quaestio X X.

Videtur primo quod prudentia non sit vnica, sed plures. Dantur enim plures artes; ergo plures prudentiæ.

2. Datur prudentia monastica, qua homo dirigitur ad felicitatem propriam; prudentia oeconomica, qua dirigitur ad felicitatem familiæ; prudentia ciuilis, seu politica, qua dirigitur ad felicitatem ciuitatis, aut regni; sed istæ sunt plures prudentiæ; ergo dantur plures prudentiæ.

3. Videtur quod prudentia non sit architectonica, seu princeps artium. Aliquæ enim artes sunt malæ, & illicitæ, vt magia; sed artes illicitæ non subduntur prudentiæ; ergo prudentia non est princeps omnium artium.

Respondeo, quod licet artes sint plures, prudentia est vnica, & absolutè architectonica, ac princeps omnium artium. Ratio est, quia prudentia intendit vltimū finem, artes intendunt fines non vltimos; sed finis vltimus est vnicus, fines non vltimi sunt plures, ac penè innumerabiles; ergo prudentia debet esse vnica, artes debent

bent esse plurimę, ac penę innumerabiles; sed omnes fines particulares, & non vltimi debent vltimo referri ad felicitatem, quę est vltimus finis; ergo omnes artes debent subordinari prudentię, ac morali, ad quas spectat singulas artes, earum opera, ac fines ordinare, ac dirigere ad humanam felicitatem, adeoque prudentia pro vt complectitur etiam scientiam moralem est absolutę princeps, & architectonica omnium artium, vt docet Aristoteles ex professo 1. eth. Est enim regula vniuersalis, quod facultas, quę intendit finem principaliorem, & ad illum ordinat finem alterius artis, est architectonica respectu illius, eo pacto, quo architectus domus dicitur ex eo quod præcipit manualibus, & eorum opera ordinat ad finem faciendi domum. Iam homo est animal non solitarium, sed naturaliter sociale: cuius ratio est, quia naturaliter non sufficit sibi ad viuendum; & benę viuendum, sed indiget societate, & consortio aliorum; ergo naturaliter viuere debet in aliqua societate, ac multitudine hominum, cuius sit pars. Duplex autem est societas, qua homo indiget, familiaris, seu domestica, & ciuilis. Indiget societate domestica, quia non potest nasci, & educari nisi in aliqua domo, & familia, ita vt a parentibus accipiat generationem; nutrimentum,

mentum, institutionem &c. & à ceteris partibus familiae plura auxilia. Indiget ulterius societate civili, quia in vnica familia non datur perfecta sufficientia ad benè viuendum, cum desint multae artes necessariae ad vitam corporalem, & secundum virtutem; ergo naturaliter debet esse pars alicuius ciuitatis, seu multitudinis sibi sufficientis ad benè viuendum quoad vitam corporalem per artes, & opificia, & quoad moralia per leges, & magistratus.

Quia igitur homo naturaliter est pars alicuius domus, & alicuius ciuitatis, hinc est vt habeat pro vltimo fine non solum felicitatem propriam, sed etiam felicitatē familiae, aut ciuitatis, cuius est pars; sed prudentia est habitus consultans de vltimo fine hominis; ergo consultat non solum de felicitate propria vniuscuiusque, sed etiam de felicitate totius familiae, ac totius ciuitatis, aut regni, cuius est pars. In quantum consultat, ac praecipit de felicitate propria vniuscuiusque vocatur prudentia monastica, seu solitaria, quae debet dari equè principaliter in omnibus, ac singulis. In quantum consultat de felicitate familiae vocatur prudentia oeconomica, seu familiaris, quae debet principaliter residere in patre familias, in aliis minus principaliter. In quantum consultat
de

de felicitate totius regni, vel ciuitatis, vocatur prudentia politica, seu ciuilis, quæ principaliter debet residere in principe supremo . Si consultat de felicitate naturali, est naturalis; si de supernaturali est prudentia politica supernaturalis, quæ debet principaliter residere in Romano Pontifice, qui est supremus princeps in ordine ad finem supernaturalem felicitatis eternæ .

Ad 1. Iam dictum est quod artes sunt plures quia sunt plures fines non vltimi; prudentia est vnica, quia finis vltimus est vnicus ,

Ad 2. Quia homo naturaliter est animal non solitarium, sed domesticum, & ciuile, finis vltimus ipsius est felicitas propria, nō solitariè accepta, sed prout coniuncta cum felicitate familiæ, ac ciuitatis, ideoque prudentia politica, œconomica, & monastica, sunt vna prudentia, cum non possit homo intendere felicitatem propriam, præscindendo à domestica, & ciuili: eo enim ipso peccaret, quia non ageret vt animal sociale. Eadē igitur prudentia secundum diuersas rationes, sortitur diuersas appellationes monasticæ, politicæ, & œconomicæ. Dum additur, quod datur prudentia iuris, & prudentia militaris, dico, quod tunc nomen prudentiæ sumitur latè, prout significat scientiam iuris,

ac legum, & artem militarem, quæ propriè non sunt prudentia.

Ad 3. Artes illicitæ subduntur prudentiæ, in quantum ad prudentiam spectat eas vetare ut cōtrarias vltimo fini, hoc est humanæ felicitati.

*Vtrum artes benè diuidantur in acti-
uas, & factiuas: rationales,
& non rationales.*

Quæstio XXI.

Videtur quod non. Omnes enim artes sunt rationales, cum sint in ratione tanquam in subiecto, & earum actus sint actus rationis; ergo [malè diuiduntur in rationales, & non rationales.

Respondeo, quod cum operationes humanæ alię sint immanentes, quæ nimirum remanent in operante, aliæ transeuntes, quæ non remanent in operante, sed transeunt in externam materiam, debuerunt institui variæ artes, aliæ actiuæ, quæ ordinant operationes immanentes, aliæ factiuæ, quæ ordinant transeuntes. Et quia inter operationes immanentes præcipuè sunt actus rationis, & eorum signa, ideo inter artes actiuas præcipuæ sunt rationales, quæ ordinant actus rationis, & eorum signa.

Prima

Prima ars rationalis est logica, quæ habet pro fine, vt actus rationis conformentur rebus, ideoque considerat res vt materiam, actus rationis vt formam. Secunda est grammatica, quæ habet pro fine, vt quæ cognoscimus possimus congruè per voces exprimere, ideoque versatur circa actus rationis, & eorum signa, tradens præcepta congruæ locutionis. Tertia est rhetorica, quæ habet pro fine, vt inueniantur rationes aptæ ad persuadendum, & explicentur oratione, atque actione ad eum finem accommodata. Quarta est poetica, quæ habet pro fine, vt inueniantur, ac fingantur actiones mirabiles similes veris, & ipsarum imitatiuæ, & explicentur oratione metrica, & apta ad delectandum, præsertim per admirationem. Quare poetica disponit animum ad philosophiã. Vt enim ait Aristoteles 1. Metaph. cap. 2. incipiunt omnes ab admiratione an sic se habeat, sicut de præstigijs, quæ per se ipsa mouentur. Quare dum poetica excitat admirationem, paulatim disponit animum ad quærendas causas, quod est philosophari; ideoque primi philosophi fuerunt poætæ, vt Aristoteles aduertit, addens, quod philosophus amator fabularum quodammodo est. Inuentis autem causis, acquiritur scientia rerum admirabilium, & sic cessat admiratio; ideoque addit

Aristoteles, quod qui scientiam habet rerum nil magis admiraretur, quam si accideret contrarium eorum, quæ vulgus miratur; ex.gr. qui habet scientiam eclipsis, non miratur, quod suis temporibus sol, & luna eclipsentur, sed summè miraretur, si non eclipsarentur. Possunt etiam artibus rationalibus adnumerari arithmetica, ac geometria practica. Nam arithmetica, ordinat actus rationis in ordine ad computandum, tradens regulas, quibus facile deprehendamus numeros resultantes ex additione, subtractione, multiplicatione, & diuisione numerorum. Geometria practica ordinat actus rationis in ordine ad deprehendendam rerum mensuram, tradens regulas, quibus per mensurationem deprehendamus magnitudines, & figuras corporum, ac locorum. Licet enim in mensurando utamur quibusdam instrumentis exterioribus, tamen præcipuū artificium consistit in ordinandis actibus rationis, ita ut per regulas practicas ope instrumentorum deprehendamus magnitudines, & figuras.

Dantur etiam artes actiuæ non rationales, & ordinatiuæ non actuum rationis, sed aliarum operationum immanentium, qualis est saltatoria, quæ ordinat motus pedum secundum proportionem numerorum, eo pacto, quo musica, & sonatoria
ordi-

ordinant voces, & alios sonos secundum proportionem eorundem numerorum, ideoque sunt artes valdè affines, & connexæ, & idcirco tum canentes, tum saltantes solent regulari sono prauio, cui cantus, & saltus conformant. Sonatoria tamen, & fortasse etiam musica sunt artes non absolutè actiuæ, quia operationes sonandi, & canendi non remanent in operante, sed transeunt in aerem, & chordas, vel alia instrumenta sonatoria; licet assimilentur actiuis, quia non relinquunt opus post se, vt factiuæ communiter solent relinquere. Licet enim post actionem pingendi remaneat pictura, post actionem sonandi, ac canendi non remanet vllum opus artis.

Ex artibus factiuis aliæ dirigunt factiones, quæ non relinquunt opus post se, vt sonatoria, & istæ sunt propinquæ actiuis; aliæ dirigunt factiones, quæ relinquunt opus post se, & illud habent pro fine, vt pictura, statuaria &c; quæ absolutè vocantur factiuæ. Ex his quædam sunt imitativæ, vt pictura, statuaria, & omnes, quæ construunt imagines rerum, quæ conueniunt in hoc etiam cum poetica, quæ est ars imitativa, & etiam cum saltatoria, ac musica, quæ sapè imitantur; & artes imitativæ non deserunt vitæ necessitatibus, sed solum delectationi. Aliæ sunt non

imitatiuæ, sed habentes pro fine varia opificia, vel necessaria ad vitam, vel vtilia ad delectationem. Videntur autem omnes, vel pleræque reduci ad illas septem, quæ vocantur mechanicę, eo quod exercentur præsertim per machinas, seu instrumenta corporalia, quę sunt Lanificiũ, Militia, Nauigatio, Agricultura, Medicatio, Venatio, & Ars fabrilis: quamuis earum aliquæ inter artes non seruiles, sed nobiles recenseantur.

Ad cognoscendam artium nobilitatem tres sunt regulæ. Prima est: artes, quę præcipuè exercentur per virtutes animi, præstant ijs, quæ exercentur præcipuè per vires corporales. Secunda est: quæ imperant, sunt præstatiores illis, quę parent. Tertia est: quę corpus non fædant, & coinquinant, sunt nobiliores illis, quæ fædant, & inquinant. Patet inductione. Nam Logica, Rhetorica, Poetica, Grammatica, quę præsertim exercentur per ingenium, & virtutes rationis, præstantiores sunt artibus remigandi, ferendi onera &c, quę parum requirunt ingenij, multum virium corporalium. Ex eadem ratione artes pingendi, sculpendi, construendi horologia, & alia quædam opificia, in quibus plus requiritur ingenij, quàm virium, præstant agriculturæ, lignarię &c, in quibus requiritur plus virium, minus ingenij.

ingenij . Rursus in ædificatoria , architectura , quæ præcipit , nobilior est artibus manualibus, quæ exequuntur iussa architecti . In militia imperatoria , præstat arti militum parentium, præsertim cum ad imperandum requiratur ingenium, & virtus animi, ad exequendum vires corporales. In nauigatoria ars gubernatoria , quia imperat, & exercetur præcipuè per rationem , præstat cæteris exequentibus . In medicatoria ars medici , qui imperat, est honorabilior . Demum videmus artes , quæ corpus inquinant, & foedant , qualis est agricultura, coquinaria &c. esse vilissimas omnium , licet sint maximè necessaria, & vtilis.

Inferitur ex dictis præstantissimam inter practicas facultates esse moralem, ac prudentiam , præsertim prout comprehendit politicam, quæ debet residere in principe supremo . Primò enim intendit finem, præstantissimum, nempe felicitatem totius ciuitatis , aut gentis . Secundò est maximè architectonica, cum imperet omnibus alijs artibus, etiam imperanti in exercitu. Tertiò gubernatio, per quam tota ciuitas, aut gens ordinatur ad felicitatem, requirit maximam virtutem intellectus , & voluntatis . Quia tamen corruptio optimi est pessima , sic quemadmodum vera , & germana politica est optima , utpote per

quam princeps se ipsum, & totam gentem ordinat ad optimum, hoc est ad felicitatem communem; ita pessima est falsa, & mala politica, quæ non est prudentia, sed verusutia, per quam contempta felicitate propria, & communi totius gentis, ordinantur omnia ad bonum temporale dominantis.

Ad argumentum in contrarium: licet omnes artes sint in ratione, tamquam in subiecto, & exercentur per actus rationis, tamen rationales propriè sunt illæ solæ, quæ habent pro fine, & opere faciundo, ordinationem actuum rationis, & signorum, ut explicatum est. Illæ verò, quæ habent alium finem, ut statuat, salutationem, cantum &c. vocantur non rationales.

Vtrum quatuor facultates speculatiuæ sint scientiæ subalternantes, & virtutes intellectus. Quæst. XXII.

PRimò videtur, quod nulla ex quatuor facultatibus sit scientia, vel virtus intellectus. Facultates enim incertæ, & fallibiles non sunt scientiæ, neque virtutes intellectus; sed quatuor facultates enumeratæ sunt incertæ, & fallibiles, ut patet ex diuersitate opinionum; ergo non sunt

sunt scientiæ, neque virtutes intellectus .
Neque dicas, quod ad hoc, vt aliquis habitus habeat denominationem scientiæ, sufficit, quod habeat aliquas cognitiones certas, & euidentes, licet habeat etiam aliquas cognitiones probabiles, & incertas : denominatio enim sumitur à potiori, ideoque totus habitus denominatur scientia à parte infallibili . Nam contra est, quia quod non sufficit ad virtutem, à fortiori non sufficit ad scientiam, cum omnis scientia sit virtus ; sed non sufficit ad virtutem, quod habeat aliquos actus veros, sed debet nunquam posse errare, ac dicere falsum ; ergo non sufficit ad scientiam, quod habeat aliquos actus veros, sed requiritur, vt nunquam possit errare, ac dicere falsum . Et ratio à priori videtur esse, quia bonum ex integra causa, malum ex vnius defectu ; ergo ad hoc, vt aliquis habitus sit virtus, ac scientia, requiritur, vt sit infallibilis secundum omnes actus : eo verò ipso, quod habet aliquem actum fallibilem, amittit rationem scientiæ, ac virtutis :

2. Scientia debet esse de obiecto necessario, & æterno ; sed nullum ens creatum, est necessarium, & æternum ; ergo logica, physica, & mathematica, quæ agunt solum de ente creato, non sunt scientiæ : imò nec metaphysica est scientia, nisi secun-

dum illam partem, in qua agit de Deo.

3. Videtur, quod physica non sit scientia, neque virtus: nam fundatur in sensibus; sed sensus cum sint fallaces, non possunt tribuere certitudinem requisitam ad virtutem, & scientiam; ergo physica non est virtus, neque scientia.

4. Videtur, quod logica non sit scientia. Ex Aristotele enim 2. Metaph. cap. 3. absurdum est simul scientiam, & modum sciendi quærere; sed logica est modus sciendi, & de illa loquitur Aristoteles eo loco, ut docent Auerroes, Sanctus Thomas, Scotus, alique interpretes communiter; ergo logica non est scientia. Confirmatur, quia 1. Rhetor. cap. 4 docet dialecticam, & Rhetoricam non esse scientias, sed facultates.

5. Videtur, quod physica, mathematica, & logica sint scientiæ subalternatæ metaphysicæ, cum obiectum earum contineatur sub obiecto metaphysicæ, & utantur principiis metaphysicis.

Respondeo quatuor facultates primarias partim esse scientias, atque adeo virtutes intellectus, partim verò habitus opinatiuos. Omnis enim facultas inferens circa suum obiectum notitiã certam, & euentem veritatum scibilium ex primis principiis per illationem syllogisticam, est scientia, & à fortiori virtus intellectus;

ctus; sed facultates dictæ secundum aliquam partem sui sunt huiusmodi; multæ enim veritates euidenter inferuntur in mathematica, in physica, in logica, & in metaphysica: ex gr. in logica inferitur euidenter, quod nouemdecim modi concludunt necessario, alij quadraginta quinque sunt inutiles; ergo quatuor facultates sunt scientiæ, & à fortiori, virtutes intellectus. Et quia multas veritates scibiles inferunt à priori per causas, multas à posteriori per effectus, & signa, ideo partim sunt scientiæ perfectæ, & à priori, partim imperfectæ, & à posteriori. Addo, quod quia potior pars, & nobilior absolutè vocatur physica, mathematica, metaphysica, & logica, potest absolutè, ac simpliciter dici, quod quatuor facultates sint scientiæ, intelligendo nomine ipsarum partem potiorē.

Secundò dico, quod sunt scientiæ propriè non subalternatæ, sed subalternantes. Vt enim dictum est quæstione 8. ad scientiam propriè subalternatam requiritur, vt ad suas conclusiones vtatur principijs non per se notis, sed demonstratis in alia scientia; sed physica, mathematica, & logica demonstrant suas conclusiones ex principijs proprijs notis per se per speciale lumen ipsarum, qualia principia sunt in logica dictum de omni, dictum de nullo, quæ non inferuntur per demon-

strationem, sed innotescunt per lumen propriè reflexum, ac logicum, ideoque ab Aristotele traduntur non in libris de anima, sed in logica; ergo physica, mathematica, & logica sunt scientiæ non subalternatæ, sed subalternantes.

Inferitur cum Sancto Thoma theologiã esse scientiam partim subalternatam scientiæ beatæ, seu visioni beatificæ, partim scientijs naturalibus. In quantum enim assumit tanquam prima principia veritates reuelatas per se non notas nobis, sed euidenter cognitæ per visionem beatam, subalternatur scientiæ beatæ: in quantum verò assumit veritates non per se notas, sed demonstratas à scientijs naturalibus, subalternatur scientijs naturalibus. Fides verò non est propriè scientia, quia non demonstrat, ac syllogizat, vt docet cum Sancto Thoma communior sententia, sed solum credit. Addo theologiam non esse scientiam simpliciter, sed solum scientiam subalternatam, ita vt ly *subalternata* sit additum distrahens. Ratio est, quia vniuersim facultas subalternata, cum datur sine subalternante, non est scientia simpliciter, cum non habeat simpliciter euentiam de suis conclusionibus: implicat enim, quod intellectus habeat euentiam de conclusionibus, nisi habeat euentiam de principijs, ex quibus demonstrantur; sed prin-

principia scientiæ subalternatæ sunt veritates per se non notæ, sed solum manifestabiles per demonstrationem scientiæ subalternantis, quam demonstrationem supponitur non habere scientia subalternata; ergo non habet eidentiam de suis conclusionibus. Idcirco musica cum datur sine arithmetica, non est simpliciter scientia, quia per illam non scimus conclusionem eidenter; theologia sine scientia beata non est simpliciter scientia, quia non habemus eidentiam de principiis reuelatis, ac proinde nec de conclusionibus. Scientiæ tamen subalternatæ sunt virtutes intellectus, quia per illas verum anima dicit infallibiliter.

Ad 1. Iam dictum est, quod quatuor facultates secundum partem fallibilem non sunt scientiæ, sed solum secundum partem infallibilem. Et quia pars infallibilis utpote potior vindicat sibi simpliciter nomen physicæ, mathematicæ &c. ideo physica, mathematica &c. simpliciter sunt scientiæ. Concedo etiam, quod non sufficit ad scientiam, ut verum dicat aliquando, sed requiritur, ut non possit unquam errare; sed dico, quod pars illa, quam dicimus scientiam, non potest errare. Verum etiam est, quod bonum ex integra causa, malum ex vnius defectu, ac cum pars quædam physicæ sit omnino infalli-

bilis, non habet vllum defectum erroris, ideoque est virtus, & scientia.

Ad 2. Scientia debet esse de obiecto necessario, non quoad existentiam, sed quoad connexionem prædicati cū subiecto. Talem autem necessitatem habent veritates, quæ sunt obiectum quatuor facultatum. Datur enim æterna necessitas, vt corpus naturale constet ex materia, & forma; vt cuiuscumque trianguli tres anguli sint æquales duobus rectis &c. ac proinde quatuor facultates sunt scientiæ.

Ad 3. Sensus sunt quidem fallaces, sed ita, vt per plures sensationes conformes præsertim sensuum diuersorum possimus dignoscere veritatem. Ex. gr. licet fallatur oculus, dum videt in aqua baculum, vt fractum, possumus tamen per tactum certiore visu aduertere quod non sit fractus. Principia physica non fundantur in vna, vel altera sensatione fallibili, sed in pluribus conformibus, ac proinde infallibilibus. Explicatur exemplo. Singuli homines, qui dicunt Constantinopolim dari, possunt mentiri, & errare; sed est impossibile, vt collectio tot hominum mentiatur, & erret; & quia ego credo Constantinopolim dari, quia collectio nō potest errare, ideo habeo certitudinem de Constantinopolis existentia. Sic in casu nostro singulæ sensationes possunt errare.

errare, sed implicat, vt collectio plurium, & plurium errer, ac falsum dicat. Physica ergo, quæ credit propter collectionem plurium, & plurium sensationum conformium, habet euentiam de principijs. Debet autem aduerti, quod triplex est certitudo, physica, metaphysica, ac moralis. Metaphysica est, per quam sumus certi, quod obiectum per nullam potentiam potest aliter se habere: ex. gr. ego sum certus, quod per nullam potentiam etiam diuinam tres anguli trianguli possunt non esse æquales duobus rectis. Physica est, per quam sumus certi, quod obiectum non potest aliter se habere naturaliter, potest tamen miraculosè; ex. gr. ego sum certus, quod sol cras orietur, & quod naturaliter non potest non oriri, potest tamen miraculosè non oriri. Moralis est, per quam sumus certi, quod obiectum potest aliter se habere naturaliter, sed est difficillimum, quod aliter se habeat: ex. gr. ego sum certus, quod si iaciam centies talos lusorios, non faciam semper idem punctum, & tamen posset sine miraculo oppositum contingere.

Ad 4. Logica est modus sciendi simul, & scientia. Eo enim ipso, quod sit scientia reflexa, est scientia de scientia, ac de modo sciendi, & vocatur etiam ipsa modus sciendi. Solet autem definiri modus sciendi

ciendi *progressus à magis noto ad minus notum*, & solent assignari tres modi sciendi, definitio, diuisio, & argumentatio. Aristoteles dum dicit *absurdum est simul scientiam, & modum sciendi querere*, si loquitur de logica, non negat illam esse scientiam, sed solū asserit, quod debet præmitti cæteris scientijs, vt illas dirigat, & quod absurdum est, quod aliquis non habens logicam querat alias scientias; ex defectu enim logicę sæpè errabit, atque hærebit. Dum primo rhet. docet dialecticam, & rhetoricam non esse scientias, sed facultates, nomine dialecticæ non intelligit logicam; sed facultatem disputandi in vtramque partem, quæ affinis est rhetoricæ, licet differat à rhetoricâ, quod rhetorica est facultas disputandi in vtramque partem præsertim circa agibilia per rationes probabiles populo: dialectica est facultas disputandi in vtramque partem per rationes probabiles sapientibus.

Ad 5. Iam dictum est physicam, mathematicam, & logicam non esse scientias propriè subalternatas, quia demonstrant conclusiones ex principijs proprijs per se notis, licet vtantur etiam principijs metaphysicis communibus.

Vtrum logica practica secundum omnes partes sit virtus, scientia, vel ars.

Questio XXIII.

Primò videtur, quod licet logica practica sit virtus secundum illam partē, secundum quam dirigit ad syllogismum demonstratiuum, & infallibilem, non tamen sit virtus secundum partem, secundū quam dirigit ad topicum, & sophisticum: virtus enim, cum sit *dispositio perfecti ad optimum*, non potest vnquam disponere ad malum, & ad falsitatem; sed topica, & sophistica disponere possunt ad falsitatē, cum syllogismus topicus possit esse falsus, sophisticus semper sit falsus; ergo logica secundum topicam, & sophisticam non est virtus.

2. Videtur, quod non solum sit virtus logica in quantum docet modum construendi syllogismum topicum, sed etiam habitus topici, atque opinatiui assentientes probabiliter sint virtus. Nam habitus perficiens intellectum magis potiori iure est virtus, quam habitus perficiens minus; sed habitus opinatiui magis perficiunt intellectum, quam habitus certi; per certos enim cognoscimus paucissima obiecta; at per opinatiuos cognoscimus innumerā,

& nobilissima ; ergo etiam habitus opinatiui sunt virtus.

3. Videtur, quod logica practica non sit scientia. Habitus enim, ad quem non spectat demonstratio suarum conclusionum, non est scientia ; sed demonstratio conclusionum logicarum non spectat ad logicam practicam, sed ad speculatiuam : ad logicam enim practicam spectat solum illa cognitio, quæ est utilis ad operandum, demonstratio verò conclusionum nihil confert ad operandum ; ergo logica practica non est scientia.

Respondeo logicam esse virtutem intellectus, non solum secundum partem demonstratiuam, sed etiam secundum topicam, & sophisticam. Omnis enim habitus, per cuius actus elicitos verum anima dicit certò, & euidenter, est virtus ; sed actus elicti logicæ demonstratiuæ sunt præcepta certa, & euidentia, ac infallibilia de construendo syllogismo demonstratiuo ; actus elicti logicæ topicæ, ac sophisticæ sunt præcepta certa, euidentia, & infallibilia de construendo syllogismo topico, ac sophistico ; ergo logica etiam secundum topicam, & sophisticam est virtus. Hinc concluditur, quod etiam sit ars : nam omnis habitus effectiuus sui operis cum ratione certa, & euidente est ars ; sed logica secundum omnes partes est

est effectiua sui operis, hoc est syllogism demonstratiui, topici, ac sophistici cum ratione, ac præcepto certo, & euidente ergo secundum omnes partes est ars. Infertur etiam, quod logica practica sit aliquo pacto scientia, licet potius materialiter, quam formaliter: nam habitus, cuius conclusiones demonstrantur est aliquo pacto scientia; sed conclusiones logicae practicae demonstrantur; ergo logica practica est aliquo pacto scientia: est tamen scientia potius materialiter, quam formaliter, quia demonstratio præcepti parum, aut nihil conducit ad operandum; ex gr. ad faciendum syllogismum in barocco nihil conducit demonstratio, quæ per reductionem ad impossibile ostenditur, quod concludit necessario; sed ad facultatem practicam spectant solum cognitiones conducentes ad operandum; ergo ad logicam vt practicam non spectat demonstratio præceptorum; ergo non est scientia vt practica, sed vt speculatiua, atque adeo materialiter, non formaliter. Solum igitur ad logicam practicam spectat præceptum docens, quod syllogismus in barocco concludat necessario; & probatio talis præcepti, non per demonstrationem, sed per inductionem à posteriori, qua aduertitur, quod semper concludit.

Ad 1. Respondeo primo, distinguo
maior.

maiolem: virtus non potest disponere ad malum per se, & ita vt eius actus elicitus sit malus, concedo : virtus non potest disponere ad malum per accidens, & ita, vt eius actus elicitus sit bonus, nego maiorem : distinguo eodem pacto minorem, & nego consequentiam. Virtus moralis, ac intellectualis habent hoc, vt sicut virtus moralis nunquam potest elicere actum peccaminosum, ita virtus intellectualis nunquam possit elicere actum falsum : tamen sicut virtus moralis eliciendo actum bonum potest per accidens inclinare ad peccatum, eo pacto, quo cum quis ieiunat, per accidens inclinatur ad peccatum vanę glorię : sic virtus intellectualis eliciendo actum verum, potest per accidens inclinare ad actum falsum. Ex. gr. prudentia dictans, quod ego debeo credere testibus fide dignis, verum dicit, & tamen potest me disponere ad credendum testibus fide dignis in casu, in quo mentiantur, adeoque ego decipiar, ac errem. In casu nostro topica tradens præceptum, verum de construendo syllogismo topico potest per accidens inclinare ad assentiendum, adeoque faciendum actum falsum.

Secundo respondeo concedo maiorem, & nego minorem : nam topica, & sophistica disponunt solum ad syllogismum, topicum, & sophisticum construendum,

non

non autem ad illis assentiendum. De syllogismo sophistico res est euidens. Neque enim qui construit syllogismum sophisticum ex arte, potest illi assentiri, cum sciat illum esse fallacem, ac non concludere. Similiter qui construit syllogismum topicum potest assentiri, & non assentiri, ut voluerit; ergo cum logica solum disponat ad syllogismos topicos, & sophisticos construendos, in constructione verò non possit esse falsitas, sed solum in assensu, ad quem logica non disponit, sequitur quod logica topica, & sophistica non disponat ad falsum.

Ad 2. Transeat, quod habitus perficiens intellectum magis intensiue, & cæteris paribus, potiori iure sit virtus, quam habitus perficiens minus: at nego, quod habitus perficiens magis solum extensiue, in quantum extenditur ad plures actus potiori iure sit virtus. Habitus opinatiui si magis perficiunt intellectum, quam habitus infallibiles, perficiunt magis solum extensiue, in quantum extenduntur ad plura obiecta, vel si cætera non sint paria, eo quod cognoscant veritates nobiliores: at si cætera sint paria, multo magis perficiunt habitus infallibiles, ut est manifestum; ideo habitus opinatiui non sunt virtus.

Ad 3. Iam dictum est, quod logica
pra-

practica est scientia potius materialiter, quam formaliter, quia demonstratio conclusionum spectat ad logicam, non in quantum est practica, sed in quantum est speculatiua.

Vtrum logica benè diuidatur in naturalem, & artificialem, docentem, & vtentem, & an sit necessaria ad scientias. Quaestio XXIV.

Primo videtur, quod mala sit diuisio logicae in naturalem, & artificialem. Nulla enim ars benè diuiditur in naturalem, & artificialem; eo enim ipso diuidetur in artem, & non artem; sed logica est ars; ergo &c.

2. Si logica benè diuideretur in naturalem, & artificialem, etiam ceterae scientiae, & artes, ex.gr. physica, mathematica, metaphysica, musica, pictura deberent diuidi in naturales, & artificiales; imò etiam prudentia, & virtutes morales deberent proportionaliter diuidi in naturales, & acquisitas, ita vt poneretur prudentia naturalis, & acquisita, temperantia naturalis, & acquisita.

3. Videtur logicam malè diuidi in docentem, & vtentem. Logica enim vtens nihil aliud potest esse, quam habitus, ad quem

quem spectat vti præceptis logicis, & illa exequi, definiendo, diuidendo. &c; sed ad omnes scientias spectat vti præceptis logicis vtpote traditis in vsum scientiarum; ergo logica vtens essent omnes scientiæ, quod est absurdum .

4. Videtur quod logica non sit necessaria ad scientias. Logica enim est scientia, & quidem difficilior cæteris ; sed non est necessaria ad se ipsam; ergo nec ad cæteras scientias .

5. Non potest explicari vtrum sit necessaria sola logica naturalis , an etiam artificialis ; vtrum sit necessaria simpliciter , vel secundum quid ; vtrum ad singulos actus scientiæ, vel solum ad scientiam totalem, & actus difficiliore ; ergo logica non est necessaria ad scientias .

Respondeo, quod sumendo latè nomen logicę, in quantum significat dispositionē intellectus ad contemplandum ens intentionale per lumen reflexum, & ad cognoscendum practicè , quo pacto possint res benè intelligi, definiendo, diuidendo, argumentando , & exercendo alias operationes rationis , logica benè diuiditur in naturalem, & artificialem, ita vt logica naturalis sit dispositio accepta à natura contemplandi ens intentionale per lumen reflexum; & cognoscendi practicè , quo pacto res benè intelligantur , definiendo,
diui-

diuidendo, & argumentando ; artificialis fit dispositio ad hæc eadem acquisita per assuetudinem, vel disciplinam, quæ dispositio per assuetudinem acquisita, dum est imperfecta, & facilè mobilis, atque amissibilis, est mera dispositio, & nondum habet rationem habitus ; cum verò est perfecta, & difficilè mobilis, atque amissibilis, tunc est habitus, vt alibi fusiùs explicabitur. Quod dixi de logica, dicendum etiam de physica, mathematica, metaphysica, musica, pictura, & alijs scientijs, & facultatibus. Possunt enim latè accipi pro dispositione contemplandi certa obiecta, & exercendi certas operationes, ac diuidi in naturales, & artificiales. Dispositio naturalis est fundamentum artificialis. Vnusquisque enim addendo assuetudinem, & disciplinam, euadet excellens in ea facultate, ad quam naturaliter est benè dispositus : exgr. qui naturaliter est benè dispositus ad picturam, addendo disciplinam, & assuetudinem, euadet pictor excellens. Habitus morales possunt diuidi proportionaliter, ac intellectuales. Sumendo enim nomina temperantiæ, fortitudinis, liberalitatis latè, in quantum significant dispositionem ad exercendos actus, & opera fortitudinis, temperantiæ, liberalitatis &c. possunt diuidi in naturales, & acquisitos. Naturalis est dispositio

fitio ad exercendos actus, & operata alium
virtutum accepta à natura, per quam ali-
qui, qui idcirco dicuntur sortiti animam
bonam, sunt naturaliter propensi ad ope-
ra virtutum. Acquisita est, quæ acquiri-
tur actibus, & assuetudine, quæ si perfi-
ciatur, & acquirat immobilitatem, euadit
habitus, ac virtus. Neque enim sufficit
ad hoc, vt aliquis sit simpliciter tempe-
rans, quod viuat temperatè, nisi sit immo-
biliter dispositus ad temperatè viuendū.
Confirmatur ex Aristotele 6. eth. vbi præ-
ter prudentiam acquisitam agnoscit quā-
dam facultatem naturalem affinem pru-
dentia, quam vocat calliditatem, quæ de-
finiri potest: *naturalis dispositio intellectus*
ad iudicandum, quæ media conducant ad fi-
nem propositum, & si perficiatur assuetudi-
ne, euadit versutia, quæ vulgò vocatur
prudentia. Vulgus enim appellat pruden-
tes eos homines, qui sciunt inuenire me-
dia opportuna ad quemcumque finē pro-
positum, licet hæc non sit vera prudentia
definita ab Aristotele, quæ potest inueni-
ri in solo viro probo. Licet tamen facul-
tates intellectuales, & morales proportio-
naliter se habeant, datur inter eas hæc
differentia, quod in intellectualibus de-
bet quisque ponere præcipuum studium,
in ea facultate, ad quam naturaliter est
melius dispositus; euadet enim excellens:

at è conuerso debet præcipuum studium
ponere in ea virtute morali, ad quam est
peius dispositus, nè ex defectu talis vir-
tutis felicitatem amittat, eo pacto, quo
illa pars arcis est præcipuè custodienda,
ex qua periculum imminet nè intret ho-
stis.

Secundo dico: benè logica diuiditur
in docentem, & vtentem, & hæc diuisio
potest multipliciter explicari. Primo ita,
vt logica docens sumatur pro theórica,
hoc est pro habitu tradendi præcepta vni-
uersalia rectè cognoscendi, definiendi,
diuidendi, argumentandi, qui habitus po-
test addisci studio, & disciplina ante om-
nem vsum, & executionem præceptorum;
logica verò vtens sumatur pro practica,
hoc est pro habitu, quo quis ex memoria
operationum aliàs rectè factarum dirigi-
tur ad tradenda præcepta particularia,
similes operationes hic, & nunc exercen-
di, qui habitus non potest acquiri, nisi vñ,
& executione præceptorum. In hoc sen-
su logica docens, & vtens realiter distin-
guuntur, sicut duę partes separabiles v-
nius habitus totalis; cum in multis detur
optima theórica sine practica, in alijs
optima practica sine theórica. Secundò
nomine logicę docentis potest intelligi
habitus in quantum inclinatur ad tradenda
præcepta: nomine vtentis idem habitus,

in quantum per eadem præcepta inclinatur ad vsum, & executionem præceptorum, hoc est ad definiendum, diuidendum, &c. Si in hoc sensu sumantur, differunt solum secundum diuersa connotata. Idem enim habitus, in quantum inclinatur ad præcepta tradenda vocatur logica docens; in quantum per præcepta inclinatur ad eorum executionem, vocatur logica vtens. Tertio nomine logicæ vtentis potest intelligi ipsa logica, in quantum traditis quibusdam præceptis, illa exequitur in aliis suis partibus, definiendo, diuidendo, argumentando in materia logica. Quarto nomine logicæ vtentis intelligunt aliqui scientias, quæ exequuntur præcepta logicæ in propriis materiis, animaduertendo ad talia præcepta, ita vt talia præcepta facilius ad actus ipsa exequentes cum reflexione ad præcepta.

Tertio: dico logica naturalis est simpliciter necessaria ad scientias, & ad omnes, ac singulos actus scientificos exercendos; logica artificialis est solum moraliter necessaria ad scientias totales perfecte acquirendas: in quantum tamen demonstrat necessitatem formæ syllogisticæ est simpliciter necessaria ad perfectionem omnium, & singulorum actuum scientificorum, vt cognoscant conclusionem materiale, & formalem per cau-

sam. Probatur, quia illud est necessarium simpliciter, sine quo aliud haberi non potest saltem naturaliter, eo pacto, quo quia vita naturaliter conseruari nequit sine cibo, cibus est simpliciter necessarius ad vitam; illud est necessarium moraliter, sine quo aliud vix potest haberi, eo pacto, quo ad benè pingendum est necessaria moraliter ars pictoria, quia sine arte vix potest benè pingi; sed nullus actus scientificus potest haberi sine syllogismo; syllogismus non potest haberi sine dispositione saltem naturali syllogizandi, quæ dispositio est logica naturalis; ergo logica naturalis est simpliciter necessaria ad omnes, & singulos actus scientificos. E conuerso, actus scientifici faciles possunt haberi per syllogismos factos ex sola logica naturali ergo logica artificialis non est necessaria ad singulos actus scientificos; sed in scientiis totalibus etiam mathematicis, dantur actus scientifici valde difficiles, contra quos occurrunt implicatissima sophismata scientiæ destructiua, & impeditiua, quæ vix soluuntur per logicam artificialem, per logicam naturalem solui moraliter non possunt; ergo logica artificialis est moraliter necessaria ad scientias totales acquirendas.

Confirmatur, & explicatur. Sicut enim qui naturaliter est benè dispositus
ad

ad natandum sine arte benè natabit in loco facili , at in loco difficili plenoque vorticibus omnino non euadet ; sic qui est benè dispositus per logicam naturalem soluet quidem sophismata facilia , at difficillima non soluet , adeoque impediatur ab acquirenda scientia perfecta, quæ red- dat intellectum imperturbabilem. Quod etiam patet à posteriori : nam antiqui philosophi in multis errarunt ex defectu logicæ .

Demum quod logica in quantum demonstrat formam syllogisticam sit simpliciter necessaria ad perfectionem omnium, & singulorum actuum scientificorum , probatur ; quia vt mathematicus sciat hanc conclusionem : *materiam cuiuscumque trianguli tres anguli sunt æquales duobus re- ctis* , debet scire causam huiusmodi veri- tatis ; vt sciat hanc conclusionem forma- lem , in quantum est conclusio in barba- ra , debet scire causam , cur syllogismus in barbara necessario concludat, quæ cau- sa affertur à logica ; ergo logica in quan- tum demonstrat necessitatem formæ syl- logisticæ est simpliciter necessaria ad om- nes , & singulos actus scientificos , vt sciant conclusionem materialem , & for- malem per suam causam .

Pro conclusione omnium questionum proœmialium, quia ex Aristotele fructus

disputationis, ac demonstrationis est definitio, libet ex iis, quæ de essentia logicæ sunt disputata, colligere definitionem logicæ. Est igitur logica scientia partim speculatiua, partim practica, adeoque ars contemplans ens intentionale per lumen reflexum, & descendens utque ad præcepta practica rectè intelligendi.

Ad 1. Logica strictè sumpta in quantum est ars, vel habitus acquisitus, non benè diuiditur in naturalem, & artificialem: at si latè sumatur pro dispositione abstrahente à naturali, vel acquisita, contemplandi, & cognoscendi practicè ens intentionale, benè diuiditur tali diuisione, ac possunt proportionaliter diuidi alij habitus intellectuales, & morales, ut dictum est: & per hoc patet ad secundum.

Ad 3. Logica vtens potest etiam sumi pro scientijs, quæ vtuntur præceptis logicis cum reflexione ad ipsa: sed in hac acceptione videtur potius logica vtens in ablatiuo, quam in nominatiuo, cum scientiæ non sint logica, sed sint vtentes logica.

Ad 4. Logica non prærequiritur ad logicam, primo quia demonstrationes logicæ sunt ita faciles, & euidentés, ut ad illas sufficiat logica naturalis, sicut sufficit ad quasdam demonstrationes aliarum

scien-

scientiarum . Secundo præcepta logicę
dum tradunt doctrinam vniuersalem de
syllogismo , demonstratione , ac de solu-
tione sophismatum , eamque probant à
posteriori per inductionem , & exempla,
deseruiunt etiam ad examinandas demon-
strationes à priori , & ad soluenda sophi-
smata contra regulas logicę , atque adeo
logica à posteriori , & practica aliquali-
ter est necessaria ad logicā speculatiuam ;
ergo à fortiori est necessaria ad cęteras
scientias .

Ad 5. Iam dictum est explicando du-
bia in obiectione proposita .

Q V A E S T I O N E S

de Vniuersalibus .

Explicatur ordo disputandorum .

Postquam in quæstionibus proœmia-
libus egimus de scientiis , sequitur ,
vt disputemus de vniuersalibus , quę sunt
obiecta scientiarum , & quorum tracta-
tio spectat ad logicam , hoc est ad scien-
tiam intentionalem , cum vniuersalia vt
vniuersalia sint entia intentionalia , hoc
est constituta per actum intellectus , vt
inferius ostendemus . Primò igitur quę-

rimus, an vniuersalitas sit perfectio cognitionis, ac scientiæ. Secundò an scientia humana possit esse de singularibus, vel solum de vniuersalibus. Tertio an dentur à parte rei vniuersalia separata à singularibus, vt ponebat Plato. Quartò an dentur ante singularia, vel in singularibus. Quintò quia vniuersale constituitur per vnitatem, disputamus de vnitatem, & eius diuisionibus, præsertim in numericam, specificam, genericam, & analogicam, examinantes etiam, an, & quomodo dentur à parte rei.

Iam quia ex eo, quod vniuersale non detur à parte rei, sequitur quod detur per intellectum abstrahentem, & præscindentem obiectiuè, vel formaliter rationes communes à singularibus, querimus, vtrum intellectus possit præscindere obiectiuè, vel solum formaliter vniuersale à singularibus. Et quia quæstio de præcisione obiectiua pendet ab ea, an rationes genericæ, specificæ, & indiuiduales distinguantur virtualiter intrinsecè, vel formaliter ex natura rei, ideo præmissa quæstione de definitione, ac diuisione distinctionis, querimus, an vniuersim in creatis repugnet distinctio virtualis intrinseca, vel formalis ex natura rei; an de facto rationes genericæ, specificæ, ac indiuiduales distinguantur for-

maliter ex natura rei . Deinde descendimus ad examinandum, an , & quomodo , & per quos actus intellectus faciat vniuersale , per præcisionem obiectiuam , vel formalem à singularibus ; an solus intellectus humanus , an etiam diuinus , & angelicus faciant vniuersale ; vtrum fiat à voluntate , & potentijs sensitivis ; vtrum vniuersale logicum, hoc est proximè prædicabile constitutur per actum absolutum , vel comparatiuum ; an vniuersale in actuali prædicatione retineat suam vniuersalitatem , & per hoc concludimus quæstiones de vniuersalibus in communi .

Vtrum sit perfectio cognitionis , ac scientiæ , quod sit vniuersalis . Quæstio XXV.

Videtur quod non 1., quia tum scientia est perfectior , cum magis exprimit obiecta pro vt sunt ; sed obiecta non sunt vniuersalia , sed singularia ; ergo scientia perfecta non debet esse de vniuersalibus , sed de singularibus .

2. Scientia quò clarior , eo perfectior est ; sed scientia de singularibus est clarior , quam scientia de vniuersalibus ; ergo perfectior est scientia de singularibus , quam de vniuersalibus .

3. Deus habet perfectissimam scientiam; sed scientia Dei non est de vniuersalibus, sed de singularibus; ergo non requiritur ad perfectam scientiam vt sit de vniuersalibus.

Respondeo, quod questio potest habere duplicem sensum. Primus sensus est, vtrum sit perfectio scientiæ, quod sit vniuersalis, hoc est vna de pluribus obiectis. Secundus sensus est, vtrum sit perfectio scientiæ, quod cognoscat obiecta in vniuersali, hoc est non distinguendo singularia inter se. In primo sensu manifestum est, quod est magna perfectio scientiæ, vt sit vniuersalis. Differentia quippe, & perfectio, per quam natura cognoscitiua eleuatur supra naturam non cognoscitiuam, atque illam excedit, consistit in quadam vniuersalitate, & amplitudine essendi; imperfectio verò naturæ non cognoscitiuæ consistit in quadam singularitate, & coarctatione essendi. Natura non cognoscitiua, cum solum habeat suam formam, & non possit in se recipere formas, species, ac similitudines intentionales aliarum rerum, est restricta ad suum esse singulare; ex. c. ignis cum solum habeat formam singularem, ignis, & non possit recipere formas, species, & similitudines intentionales aquæ, terræ, plantarum, & aliarum rerum, est

restrictus, & coarctatus ad esse singulare huius ignis: idemque dic de ceteris naturis non cognoscitiuis. E conuerso naturæ cognoscitiuæ, cum non solum habeant suam formam, sed possint etiam recipere formas, species, & similitudines intentionales aliarum rerum, non sunt coarctatæ ad suum esse singulare, sed habent quamdam amplitudinem, & vniuersalitatem essendi, per quam non solum, sunt id, quod sunt, sed etiam sunt quodammodo alia, ideoque de anima intellectiua dixit Aristoteles 3. de anima: tex 37. quod est quodammodo omnia, quia recipit species intentionales omnium rerum, & ex Aristotele totam hanc doctrinam desumpsit 8. Thomas 1. parte quæst. 14. artic. primo & etiam in comm. tex. 27. lib. 2. de anima, & pluribus alijs locis.

Iam sicut natura cognoscitiua excedit naturam non cognoscitiuam per quamdam vniuersalitatem, & amplitudinem essendi, sic natura cognoscitiua superior excedit naturam cognoscitiuam inferiorem per hoc, quod habeat maiorem vniuersalitatem, & amplitudinem essendi. Ita natura intellectiua est vniuersalior, quam natura sensitiua, quia natura intellectiua est quodammodo omnia, cum possit recipere species intentionales omnium rerum; natura verò sensitiua, cum

possit recipere solum species rerum sensibilium, non est omnia, sed solum sensibilia. Ex naturis intellectiuis superiores sunt vniuersaliores inferioribus, quia superiores possunt plura simul distinctè cognoscere: ex. c. Angeli possunt plura simul cognoscere, quam anima rationalis, Angeli superiores possunt plura simul distinctè cognoscere, quam inferiores: Deus verò est vniuersalissimus, in quantum potest simul cognoscere distinctissimè omnia cognoscibilia.

Ex eo igitur, quod perfectio naturę cognoscitiuę consistat in quadam vniuersalitate, sequitur, quod etiam perfectio cognitionis, ac scientiæ, quæ sunt propriæ operationes naturę cognoscitiuę, & intellectiue, consistant in quadam vniuersalitate, ac proinde quod cæteris paribus, illa cognitio sit perfectior, quę cum sit vna, extenditur ad plura cognoscenda. Et quia cognitio diuina est perfectissima, ideo cum sit vnica cognoscit omnia cognoscibilia: de angelis dicit Dionysius cap. 12. de cęlesti hyerarchia, quod superiores participant scientiam magis in vniuersali, quam inferiores: in hominibus videmus, quod qui sunt debilioris intellectus, quasdam veritates capere non possunt, nisi eis particulatim per singula explicentur, qui verò sunt fortioris intel-

intellectus simul multa capere possunt , vt
D. Thomas docet prima parte quæst. 55.
art. 3. in corpore : potentiæ verò sensiti-
uæ quia sunt imperfectissimæ habent co-
gnitiones minimè vniuersales , & maxi-
mè alligatas ad obiecta singularia ; ergo
manifestum est , quod vniuersalitas est
perfectio cognitionis . Et ratio à priori
est , quia vnitas plurium perfectionum
est magna perfectio ; sed vniuersalitas est
quædam vnitas , per quam in vnica cog-
nitione coadunantur perfectiones plurium
cognitionum , & obiectorum ; ergo vni-
uersalitas est perfectio cognitionis , ac
scientiæ .

In secundo sensu quæstionis dicendum,
quod non est perfectio , sed imperfectio
cognitionis , ac scientiæ , vt cognoscat
res solum in vniuersali , non distinguen-
do singularia inter se . Ratio est , quia
omnis confusio exclusiua claritatis , &
distinctionis est imperfectio cognitionis ,
ac scientiæ ; sed cognoscere res solum in
vniuersali non distinguendo singularia
inter se est quædam confusio exclusiua
claritatis , & distinctionis ; ergo cogno-
scere res solum in vniuersali non est per-
fectio , sed imperfectio cognitionis , ac
scientiæ . Confirmatur : nam intellectus
perfectior differt ab imperfectiori non
per hoc , quod possit plura cognoscere in
vni-

vniversali, cum omnis intellectus etiam imperfectissimus possit formare conceptum communissimum intelligibilis, per quem in vniversali cognoscit omnia omnino, sed solum differt in hoc, quod possit plura simul in particulari cognoscere; ergo cognoscere res solum in vniversali non est perfectio, sed imperfectio cognitionis. Et per hoc patet ad argumenta in contrarium. Probant enim, quod non sit perfectio cognitionis, ac scientiae, ut cognoscat obiecta solum in vniversali, non distinguendo singularia inter se, at non probant, quod non sit perfectio cognitionis, ac scientiae, ut sit vniversalis, hoc est vna de multis.

Vtrum scientia humana sit de singularibus. Quaestio XXVI.

VIdetur, quod scientia humana sit etiam de singularibus 1. quia, vel scientia humana non est de singularibus, quia nullo pacto attingit singularia; vel quia non attingit ita, ut vnum singulare distinguat ab alio; neutrum dici potest: nam cum cognoscimus, quod cuiuscumque trianguli tres anguli sunt aequales duobus rectis, procul dubio attingimus

om-

omnes triangulos singulares ; præterea est manifestum , quod plura singularia , e. g. plures homines distinguimus inter se ; ergo scientia humana est de singularibus .

2. Circa obiectum , circa quod potest versari potentia inferior , à fortiori potest versari potentia superior ; sed sensus , qui est potentia inferior , potest versari circa singularia per actus sentiendi ; ergo intellectus potest circa singularia versari per actus sciendi .

3. Id , quod per aliud scitur , magis scitur ; sed vniuersalia sciuntur per inductionem singularium , vt docet Aristoteles 2. poster. tex. 27 ; ergo magis sciuntur singularia . Confirmatur ex eodem Aristotele 1. post. tex. 12. *Dico autem ad nos priora , & notiora propinquiora sensui : simpliciter autem priora , & notiora , quæ longius sunt ; sunt autem longinquissima quidem vniuersalia maxime , proxima sunt singularia ; sed quæ sunt nobis notiora sunt etiam magis scibilia ; ergo singularia sunt magis à nobis scibilia , quam vniuersalia .*

Respondeo , quod ex pluribus patet intellectum humanum esse defectuosum in cognoscendis singularibus , præsertim sensibilibus . Primo quia vt illa cognoscat indiget sensibus , e. g. vt cognoscat singularia visibilia indiget sensu visus ,

ut cognoscat singularia audibilia, indiget sensu auditus; ergo est defectuosus in cognoscendis singularibus sensibilibus. Secundò, quia cognitio singularibus naturaliter contemnit cognitionem ipsorū, & progreditur ad abstractionem vniuersalis, in cuius contemplatione quiescit; ergo signum est, quod cognitio, quam de singularibus format, est valde imperfecta. Tertio quia cognitio, qua de re cognoscatur, quid per accidens, & mutabiliter sit, non autem quid sit per se, necessariò, ac immutabiliter, est valde imperfecta; sed intellectus de singularibus solum penetrat quid sint per accidens, & mutabiliter, non autem quid sint per se, ac necessariò; ergo intellectus humanus de singularibus habet cognitionem valde imperfectam. Minor probatur experientia, & inductione descriptionum, quas de singularibus formamus. Omnes enim conueniunt illis per accidens; ex. gr. descriptio Petri est quod sit *homo habens talem figuram, staturam, & aggregatum talium accidentium*; sed per accidens est, quod hic homo habeat aggregatum talium accidentium, cum potuisset habere diuersam figuram, staturam, & aggregatum accidentium diuersorum; ergo descriptio huius hominis in singulari conuenit illi solum per accidens.

dens . Idem dic de descriptione , quam formamus huius albedinis . Dicimus enim , quod sit *albedo existens tali loco , & tempore &c* ; sed hæc omnia prædicata per accidens solum competunt tali albedini ; ergo descriptio talis numero albedinis conuenit illi solum per accidens , & exprimit non quid per se , sed quid per accidens sit . Confirmatur , quia non potest singulare per se distinctè cognosci , nisi penetretur distinctè eius singularitas , per quam per se differt ab alijs singularibus ; sed non penetramus distinctè singularitatem , per quam vnum singulare per se differt ab alijs , ex . g. ego non penetro , per quam singularitatem differam ab alijs hominibus ; ergo non possumus singularia , per se distinctè cognoscere ; sed non possumus habere scientiam per se de aliquo subiecto , nisi cognoscamus de ipso , quid per se sit , formando aliquam descriptionem per se conuenientem tali subiecto , ita vt non possit illi non continere ; ergo non possumus de singularibus acquirere scientiam per se ; & propriam , sed solum per accidens , & imperfectam ; ergo solum possumus habere scientiam per se de rebus in vniuersali , formando descriptiones per se conuenientes toti speciei : ex . g. possumus per se cognoscere quid sit homo , formando descriptionem exprim-

mentem, quod homo est animal rationale, cum homo per se, & necessariò sit animal rationale, ita vt non possit non esse animal rationale.

Hinc verò patet, quod ad logicam spectat agere de vniuersalibus. Debet enim statuere, quale sit obiectum per se scibile; sed solum vniuersale est per se scibile; ergo debet agere de vniuersalibus, in quantum vniuersalitas subiecti requiritur ad scibilitatem per se.

Ad 1. Certum est, quod intellectus humanus potest habere scientiam de singularibus in vniuersali, per quam nimirum cognoscat illa, non distinguendo inter se. Solum igitur dicimus, quod non possumus de singulari habere scientiam per se, per quam vnum singulare distinguamus ab altero per prædicata per se ipsi conuenientia, vt explicatum est. Dum opponitur, quia distinguimus vnum hominem ab alio e. g. Petrum à Paulo: respondeo, quod distinguimus vnum hominem ab alio per prædicata merè per accidens illis conuenientia, nimirum per figuram, staturam, & alia, quæ explicamus hoc versu.

Forma, figura, locus, stirps nomē, patria, tēpus
at verò per prædicata per se illis conuenientia non distinguimus, vt patet experientia.

Ad 2. Intellectus noster potest quidem versari circa singularia, sed ita ut accipiat eorum cognitionem à sensu: & quia sensus de singularibus non penetrat quid per se, & necessario sint, sed solum quid sint per accidens; ideo intellectus humanus de singularibus habet solum scientiam per accidens, non autem scientiam per se.

Ad 3. Distinguo maiorē; id, per quod aliud scitur, ascendendo ab imperfecto ad perfectum, magis scitur, nego; descendendo ab vno perfecto ad aliud contentum in ipso, concedo maiorem, distincta eodem pacto minore, nego consequentiam. Dupliciter potest vnum sciri per aliud. Primo incipiendo à cognitione vnius, quod est imperfectum, & ascendendo ad aliam cognitionem perfectam; & tunc id per quod aliud scitur, minus scitur. Secundo à cognitione perfecta vnius progrediendo ad cognitionem alterius; & tunc id, per quod aliud scitur, magis scitur. In casu nostro intellectus incipit à cognitione singularium à sensibus accepta, & penetrante solum quid per accidens sint: tum verò per abstractionem ab ijs, quę per accidens conueniunt singularibus, progreditur ad cognoscendum quid per se sint in vniuersali. Ad Aristotelem dicentem singularia esse magis

gis nota nobis, dico, quod singularia sunt magis nota scientia exprimente quid per accidens sint; vniuersalia sunt magis nota scientia exprimente, quid per se sint, & per hoc possunt conciliari plura loca Philosophi, quæ videntur contraria.

*Vtrum detur vniuersale à parte rei
extra singularia. Quæstio
XXVII.*

PRimo videtur vera sententia Platonis, quod præter singularia sensibilia, materialia, & mutabilia, dentur vniuersalia immutabilia, & immaterialia: ex. g. quod præter hominem, & equum sensibilem, & mutabilem detur homo, & equus vniuersalis, insensibilis, & immutabilis. i. quia sicuti se habet sensus ad obiectum sensibile, ita se habet intellectus ad obiectum intelligibile; sed quia sensus est materialis non potest attingere obiectum immateriale; ergo quia intellectus est immaterialis non potest per se contemplari obiectum immateriale; sed intellectus per se contemplatur vniuersalia, e. g. quid sit homo, vel equus; ergo homo vniuersalis, vel equus vniuersalis sunt immateriales.

2: Veritas, quæ semper, necessario, & immutabiliter est, non potest fundari in subiecto, quod aliquando est, aliquando non est; sed istæ veritates quod *homo sit animal rationale*; quatuor, & tria faciunt, septem, semper, immutabiliter, ac necessario sunt; ergo non possunt fundari in obiectis, quæ modo sunt, modo non sunt; ergo veritates necessarie non fundantur in singularibus, sensibilibus, sed fundantur in naturis rerum; e. g. ista veritas, quod *homo sit animal rationale* fundatur in natura hominis; ergo præter singularia dantur nature vniuersales.

Respondetur, quod sæpè contingit, vt ex eodem principio falso, subiungendo in minori propositiones veras, ad certas, inferantur errores contrarij. In casu nostro Plato, ac philosophi antiquiores conuenerunt in hoc principio, quod obiecta eodem pacto sint in cognoscente, sicut sunt in se ipsis. Subsumebant Heraclitus, & quidam alij antiquiores philosophi: omnia corpora sunt in se ipsis materialiter, mutabiliter, & veluti in perpetuo quodam fluxu, cum modo sint, modo non sint, nunc se habeant vno modo, nunc altero modo; ergo omnia corpora sunt in cognoscente materialiter, mutabiliter, ac veluti in perpetuo quodam fluxu; sed ad scientiam requiritur, vt

-o-o-o-

obie-

obiectum sit in cognoscente immutabiliter, & immobiliter, ita ut cognoscens habeat certitudinem, quod subiectum non potest aliter se habere; ergo de corporibus non potest dari scientia: & quia putabant, quod in mundo nihil detur præter corpora, concludebant, quod absolute non datur scientia, neque vlla cognitio certa, & firma de rebus, sed solum cognitio quædam fluxa, & mutabilis, ideoque apud Aristotelem lib. 4. metaph. tex. 22. dicebat Heraclitus, quod sicut impossibile est aquam fluij currentis bis tangere, quia cum secundo conamur tangere, iam præterijt, sic impossibile est de rebus mutabilibus formare cognitionem certam, & immutabilem, quia dum putamus, quod ita se habeant mutantur & aliter se habent. Hinc ulterius inferebant, quod intellectus non differt à sensu, sed est quidam sensus. Sicut enim sensus est potentia percipiens obiecta mutabilia mutabiliter, ita ut cum obiecta mutantur in se ipsis, mutantur etiam secundum apparentiam, quam habent in sensibus; sic intellectus percipit solum obiecta mutabilia mutabiliter, ita ut non habeat de ipsis certitudinem, sed mutatis obiectis, mutatur etiam apparentia, quam habent in intellectu.

Ex opposito Plato subsumpsit, quod
- 100
obie-

obiecta e. g. homo , equus habent in intellectu quoddam esse vniuersale , immutabile , necessarium , & immateriale: vniuersale quidem , quia homo , qui cognoscitur, non est restrictus ad hoc , vt sit Petrus , vel Paulus ; immateriale , quia non est restrictus ad hoc, vt sit in hac materia, neque vt pendeat à conditionibus materiæ , e. g. ab hoc loco , vel tempore : necessarium , & immutabile , quia homo , qui cognoscitur, necessario , & immutabiliter est animal rationale , ita vt non possit non esse animal rationale . Hinc verò intulit , quod præter obiecta singularia , materialia , sensibilia , & mutabilia dentur à parte rei obiecta vniuersalia, immaterialia, purè intelligibilia , & immutabilia ; e. g. quod præter homines singulares , nimirum Petrum , & Paulum , qui nascuntur , & occidunt , & pluribus modis mutantur , detur homo vniuersalis , æternus , & immutabilis , qui semper , & necessario sit animal rationale , & non dependeat à materia , neque à circumstantijs loci , & temporis . Hæc autem vniuersalia vocauit ideas , seu exemplaria . Ratio est , quia idea est , *ad cuius imitationem opus fit* ; sed omnia singularia , & materialia fiunt ad imitationem alicuius vniuersalis , & immaterialis: e. g. domus singularis , & materialis fit ad imitationem
 tio-

onem alicuius domus vniuersalis; & immaterialis; quam artifex sibi proponit contemplandam tanquam ideam domus faciendę; ergo homo vniuersalis est idea, & exemplar, ad cuius imitationem fiunt omnes homines singulares.

Confirmabat, quia idea operis facti præcedit opus factum; sed omnes homines singulares sunt facti; ergo præcedit aliquis homo vniuersalis, qui sit idea omnium hominum singularium: & quia omnes homines singulares sunt facti ad imitationem hominis vniuersalis, dicebat, quod singularia sunt per participationem idearum vniuersalium. Addebat, quod idee vniuersales sunt obiectum intellectus, eo pacto, quo singularia sunt obiecta sensuum. Sicut enim homo singularis, materialis, & mutabilis mouet sensum ad sensationem materiale, & mutabilem sui, sic homo vniuersalis, ac immaterialis, & immutabilis mouet intellectum ad formandam de ipso definitionem, aut demonstrationem immaterialem, & immutabilem, per quam certum, & immutabiliter cognoscitur, quod anima est animal rationale, vt non possit non esse animal rationale. Hinc concludebat, quod scientia causatur in nobis ex eo, quod idee vniuersales imprimantur in nostris intellectibus imagines immutabi-

biles sui, sicut sensationes causantur ex eo, quod singularia imprimant in sensibus imagines sui mutabiles, ac delebiles.

Hæc sententia Platonis ex principijs Aristotelicis reijcitur multipliciter. Primo falsum est principium, ex quo Plato, & antiqui sumpserunt occasionem errandi, quod obiecta eodem pacto sint in cognoscente, quo sunt in se ipsis. Patet: nam ipsa obiecta sensibilia sunt in sensibus modo quodam altiori, & minus materiali, quam sint in se ipsis; e. g. colores sunt in suis subiectis omnino materialiter, hoc est ita ut pendeant à dispositionibus, & temperamento materiæ, cum non possit idem subiectum retinens idem temperamentum ex vno colore mutari in alium: at visio coloris est in oculo minus materialiter, cum oculus retinens suum temperamentum possit recipere visiones diuersorum colorum, albi, nigri, & rubri &c. Rursus in eadem parte subiecti non possunt esse plures colores: at in eadem parte oculi possunt simul esse visiones plurium colorum, albi, nigri, rubri; ergo colores sunt in vidente modo quodam altiori, ac minus materialiter, minusque dependenter à conditionibus materiæ, quam sint in re ipsa. Ratio à priori est, quia entia cognoscitiua per hoc

hec ipsum, per quod sunt cognoscitua, habent quamdam vniuersalitatem, per quam possunt fieri quodammodo omnia, vel plura entia, vt dictum est questione 25; ergo non est mirum si cognoscendo entia materialia, possint illis dari aliquod esse minus materiale, minusque restrictum, ac magis vniuersale, quam habeant in se ipsis.

Secundo contra sententiam Platonis est, quia ridiculum omnino est, quod dum querimus scientiam, ac definitionem obiectorum, quæ videmus, e. g. hominis equi &c. non acquiramus scientiã, ac definitionem eorum, sed aliorum, quæ solum sunt æquiucè homo, vel equus; sed hoc sequeretur; ergo &c. Probatur minor: nam homo vniuersalis est solum æquiucè homo, equus vniuersalis est solus æquiucè equus; sed nos acquirimus solum scientiam, ac definitionem hominis vniuersalis; ergo &c. Probatur minor: nam homo vniuersalis disconuenit ab hominibus singularibus in essentia, proprietatibus, operationibus, & accidentibus; sed homo disconueniens ab hominibus singularibus in omnibus his est æquiucè homo, & ita vt in hoc sensu etiam baculus posset vocari homo; ergo &c. Probatur maior: nam homo vniuersalis est essentialiter æter-

eternus , & immortalis , inuisibilis , impassibilis , insensibilis , non circumscriptus loco , non habens certam figuram , &c. ; econuerso homines singulares sunt temporales , mortales , visibiles , passibiles , circumscripti loco , habentes certam figuram &c. ; ergo homo vniuersalis est omnino æquiuocè homo , ac similiter equus vniuersalis est æquiuocè equus , idemque dic de cæteris ideis ; ergo dum quærimus scientiam eorum , quæ videmus , non acquirimus scientiam ipsorum , sed aliorum , quibus solum æquiuocè conueniunt nomina obiectorum sensibilium , quod est absurdum . Hinc verò sequitur rursus , quod aufertur scientia physica . Hæc enim est de ente sensibili , ac mutabili , & demonstrat per causam efficientem , ac materiale motus ; sed non datur scientia de ente mutabili , ac sensibili , sed solum de ideis immaterialibus & insensibilibus ; ergo aufertur scientia physica .

Tertio non potest explicari , quanam sit participatio , qua Petrus , & alij homines singulares participant hominem communem . Vel enim est participatio per identitatem , & hoc repugnat , nam Petrus mortalis non potest identificari cum homine immortalis . Rursus quo pacto hic homo communis identificatur cū pluribus hominibus separatis , ac separa-

bilibus? quo pacto posset identificari cum homine, qui nascitur Romæ, & cum eo, qui moritur in India; vel est participatio per vnionem, & sequuntur eadem absurda, quod nimirum homo communis vnatur simul hominibus distantibus, ac separatis loco, habentibus opiniones contrarias; vel est participatio per causalitatem causę efficientis, aut idealis, siue exemplaris; & contra est, quia vel ponitur talis causa efficiens, vt sit causa vniuoca, hoc est omnino similis effectui, vel vt sit causa dissimilis effectui, quę vocari solet causa equiuoca. Si primum, causa similis singulari producto est aliud singulare producens mortale, ac corruptibile, sicut productum, e. g. causa, & exemplar simile filio est ipse pater; hoc autem æternum, & immortale prorsus est dissimile; si verò ponitur tamquam causa dissimilis, & æquiuoca, sufficiunt alię causę æquiuocę, nimirum Deus, & cælum concurrentes ad productionem rerum inferiorum, & corruptibilium, ac non requiruntur tales ideę, vt fusius dicetur suo loco.

Hinc verò patet vniuersalia Platonica non esse necessaria tamquam ideas singularium. Nam neque requiruntur vt ideę vniuocę, neque vt equiuocę, vt dictum est. Adde quod prima idea rerum,
ad

ad cuius similitudinem fiunt vniuersa , vt illam imitentur secundum varios gradus perfectionis , est essentia diuina , continens eminenter omnes perfectiones modo quodam simplicissimo ; ergo non requiruntur ideæ Platonice . Neque etiam sunt necessariae tales ideæ tamquam obiecta mouentia intellectum ad formandas definitiones , ac demonstrationes immutabiles , & imprimendas imagines immutabiles sui , sicut sensationes imprimunt in sensibus imagines mutabiles singularium . Nā intellectus humanus procedit ad cognitionem certam , & immutabilem de vniuersalibus , non per impressionem idearum , sed per abstractionem à singularibus , vt dicitur inferius .

Ad 1. Quia sensus est materialis non potest attingere obiectum spirituale ; ergo quia intellectus est spiritualis non potest attingere obiectum materiale ; nego consequentiam . Disparitas est , quia virtus inferior non se extendit ad ea , quæ sunt superioris virtutis ; sed sensus est virtus inferior intellectu ; ergo non se extendit ad spiritualia , quæ sunt obiectum intellectus . Econuerso virtus superior extendit se ad ea , quæ sunt inferioris virtutis ; comparatur enim ad illam tamquam continens , & excedens ; sed intellectus est virtus superior sensu ; ergo

extenditur ad cognoscenda omnia materialia sensibilia, quæ percipit sensus, ac præterea sensum excedens extenditur ad spiritualia, quæ sunt supra sensum. Ad do, quod virtus altior, & vniuersalior potest cognoscere inferiora modo altiori, & vniuersaliori; & quia virtus intellectiua est altior rebus materialibus, ideo cognoscit illas modo altiori, & vniuersaliori, ita vt faciat vniuersalia, vt dicitur etiam inferius.

Ad 2. Veritas necessaria non potest fundari in subiecto contingente, distinguo, in quantum existit in se ipso, concedo; in quantum existit in aliqua prima, & æterna necessitate, nego. Dicemus inferius in qu. 47. de ente possibili, quod veritates necessariæ, e. g. quod *homo sit animal rationale*, non fundantur in aliquo contingente existente in se ipso, sed in necessitate æterna, & immutabili, per quam omnia existunt in sua causa, quæ Deus est, vt explicabimus suo loco.



*Utrum vniuersale detur ante singularia
vel in singularibus . Questio
XXVIII.*

PRimo videtur vera sententia, quę tribuitur Fonseca, licet obscure loquatur in hac materia, quod natura habeat aliquam vniuersalitatē in statu possibilitatis, vel in aliquo priori, antequam contrahatur ad singularia. Vniuersale enim est vnum aptum esse in multis; sed natura humana possibilis e. g. antequam contrahatur per singularitatem Petri, & Pauli est vna, & est apta esse in multis; ergo natura humana possibilis est vniuersalis.

2. Videtur vera sententia quorundam Scotistarum, quod non detur quidem vniuersale actu à parte rei separatum à singularibus, vt docebat Plato, sed detur vniuersale in potentia, hoc est natura vna in multis singularibus per intellectum abstrahibilis à singularibus: e. g. quod natura humana omnium hominum secundum se omnino sit vna formaliter, & positivè. Si enim natura Petri, & Pauli non esset vna, Petrus, Paulus, & ceteri homines differrent in natura; ergo

natura omnium hominum est vna ; ergo est vniuersalis.

3. Videtur saltem vera opinio aliorum Scotistarum asserentium , quod licet natura non sit vna positiuè , impediēte singularitate , per quam multiplicatur , sit tamen vna priuatiuè , in quantum si posset esse sine singularitatibus, esset vnate g si natura Petri , & natura Pauli possent esse sine singularitatibus, essent vna natura . Verè enim natura humana est talis , vt si posset esse sine singularitatibus esset omnino vna , & indiuisa , cum per solas singularitates diuidatur ; sed hæc vnitas sufficit ad vniuersale ; ergo natura secundum se præcise est vniuersalis , hoc est vna , & apta ad essendum in multis .

4 Videtur vera opinio aliorum Scotistarum , quod detur vniuersale à parte rei , licet natura non habeat aliam unitatem , quam similitudinis , aut conuenientiæ in specie , vel genere . Nihil enim aliud requiritur ad hoc , vt vniuersale detur à parte rei , nisi vt natura sit vna , & apta ad essendum in multis ; sed natura est vna specie , vel genere , & simul est apta ad essendum in multis : e. g. natura humana est vna specie , & est apta ad essendum in multis hominibus ; natura animalis est vna genere , & simul est apta esse in multis animalibus specie diuersis ;
ergo

ergo datur vniuersale à parte rei .

5. Videtur , quod licet vniuersale non detur in creatis , detur tamen in diuinis , ac diuina essentia verè sit vniuersalis . Essentia enim diuina est vna , & tamen est in pluribus personis per identitatem perfectissimam , per quam de illis est prædicabilis ; sed hoc sufficit ad vniuersale ; ergo natura diuina est vniuersalis .

Respondeo, quod Fonseca, & Scotistæ sumptum occasionem errandi ex eodē principio , ex quo errauit Plato , & alij antiqui . Supponunt enim , quod res eodem pacto sint in se ipsis, sicut repræsentantur intellectui : & quia intellectus format conceptum vniuersalem hominis e. g. atque illud per prædicationem applicat singularibus hominibus , dicendo *Petrus est homo*, *Paulus est homo* , idcò existimauerunt , quod detur à parte rei quædam natura humana vniuersalis , quæ per applicationem quamdam, & contractionem ad homines singulares daret illis esse hominis . Sed reiiciuntur multipliciter . Primo quia falsum est, quod res eodem pacto sint in se ipsis , sicut sunt in intellectu , vt dictum est etiam quæstione superiori . Secundo natura non potest esse vniuersalis in statu possibilitatis , vt dicebat Fonseca : nam eadem natura , quæ est possibilis, existit actu ; sed natura exi-

stans actu non est vniuersalis, sed singularis, vt fatetur Fonseca; ergo etiam natura possibilis non est vniuersalis, sed singularis. Confirmatur, quia quod non potest actu existere non est possibile, sed impossibile; sed natura non potest actu existere ita vt sit vniuersalis; ergo est impossibilis ita, vt sit vniuersalis.

Nec potest dici cum Scotistis, quod natura acta existens sit vniuersalis, hoc est vna positivè in pluribus. Vel enim dicitur, quod natura humana Petri, & natura humana Pauli sit vna solum vnitatem quadam similitudinis, & conuenientiae; vel quod sit vna vnitatem non solius similitudinis, & conuenientiae, sed indistinctionis, ita vt haec natura humana Petri secundum se sit indistincta à natura humana Pauli. Si primum, nihil dicitur, quod non omnes dicamus. Nemo enim est, qui non fateatur in pluribus hominibus esse plures naturas distinctas, sed similes inter se, adeoque vnas vnitatem similitudinis, ac conuenientiae. Si secundum; ergo ponitur in creaturis mysterium Trinitatis, asserendo, quod vna natura secundum se indistincta datur in pluribus hominibus, eo pacto, quo vna natura diuina datur in pluribus personis diuinis. Immò asseritur aliquid mirabilius mysterio Trinitatis. Nam vna natu-

ra diuina est in tribus Personis, quæ non sūt separata loco, neque tempore, neque habent opiniones, ac inclinationes contrarias. At natura humana non solum, similis sed eadem esset in pluribus hominibus separatis loco, & tempore, quorum vnus nascitur, alius moritur, vnus est bonus, alius malus, vnus est beatus in cœlo, alius damnatus in inferno, vnus alteri contradicit, vnus alterum odit; ergo est manifestum, quod in pluribus hominibus sunt plures naturæ secundum se distinctæ, ac non habentes aliam vnitatem, quam similitudinis, ac conuenientiæ.

Nec etiam dici potest cum alijs Scotistis, quod natura Petri e. g. secundum se, esset vna, & eadem cum natura Pauli, sed non est vna, quia impeditur singularitatibus Petri, & Pauli, quibus diuiditur. Omnis enim res est talis, vt facta additione, retineat omnia prædicata secum, identificata, quæ haberet non facta additione: e. g. paries, siue addatur, siue non addatur albedo, retinet omnia prædicata omninò identificata cum pariete; sed prædicatum identificati cum ijs, cum quibus res est idem, est prædicatum omninò identificatum cum quacumque re; e. g. cum homine identificatur hoc prædicatū, quod est *animal rationale*: & ratio à priori est,

quia nihil potest esse idem cum altero medio aliquo, cum quo non est idem; ergo si natura Petri, & Pauli, nisi adderentur ipsis singularitates, essent idem, ut docet hæc sententia, etiam additis singularitatibus, sunt idem; sed de facto non sunt idem; ergo etiam subtractis singularitatibus non essent idem, sed distinguerentur; ergo si in natura Petri, & Pauli non datur vnitas positiua, nec datur vnitas priuatiua. Confirmatur, nam vnitas priuatiua ponitur ad saluandum, quod natura sit vniuersalis, hoc est vna in multis; sed illa admissa, non saluatur, quod natura sit vniuersalis; ergo &c Probatur minor: nam ad saluandum, quod aliquis sit beatus, non sufficit, quod esset beatus, nisi a beatitudine impediretur per miseriam, sed requiritur, ut habeat absolute beatitudinem; ergo ad saluandum, quod natura humana sit vna, & vniuersalis, non sufficit, quod esset vna, nisi impediretur à singularitatibus, sed requiritur, ut absolute habeat vnitatem; sed absolute non habet vnitatem, imò habet singularitatem oppositam vnitati; ergo natura non est vna, nec vniuersalis: alioquin posset etiam dici, quod peccator sit innocens, quia esset innocens, nisi impediretur à peccato exclusiuo innocentiae, eo pacto, quo

quo dicitur naturam esse vnā, quia esset vna, nisi impediretur à singularitate exclusiua vnitatis; ergo cum natura humana Petri, & Pauli nec habeat vnitatem positiuam, nec priuatiuam, habet solum vnitatem similitudinis.

Ad 1. Pro sententia Fonseca. Licet natura possibilis nō sit cōtracta per singularitates actuales, quia cū actu non existat, nullas habet singularitates actuales, est tamen contracta per singularitates possibiles. Natura siquidem possibilis est eadem, ac quæ potest existere: si enim non posset existere, non esset possibilis; sed potest existere cum suis singularitatibus; ergo est possibilis cum suis singularitatibus; ergo non est vna in multis, sed multiplex in multis, adeoque non est vniuersalis.

Ad 2. Distinguo antecedens: Petrus, & Paulus non differunt, hoc est non distinguuntur in natura humana, nego; non differunt, hoc est non sunt dissimiles in natura humana, concedo; & distinguo consequens; ergo habent vnitatem similitudinis in natura humana, concedo; ergo habent vnitatem exclusiuam distinctionis in natura humana, nego; & distinguo secundum consequens; ergo natura humana Petri, & Pauli, & omnium hominum est vna vnitate similitudinis, concedo; vnitate

indistinctionis , nego . Dum dicimus , quod plures homines non differunt in natura , sensus est solum , quod non sunt dissimiles in natura , non autem est sensus , quod non distinguantur in natura , cum verè naturæ plurium hominum distinguantur non minus , quam homines habentes talem naturam ; ergo solum potest inferri , quod plures homines habeant in natura unitatem quamdam similitudinis , quam omnes concedimus ; non autem , quod habeant unitatem exclusivam distinctionis , quam solum negamus .

Ad 3. Si natura Petri , & Pauli ponerentur sine singularitatibus , non distinguerentur , sed identificarentur ; ergo habent unitatem quandam privativam , per quam secundum se præcisè deberent identificari , nisi impedirentur à singularitatibus . Respondeo , quod suppositio est impossibilis , adeoque sequitur utraque pars contradictionis , quod nimirum ex vna parte distinguerentur , ex alia parte non distinguerentur . Deberent distingui , quia distinguuntur se ipsis ; remanerent eadem naturæ ; ergo distinguerentur . Ex alia parte non possent distingui , quia duæ naturæ non possunt distingui , nisi vna sit hæc , alia sit altera ; sed ablatis singularitatibus , vna non esset hæc , nec altera esset

esset altera; ergo non distinguerentur. Confirmatur: nam vnaquæque natura identificatur omnimodè cum aliqua singularitate saltem incompleta, vt dicetur inferius; ergo dum naturæ remanent eadem, retinent aliquam singularitatem, per quam sufficienter distinguuntur.

Ad 4. Dum fit quæstio realis, vtrum detur vniuersale à parte rei, non quæritur, vtrum singularia habeant à parte rei vnitatem quamdam puræ similitudinis, ac cōuenientiæ in natura: id enim est certum, & à nullo negatur: sed quæritur, vtrum detur natura communis pluribus singularibus, quæ sit vna vnitatem maiori, quam puræ similitudinis; ergo dum aduersarij concedunt, quod natura communis habeat vnitatem puræ similitudinis, sed dicunt, quod talis vnitatis sufficit ad vniuersale, diuertunt à quæstione de re ad quæstionem de nomine. Namine enim vniuersalis non intelligitur vnum à parte rei vnitatem puræ similitudinis, quod possit esse in multis, sed vnum à parte rei vnitatem non puræ similitudinis, potens esse in multis. Sed de hoc inferius quæstione sequenti.

Ad 5. Natura diuina non est vniuersalis, sed summè, ac maximè singularis. Natura enim vniuersalis est natura secundum se vna, quæ possit communicari plu-
ri-

ribus naturis singularibus; sed natura diuina ita est vna, vt non possit pluribus naturis singularibus communicari, cum repugnent plures naturæ diuinæ; ergo natura diuina non est vniuersalis, sed summè, & maximè singularis. Ex eadem ratione Deus non est vniuersalis, cum non possit communicari pluribus Dijs, sed maximè singularis. Dum ergo dicitur, quod vniuersale est vnum in multis, sensus est, quod vniuersale est vnum in multis, quæ sunt multa in eadem ratione; e. g. quod sit homo vnus in multis hominibus singularibus; equus vnus in multis singularibus equis. Dicitur tamen quaest. 13. phys. in qua sagetur de supposito, quod licet natura diuina non sit vniuersalis logicè in sensu explicato, est tamen vniuersalis constitutiue, in quantum potest esse in pluribus suppositis.

Verum vnitas conuenienter definitur, ac diuidatur. Quaestio XXIX.

V Idetur, quod non sit conueniens definitio, qua vnitas definitur *negatio diuisionis*. Primo quia vnitas est proprietas entis, & maxima ipsius perfectio; sed
nega-

negatio non est perfectio , nec proprietas entis ; ergo vnitas non est negatio diuisionis . Confirmatur quia Deus est maximè vnus ; sed Deo non competit vlla negatio ; ergo vnitas non est negatio .

2. Vnitas est , proprietas entis realis , adeoque conuenit solis entibus realibus ; ergo definitio vnitatis debet esse talis , vt conueniat solis entibus realibus ; sed hoc quod est *habere negationem diuisionis* conuenit etiam negationibus , & non entibus ; ergo essentia vnitatis non consistit in negatione diuisionis .

3. Definitio debet esse per priora , & notiora ; sed diuisio non est prior , neque notior vnitate ; ergo vnitas non benè definitur per negationem diuisionis .

4. Videtur , quod vnitas non benè diuidatur in transcendentalem , & prædicamentalem . Vnitas enim transcendentalis esset illa , quæ est proprietas entis , ac conuenit omnibus entibus cuiuscumque sint prædicamenti : vnitas prædicamentalis esset illa , quæ propria est soli prædicamenti quantitatis ; sed explicari non potest , quamam vnitas propria sit prædicamenti quantitatis ; ergo mala est diuisio vnitatis in transcendentalem , & prædicamentalem .

5. Videtur , quod vnitas nec benè diuidatur in numericam , seu singularem
& vni-

& vniuersalem, cuius species sunt specifica, generica, & analogica. Malè enim diuiditur in membra, quorum vnum datur à parte rei, aliud datur solum per intellectum; sed vnitas singularis, & numerica datur à parte rei, vnitas vniuersalis datur solum per intellectum; ergo &c. Confirmatur, quia dici non potest, quod vnitas specifica, & generica dentur à parte rei. Vnitas enim specifica est vnitas in specie; vnitas generica est vnitas in genere; sed species, & genera non dantur à parte rei, sed solum per intellectum; ergo vnitas specifica, ac generica non dantur à parte rei, sed solum per intellectum.

Respondeo, quod Aristoteles 5. Metaph. cap. 6. tex. 7. cum enumerasset plura genera vnitatum, concludit. *Vniuersè enim quæcumque diuisionem non habent, quatenus non habent, eatenus vnum dicuntur; ut si quatenus homo diuisionem non habet, vnus est homo, si quatenus animal vnum animal, si quatenus magnitudo vna magnitudo.* Ex his verbis possumus colligere talem definitionem vnus in concreto. *Vnus est, quod quatenus tale diuidi non potest in plura eiusdem rationis cum diuiso.* E. g. Petrus est vnus homo, quia licet possit diuidi in animam, & corpus, tamen non potest diuidi in plures homines: acervus lapi-

lapidum est vnus acervus, quia non potest diuidi in plures acervos eiusdem rationis; idem dic de reliquis. Ex definitione vnus in concreto possumus desumere definitionem vnitatis in abstracto. Est enim *per quam ens quatenus tale diuidi nequit in plura eiusdem rationis cum diuiso*; e.g. vnitas, qua Petrus est vnus homo, est, per quam diuidi non potest in plures homines.

Ex eo, quod vnitas consistat in quadam indiuisibilitate, vt dictum est, sequitur, quod quò maior est indiuisibilitas, eo maior est vnitas. Porro summa indiuisibilitas est, per quam aliquid neque est pars, neque constat ex partibus. Quod enim constat ex partibus habet esse diuisum in plura entia partialia; quod verò est pars habet complementum essendi ab alia comparte; ergo etiam ad summam vnitatem requiritur, vt res neque sit pars, neque constet ex partibus. Hęc summa vnitas vocari potest vnitas simpliciter simplex, & est propria solius Dei, qui neque constat ex partibus, cum sit omninò simplex: neque potest esse pars, quia pars recipit complementum essendi ab alia comparte; sed Deus habet esse omninò perfectum, & completissimum; ergo non potest recipere complementum essendi ab vlllo alio; ergo non potest esse pars. Hanc summam
vni-

vnitatem nulla creatura potest habere : quia quælibet creatura, vel est pars, vel constat ex partibus. Omne enim ens creatum completum est compositum saltem ex natura & subsistentia, adeoque constat ex partibus: omne ens creatum incompletum, licet possit non constare ex partibus, tamen est essentialiter pars alicuius totius, vt dicetur etiam inferius suo loco, cum agetur de subsistentia. Quia verò primum, & perfectissimum est ratio, vel causa cæterorum, ideò summa, ac prima vnitas diuinæ essentię est ratio, vel causa omnium aliarum vnitatum, & omnium numerorum, qui per tales vnitates constituuntur, ita vt ipsa non sit pars propriè vllius numeri, nec ab alia vnitate principietur. Est prima ratio omnis numeri, quia est ratio numeri ternarij diuinarum personarum, & est causa numerorum penè innumerabilium existentium in creaturis, nec includitur in vlllo numero tamquam pars perfectibilis per alias partes totius numeri, sed purè tamquam adequatum principiū totius perfectionis, quę est in tali numero. E conuerso vnitates creatę & sunt pars numeri, quia adduntur vnitati diuinę tamquam ab ipsa accipientes totam suam perfectionem, & sunt causatę ab aliqua alia vnitate, nimirum diuina.

Post vnitatem summam, seu simpliciter
sim-

simplicem sequitur vnitas simplex, per quā aliquid non constat ex partibus, sed est pars. Omnia composita (excepto fortasse continuo) componuntur tandem ex vnitatibus simplicibus, hoc est non constantibus ex partibus, nè procedatur in infinitum, sed talibus, vt sint partes compositi. Et quia, vt dictum est, omnia entia creata completa sunt composita, ideo omnia entia creata completa sunt numeri constantes ex vnitatibus simplicibus: solus Deus est vnitas nullo pacto composita.

Tertia vnitas est composita, & est per quam ens ita est vnum, vt constet ex partibus: e. g. homo est vnū non simplex, sed compositum, quia constat ex partibus. Eò verò ens magis est vnum tali vnitare, quò partes, ex quibus constat, sunt minus diuisæ quò adesse, & magis sibi inuicem communicant suam perfectionem: e. g. homo est magis vnus, quam exercitus, quia homo componitur ex partibus, hoc est anima, corpore, & vnione, quæ magis sibi inuicem communicant suam perfectionem, quam communicent milites, ex quibus componitur exercitus. Similiter quod est vnum per se magis est vnum, quam quod est vnum solum per accidens, ex eadem ratione. In quo verò consistat vnum per se, vel per accidens dicetur suo loco.

Con-

Constat verò inductione vniuersalissi-
ma, quod entia completa, quæ maiorem
habent vnitatem, atque indiuisibilitatem,
habent etiam maiorem entitatem, ac per-
fectionem. Ita Deus, qui summè est vnus,
est summè perfectus. Angeli maiorem
habent vnitatem, quam homines, cum nō
constent ex anima, & corpore, sicut ho-
mines, ideoque sunt perfectiores homini-
bus. Ex Angelis verò illi sunt perfectio-
res, qui per vnum actum plura cogno-
scunt distinctè, ideoque habent maiorem
vnitatem in cognoscendo. Homines sūt
perfectiores brutis, quia hominis anima
non constat ex partibus, sicut animæ bru-
torum: vel si animæ brutorum perfectio-
rum sunt indiuisibiles, vt docent Thomi-
stæ, adhuc anima hominis est simplicior,
quia potest esse sine materia, secus animæ
brutorum. Ex brutis, quæ diuidi non
possunt in duo, quales sunt equus, leo,
canis &c. sunt perfectiora insectis, quæ
possunt diuidi in duo, quorum vtrumque
viuat, cuiusmodi sunt serpentes, & alia.
Insecta sunt perfectiora plantis, quia
maiorem habent vnitatem, & indiuisibi-
litatem; insecta enim diuisa non uiuunt,
sicut plantæ, quarum partes si plantentur
in terra, ita vt trahant alimentum, solent
euadere in alias plantas. Plantæ adhuc
sunt minus diuisibiles mixtis, ideoque
sunt

sunt magis vnę , quam mixta inanimata , quę conseruari possunt etiam facta maxima diuisione . Adhuc elementa sunt magis diuisibilia , quam mixta ; & demum materia prima , quę est omnium maximę diuisibilis , ac minimę vna , cum facta quacumque diuisione , conseruetur , est imperfectissimum ens , & minimę vnum .

Constat etiā inductione , quodque magis sunt vnum , sunt eminenter , ac virtualiter plura . Itā Deus , qui summę est vnus , est etiam eminenter omne ens , cum contineat omnia in suo esse , & in sua perfectione , ac possit vniuersa causare . Angeli in quantum habent species ingenitas , per quas cognoscunt res omnes , sunt quodammodo omnia intelligibilia . Anima rationalis est omnia in potentia , in quantum potest acquirere species omniū rerum . Animalia sunt in potentia omnia sensibilia . Plantę in quantum assiduę nutriuntur fiunt semper plura , & plura entia . Insecta sunt in potentia omnia elementa . Elementa verò habent esse limitatissimum .

Pręter diuisionem vnitatis in simpliciter simplicem , simplicem , & compositam , diuiditur etiam in trāscendentalem , & predicamentalem , singularem , & vniuersalem , numericam , specificam , genericam , & analogicam , vt iam explicabitur

in

in responsione ad, quartum, & quintum argumentum.

Ad 1. Ex eo, quod unitas ut proprietas, ac perfectio entis, negatio verò non possit esse proprietas, nec perfectio entis, ut respondeatur, debent explicari duo: primum in quo sensu unitas sit proprietates entis: secundum in quo sensu unitas sit negatio. Avicenna, ut refert S. Thomas prima parte quaest. 51. artic. 1. in corpore credidit, quod unitas addat suprà ens rem aliquam distinctam, per quam ens sit unum, eo pacto, quod albedo addit suprà subiectum rem aliquam distinctam, qua subiectum constituatur album. Sed reiicitur à S. Thoma, quia hæc res, quæ additur suprà ens, est una; vel ergo est una per se ipsam, vel per aliquid aliud; si est una per aliquid aliud, de illo redit difficultas, & proceditur in infinitum: si est una per se ipsam; ergo etiam ens est unum per se ipsum; ergo unitas non est proprietates entis, tamquam res addita suprà ens. Dicitur ergo unitas esse proprietates entis, in quantum licet quodlibet ens sit unum per se ipsum, e. g. Petrus sit unus homo per se ipsum, tamen nos connaturaliter prius formamus conceptum, quo cognoscimus aliquid esse ens, deinde verò formamus conceptum quo cognoscimus expressè, quod sit unum.

Hinc

Hinc verò potest etiam explicari, in quo sensu vnitas sit negatio diuisionis. Pro quo debet aduerti, quod dupliciter possumus nos formare conceptum de perfectionibus rerum: primò via affirmatiua, formando directè conceptum perfectionum ipsis conuenientium: e. g. cum cognosco, quod aliquid est ens, cognosco directè, quod habet perfectionem essendi. Secundo via negatiua, formando directè conceptum quarundam imperfectionum, quæ competunt alijs rebus, deinde verò per ablationem talium imperfectionum, formando conceptum de perfectionibus oppositis. Hoc pacto cognoscimus spiritualitatem. Formamus enim conceptum de imperfectione materialitatis, deinde verò per eius remotionem formamus cōceptum de perfectione opposita spiritualitatis, quam tamen cognoscimus esse perfectionem positiuam. In casu nostro vnitas dicitur negatio diuisionis, quia prius formamus conceptum de imperfectione diuisionis, ac diuisibilitatis; deinde verò remouentes talem defectum, formamus conceptum vnitatis, & indiuisibilitatis oppositæ diuisibilitati, ac diuisioni. Ratio vero, cur prius formetur cōceptus diuisionis, quam indiuisibilitatis, afferetur in responsione ad 3. Hinc patet responsio ad argumentum. Vnitas est
pro-

proprietas, & perfectio entis; negatio non est proprietas, neque perfectio entis; ergo &c. Distinguo minorem; negatio quo ad rem ipsam, transeat; negatio secundum modum significandi, nego. Negationes secundum modum significandi sunt maxime perfectiones; e. g. infinitas Dei, quæ secundum modum significandi est negatio finis, secundum se ipsam est perfectio opposita limitationi, per cuius remotionem cognoscitur. Sic in casu nostro vnitas, quæ secundum se ipsam est perfectio opposita imperfectioni diuisionis, ac diuisibilitatis, est maxima perfectio entis; vnitas verò diuina, quæ est perfectio opposita defectui cuiuscunque diuisionis, ac diuisibilitatis, est maxima perfectio Dei.

Ad 2. Dum dicitur, quod vnitas est proprietas solius entis realis, intelligitur de vnitatem, seu negatione diuisionis fundata in entitate rei. Talis verò negatio fundata in entitate est maxima perfectio, & nullo pacto competit negationibus, & non entibus. Quod verò posita entitate, & perfectione, vnitas sit perfectio, patet. Nam vnitas cum perfectione est perfectio, & quò maior est vnitas, est maior perfectio; sed indiuisibilitas est summa vnitas; ergo indiuisibilitas entitatis, ac perfectionis est maxima perfectio. E con-

uer-

uerso vnitas cum non ente, & non perfectione nulla est perfectio; ergo cum vnitas non fundatur in perfectione, non est vlla perfectio. Ex eo, quod vnitas entis sit perfectio, oritur, vt notat S. Thomas prima parte quest. 11. art. 1. quod vnaquæque res sicut custodit suum esse, ita custodit suam vnitatem, & sicut resistit destructioni, sic resistit diuisioni; e.g. homo custodit vnionem anime cum corpore, & diuisioni, per quam anima separatur à corpore, resistit sicut destructioni. Præterea custodit continuationem partiũ; diuisioni verò per vulnera resistit vehementissimè, ideoque ex diuisione partium animatarum sequitur dolor.

Ad 3. Sufficit ad definitionem, quod sit per priora, & notiora quoad nos, licet illa sint ex natura sua posteriora, ac minus nota. Iam quoad nos diuisio, ac diuisibilitas notior est indiuisibilitate, vt dicit Aristoteles 10. met. tex. 9. per hæc verba: *significatur ex diuisibili indiuisibile, eo quod magis multitudo, ac diuisibile sensibile est. Quare multitudo ratione prior quam indiuisibile propter sensum est.* Idem ex Aristotele docuit S. Thomas prima parte quest. 11. art. 2. ad 2. Ratio, cur diuisibile sit notius est, quia est magis sensibile, cum per sensum primo percipiamus diuisibile. Secundum naturā verò indiuisibile prius
V est,

est, ac notius diuisibili, cum indiuisibile sit causa diuisibilis, & vnitas sit causa numeri.

Ad 4. Vnitas, vt dictum est, consistit in negatione diuisionis, ac diuisibilitatis. Quia ergo res quantę habent aliquam specialem indiuisibilitatem in partes quantitatuas, ideò habent etiam aliquam specialem vnitatem, quę idcirco dicitur vnitas prædicamentalis. Est autem vnitas prædicamentalis *indiuisibilitas, vel indiuisio rei quantę opposita diuisioni, vel diuisibilitati quantitatuę*; multitudo verò, seu numerus prædicamentalis est *multitudo resultans ex diuisione rei quantę*, & hic numerus prædicamentalis vocatur quantitas discreta, & non datur in entibus spiritualibus, hoc est in personis diuinis, & angelicis, licet in ipsis detur numerus transcendentalis. Talem numerum prædicamentalem definiuit Aristoteles 3. physicor. tex. 68. dicens *numerus est vna plura, & quanta quedam*.

Ad 5. Vt respondeatur primo definienda est vnitas singularis, & vniuersalis, ac præsertim vnitas specifica, generica, & analogica. Secundo examinandum, an, & quomodo vnitas specifica, generica, & analogica dentur à parte rei. Quoad primum: vnum numero est, quod quatenus tale diuidi non potest in plura, de quibus fit

seor-

seorsim predicabile ; e. g. Petrus est vnus numero homo , quia non potest diuidi in plures homines , de quibus sit seorsim predicabilis : Roma est vna numero ciuitas ex eadem ratione. Vnum vniuersale est , quod ita est vnum saltem unitate abstractionis , ut possit diuidi in plura , de quibus est seorsim predicabile , ut homo , ciuitas . Homo enim potest diuidi in plures homines , Petrum , Paulum , de quibus est seorsim predicabilis : ciuitas similiter diuidi potest in plures ciuitates . Ex his verò potest proportionaliter colligi definitio unitatis singularis , ac vniuersalis in abstracto . Dum opponitur , quia malè vnitas diuiditur in membra , quorum vnum detur à parte rei , aliud detur solum per intellectum . Respondeo id esse falsum , præsertim si sit controuersum de aliquo membro , vtrum detur à parte rei , vel per intellectum ; sed est controuersum vtrum vnitas vniuersalis detur per intellectum , vel à parte rei ; ergo benè vnitas diuiditur in singularem & vniuersalem .

Iam vnum specie est , quod potest predicari de pluribus similibus in tota essentia , ac definitione , & dissimilibus solum , & à nobis discernibilibus per accidentia : e. g. homo est vnum specie , quia potest predicari de pluribus hominibus Petro , & Paulo , qui

sunt similes in tota essentia, ac definitione hominis, & sunt dissimiles, & à nobis discernibiles solum per accidentia. Vnitas specifica est *conuenientia pluriũ similitum in tota essentia, ac definitione, ac dissimilium solum in accidentibus modo explicato.*

Vnum genere est, quod dicitur de pluribus conuenientibus in parte essentiae, & definitionis, & disconuenientibus in alia parte, in qua non includitur formaliter illa pars, in qua conueniunt. E. g. animal est vnum genere, quia dicitur de pluribus, e. g. de homine, & equo conuenientibus in hoc, quod *sint animal*, quæ est pars definitionis vtriusque, & disconuenientibus per rationalitatem, & irrationalitatem, quæ est altera pars definitionis, in qua non includitur formaliter hoc, quod est *esse animal*. Vnitas generica est *similitudo, & conuenientia in parte essentiae, ac definitionis modo explicato.*

Vnum analogicè est, quod dicitur de pluribus disconuenientibus in tota essentia, eo quod non sit pars, in qua conueniant formaliter non inclusa in parte, in qua disconueniunt. e. g. ens est vnum analogicè, quia dicitur de substantia, & accidentibus, quæ sunt primo diuersa in tota essentia, eo quod ratio entis includitur formaliter in rationibus perfectatis, & inaleiatis, quibus differunt, vt melius etiam explicabimus inferius.

Quo

Quoad secundum dubium, vtrum vnitas specifica, generica, & analogica datur à parte rei: respondeo, quod si sumantur pro pura similitudine dantur à parte rei. Certum est enim, quod à parte rei Petrus, & Paulus sunt similes in tota essentia; ergo si vnitas specifica nihil est aliud, quam similitudo in tota essentia, datur à parte rei. Confirmatur, quia quæ à parte rei specie non differunt, sunt vnum specie; sed à parte rei Petrus, & Paulus non differunt specie; ergo Petrus, & Paulus à parte rei sunt vnum specie. Similiter à parte rei Petrus, & equus nō differunt in genere animalis; ergo sunt vnum in genere animalis. Tales tamen vnitates sunt vnitates solum secundum quid, & cum addito distrahente. Ratio est quia quæ sunt vnum specie, non possunt dici vnum simpliciter, & sine addito, sed solum possunt dici *vnum specie*, atque adeò cum addito distrahente ab vnitate perfecta, quæ non est vnitas meræ similitudinis. Si verò vnitas specifica, & generica sumantur pro vnitate in aliqua ratione abstracta, dico, quod sicut rationes non sunt abstractæ à parte rei, sed per intellectum, sic tales vnitates non dantur à parte rei, sed solum per intellectum. Hinc patet ad argumentum: species, & genera non dantur à parte rei;

rei ; ergo nec vnitas specifica , & generica ; distinguo antecedens : species , & genera si sumantur pro rationibus abstractis non dantur à parte rei , concedo ; species , & genera si sumantur pro naturis conuenientibus in essentia , vel parte essentia , nego antecedens ; & distinguo eodem modo consequens . Et quia quidam species & genera abstracta vocant species , & genera formaliter ; naturas verò conuenientes in essentia , vel parte essentia vocant species solum fundamentales , ideò consequenter dicunt , quod datur à parte rei vnitas specifica , vel generica solum fundamentaliter , non verò formaliter : qui modus loquendi non est respuendus . Sed quo ad hoc non potest esse alia quæstio , quam de nomine .

Vtrum identitas , ac distinctio conuenienter definiantur , ac diuidantur .

Quæstio XXX.

Primo videtur , quod inconuenientes sint definitiones , quibus identitas describitur affirmabilitas in recto vnius de alio ; distinctio negabilitas in recto vnius de alio : 1. quia cum duo sunt idem , non est in ijs vnum , & aliud ; ergo identitas non est affirmabilitas vnius de alio .

2. Debet

2. Debet explicari quid requiratur à parte rei ad hoc, ut aliquid sit affirmabile de alio in recto; sed id non explicatur: ergo non satis explicatur identitas.

3. Videtur, quod inconueniens sit diuisio distinctionis in distinctionem realem & rationis, & etiam in distinctionem realem, & virtualem. Nam inconueniens est diuisio generis in species, quarum singulis non conuenit definitio generis; sed definitio distinctionis ut sic non conuenit distinctioni rationis, neque virtualis ergo. Probatur minor: nam distinctio rationis & distinctio virtualis non est negabilitas vnius de alio: quæ enim distinguuntur sola ratione, vel solum virtualiter non sunt negabilia, ideoque paternitas, & essentia diuina negari non possunt, dicendo, quod essentia non sit paternitas.

4 Videtur etiam inconueniens diuisio distinctionis in realem, & modalem. Mala est enim diuisio in mēbra, quorum vnum includitur in alio; sed distinctio modalis includitur in reali; nam distinctio modalis non est distinctio rationis; sed omnis distinctio, quæ non est rationis est realis; ergo distinctio modalis est realis.

5. Si bona esset diuisio distinctionis in realem, & modalem, distinctio realis esset negabilitas duorum mutuo separabi-

lium ; modalis esset distinctio duorum . separabilium non mutuo ; sed hoc est falsum : sequeretur enim , quod Personæ diuinæ non distinguerentur realiter , cum non sint mutuo separabiles , sed omnimodo inseparabiles ; ergo &c.

6. Non explicatur , quid sit distinctio formalis ex natura rei ; utrum distinctio suscipiat magis , & minus , ita ut quæ distinguuntur realiter magis distinguantur , quam quæ solum modaliter ; ergo non conuenienter traditur doctrina de distinctionibus .

Respondeo , quod sicut bonum definitur per appetibilitatem , & dicitur esse , quod omnia appetunt ; pulchrum describitur per delectabilitatem , & dicitur esse , quod delectat contemplantem ; sic identitas , ac distinctio definiri debent per affirmabilitatem , & negabilitatem , dicendo , quod identitas est affirmabilitas in recto vnius de alio : distinctio est negabilitas in recto vnius de alio . Verum quia ad hoc , ut aliqua sint affirmabilia , aut negabilia à parte rei , debent certo modo se habere in se ipsis , ideò tradita prima explicatione identitatis , ac distinctionis per affirmabilitatem , ac negabilitatem , inquirendum vltcrius , quomodo res debeant se habere in se ipsis , ad hoc ut sint affirmabiles , aut negabiles in

tecto, eo pacto, quo tradita prima^a explicacione pulchri per hoc, quod delectet contemplantem, inquirendum est, quo pacto debeant res se habere, vt sint contemplanti delectabiles.

In hoc autem manifestum est primo, quod quæ non habent à parte rei aliquam vnitatem, & communicationem, per quã se inuicem communicent, non sunt affirmabilia, ideoque ad identitatem, & affirmabilitatem requiritur aliqua vnitas, & communicatio. Secundo manifestum est, quod vnitas, qua aliqua se communicant separabiliter, non sufficit ad identitatem, & ideo anima, & corpus, & vniuersum, materia, & forma, modus, & res, quia se inuicem communicant separabiliter, non sunt idem. Tertio nec sufficit ad identitatem communicatio, qua vnum se communicat alteri productiue, & in diuerso supposito, & ideo Pater æternus, licet communicet Filio totam suam perfectionem, quia tamen communicat productiue, & in diuerso supposito, non identificatur cum Filio, & vniuersum causa non identificatur cum effectu, nec produciens cum producto.

His exclusis, explicandum, qualis vnitas sit identitas. Dico, quod identitas est *summa vnitas duorum spectantium ad vnum suppositum*. Porro summa vnitas abstrahit

à triplici modo, quo vnitas potest dici summa, & ab hoc triplici modo sumi potest triplex gradus identitatis. Primò vnitas summa est summa indiuisio, & inseparabilitas duorum existentium in vno supposito, per quam vtrumque est equè inseparabile ab alio, sicut à se ipso; & hæc potest vocari identitas realis infimi gradus, vel identitas summa physicè.

Secundo vnitas summa est summa communicatio duorū existentium in vno supposito, per quam alterum equè perfectè se communicat alteri, sicut sibi ipsi, ita vt non minus perficiat alterum, quam se ipsum; & hæc vocatur identitas summa metaphysicè. Tertio vnitas summa est summa conuenientia duorum, quorum vtrumque consentiat cum altero in omnibus omninò prædicatis, non minus quam cum se ipso; & hæc potest vocari, identitas summa logicè, quia est conuenientia in omnibus prædicationibus. Vocatur etiam à recentioribus identitas virtualis intrinseca; ab Aureolo vocatur identitas repetitionis, per quam omne prædicatum, quod dicitur de vno, repetitiuè potest dici de altero. Omnes istæ identitates fundant mutuā affirmabilitatem in recto. Cū enim dicimus, *homo est animal rationale*, affirmamus identitatem summam etiam logicè, per quam homo & animal rationale con-

sen

sentiant in omnibus prædicatis, ac sint omnibus modis idem: cum dicimus, quod *Paternitas est diuina essentia*, affirmamus, quod Paternitas habet cum diuina essentia identitatem summam metaphysicè, per quam essentia diuina ita perfectè communicat se ipsam, & totam suam perfectionem paternitati, sicut sibi ipsi, licet non habeant identitatem summam logicè, eo quod non consentiunt in omnibus prædicationibus, cum essentia identificetur cū tribus Personis, Paternitas non identificetur cum tribus personis. Cum dicitur, quod *animalitas est realiter rationalitas*, affirmamus, quod habent identitatem realem infimi gradus, seu summam physicè, per quam in vno supposito hominis ita sunt inuicem inseparabiles, sicut animalitas est inseparabilis à se ipsa, licet fortasse non habeant identitatem summam logicè, neque metaphysicè.

Triplici identitati opponitur proportionaliter triplex distinctio. Identitati virtuali intrinsecè, seu summæ logicè opponitur distinctio virtualis intrinseca, seu distinctio logica obiectiua, quæ definiiri potest; *recessus duorum habentium summam identitatem metaphysicam ab identitate summa logicè, per hoc quod possint dissentire in aliquibus prædicationibus: e.g. natura diuina, & paternitas, distinguuntur logicè,*

seu virtualiter intrinsece quia licet habeant summam identitatem metaphysicam, tamen possunt dissentire, & de facto dissentiunt in aliquibus prædicationibus, ut in hac, quod natura identificatur cum tribus personis; Paternitas non identificatur cum tribus personis. Identitati summæ metaphysicè opponitur distinctio formalis ex natura rei, quæ potest vocari distinctio metaphysica obiectiua, & definiri potest; *recessus duorum realiter identificantium ab identitate summa metaphysicè, per hoc, quod non æquè perfectè se communicent alteri, sicut sibi ipsis*; e. g. probabiliter rationes genericæ, & differentiales, ut rationalitas; & animalitas distinguuntur metaphysicè, seu formaliter ex natura rei, quia licet habeant identitatem summam physicè, per quam una est inseparabilis ab altera non minus, quam à se ipsa, tamen animalitas non æquè se communicat rationalitati, sicut sibi ipsis, ut dicitur inferius. Demum identitati reali, seu summæ physicè opponitur distinctio realis generica, quæ definiri posset, *recessus ab identitate physica, per quem duo vel non spectant ad unum suppositum, vel spectant separabiliter*.

Distinctio realis genericè, seu summa physicè subdiuiditur in distinctionem realem specificè, & distinctionem modalem.

Di-

Distinctio realis specificè est, quæ intercedit inter duo, quorum utrumque potest esse, quin uniatur alteri intrinsecè: e.g. tres Personæ diuinæ distinguuntur realiter, quia nulla persona vnitur alteri ita, vt illam intrinsecè perficiat per se ipsam. Similiter anima, & corpus realiter distinguuntur, quia & corpus potest esse, quin uniatur animæ, & anima potest esse, quin uniatur intrinsecè corpori. Distinctio modalis est, quæ intercedit inter duo, quorum unum tantum potest esse, quin uniatur alteri intrinsece; e.g. motus, quo ego moueor, distinguitur modaliter à me, quia licet meus motus non possit esse, quin uniatur intrinsecè mihi, tamen ego possum esse sine tali motu, atque adeò quin vniam tali motui. Hinc potest colligi definitio modi, & formalitatum obiectiuarum. Modus enim est entitas, quæ non potest esse, quin uniatur intrinsecè alteri, quod potest esse sine illa. Formalitates obiectivæ sunt rationes formaliter ex natura rei distinctæ, quarum nulla potest esse, quin uniatur alteri intrinsecè ad constituendum aliquod unum: e.g. animalitas, & rationalitas hominis sunt formalitates obiectivæ, quia nec animalitas hominis potest esse, quin uniatur intrinsecè rationalitati, nec rationalitas potest esse, quin uniatur animalitati ad hominem constituendum.

Ad

Ad 1. Cum dicimus, quod identitas est affirmabilitas vnius de alio, non significatur, quod quæ habent identitatem debeant habere aliquam pluralitatem à parte rei: nam procul dubio quæ habent identitatem à parte rei omnibus modis summam nullam à parte rei habent pluralitatem, qua detur vnum, & aliud cum aliqua distinctione à parte rei: solum igitur significatur, quod identitas est affirmabilitas duorum nullam habentium pluralitatem à parte rei, sed habentium aliquam pluralitatem ratione nostra, in quantum sumuntur vt duo per duos conceptus, per quos vnum constituitur subiectum, aliud prædicatum propositionis affirmantis quod sunt idem.

Ad 2. Patet ex dictis: Iam enim est explicatum quid requiratur à parte rei ad hoc, vt vnum sit affirmabile de alio.

Ad 3. Cum genus diuiditur in species, quarum vna participat rationem generis simpliciter, altera solum proportionaliter, & cum addito aliquo distrahente, etiam definitio generis debet ita conuenire speciebus, vt vni conueniat simpliciter, alteri proportionaliter, & cum addito distrahente. In casu nostro sola distinctio realis est distinctio simpliciter: distinctio rationis non est distinctio simpliciter, sed solum secundum quid, & addendo

addendo *ly rationis* ; ergo definitio distinctionis debet conuenire simpliciter distinctioni reali, distinctioni verò rationis debet conuenire solum secundum quid , & cum addito distrahente. Distinctio igitur realis est negabilitas duorum secundum rem ipsam: distinctio rationis est negabilitas rationum , seu conceptuum de eadem re . E. g. distinctio rationis inter hominem, & animal rationale non est negabilitas hominis de animali rationali, sed negabilitas rationis definitiue hominis de ratione definibili eiusdem . Similiter distinctio virtualis non est simpliciter distinctio, sed solum est distinctio virtualis, ita vt *ly virtualis* sit additum distrahens ; ergo non est negabilitas simpliciter , qua possit absolutè dici , quod vnum non sit aliud , sed est negabilitas secundum quid, qua potest tantum dici , quod vnum non est aliud virtualiter , ita vt *ly virtualiter* sit additum distrahens . Proportionaliter est philosophandum de distinctione ex natura rei . Addo , quod sicut color diuiditur in album , nigrum, & alios colores medios, sic distinctio diuiditur in realem , & rationis , & distinctiones aliquantulum medias, cuiusmodi sunt virtualis, & formalis ex natura rei , quæ aliquid participant de vtraque ; de reali in quantum sunt rebus intrinsecæ ; de distinctione rationis ,

tionis, in quantum non fundant negabilitatem, per quam res negentur simpliciter, sed solum secundum quid.

Ad 4. Sicut Angelus sumitur dupliciter; primo pro genere communi omnibus substantijs creatis completis spiritualibus; secundo pro Angelis ultimi chori: sic distinctio realis sumitur dupliciter; primo pro genere communi ad omnes distinctiones, per quas res sunt negabiles simpliciter; secundo pro specie distinctionis, per quam duo sunt ita negabilia, ut utrumque possit esse, quin uniatur alteri intrinsecè. Distinctio modalis includitur in distinctione reali genericè sumpta, quæ non est membrum diuisionis, per quam distinctio diuiditur in realem, & modalem, sed est ipsum genus diuisum: at non includitur in distinctione reali specificè sumpta.

Ad 5. Iam dictum est, quod distinctio realis pro ut opponitur modali non benè definitur *negabilitas duorum mutuo separabilium*, alioquin eius definitio non conueniret distinctioni diuinarum Personarum, quæ est realis: sed definiri debet, *negabilitas duorum, quorum utrumque potest esse, quin uniatur alteri intrinsecè modo explicato.*

Ad 6. Distinctio suscipit magis, & minus. Cum enim sit recessus ab identitate,

&

& à summa communicatione duorum, quo minus recedit, eò est minor. Identitas omnibus modis summa metaphysicè, & logicè est identitas virtualis. Distinctio virtualis, seu logica est minima omnium distinctionum intrinsecarum rebus, quia est recessus à summa communicatione logica, cum summa communicatione metaphysica. Distinctio modalis est maior formali ex natura rei, quia est recessus à summa inseparabilitate. Distinctio realis in creatis est maior modali, quia cum per illam utrumque possit esse, quin intrinsecè uniatur alteri, magis adhuc recedit à summa communicatione perfectiva, quam modalis, in qua unum solum potest esse, quin intrinsecè uniatur alteri. Distinctio tamen realis divinarum Personarum est minor etiam distinctione modali, quia est negabilitas duorum communicantium in tota essentia, & perfectione: ideoque S. Thomas par. 1. q. 40. ad tertium docet illam esse minimam.



Virum in Creatis dari possit distinctio virtualis intrinseca, aut formalis ex natura rei.

Questio XXXI.

VIdetur, quod possit in creatis dari distinctio virtualis intrinseca 1. quia potest dari, & de facto datur in diuinis; ergo etiam potest dari in creatis. Si verò dicatur, quod in diuinis potest dari ratione infinitatis, repugnat in creatis ratione limitationis; contra est, quia non apparet, quid conferat ad hoc, ut repugnet, vel non repugnet distinctio virtualis, finitas, vel infinitas entis.

2. Si repugnaret in creatis distinctio virtualis, maximè quia sequeretur, quod de eodem verificarentur prædicata contradictoria; sed hæc ratio probat etiam quod repugnet in diuinis; si enim datur inter paternitatem, & diuinam essentiam, verificantur de eodem prædicata contradictoria: nam essentia, & paternitas sunt idem, & tamen essentia identificatur cum tribus Personis, paternitas non identificatur cum tribus personis, sed cum solo Patre, quæ sunt prædicata contradictoria; ergo non repugnat in creatis distinctio

vir-

tualis. Confirmatur, quia repugnantia distinctionis virtualis in creatis est quia ea, de quibus verificantur contradictoria non sunt inuicem affirmabilia, atque adeò non sunt realiter idem: e. g. si animalitas cognoscitur, rationalitas non cognoscitur, non possunt inuicem affirmari, alioquin esset vera hæc propositio, *cognitum est non cognitum*; sed hæc ratio probat etiam in diuinis: nam si essentia est idem cum filio, esset vera hæc propositio, *idem cum filio est non idem cum filio*, immò esset verum, quod idem est esse idem cum filio, ac non esse idem cum filio, cum essentia sit *esse idem cum filio*, paternitas sit *non esse idem cum filio*; ergo non repugnat in creatis distinctio virtualis.

3. Si in creatis daretur distinctio sufficiens ad hoc, ut verificarentur contradictoria de prædicatis, quæ non distinguuntur ex natura rei, daretur distinctio virtualis; sed datur talis distinctio ergo &c. Minor probatur: nam in substantia ratio entis, & ratio perfectitatis non distinguuntur ex natura rei; sed de ratione entis, & de ratione perfectitatis verificantur contradictoria; ergo. Probatur minor: nam distinguere ratione ab ente, non distinguere ratione ab ente, sunt prædicata contradictoria; sed ens non distinguitur ratione ab ente, perfectitas distinguitur
ratio-

ratione ab ente ; ergo de ente , & perfectitate verificantur contradictoria. Rursus cognosci clarè per aliquam cognitionem, & non cognosci clarè per eandem cognitionem sunt prædicata contradictoria ; sed ratio entis cognoscitur clarè cognitione, qua dico *ens* , ratio perfectitatis non cognoscitur clarè eadem cognitione ; ergo &c. Confirmatur , nam quælibet formalitas , & perfectio creata per seipsam formaliter est perfectio limitata , & imperfecta ; ergo identificatur ex natura rei cum sua imperfectione ; sed de perfectione, atque imperfectione verificantur contradictoria tum iam explicata , tum etiam alia , nam perfectio per se ipsam est amabilis ; imperfectio per se ipsam non est amabilis, sed solum ratione perfectionis ; perfectio per se ipsam placet, & mouet ad amorem, secus imperfectio, ergo .

4. Videtur, quod si repugnat in creatis distinctio virtualis intrinseca , repugnet etiam distinctio formalis ex natura rei . Ideò enim repugnat distinctio virtualis intrinseca, quia de eodem verificarentur contradictoria: e. g. idem esset cognitum, & non cognitum, sicut dictum est in secundo argumento ; sed istæ rationes probant etiam repugnare distinctionem formalem ex natura rei ; nam etiam formalitates ex natura rei distinctæ realiter identificantur ;

tur ; ergo &c. Confirmatur , quia sequeretur , quod idem distingueretur à se ipso , idem esset melius se ipso , vel saltem melius identificaretur cum deteriore, quæ sunt absurda .

5. Distinctio formalis ex natura rei est summa inseparabilitas in vno supposito plurium non habentium summam conuenientiam in omnibus prædicatis ; sed hæc summa inseparabilitas repugnat ; spectat enim ad diuinam omnipotentiam posse separare omnia , quæ non sunt omninò idē, itavt habeant summam conuenientiā in omnibus prædicatis ; ergo repugnat in creatis distinctio formalis ex natura rei .

Respondeo , quod ex principijs fidei satis clarè deducitur , quod distinctio virtualis prout definita est quæstione superiori, saltem vniuersim non repugnat, sed de facto datur in diuinis. Distinctio enim virtualis est , per quam quæ habent summam identitatem metaphysicam , hoc est summam communicationem , per quam vnum tam perfectè communicatur alteri , sicut sibi ipsi , non habent summam identitatem logicam , sed disconueniunt in aliquo prædicato ; sed natura diuina , & paternitas habent summam identitatem metaphysicā, per quā natura diuina tā perfectè communicatur Paternitati, sicut sibi ipsi ,

ipsi ; cum paternitas per naturam diuinam sit summè perfecta ; ex alia parte natura diuina , & paternitas disconueniunt in aliquibus prædicatis, vt in hoc quod natura identificatur cum tribus personis , paternitas non identificatur cum tribus personis ; ergo inter naturam diuinam , & paternitatem datur distinctio virtualis intrinseca . Et quia disconuenientia in prædicatis assignatis datur actu inter naturam, & paternitatem ante omnem operationem intellectus , - ideò distinctio virtualis datur actu ante operationem intellectus . Hinc confurgit difficilis quæstio , vtum distinctio virtualis sit possibilis in Deo ratione solius infinitatis , ita vt implicet in creatis , an verò sit possibilis abstrahendo ab infinitate , ita vt sit etiam possibilis in creatis .

Dicendum , quod distinctio virtualis est possibilis in Deo ratione solius infinitatis , adeoque repugnat in creaturis . Probatur positis principijs fidei circa mysterium Trinitatis . Essentia enim diuina est summum, atque infinitum bonum ; sed essentia boni est , vt non sit avarum , ac sterile , sed sit communicatum sui ; ergo essentia summi boni est , vt sit summè communicatum sui ; sed eo ipso , quod est summè communicatum sui , debet habere personalitates realiter identi-

tificatas cum essentia, ac virtualiter distinctas ab eadem; communicatio enim non potest dari sine aliqua distinctione saltem logica, adeoque si ab eterno nihil fuisset logicè distinctum ab essentia diuina, illa fuisset omnino sui ipsius auara, ac sterilis, ac nulli se ab eterno communicaret; si personalitates non identificarentur realiter cum diuina essentia, non se ipsis communicaret summè, cum identitas realis sit summa communicatio, qua vnum ita se communicat alteri logicè distincto, sicut sibi ipsi, dans illi tantam omnino perfectionem, quantam sibi; ergo eo ipso, quod essentia diuina est summum bonum, debet habere personalitates realiter identificatas, ac virtualiter, & logicè distinctas ab essentia. E conuerso omnis entitas creata est bonum non summum, sed deficiens; ergo habet vim communicandi se ipsam solum imperfectè, & deficienter; ergo habet vim communicandi se ita, vt non tribuat alteri summè perfectionem, quam habet in se; sed eo ipso, quod communicet se alteri non summè, non habet cum eo summam identitatem metaphysicam, quæ requiritur ad distinctionem virtualem; ergo non potest in creatis dari distinctio virtualis cum identitate summæ communicationis metaphysicæ. Posset hoc argumentum

alijs

alijs etiam modis explicari, qui breuitatis causa omittuntur. Debet autem aduerti, quod ratio allata, & alia similes non afferuntur ad probandum contra infideles mysterium Trinitatis, sed posita fide, adducuntur ad defendendum, quod tale misterium sit rationabile, & quod est ratio specialis, propter quam licet repugnet in creatis, est possibile in diuinis.

Dicendum secundo: licet in creatis sit impossibilis distinctio virtualis intrinseca, quæ est propria Dei, tamē est possibilis distinctio formalis ex natura rei cum identitate reali infimi gradus consistente in summa indiuisione plurium existentium, in vno supposito, per quam quodlibet ita est inseparabile ab alio, sicut à se ipso. Probatur, quia ex finitate entitatis creatæ sequitur solum, quod non possit entitas creata alteri se communicare ita perfectè, sicut sibi ipsi; at non sequitur, quod non possit se communicare alteri ita, vt sit æquè inseparabilis ab ipso, sicut à se ipsa; sed communicatio summæ inseparabilitatis in eodem supposito est distinctio formalis ex natura rei, vt dictum est quæst. 30; ergo in creatis est possibilis distinctio formalis ex natura rei. Confirmatur, quia est possibilis distinctio modalis, per quam duo ita se inuicem communicent in eodem supposito, vt sint inse-

inseparabilia non mutuo; ergo possibilis est distinctio minor, per quam duo in eodem supposito se communicent cum mutua inseparabilitate; sed hæc distinctio minor modali, & maior virtuali intrinseca est distinctio formalis ex natura rei; ergo est possibilis in creatis distinctio formalis ex natura rei. Confirmatur ex argumentis, quibus quæstione sequenti probabitur positiuè dari de facto inter rationes genericas, ac differentiales talè distinctionem. In hac enim quæstione procedimus potius via negatiua, quam positiua, defendentes in genere possibilitatem distinctionis ex natura rei in creatis.

Ad 1. Iam dictum est distinctionem virtuales intrinsecas esse possibilem in Deo ratione infinitatis diuinę; repugnare in creatis ratione finitatis creatę.

Ad 2. Recentiores satis communiter probant repugnare distinctionem virtuales in creatis ex eo, quod de eodem verificarentur duo contradictoria, tum quę explicantur in argumento, tum multa alia. Sed verè hæc argumenta nimis probant, cum ostendant repugnare distinctionem virtuales *ut sic* etiam in Deo. Quod enim contradictoria verificentur de eodem, æquè repugnat, seu illud sit ens creatum, & finitum, seu sit ens in-

creatum & infinitum. Non igitur vten-
dum talibus argumentis, quæ sunt etiam
solubilia, & soluentur in responsione ad
quartum, sed probanda est repugnantia
distinctionis virtualis in creatis ex ipsa
finitate, & limitatione entitatis crea-
tæ.

Ad 3. In substantia ratio entis, & ra-
tio perfectitatis nulla distinctione intrinse-
ca distinguuntur à parte rei, ut ex pro-
fesso probabitur inferius. Et ratio est,
quia perfectitas per se ipsam est ens; er-
go non est ens per rationem distinctam;
ergo in substantia non datur duplex ra-
tio, per quarum alteram sit ens, per al-
teram sit per se. Hinc sequitur, quod de
rationibus obiectivis, per quas substantia
est ens, & est per se, non verificentur vlla
contradictoria. Dum opponitur, quia
ens non distinguitur ratione ab ente; per-
fectitas distinguitur ratione ab ente; ergo
de ente, & de perfectitate verificantur con-
tradictoria: *distinguo antecedens*: ens
non distinguitur ratione ab ente, perfectitas
distinguitur ratione ab ente, & sumuntur
sub diuersis conceptibus, concedo; & nō
sumuntur sub diuersis conceptibus, nego:
& *distinguo consequens*; ergo de ente,
& perfectitate sumptis sub diuersis conce-
ptibus verificantur contradictoria, con-
cedo consequentiam: sumptis secundum
se-

se præcisè , nego consequentiam . Dico quod de eadem omnino re sumpta sub diuersis rationibus , nominibus , vel conceptibus verificari possunt contradictoria conuenientia rei non ratione sui , sed ratione diuersorum nominum & conceptuum : e. g. *gladius* , & *ensis* , sunt eadem omninò res , & tamen de hac eadem re sumpta cum diuersis nominibus verificantur contradictoria , cuiusmodi sunt , quod *gladius* non differt nomine à *gladio* , *ensis* nomine differt à *gladio* . In casu nostro *ens* , quo substantia est *ens* , & *perfectas* sunt idem omninò à parte rei : si tamen sumantur sub diuersis conceptibus , seu nominibus mentalibus , quæ format intellectus dicens *ens* , *perfectas* , differunt ratione , & propter conceptus distinctos , cum quibus sumuntur , verificantur de ipsis contradictoria , quæ sunt , *ens non distinguitur ratione ab ente* , *perfectas distinguitur ratione ab ente* ; nullum verò est absurdum , quod de eodem sumpto cum rebus diuersis verificentur contradictoria ratione rerum diuersarum . Idem dic ad alia sophismata similia .

Dum vrgetur : ratio entis cognoscitur clarè cognitione , qua dico *ens* : ratio perfectitatis non cognoscitur clarè tali cognitione ; ergo . Distinguo secundam partem antecedentis : ratio perfectitatis non co-

gnoskitur clarè eadem claritate, nego; diuersa claritate, concedo; & nego consequentiam. Idem potest cognosci diuersis cognitionibus, & diuersis claritatibus. In casu nostro ens potest clarè cognosci claritate; qua dico *ens*, & claritate, qua dico *perfeitas*. Dum dico *ens* cognosco tã ens, quam perfeitatem clarè prima claritate; non cognosco clarè secunda claritate, ideo dicor cognoscere clarè ens, non cognoscere clarè perfeitatem, non quia non cognoscam clarè perfeitatem vlla claritate, sed quia non cognosco clarè illa claritate, & expressione, quam experior, dum dico *perfeitas*. Quod verò eadem res cognoscatur clarè vna claritate, non cognoscatur clarè alia claritate, non est contradicção, sicut non est contradicção, quod idem corpus coloretur vno colore, non coloretur alio colore.

Sed explicandum, cur obiecta eadem possint cognosci diuersis cognitionibus, ac diuersis claritatibus, & in quo tandem consistant istę diuersę claritates. Dico, quod vt indicatum est quæst. 2. res possunt producere effectus sibi similes tum in esse reali, tum in esse intentionali; e. g. homo & potest causare hominem sibi similem in esse reali, & potest causare cognitionem hominis similem homini in esse intentionali. Porro tales effectus vel possunt

sunt esse similes causæ omnino perfectè, vel possunt esse similes solum imperfectè, ac deficienter; e. g. homo productus ab homine est perfectè similis homini producenti, ita ut adæquet perfectionem specificam producentis; at creaturæ productæ à Deo sunt similes Deo imperfectè, & ita ut infinito quodam defectu distent à diuina imperfectione, idemque dic de pluribus alijs effectibus causarum secundarum. Similiter cognitio rei & potest esse perfecta, & comprehensiva, hoc est adæquans proportionaliter perfectionem obiecti, & potest esse imperfecta, ac deficiens, hoc est non adæquans perfectionem obiecti. Hoc posito, sicut cum causa producit effectus imperfectos, ac deficientes à perfectione causæ in esse reali, potest producere plures, & plures effectus similes; e. g. Deus potest producere plures, & plures creaturas similes secundum varios gradus perfectionis: solet etiam producit plures effectus soli similes secundum diuersas rationes; sic cum causa producit cognitiones imperfectas, ac deficientes à perfectione causæ in esse intentionali potest producere plures, & plures cognitiones similes, ac repræsentantes obiectum per varias claritates, ac repræsentationes; e. g. substantia potest producere cognitionem repræsentantem illā

claritate entis, & potest producere aliam cognitionem representantem illam claritate perfectitatis. Non itaque tales cognitiones repræsentant diuersam rationem obiectiuam, sed quia repræsentant obiectum imperfectè, & deficienter, repræsentant diuersa claritate, & expressione, eo pacto, quo diuersę creaturæ, e. g. equus, leo non imitantur diuersam rationem, & perfectionem obiectiuam diuinæ essentię, sed essentiam diuinam simplicem deficienter, & inadæquatè imitantur diuersa imitatione.

Rursus sicut cœlum à diuersis conditionibus propinquitatis, ac distantię, à diuersis dispositionibus materiæ &c. determinatur ad producendos diuersos effectus, quos videmus in inferioribus; sic obiectum à diuerso modo, quo proponitur potentię, à diuersa dispositione potentię &c. determinatur ad causandas diuersas cognitiones. Ita obiectum valde distans causat in oculo diuersam visionem, ac causet quando proponitur in debita propinquitate. Similiter diuersam visionem causat in oculo acutiore, & melius disposito ad videndum, quam in oculo hebetiori, ac peius disposito. Adde, quod diuersam cognitionem rei formamus, cum illam cognoscimus per vnum medium, ac cum cognoscimus per aliud;

e. g.

e. g. diuersam cognitionem formamus de Deo, cum cognoscimus illum per creaturas intellectiuas, ac cum cognoscimus per non intellectiuas; diuersam cognitionem formamus de homine, dum illum cognoscimus per operationes discurrendi, ac cum cognoscimus per operationes sentiendi. Adde etiam, quod cognitio clarior obiectorum creatorum est, quæ magis illa imitatur, ita vt sicut possunt ex rebus oriri plures effectus, ita possint ex cognitione rei oriri cognitiones pluriū, & plurium effectuum: e. g. cognitio, qua dico *animal rationale*, clarior est cognitione, qua dico *homo*, quia ex priori statim possunt oriri cognitio ne sensationis, ac discursus, quæ cognitiones nō possunt oriri ex posteriori.

Dum rursus vrgetur, quia de perfectione, & imperfectione identificata verificantur contradictoria; nam perfectio est amabilis propter se ipsā, imperfectio non est amabilis propter se ipsam, sed solum ratione perfectionis. Respondeo, quod sicut perfectio creata est perfectio per se ipsam imperfecta, ita per se ipsam mouet ad amorem, & complacentiā imperfectam includentem aliquid displicentiæ; ac proportionaliter imperfectio creata, quia est imperfectio aliquantulum perfecta, mouet ad displicentiam mixtam cum aliqua complacentia. Nulla igitur de perfectione,

& imperfectione verificantur contradictoria . Nam & perfectio aliquo modo imperfecta mouet ad complacentiam cum displicentia , & imperfectio aliquo modo perfecta mouet ad displicentiam cum complacentia , ita ut proportionaliter , sicut perfectio est idem cum imperfectione , sic amor imperfectus sit idem cum aliquo odio , & imperfecta complacentia sit idem cum aliquo displicentia .

Ad 4. Iam dictum est in responsione ad 2. , quod in creatis distinctio virtualis non repugnat ratione contradictionum , quæ afferuntur , sed ratione limitationis . At soluenda sunt argumenta petita ex contradictionibus . Primum est , quia est primum principium , quod contradictoria non possunt de eodem verificari . Respondeo sensum principij esse , quod non possunt contradictoria verificari de eodem etiam logicè , cum possint verificari de ijs , quæ cum logicè distinguuntur , sunt idem metaphysicè , vel physicè , ut patere potest ex ipsis definitionibus talium identitatum allatis quæst. 30. Confirmatur solutio , nam S. Thomas prima parte quæst. 28. ad primum docet ex Aristotele 3. physic. tex. 21. quod principium illud , *quæ sunt eadem uni tertio , sunt eadem inter se* intelligitur de iis , quæ sunt eadem re , & ratione , sicut tunica & vestimentum ,

tum, non autem de ijs, quę differunt ratione; ergo etiam principium illud, non possunt de eodem verificari contradictoria, intelligitur de ijs, quę sunt idem re, & ratione; sed esse idem ratione obiectiva, de qua patet loqui S. Thomam, & Aristotelem, est esse idem logicę; ergo. Verba S. Thomę sunt. *Ad primam dicendum, quod secundum philosophum in 3. physic. argumentum illud tenet, quod quęcumque uni, & eidem sunt eadem, sibi inuicem sunt eadem in his, quę sunt idem re, & ratione, sicut tunica, & vestimentum, non autem in ijs, quę differunt ratione.* Dum vrgetur; ergo est vera hæc propositio, cognitum est non cognitum: respondeo negando consequentiam. Hęc enim propositio, ratione materię affirmat identitatem logicam, quę repugnat inter cognitum, & non cognitum. Ratio cur affirmet identitatem logicam, est, quia cum affirmatur, vel negatur quod de eodem verificentur contradictoria, ly *idem* semper sumitur logicę. Si tamen propositio restringatur, & dicatur cognitum distinguitur logicę à non cognito, sed habet cum illo aliquam identitatem metaphysicam, vel physicam, propositio est vera. Idem dic ad alias similes propositiones. Ex eadem ratione falsę sunt illę sequelę; ergo idem distinguitur à se ipso; Idem est melius se ipso:

significant enim, quod idem distinguitur ab eo, cum quo habet identitatem logicā. Potest tamen concedi, quod res aliqua logicè distinguitur ab eo, cum quo habet identitatem physicam, aut metaphysicam: quod aliqua formalitas habet identitatem purè physicam cum alia formalitate, quæ secundum se præcisè est melior.

Ad 5. Negandum quod spectet ad divinam omnipotentiam posse separare omnia, quæ non habent identitatem logicam. Ad inseparabilitatem enim sufficit identitas purè physica. Confirmatur quia sicut quæ distinguuntur modaliter, non possunt mutuò separari; sic quæ distinguuntur distinctione minore quam modali, neque mutuo, neque non mutuo possunt separari.

Vtrum in creatis rationes genericæ, specificæ, & indiuiduales distinguantur formaliter ex natura rei. Quæstio XXXII.

Videtur vera sententia Nominalium, quos sequuntur communiter multi recentiores, quod in creatis rationes genericæ, specificæ, & indiuiduales non distin-

stinguantur formaliter ex natura rei, neque vlla distinctione intrinseca, sed solum per intellectum, & per rationem nostram: 1. quia non sunt multiplicanda entia sine necessitate; sed nulla est necessitas distinguendi rationes genericas, ac differentiales, e. g. animalitatem hominis ab eius rationalitate; ergo non debet poni talis distinctio. Minor probatur: nam inseparabilitas est vnicum indicium distinctionis; sed rationes genericæ, ac differentiales sunt omninò inseparabiles; ergo &c. Confirmatur, quia si animalitas distinguitur à rationalitate, non est vlla ratio, cur sit ab illa inseparabilis etiam de potentia absoluta.

2. Vel omnes formalitates per intellectum abstrahibiles ab alijs formalitatibus distinguuntur ab ipsis, vel non omnes: si omnes: ergo etiam ratio entis distinguitur à differentia perfectitatis, cum sit ab illa per intellectum abstrahibilis, quod est impossibile, & contra Aristotelem 3. metaph. tex. 10: si non omnes, contra est tum quia non potest assignari quænam distinguantur, quæ verò non distinguantur; tum quia hæc sententia in quantum dicit aliquas formalitates identificari, debet soluere omnia argumenta probantia vniuersim distinctionem formalitatum; in quantum verò dicit quasdam distingui,

soluere debet argumēta impugnantia earū distinctionē, ergo cum incurrat in difficultates vtriusque, sententia est reiiciēda.

3. Si dicatur, quod illæ formalitates identificantur, quæ includunt alias in suo conceptu, vel in ijs includuntur, cuiusmodi sunt ens, & perfectitas, cum perfectitas sit quoddam ens; illæ verò formalitates distinguuntur ex natura rei, quæ se mutuo excludūt in suo conceptu, cuiusmodi sunt animalitas, & rationalitas: contra est, quia sequeretur, quod substantia non distingueretur à differentiis substantiæ materialis, spiritualis &c: nam omnes differentiæ substantiæ sunt substantia, alioquin essēt accidentia, quod repugnat; ergo substantia includitur in omnibus suis differentiis; ergo non distinguitur ab vlla differentia.

4. Si rationes genericæ deberent distinguī à differentialibus, daretur processus in infinitum; ergo &c. Probatur sequela: idē in homine ratio genericæ distinguitur à differentiali, quia homo constat ex genere, & differentia; sed omnes rationes genericæ, ac differentiales constant ex alio genere, & differentia; ergo in omnibus rationibus genericis, ac differentialibus distinguuntur alię rationes genericæ, ac differentiales, ac proinde proceditur in infinitum. Minor
pro-

probatur: nam omnes rationes genericę , ac differentiales sunt definibiles ; sed definitio est per genus , ac differentiam ; ergo omnes rationes genericę , ac differentiales constant ex genere , ac differentia . Confirmatur ; nam rationalitas , quę est hominis differentia e. g. conuenit cum equinitate , quę est differentia equi , in prædicato differentię , disconuenit in taleitate differentię ; ergo est composita ex duobus prædicatis , in quorum altero conuenit , in altero disconuenit ; sed ex eadem ratione prædicatum , in quo disconuenit , est compositum ex pluribus prædicatis ; ergo &c.

5. Sequeretur , quod etiam in angelis , & anima rationali deberent dari compositio ex genere , & differentia , quod videtur absurdum ; sequeretur rursus , quod in anima rationali distinguerentur gradus vegetatiui , sensitiui , & rationalis ; sed isti gradus essent tres animę ; ergo in hominē darentur tres animę . Rursus in anima rationali deberent distingui gradus visuui , auditui , tactiui &c. : in intellectu deberent distingui gradus cognoscitiui , apprehensiui , iudicatiui , discursiui .

6. Non potest explicari , quo pacto in composito physico partes metaphysicę , e. g. animalitas , & rationalitas identificentur

cum partibus physicis, nimirum cum anima, & corpore; an etiam materia prima constet ex genere, ac differentia distinctis ex natura rei; an plures gradus componentes vnam essentiam existant per vnicam, vel plures existentias &c; ergo hæc sententia ponens distinctionem ex natura rei inter formalitates est vndique implicata.

7. Ideo in creatis aliqua prædicata distinguuntur ex natura rei, quia se inuicem non includunt in suo conceptu; sed etiam plura prædicata diuina, e. g. misericordia, iustitia &c. se inuicem non includunt in suo conceptu; ergo etiam multa prædicata diuina distinguuntur formaliter ex natura rei, quod repugnat diuinæ simplicitati.

8. Etiam indiuiduatio deberet distinguere à natura specifica, e. g. petreitas à natura humana Petri. Ideò enim animalitas distinguitur à rationalitate, quia homo per animalitatem conuenit cum equo, per rationalitatem differt; sed Petrus per naturam humanam conuenit cum Paulo, per petreitatem differt; ergo &c. sed aliunde videtur absurdum, quod indiuiduatio distinguatur à natura specifica.

9. Si rationes genericæ distinguerentur à differentialibus, res deberent omnino

nino conuenire in rationibus genericis, e. g. homo, [& equus deberent omnino conuenire in animalitate, ac deberent solum differre per rationalitatem; sed res e. g. homo, & equus non possunt omnino conuenire in ratione generica, nimirum in animalitate; ergo &c. Probatur minor: animalitas enim hominis est inseparabilis à rationalitate, & illam exigit essentialiter; animalitas equi est inconiungibilis cum rationalitate, & illi repugnat essentialiter; ergo animalitas hominis, & equi sunt dissimiles, ac differentes se ipsis ante differentias aduenientes. Confirmatur: nam anima rationalis, & equina, conueniunt in ratione generica sensitiuitatis; sed sensitiuitas animæ rationalis secundum se præcisè est dissimilis à sensitiuitate animæ equinæ; nam sensitiuitas animæ rationalis est immortalis, incorruptibilis &c, opposita prædicata conueniunt sensitiuitati animæ equinæ; ergo &c.

10. Non solum Nominales, sed etiam Thomistæ, Scotistæ, & omnes scholastici conueniunt in ponenda inter gradus aliqua identitate reali; sed si gradus distinguuntur ex natura rei, nulla poni potest inter ipsos realis identitas, sed sola inseparabilitas, quæ non dicit realem identitatem; nam potentiæ animæ, licet sint om-

omninò inseparabiles ab anima nullam habent realem identitatem cum anima; ergo hæc opinio est contra omnes scholasticos: præsertim verò est contra Aristotelem, & sanctum Thomam. Aristoteles enim 1. poster. tex. 4. docet, quod cum aliquis cognoscit aliquam veritatem in vniuersali, cognoscit idem, ac cum cognoscit illam in particulari, sed diuerso modo; sed si gradus distinguerentur ex natura rei, non diceret, quod cognoscit idem diuerso modo, sed quod cognoscit secundum diuersum gradum, & rationem; ergo Aristoteles supponit gradus non distingui ex natura rei. Sanctus etiam Thomas vbique docet gradus non distingui ex natura rei, sed solum secundum considerationem nostram, vt videre est in compendio theologiæ cap. 92. de ente, & essentia cap. 1. & clarissimè prima parte quæst. 50. artic. 2. ad primum per hæc verba: *In rebus immaterialibus non est aliud determinans & determinatum, & ideo genus, & differentia non accipitur in ipsis secundum aliud, sed solum secundum idem, quæ differunt tantum secundum considerationem nostram.*

Resp. quod vt Aristoteles docet 2. metaph. tex. 15. absurdum est simul scientiam, & modum sciendi quærere: idè antequam quæratur scientia alicuius sci-

bi-

bilis , statuendum est ex quibus principijs possit haberi scientia , & demonstratio talis scibilis . Cum igitur nos quæramus scientiam de distinctione , vel identitate rationum conceptarum : debemus primò determinare ex quibus principijs possit demonstrari identitas , ac distinctio rationum conceptarum deinde debemus descendere ad ostendendū magis in particulari , quæ rationes sint distinctæ , vel indistinctæ .

Quo ad primum : dicunt aliqui , quod vnica via demonstrandi identitatem , aut distinctionem rationum est separabilitas , & inseparabilitas , ita vt rationes separabiles dicantur distingui , rationes omninò inseparabiles in vno supposito dicantur identificari . Alij dicunt , quod talis via est contradictoriorum verificatio , ita vt rationes , de quibus verificantur contradictoria , distinguantur , rationes , de quibus non verificantur contradictoria , identifcentur .

Sed omissis alijs , quæ possunt contra hanc sententiam opponi , contrà est , quia separabilitas , ac receptio contradictoriorum sunt solum effectus , & passionēs distinctionis ; ideo enim aliqua possunt separari , vel suscipere contradictoria , quia sunt distincta ; sed per effectus , & passionēs non potest haberi nisi scientia , &
de .

demonstratio imperfecta ; ergo auctores huius sententiæ viam ineunt, qua possit solum obtineri scientia, & demonstratio imperfecta, cum philosophus, ac præsertim metaphysicus, ad quem spectat hæc quæstio, debeat querere scientiam, ac demonstrationem perfectam, & per causam, vt Aristoteles docet I. metaph. capit. 2.

Relictis igitur vijs, quibus obtineri nõ potest perfecta scientia, ac demonstratio identitatis, ac distinctionis, dicendum primo, quod vt in post. docet Aristoteles, quem sequuntur omnes, definitio explicans *quid est res* est principium demonstrandi passiones, & prædicata, quæ consequuntur ad quidditatem rei. Sicut enim quidditas rei est ratio, cur ei competant alia prædicata, sic est ratio, per quam demonstrantur eadem prædicata, siquidẽ omnia demonstrantur per suam causam, & rationem. Ita videmus, quod in mathematicis passiones, & prædicata figurarum demonstrantur per earum definitionem. Sed identitas, ac distinctio sunt prædicata consequentia ad quidditatem rerum, vel rationum: manifestum est enim, quod ideò res identificantur, ac distinguuntur, quia sunt id quod sunt, ergo definitio explicans quid sit res, aut ratio concepta, est principium demonstrandi identita-

titatem , aut distinctionem rerum , vel rationum conceptarum ; e. g. cum in homine detur animalitas , per quam est animalitas , vitalitas , & plures alię rationes , definitio ipsarum est principium demonstrandi earum identitatem , vel distinctionem . Definitio verò rationum cū sit primum principium , demonstrari non potest , sed per se innotescit ex penetratione rei definitę , vt Aristoteles docet , quem sequuntur alij .

Sed vt explicemus , quo pacto ex definitione possit demonstrari identitas , aut distinctio rationum conceptarum , dicendum secundo , quod sicut Aristoteles in libris priorum posuit duo principia , alterum ad demonstrandam infallibilitatem syllogismorum affirmatiuorum , alterum ad demonstrandam infallibilitatem negatiuorum , quę sunt *dictum de omni* , *dictum de nullo* ; sic à nobis ponenda sunt duo proportionalia principia ; alterum ad demonstrandam identitatem rationum conceptarum , quod possumus vocare *inclusum in definitione* , alterum ad demonstrandam distinctionem rationum conceptarū , quod possumus vocare , *exclusum à definitione* . Sensus principij , quod dicimus *inclusum in definitione* est ; rationes conceptę , quarum vna in recto includitur in definitione alterius , sunt idem sine vlla
 distin-

distinctione ex natura rei . Probatur , quia vt Aristoteles docet 7. metaph. tex. 20. & 21. nihil distinguitur ex natura rei à suo *quid est* per definitionem explicato : e. g. quia *quid est* , seu definitio hominis est *animal rationale* , homo non distinguitur ex natura rei ab animali rationali , immò idem omninò est , esse hominem , & esse animal rationale ; sed eo ipso , quod vna ratio in recto includitur in definitione alterius , spectat ad *quid est* illius , cum per definitionem explicetur quid res sit ; ergo rationes , quarum vna includitur in recto in definitione adæquata alterius , sunt idem sine vlla distinctione ex natura rei . Sensus principij quod vocamus *exclusum à definitione* est ; rationes conceptę , quarum neutra in recto includitur in definitione adæquata alterius , distinguuntur ex natura rei . Probatur , quia definitio adæquata rei explicat quidquid conuenit rei per se ipsam , ita vt hoc ipsum sit esse talem rem : e. g. definitio adæquata hominis , quę ponatur *animal rationale* , explicat totum id , quod conuenit homini per se ipsum , ita vt hoc ipsum sit esse hominem ; homo enim ita est animal rationale , vt idem sit esse hominem , ac esse animal rationale . Iam sic : definitio adæquata explicat quidquid conuenit rei per se ipsam , ita vt hoc ipsum sit esse talem

lem rem ; ergo quod non includitur in definitione adequata non conuenit rei per se ipsam , sed aliud est esse rem , aliud hoc prædicatum conuenire ; sed quod non conuenit rei per se ipsam , sed per aliud , distinguitur ex natura rei ab illa ; ergo quod non includitur in definitione adequata rei , distinguitur ex natura rei à rei ; ergo rationes conceptę , quarum neutra includitur in definitione adequata alterius , distinguuntur ex natura rei .

Explicata prima parte quæstionis , ac positis duobus principijs , ex quibus debet ostendi identitas , ac distinctio rationū conceptarum , explicanda est secunda pars quæstionis , ac statuendum , quænam rationes conceptę identificentur , quę verò distinguantur . Primo igitur ostendendum , quod ratio communis entis , & aliorum transcendentium contentorum in voce *Reubau* non distinguuntur ex natura rei ab vlla differentia , vel ratione positiua : secundo quod neque ratio communis accidentis distinguitur ex natura rei ab vlla differentia accidentis : tertio quod in Deo nulla ratio generica distinguitur ex natura rei ab vlla ratione differentiali , immo nulla ratio absoluta distinguitur ex natura rei ab vlla alia ratione absoluta : quarto quod in creatis dantur rationes genericę distinctę à rationibus differen-

tia-

tialibus : quinto demum examinandum ,
an , & quomodo rationes indiuiduales di-
stinguantur à rationibus specificis .

Primò igitur dico , quod ratio entis ,
& aliorum transcendentium non distin-
guitur ex natura rei ab vlla differentia ,
vel ratione positiua . Probatur , nam
nulla ratio distinguitur ex natura rei ab
eo , in cuius definitione includitur ; sed
ratio entis includitur in definitione om-
nium differentiarum , & omnium rationum
positiuarum ; ergo . Minor probatur ; illa
enim ratio includitur in definitione alte-
rius , quæ conuenit illi per se ipsam ; sed
ratio entis per se ipsam conuenit omni-
bus differentijs , & rationibus positiuis :
nam omnes differentiæ , & rationes posi-
tiuæ per se ipsas sunt ens : e. g. perfectitas ,
quæ est differentia substantiæ , per se ipsam
est ens , & esse perfectitatem , est esse quod-
dam ens , idemque dic de inaleitate , &
cæteris differentijs , ac rationibus positi-
uis ; alioquin si per se ipsas non essent ens ,
essent non ens , & nihil , quod est impos-
sibile , vt arguit Aristoteles 3. metaph. tex.
10 ; ergo ens includitur in definitione om-
nium differentiarum , & rationum positi-
uarum . Eodem pacto probatur , quod
alia quinque transcendentia contenta in
dictione *Reubau* , quæ sunt res , vnum ,
bonum , aliquid , verum , non distinguun-
tur

tur ex natura rei ab vlla differentia , vel ratione positiua . Perseitas enim , & aliæ rationes sicut per se ipsas sunt quoddam ens, ita per se ipsas sunt quædam res, sunt quoddam bonum, verum, vnum, & aliquid, cum ipsum esse ens sit esse rē, aliquid, vnū, verum, bonum ; ergo dictæ rationes transcendentes, & alię similes nec distinguuntur inuicem, nec ab vlla ratione positiua.

Dico secundo : ratio communis accidentis non distinguitur ex natura rei ab vlla differentia accidentis . Probatur, quia ratio communis accidentis consistit in hoc, vt sit entis ens ; sed omnis differentia accidentis eo ipso, quod est differentia accidentis, est entis ens ; ergo omnis differentia accidentis includit rationē communem accidentis ; ergo ratio communis accidentis non distinguitur ab vlla differentia accidentis . Confirmatur, & explicatur, exemplificando in differentijs constitutiuis nouem prædicamentorū, quę sunt quantitas, qualitas, &c. Differentia constitutiua quantitatis est, per quā accidens afficit substantiam, illam mensurando ; differentia constitutiua qualitatis est, per quam accidens afficit substantiam, illam qualificando ; sed hoc ipsum, quod est esse id, per quod accidens constituitur mensura substantię, vel qualificans substantiam, est esse ens ordinatum.

ad]

ad substantiam, atque adeò est esse accidens; ergo omnes differentie accidentis includunt accidens in sua definitione. Breuiter esse ordinatum ad constituendum entis ens in sua specie est esse entis ens; sed omnes differentie accidentis per se ipsas sunt rationes ordinatæ ad constituendum accidens, seu entis ens in sua specie; ergo omnes differentie per se ipsas sunt entis ens; ergo accidens includitur in definitione omnium differentiarum accidentis.

Dico tertio: in Deo nulla ratio generica distinguitur ex natura rei ab vlla ratione differentiali, immò nulla ratio absoluta distinguitur ab vlla ratione absoluta. Probatur, quia nulla ratio distinguitur ex natura rei à ratione, in cuius definitione includitur; sed omnis ratio generica, vel quasi generica affirmabilis de Deo includitur in definitione rationis differentialis Dei; ergo &c. Minor probatur: nam differentia Dei est, per quam est ens omninò illimitatum, & totale continens totum esse: diuiditur enim ens primo in Deum, & creaturam, hoc est in ens perfectum, & continens in se totum esse, & in ens imperfectum, & parziale non continens totum esse; sed in definitione illimitationis, & continentie totius esse includitur omnis ratio quasi generica
affir-

affirmabilis de Deo ; illimitatio enim, & continentia totius esse manifestè includit in sua definitione ; & quidditate esse ens, esse substantiam, viuentem, sapientem, &c. cum hæc omnia sint aliquod esse ; ergo omnis ratio quasi generica affirmabilis de Deo includitur in differentia Dei, ac proinde nulla ratio affirmabilis de Deo distinguitur ex natura rei à differentia Dei. Hinc verò vltèrius sequitur, quod in Deo nulla ratio absoluta distinguitur ab vlla alia ratione absoluta. Patet : nam omnis ratio absoluta includitur in definitione cuiuscunque alterius rationis absolute e. g. misericordia diuina includitur in definitione diuinæ iustitiæ ; ergo &c. Probatur antecedens : nam iustitia diuina est iustitia omninò illimitata, & continens totum esse, & per hoc differt à iustitia creata, quæ est limitata, & non continet totum esse ; sed iustitia illimitata, & continens totum esse includit in sua definitione etiam esse misericordiæ ; ergo iustitia diuina includit in sua definitione misericordiam, & misericordia iustitiam, & quælibet ratio absoluta Dei omnem aliam rationem absolutam. Ideò reiicienda est omninò sententia Scoti distinguens in Deo rationes absolutas ex natura rei : aufert enim à Deo optimam differentiã, quæ est esse ens omninò illimitatum, & in-

cludens totum esse.

Dico quarto : in creatis dantur rationes genericę distinctę formaliter ex natura rei à rationibus differentialibus: Probatur, quia rationes, quarum neutra includitur in definitione adequata alterius, distinguuntur ex natura rei; sed dantur multę rationes genericę, ac differentiales, quarum neutra includitur in definitione adequata alterius; e. g. in homine ratio generica est animalitas, ratio differentialis est rationalitas, & nec animalitas includitur in definitione adequata rationalitatis, nec rationalitas in definitione adequata animalitatis; ergo in creatis dantur plures rationes genericę, ac differentiales distinctę ex natura rei. Minor probatur; nam si quæratur, quid sit animalitas, nunquam ponetur in eius definitione rationalitas; & si rursus quæratur quid sit rationalitas, nunquam ponetur in eius definitione animalitas; sed cum quæratur quid sit res, aut ratio, quæratur definitio adequata explicans totam quidditatem rei; ergo nec rationalitas includitur in definitione animalitatis, nec animalitas in definitione rationalitatis.

Respondent nominales dupliciter posse quæri, quid sit aliqua ratio: primo quærendo definitionem simpliciter adequatā explicantem totaliter quid sit à parte rei: secun-

secundo querendo definitionem inadæquatam, & præcisivam explicantem quid sit præcisè, in quantum concipitur aliquo conceptu inadæquato, & præscindente ab alijs rationibus, cum quibus identificatur à parte rei. E. g. dupliciter potest queri, quid sit rationalitas, primo querendo quid sit simpliciter à parte rei, & tum quæritur definitio simpliciter adæquata explicans totam quidditatem rationalitatis, prout est à parte rei; & quia ad quidditatem rationalitatis, & cuiuscunque rationis spectat omnis ratio, cum qua identificatur, ideò definitio adæquata rationalitatis prout est à parte rei debet explicare omnia, quæ cum ipsa identificantur; & quia cum rationalitate identificatur animalitas, ideò per definitionem adæquatam rationalitatis debet explicari etiam animalitas, & ex eadem ratione in definitione adæquata animalitatis debet explicari rationalitas. Secundo potest queri, quid sit rationalitas non simpliciter, & à parte rei, sed præcisè in quantum concipitur conceptu inadæquato, quo formaliter præscinditur ab animalitate, & alijs rationibus ab ipsa distinctis ex natura rei, & tunc non quæritur definitio adæquata rationalitatis, sed inadæquata, & præcisa, explicans quid sit, non simpliciter, sed præscindendo ab ani-

malitate, & à cæteris rationibus, à quibus præscinditur per conceptum inadæquatum; ergo ex eo, quod aliquæ rationes præcisæ mutuò se excludant in sua definitione præcisua, non potest argui distinctio illarum ex natura rei, sed solum distinctio per intellectum, & rationem præcisuam, ac proinde ruit tota doctrina de distinctione formalitatum.

Vt reiiciam hanc doctrinam, & probem conclusionem, duo suppono. Primū est, quod sicut duo sunt genera veritatum; quædam sunt ita proportionatæ intellectui humano, ut possit de ijs naturaliter acquirere cognitionem certam, & evidentem; quædam ita ipsum excedunt, ut non possit de ijs acquirere cognitionem certam, & evidentem; ita sunt duo genera quidditatum; quædam ita proportionatæ, ut possit de ijs intellectus noster acquirere cognitionem quidditativam adæquatam; quædam ita excedentes, ut non possit de ipsis acquirere cognitionem adæquatam, sed solum inadæquatam, vel merè abstractivam. Ratio est, quia sicut intellectus humanus est naturaliter aptus ad cognoscendas quasdam veritates certò, & evidenter, ita debet esse naturaliter aptus ad cognoscendas quasdam quidditates adæquatè, & quidditatiuè. Si verò quærat, quænam quid-

ditates sunt cognoscibiles quidditatiuè ,
& adæquatè ab intellectu humano , quæ
verò solum inadæquatè , & abstractiuè ,
dicendum quod quidditates materiales ,
& sensibiles sunt cognoscibiles quiddita-
tiuè , & adæquatè , è conuerso quiddita-
tes immateriales , & insensibiles sunt co-
gnoscibiles inadæquatè , & abstractiuè .
Ratio est, quia obiectum proportionatum
intellectus quodammodo sensitiui, hoc
est vtentis ministerio sensuum est quid-
ditas sensibilis, & materialis; obiectum
verò proportionatum intellectus non
vtentis ministerio sensuum est quidditas
insensibilis, & immaterialis; sed intel-
lectus humanus est intellectus quodam-
modo sensituius, hoc est vtens ministerio
sensuum, intellectus angelicus est insen-
sitiuius, nec vtens ministerio sensuum;
ergo obiectum proportionatum intelle-
ctus humani est quidditas sensibilis, &
materialis; quidditas verò insensibilis,
& immaterialis excedit humanum intel-
lectum & est proportionata angelico; sed
intellectus humanus potest acquirere na-
turaliter cognitionem adæquatam, &
quidditatuam de suo obiecto proportio-
nato, de excedente verò potest acquire-
re solum inadæquatam; ergo &c. Ideo
Aristoteles, & ex eo Sanctus Thomas r.
par. quæst. 83. art. 7. in corp. & quæst.

85. ar. 5. & 7. & pluribus alijs locis docent, quod obiectum proprium, & primū intellectus humani est quidditas rei materialis, quod intelligendum de obiecto proportionato; docent etiam quod de rebus immaterialibus, vtpotē excedētibz possumus habere aliqualem cognitionem, sed imperfectam, vt videre est apud Sanctum Thomam prima parte, quęst. 88. articulo secundo.

Secundo suppono, quod sicut ex veritatibus cognoscibilibus certò, & euidenter ab humano intellectu, quędam sunt cognoscibiles certò, & euidenter solum mediātē per discursum ex alijs veritatibus, & tales sunt veritates demonstrabiles, ac scibiles; quędam verò sunt cognoscibiles certo, & euidenter immediātē, & ex terminis, & talia sunt prima principia per se nota, & non vltius demonstrabilia; sic ex quidditatibus cognoscibilibus adęquatē, & quidditatiuē quędam sunt cognoscibiles quidditatiuē, & adęquatē solū mediātē per alias quidditates, & tales sunt quidditates propriē definibiles per genus, & differentiam; quędam sunt cognoscibiles quidditatiuē, & adęquatē per se ipsas, & tales sunt prima principia definitionum, seu prima genera, & primę differentię per se quidditatiuē nota, & non vltius defini-

nibilia per alia genera, & per alias differentias. Ratio utriusque est, quia sicut ne procedatur in infinitum in demonstrationibus dari debent prima principia non ulterius demonstrabilia, sed per se nota, sic ne procedatur in infinitum in definitionibus manifestantibus quidditatem per genus, & differentiam dari debent prima genera, & primæ differentiæ non ulterius definibilia per genus, & differentiam, sed per se quidditatiuè nota.

His suppositis, rejicitur doctrina Nominalium, & probatur conclusio. Nam rationes cognitæ conceptu quidditatiuo, & adequato, quarum neutra includitur in definitione adequata alterius, distinguuntur ex natura rei; sed plures primæ rationes genericæ, & differentiales, e. g. animalitas, & rationalitas cognoscuntur à nobis conceptu quidditatiuo, & adequato, ut dictum est in fine secundi suppositi; alioquin nulla quidditas sensibilis, & materialis esset à nobis cognoscibilis quidditatiuè, & adequatè contra primum suppositum; & prætereà tales rationes mutuo se excludunt à sua definitione adequata; nam neque in definitione adequata animalitatis includitur rationalitas, neque in definitione adequata rationalitatis in recto includitur animalitas; ergo tales rationes genericæ, & differentiales distinguuntur ex natura rei.

Confirmatur primò, quia quid sint, vel non sint rationes quidditatiuè & adæquatè cognitæ innotescit ex terminis, & demonstrari non potest; nam definitio explicans quid est res non demonstratur, sed est primum principium demonstrationis; sed comparando rationes genericas, & differentiales quidditatiuè cognitæ, e. g. animalitatem, & rationalitatem non innotescit, quod animalitas sit rationalitas, sed potius innotescit oppositum, eo pacto, quo comparando colorem, & sonum innotescit, quod color non est sonus; ergo &c. Adde quod intellectus non magis penetrat rationem entis, & ceteras rationes transcendentis, quam rationem animalis, & alias non transcendentes; sed de ratione entis, & transcendentibus certificatur, quod includuntur à parte rei in quidditate omnium differentiarum, & omnium rationum positiuarum; ergo etiam de ratione animalis certificaretur quod includitur à parte rei in quidditate suarum differentiarum, si verè includeretur; non certificatur; ergo ideò quia non includitur. Et confirmatur à fortiori; quia noster intellectus minus penetrat differentiã Dei, quam differentiam creaturarum; sed de differentia diuina certificatur, quod includit in sua quidditate omnes rationes absolutè prædicabiles de Deo, vt dictum est

est conclusione tertia ; ergo si differentia creaturarum includerent rationes genericas in sua quidditate, certificaretur de tali inclusionem . Et ratio à priori est, quia conceptus quidditativus adæquatus rationum est perfectè representativus ipsarum ; ergo cum conceptus quidditativus non exprimunt inclusionem rationum, nec rationes se includunt à parte rei , adeoque distinguuntur . Ad hunc verò modum argumentandi ducimur ab ipsa natura .

Vnusquisque enim comparans *esse animal*, & *esse rationale*, & aduertens quod non se includunt in sua quidditate, statim dicit, quod licet idem homo sit animal simul, & rationale, tamen in eo aliud est *esse animal*, aliud *esse rationale*, eo pacto, quo licet videamus, quod idem corpus est simul figuratum & coloratum, adhuc dicimus, quod aliud est *esse figuratum*, aliud *esse coloratum* : et sicut potentia sensitiva non solum certificatur de proprio obiecto sensibili, sed etiam de eius privatione, vt colligitur ex Aristotele 2. de anima tex. 102. eo pacto, quo per potentiam visivam non solum certificamur, an aer sit lucidus, sed etiam an tenebrosus, cum lumen non videmus; sic intellectus, cuius proportionatum obiectum est quidditas rerum, & rationum materialium, non solum certificatur, quid sint, sed etiam

quid non sint . Eo enim ipso , quod non videt in quidditate vnius rationis aliam includi , certificatur , quod vna ratio non est de quidditate alterius , adeoque distinguitur ab illa .

Confirmatur secundo , quia principia , in quæ resolvitur , & ex quibus oritur cognitio quidditatiua , debent cognosci quidditatiuè , eo pacto , quo principia ex quibus oritur , & in quæ resolvitur cognitio euidens , debent esse euidencia ; sed hoc optimè saluatur in nostra sententia , non potest saluari in sententia contraria ; ergo &c. Minor probatur , faciendo talem resolutionem definitionis , qua res quidditatiuè cognoscitur . Dum quæritur *quid est homo* ? quæritur cognitio quidditatiua hominis , & respondetur *est animal rationale* . Quia animal per se ipsum non cognoscitur quidditatiuè , quæritur vlteriùs *quid est animal* ? & respondetur *est viuens sensituum* . Quæritur adhuc *quid est viuens* ? & respondetur *est corpus vegetabile* . Quæritur *quid est corpus* ? respondetur *quod est substantia postulans trinam dimensionem* . Quæritur *quid est substantia* ? & respondetur *quod est ens per se* , in qua descriptione non explicantur duæ rationes , quarum vna addatur alteri , nam ipsa perseias cū per se fit ens , non additur enti , sed explicatur vnica ratio irresolubilis in plures ,

res , quarum vna addatur alteri , quę ratio cognoscitur quidditatiuè conceptu simplici , quo dicitur *ens per se* . Substantia igitur est primum genus per se ipsum quidditatiuè cognitum , & est principium cognoscendi quidditatiuè omnia genera , & species , quę sunt sub ipsa , addendo cognitionem quidditatuam simplicem rationum differentialium vsque ad infimam differentiam . Addendo enim differentiam *postulantis trinam dimensionem* , cognoscitur quidditatiuè corpus , quod est substantia postulans trinam dimensionem ; addendo differentiam *vegetabilis* , cognoscitur quidditatiuè viuens ; addendo differentiam *sensitiui* , cognoscitur quidditatiuè animal ; addendo differentiam *rationalis* cognoscitur quidditatiuè homo , qui est substantia corporea , vegetabilis , sensitiua , rationalis . Quia igitur & summum genus substantię est ratio simplex , & ordinatè contrahitur per differentias simplices , quę proinde per se ipsas quidditatiuè cognoscuntur , ideo per rationes genericas , ac differentiales simplices quidditatiuè cognitæ quidditatiuè cognoscitur substantia composita , quę sola est propriè definibilis , sicut sola veritas habens causam est propriè demonstrabilis ; ergo in nostra sententia optimè saluatur , quo pacto principia , ex quibus oritur , & in quę resol-

uitur cognitio quidditatiua, cognoscantur quidditatiuè, & ex ijs generetur cognitio quidditatiua rei compositæ, ac definibilis. In sententia contraria non potest hoc saluari. Nam rationes genericæ, & differentiales minus quidditatiuè cognoscuntur, quam res definitæ; sed principia cognoscendi quidditatiuè res sunt rationes genericæ, ac differentiales; ergo principia cognoscendi quidditatiuè res minus quidditatiuè cognoscuntur, quam res definitæ. Probatur maior: nam primum genus substantiæ, per quod cognoscitur quidditatiuè homo, minus quidditatiuè cognoscitur, quam homo. Ad quidditatem enim substantiæ à parte rei spectant omnes differentiæ determinantes substantiam; sed differentiæ determinantes substantiam minus quidditatiuè cognoscuntur per hunc conceptum *substantia*, quam per hunc conceptum *homo*; ergo substantia minus quidditatiuè cognoscitur, quam homo. Similiter rationale, quod est vltima differentia hominis, minus quidditatiuè cognoscitur, quam homo. Nam de quidditate rationalis est animal; sed minus quidditatiuè cognoscitur animal per hunc conceptum *rationale*, quam per hunc conceptum *homo*; ergo differentia rationalis minus quidditatiuè cognoscitur, quam homo; ergo prin-

cipia

cipia cognitionis quidditatiuè minus quidditatiuè cognoscuntur, quam res, quæ per talia principia cognoscuntur quidditatiuè.

Confirmatur tertio, quia intellectus debet esse dispositus ad cognoscendum suum proprium, & proportionatum obiectum prout est; sed proprium, & proportionatum obiectum intellectus nostri est quidditas rei materialis; ergo intellectus debet esse dispositus ad cognoscendā quidditatem rei materialis prout est; sed intellectus cognoscit quidditatem rei materialis ut compositam ex rationibus genericis, & differentialibus; ergo verè quidditas materialis componitur ex rationibus genericis, & differentialibus distinctis ex natura rei: alioquin noster intellectus etiam obiectum proportionatum cognosceret aliter ac est. Sicut enim cum ea, quæ sunt plura, cognoscuntur ut vnum, cognoscuntur aliter ac sunt, sic cum ea, quæ sunt vnum, cognoscuntur ut plura, cognoscuntur aliter, ac sunt; sed intellectus cognoscit rationes genericas, & differentiales ut plures; ergo si sunt vnum cognoscit quidditatem materialem, quæ est ipsius proportionatum obiectum aliter ac est. Explicatur exemplo. Si oculus rem simplicem connaturaliter videret ut multiplicem, cognosceret illam aliter ac est,

est, & esset malè dispositus ad videndum; ergo si intellectus quidditatem simplicem cognoscit vt compositam ex pluribus rationibus, cognoscit aliter ac est, & est malè dispositus ad cognoscendum. Hinc reiiciuntur responsiones desumptæ ex eo, quod intellectus cognoscat quidditates materiales per accidentia. Licet enim incipiat à cognitione sensuali accidentiū singularium, tamen verè, & quidditatiuè cognoscit rationes vniuersales tum accidentium, tum substantiæ materialis, cum quidditas materialis sit proprium obiectū intellectus nostri quidditatiuè cognoscibile ab ipso, incipiendo à cognitione singulari priorum accidentium, & perueniendo vsque ad cognitionem quidditatiuam substantiæ.

Confirmatur quarto, quia secundum hanc sententiam traditur ratio vniuersalis de distinctione, vel identitate rerum, ac rationum. Hæc ratio est finitas, & infinitas. Infinitas & limitatio essendi, per quam Deus est ens omninò illimitatum, est ratio cur in Deo identificentur omnes perfectiones. E conuerso limitatio essendi in creaturis est ratio distinctionis. E.g. in Deo misericordia, & iustitia identificantur ratione infinitatis. Quia enim diuina misericordia est illimitata, non solum habet esse, & perfectionem

nem misericordiæ, sed etiam iustitiæ, & cuiuscumque alterius rationis. E conuersò quia misericordia creata est limitata, habet solum esse, & perfectionem misericordiæ, non verò iustitiæ. Deus est sapiens per se ipsum, quia esse diuinum utpotè illimitatum continet perfectionem sapientiæ. At creatura non potest esse sapiens per se ipsam, sed per sapientiam distinctam, quia esse substantiale creature non includit perfectionem sapientiæ. Hinc oritur in creaturis distinctio substantiæ, & accidentis, & variorum accidentium inter se. Sed limitatio creature debet consistere in hoc, ut omnis ratio sit id solum, quod inuoluit in sua definitione, & non aliud; ergo rationes creatæ identificantur solum cum eo, quod inuoluunt in sua definitione, & non cum alio, ideoque dicit Auicenna, quod animalitas est animalitas tantum, rationalitas est rationalitas tantum, eo pacto, quo sapientia creata est sapientia tantum, non verò iustitia, iustitia creata est iustitia tantum, & non sapientia. Hinc colligitur, quod in creaturis omnis ratio identificatur cum sua imperfectione consistente in limitatione. Nam quidditas entis creati consistit in hoc ipso, quod sit tantum hæc entitas, & non alia.

Dico quinto: omnes rationes generi-
ca,

cę, ac specificę identificantur cum aliqua indiuiduatione incompleta indistincta ex natura rei; in entibus tamen multiplicabilibus in eadem specie præter rationes genericas, ac specificas datur aliqua indiuiduatio distincta ex natura rei.

Probatur prima pars conclusionis, nam hæcceitas, & indiuiduatio saltem incompleta rationum est, per quam rationes sunt hæ, & non aliæ; sed omnes rationes genericę, ac differentiales per se ipsas, & non per aliquid distinctum sunt hæ, & non aliæ; ergo &c. Minor probatur: nam in mea animalitate e. g. non datur duplex ratio distincta ex natura rei, quarum vna sit animalitas, alia sit hæcceitas, per quam constituitur hæc animalitas; nam ratio animalitatis, quę est in me, per se ipsam non est idem cum animalitate, quę est in Petro; si enim esset idem per se ipsam, per nihil superadditum posset distingui; nam quod per se ipsum est idem cum alio semper remanet idem, quodcumque superaddatur; sed si per se ipsam non est animalitas Petri, per se ipsam est non eadem, ac animalitas Petri, & quęlibet alia animalitas, quod est esse hanc animalitatem hæcceitate saltem incompleta, & imperfecta; ergo animalitas, & omnes rationes per se ipsas sunt hæ, & non aliæ, adeoque identificantur ex natura rei

rei cum aliqua hæcceitate saltem incompleta . Confirmatur: nam in nulla ratione esse solum quod est, & non aliud, est aliquid distinctum, & superadditum; sed esse idem solum secum, & cum nullo alio est quædam hæcceitas saltem incompleta; ergo omnes rationes identificantur ex natura rei cum aliqua hæcceitate, saltem incompleta: et quia omnes rationes in suo *quid est* includunt esse id quod sunt, & non aliud, ideò omnes rationes in suo *quid est* includunt aliquam hæcceitatē incompletam .

Vt probetur secunda pars conclusionis debet prius explicari quid sit hæcceitas completa, quid incompleta . Hæcceitas completa rationis, aut rei est, per quam ita res, aut ratio distinguitur ab omni alia re, vel ratione, vt possit per ipsam ab intellectu nominari nomine proprio, & distingui ab omni alia re, & ratione . Hæcceitas incompleta est, per quam ita res, aut ratio distinguitur ab omni alia re, vel ratione, vt non possit per illam nominari nomine mentali proprio, ac distingui à qualibet alia re, vel ratione conceptibili . Sed quæritur vterius, quid requiratur ad hæcceitatem, vt per illam res possit, aut non possit nominari nomine proprio, adeoque sit completa, vel non completa . Dico, quod hæcceitas, per quam res ita
di-

distinguitur, vt sit omnino similis, non est talis, vt possit per illam res nominari nomine proprio, adeoque est incompleta: è conuersò hæcceitas, per quam res ita distinguitur, vt sit aliquo modo dissimilis, est talis, vt possit per illam res nominari nomine mentali proprio, adeoque est completa. Probatur: nam duæ res non possunt inuicem distingui per duo nomina mentalia, seu duos conceptus omnino similes, e. g. per istos duos conceptus *Petrus*, *Petrus* omnino similes, non possunt duo homines distingui inter se, sed vt distinguantur debent formari conceptus aliquo modo dissimiles, quibus dicatur e. g. *Petrus A*, *Petrus B*; sed conceptus exprimentes perfectè hæcceitates omnino similes sunt omnino similes; ergo res non possunt distingui per conceptus exprimentes perfectè duas hæcceitates omnino similes; ergo multo minus si exprimant imperfectè; si enim conceptus perfecti non distinguunt, nec imperfecti; ergo duæ hæcceitates omnino similes non sunt sufficiens principium distinguendi res, adeoque sunt hæcceitates incompletæ; ergo solæ hæcceitates dissimiles sunt complete.

Hinc iam probatur secunda pars conclusionis, quod in entibus multiplicabilibus in eadem specie debet dari aliqua

ulti-

ultima indiuiduatio distincta ex natura rei . Vnumquodque enim indiuiduum debet esse nominabile nomine mentali proprio , ac distinguibile à quolibet alio ; sed si in Petro e. g. non daretur aliqua indiuiduatio superaddita rationibus genericis , & differentialibus , non esset nominabilis tali nomine ; ergo &c. Minor probatur : nam rationes genericę , ac specificę constitutiue Petri sunt omnino similes rationibus genericis , ac specificis constitutiuis Pauli , & aliorum hominũ ; alioquin Petrus , & alij homines essent dissimiles in aliqua ratione generica , ac specifica , & sic non essent omninò similes in specie ; sed rationes omninò similes nō sunt sufficiens principium distinguendi res ; ergo si in Petro , & ceteris hominibus non daretur indiuiduatio superaddita , non possent nominari nomine mentali proprio , nec inuicem distinguī ; quod est contra perfectam intelligibilitatem rei , quę requirit , vt res sit nominabilis nomine proprio ; ergo in indiuiduis omnino similibus in specie datur indiuiduatio superaddita , quę potest vocari proprietas characterifica , de quā in quo consistat explicandum inferius quæst. 40.

Nec dicas , quod ad hoc , vt indiuidua sint distinguibilia , sufficit , quod habeant colle-

collectionem dissimilem accidentium, eo pacto, quo videmus homines esse dissimiles per collectionem accidentium, propter quod Porphyrius definiuit indiuiduum, *quod ex proprietatibus consistit, quarum aggregatum in nullo alio fiet*. Nam contra est, quia ut indiuidua sint perfectè intelligibilia, debent esse nominabilia nomine mentali proprio ipsorum per se, & non solum per accidens, ita ut possit etiam illis non conuenire; sed collectio accidentium conuenit indiuiduis per accidens, & ita ut possit non conuenire: potuisset enim Petrus e. g. creari, & non cum aggregato accidentium, quæ nunc habet; ergo non sufficit, quod indiuidua sint nominabilia per talia accidentia; alioquin non essent nominabilia nomine proprio per se; ergo debet in illis dari aliqua indiuiduatio conueniens ita, ut nō possit non conuenire. Hanc verò indiuiduationem quærimus per quæstionem, *quis est*: Sicut enim per quæstionem *quid est* quærimus definitionem explicantem, rationes genericas, & específicas, ita per quæstionem *quis est* quærimus differentiam indiuidualem. Et licet intellectus humanus, qui est vltimus in genere intellectus, non possit indiuidua nominare per indiuiduationem propriam per se competentem, sed solum per indiuiduationem per
ac-

accidens competentem, tamen res sunt etiam nominabiles per se. Sicut enim, visibilia non solum habent visibilitatem imperfectam, qua videntur à noctuis habentibus imperfectum oculum, sed etiam visibilitatem perfectam, qua videntur ab aquilis habentibus perfectum oculum; sic intelligibilia non solum habent intelligibilitatem, qua nominantur per accidens ab intellectu humano, qui in genere intellectus ita se habet, sicut visus noctux in genere visus, sed etiam habent intelligibilitatem, qua sunt nominabilia per se ab intellectu angelico perfecto, ideoque habent indiuiduationem & proprietatem characteristicam per se competentem, ita vt non possit non conuenire. Porro Deus sicut non potest vnā rem ab alia non distinguere, ita non potest cognoscere præscindendo à proprietate characteristicā. Quod enim præscindit, confundit.

Ad 1. Iam allata est necessitas distinguendi rationes genericas, ac differentiales ex eo, quod se mutuò excludant à sua quidditate, ac definitione. Separabilitas igitur non est vnicum argumentū distinctionis. Ad confirmationem ex eo, quod si rationes genericę, ac differentiales distinguuntur, non est ratio cur mutuò sint inseparabiles: respondeo rationem
inse-

inseparabilitatis desumi ex ipsa definitione rationum differentialium. Ratio enim Differentialis est determinatio rationis genericæ, quæ per se ipsam non differt, sed est omninò similis, ad hoc ut differat non contingenter, sed necessariò: e. g. rationalitas mea est actualis determinatio meæ animalitatis, quæ per se ipsam præcisè non differt specie ab animalitate equi, sed est omninò illi similis, ad hoc, ut specie differat ab animalitate equi, non contingenter, & ita ut possit non differre, sed necessariò; sed eo ipso, quod est actualis determinatio rei, non potest esse sine re, ideoque est doctrina communis, quod modus non potest esse sine re, quia est actualis determinatio rei: rursus eo ipso, quod est determinatio, qua mea animalitas differt necessario, mea animalitas non potest esse sine rationalitate, alioquin posset per illam non differre, adeoque non differret necessario, sed contingenter; ergo mea animalitas, & mea rationalitas, & vniuersim rationes genericæ, ac differentiales sunt mutuò inseparabiles. Rationes igitur differentiales conveniunt cum modis in hoc, quod sicut modus est actualis determinatio rei, ideoque non potest esse sine re, sic ratio differentialis est actualis determinatio rationis genericæ, ideoque non potest esse sine

ratione generica: differunt à modo., quod
modus est actualis determinatio, qua res
constituitur talis contingenter, cum possit
non esse talis, ideoque res potest esse sine
modo: at ratio differentialis, & indiui-
dualis est determinatio, qua ratio gene-
rica constituitur talis necessario, ideoque
ratio generica non potest esse sine ratione
differentiali, ac indiuiduali. Ideò mo-
dus, & res distinguuntur modaliter cum
inseparabilitate non mutua; rationes ge-
nericę, differentiales, & indiuiduales
distinguuntur solum formaliter ex natu-
ra rei cum inseparabilitate mutua, at-
que identitate reali, vt dictum est quæst.
30.

Ad 2. Omnis sententia media incurrit
in aliquas difficultates vtriusque opinionis
extremę: si tamen tales difficultates sint
solubiles, non ideo est reiicienda senten-
tia media. Nego tamen, quod sententia
nostra incurrat in omnes difficultates ex-
tremarum. Sunt enim quædam rationes
insolubiles ostendentes, quod formalita-
tes, quarum vna includitur in definitione
alterius, non distinguuntur ex natura
rei; & sunt rationes ostendentes, quod
rationes se excludentes mutuò à defini-
tione distinguuntur. Harum rationum
difficultates, in quas respectiuè incurrunt
sententię extremę, effugit sententia media.

Ad

Ad 3. Substantia dicitur dupliciter, primario, & secundario. Substantia primario dicta est *primum ens, quod est per se, & non in alio*. Hoc pacto solæ substantiæ completæ dicuntur substantiæ, cū solę sint entia prima per se, & non in alio existentia: substantię verò partiales non sunt substantię in hoc sensu, quia non per se existunt, sed in toto substantiali. Substantia secundario dicta est *constitutiuū partiale entis primi in suo genere, specie, & individuo*. In hoc sensu partes tum physicæ, vt materia, & forma, & suppositalitas, tum metaphysicę, vt rationes genericę, differentiales, & vltima indiuiduatio, dicuntur substantiæ. Dum igitur opponitur, quod substantia non distingueretur à rationibus differentialibus substantię, respondeo distinguendo: substantia primario dicta, quę est primum genus, nego; substantia secundario dicta, concedo. Materialitas, spiritualitas, & alię rationes differentiales substantię non sunt primum ens per se existens ergo distinguuntur à ratione substantię primario dictæ, licet quia sunt constitutiue substantię, nō distinguantur à substantia dicta secundario. Ideo sola substantia primario dicta est proprium, & vniuocum genus; substantia secundario dicta est genus minus proprium, & analogum, sicut ens, & ac-

ci-

accidens , vt dicetur inferius . Debet autem aduerti , quod sicut rationalitas non solum non est animal , sed nec est animalitas , sic materialitas , spiritualitas , & alię differentię substantię non solum non sunt primum ens per se , sed neque sunt perfectitas , seu primum , quo constituitur ens per se , sed sunt differentię perfectitatis .

Ad 4. Sicut in demonstratione peruenitur ad prima principia indemonstrabilia ; sic in definitione peruenitur ad primas rationes genericas , ac differentiales simplices non constantes ex alijs rationibus genericis , ac differentialibus , ac proinde non definibiles definitione propria , sed per se ipsas cognoscibiles quidditatiuè , vt dictum est in probatione quartę conclusionis . Ad confirmationem ex eo , quod in rationalitate dentur duę rationes , nimirum differentia , & taleitas differentię , distinguo : dantur duę rationes , quarum vna includitur in quidditate alterius , concedo ; quarum neutra includitur , nego . Sicut differentię entis per se ipsas sunt ens , sic taleitas differentię per se ipsam est differentia , ac proinde differentia , & taleitas differentię non sunt duę rationes distinctę ex natura rei .

Ad 5. Plura ex argumentis adductis

Z

pro-

probant directè, & primo distinctionem rationum genericarum, & differentialium solum in entibus materialibus. Desumuntur enim ex eo, quod intellectus humanus cognoscit quidditatiuè vt proprium obiectum res materiales. Cum ergo substantiam angelicam intellectus humanus non cognoscat quidditatiuè, sed per rationes abstractas à substantijs materialibus, posset dici, quod substantia angelica non componitur ex rationibus genericis, ac differentialibus distinctis ex natura rei, sed est simplex, continens simpliciter perfectionem rationum, quæ rationes generice, ac differentiales distinguuntur ex natura rei in rebus materialibus, & dantur per compositionem metaphysicam ex actu & potentia. Adhuc tamen censeo, quod etiam in angelis rationes genericæ, ac differentiales distinguantur ex natura rei. Vniuersalis enim ratio distinctionis entium, & formalitatum in creatis est limitatio, vt dictum est in quarta confirmatione quartæ conclusionis; sed etiam angeli sunt limitati; ergo etiam in angelis distinguuntur rationes, & perfectiones. Hinc sequitur, quod solus Deus sit extra genus, angeli sint sub genere, & conueniant cum rebus materialibus in genere substantiæ. Hinc etiam est, vt Deus secundum nullam rationem possit à nobis

co-

cognosci quidditatiuè . Omnis enim ratio , quæ est in Deo , cum includat perfectionem omnium aliarum rationum , excedit infinito excessu rationes creatas quidditatiuè cognitæ à nobis . At angeli possunt quidditatiuè cognosci secundum omnes rationes genericas , in quibus conueniunt cum substantijs materialibus quidditatiuè cognitæ , e. g. in ratione substantiæ . Porro ordinare in particulari rationes genericas , ac differentiales , ex quibus angeli componuntur , non est huius loci . Solum dico , quod ratio , in qua angeli conueniunt cum rebus materialibus , est *esse primum ens per se , & non in alio existens* ; ratio , qua differunt à substantijs materialibus , & ab anima rationali est *esse ens intellectuale sine ministerio sensuum* . Ex quo sequitur , quod neque habent materiam , ut substantiæ completæ inferiores , neque sunt formæ alicuius materiæ , ut anima rationalis . Ex his rationibus componitur genus proximum , in quo angeli conueniunt inter se , & differunt à substantijs materialibus , & anima rationali , quod est *esse substantiam completam intellectualem sine ministerio sensuum , & materiæ* . Differentiæ , per quas angeli differunt inter se , desumuntur ex modo intelligendi . Sicut enim animalia irrationalia , hoc est purè sensitiva differunt

per hoc, quod habent diuersos modos sentiendi; canis enim habet modum sentiendi caninum, leo leoninum; sic angelus differunt per hoc, quod habent diuersos modos intelligendi. Porro sicut claudicatio, quæ est determinatio ad modum ambulandi, non est potentia ambulativa, sed est determinatio potentiæ ad taliter ambulandum; sic determinatio ad modum sentiendi, & intelligendi non sunt sensitiuitas, vel intellectualitas, sed sunt differentię, & determinationes, ac proinde possunt ex natura rei distingui à ratione generica sensitiuitatis, vel intellectualitatis.

Concedo etiam, quod in anima rationali distinguuntur gradus vegetatiui, sensitiui, ac rationalis: at nego quod isti gradus essent tres animę, sed essent vna anima constans ex tribus rationibus. Explicatur exemplo, & doctrina Aristotelis secundo de anima tex. 30. & 31. Formę se habent sicut figurę, quę sunt ita ordinatę, vt prima, seu infima sit trilatera, secunda sit quadrilatera, tertia quinquelatera, & sic in infinitum. Sicut igitur figura superior continet totum, quod inferior, & aliquid plus, e. g. figura quadrilatera continet tria latera, vt trilatera, & adhuc quartum latus; sic forma superior continet totum, quod inferior,
& plus;

& p'us; e. g. forma mixti continet totam perfectionem formę elementaris, & aliquid plus. Patet id expressè in animabus. Anima plantę est purè vegetatiua, ideoque se habet sicut figura trilatera; anima brutorum non solum est vegetatiua, sed etiam sensitiua, ideoque se habet vt figura quadrilatera, quę habet tria latera, & præterea quartum; anima rationalis non solum est vegetatiua, & sensitiua, sed etiam rationalis, ideoque se habet vt figura quinquelatera. Iam sicut in figura trilatera aliud est habere tria latera, in quo conuenit cum trilatera, aliud superaddere quartum in quo differt: sic in anima bruti aliud est esse vegetatiuam, in quo conuenit cum plantis, aliud esse sensitiuam, in quo differt. Rursus sicut figura quadrilatera est vnica figura, licet in ea aliud sit habere tria latera, aliud superaddere quartum; sic anima rationalis est vnica anima, licet in ea aliud sit esse vegetatiuam, aliud esse sensitiuam, aliud esse rationalem.

Concedo similiter, quod in anima rationali distinguantur rationes tactiui, visui, auditiui &c. Sensitiuitas enim alia est imperfecta habens tantum sensum tactus, & gustus, vt in zoophytis affixis scopulis, alia perfecta, & habens etiam alios sensus, & hæc componitur ex plu-

ribus gradibus, ut dictum est de figuris. Quia ergo sensitiuitas animæ rationalis est perfecta, dantur in ea omnes gradus sensitiui Concedo quod in intellectu, qui est virtus cognoscitiua perfecta, dari possunt plures rationes cognoscitiui, apprehensiui, &c. dummodo nulla talium rationum includatur in definitione alterius. Istæ rationes in rebus præsertim, valde perfectis possunt esse plurimæ, sed non infinitæ. Cum verò cognoscuntur quidditatiuè omnes rationes, ex quibus res componitur, tunc formatur perfecta cognitio quidditatiua rei, quæ est perfecta definitio ipsius.

Ad 6. In quo proponuntur varia dubia, respondeo resoluendo dicta dubia. Primum est, quo pacto in rebus compositis ex materia, & forma rationes genericæ, ac differentiales identificentur partialiter cum materia, & forma; e. g. quo pacto in homine, qui est compositus ex anima, & corpore, animalitas, & rationalitas identificentur cum anima, & corpore. Dico quod animalitas dicit materiam, & gradum formæ, qui est sensitiuitas; rationalitas dicit materiam, & gradum formæ, quo anima constituitur rationalis, idemque dic proportionaliter de cæteris.

Secundum est, an materia prima constet ex genere, & differentia distinctis

ex

ex natura rei . Quo ad hoc certum videtur non tot rationes esse in materia, quot in forma . E. g. in anima rationali datur ratio vegetatiui, sensitiui, rationalis &c: at in materia prima non dantur totidem rationes, per quarum vnā possit esse vegetatiua, per aliam sensitiua, &c. Ratio est, quia materia est potentia potens recipere formam in genere, & gradus essendi, quos tribuit, non determinando formas, nec gradus formarum; ergo sicut per vnā potentiam physicā respicit omnes formas physicas, vt dicitur in physicis, sic à fortiori omnes gradus formarum; ergo in ea non distinguuntur tot gradus, quot in formis . Secundo probabile est, quod in materia distinguatur ratio generica, & differentialis, ita vt ratio generica, in qua conuenit cum formis, sit esse *substantiam partialem*; ratio differentialis sit esse *potentiam ad essendum omnia corpora saltem sublunaria*.

Tertium dubium est, an omnes rationes componentes vnā essentiam existant per vnā, vel per plures existentias . Respondeo quod per vnā. Probatur primo specialiter de rationibus componentibus essentiam substantialem. Nam si haberent diuersa esse, solum primum genus esset substantiale, differentiæ vero omnes essent accidentales . Patet: nam

accidentale est, quod dat esse receptum in alio esse; sed omnes differentie darent primo generi esse receptum in esse primi generis; ergo omnes differentie essent accidentales. Secundo probatur vniuersaliter: nam ens, quod est vnum solum per hoc, quod vnum esse recipiatur in alio esse, est vnum per accidens, & per aggregationem esse ad esse; ideo homo albus est vnum per accidens, quia constituitur per hoc, quod esse albi addatur esse hominis; sed omnes essentie constituerentur per hoc, quod esse rationis differentialis adderetur esse rationis genericæ; ergo omnes essentie essent vnum solum per accidens; ergo vt sint vnum per se, debent rationes genericæ, ac differentiales habere vnicum esse.

Ad 7. & 8. Patet ex resolutione questionis, in qua ostensum est in Deo nullas rationes distingui, & explicatum, quo pacto in creaturis indiuiduatio distinguatur ab aliis rationibus.

Ad 9. Vt soluatur argumentum ponendæ sunt quedam propositiones. Prima est: triplici modo dicuntur res specie differre. Primo in quantum constituuntur diuersis differentiis specificis: hoc pacto specie differunt homo, & equus. Secundo in quantum sunt ipsæ diuersæ differentiæ specificæ: hoc pacto specie dif-

differunt hinnibilitas , & rationalitas ; si enim sunt prædicata simplicia non constituuntur diuersis differentijs , sed solum sunt diuersæ differentiæ . Tertio in quantum sunt rationes genericæ secundum se omninò similes , sed contractæ diuersis differentijs specificis : hoc pacto specie differunt animalitas hominis , & equi ; sunt enim secundum se omnino similes , sed animalitas hominis contrahitur rationalitate , animalitas equi hinnibilitate , quæ sunt differentiæ specificæ diuersæ . Secunda propositio est : aliud est , quod quædam rationes specie differant , & sint dissimiles ; aliud quod specie differant , & sint dissimiles præcisè per se ipsas . Animalitas hominis , & equi e. g. specie differunt , & sunt dissimiles , sed non per se ipsas præcisè , sed per se ipsas sunt omnino similes , & constituuntur dissimiles differentijs additis rationalitatis , & hinnibilitatis . Tertia propositio continet descriptionem rationis genericæ , & differentialis vniuocæ . Ratio generica vniuoca est ratio secundum se omnino similis aliquibus aliis rationibus , ordinata ad hoc , vt à quibusdam illarum specie differat per differentiam adiunctam . Ratio differentialis est determinatio rationis genericæ ad hoc , vt specie differat à quibusdam aliis rationibus , quibus secundum

se præcisè est omnino similis . Animalitates hominis, & equi sunt rationes genericæ ; sunt enim secundum se præcisè omnino similes, & ordinantur ad hoc, vt per rationalitatem, & hinnibilitatem specie differant . At rationalitas, & hinnibilitas sunt rationes differentiales, quia sunt determinationes ad hoc, vt animalitates secundum se omnino similes constituantur dissimiles, ac specie differentes .

Hinc ad argumentum concedo, quod animalitas hominis, & equi, & vniuersim rationes genericæ per se ipsas præcisè sūt omnino similes, licet sint dissimiles, & specie differentes per differentias adiunctas iuxta secundam propositionem. Dum opponitur : animalitas hominis est inseparabilis à rationalitate ; animalitas equi est inconiungibilis ; ergo specie differunt ; distinguo antecedens : animalitas hominis est inseparabilis à rationalitate per se ipsam præcisè, nego ; per rationalitatem adiunctam, concedo ; & distinguo consequens : ergo differunt specie per se ipsas præcisè, nego ; per differentias adiunctas, concedo . Animalitatem hominis esse inseparabilem à rationalitate est esse necessario rationalem. At sicut non per se ipsam est rationalis, sed per rationalitatem, ita non per se ipsam est necessario rationalis, sed per rationalitatem, quæ est determi-

natio animalitatis ad hoc , vt sit necessario rationalis. Si vero quærat^r, cur animalitas hominis non sit per se ipsam rationalis , respondeo ex descriptione rationis genericę posita in tertia propositione , quod ratio generica est ratio per se ipsam omnino similis aliis rationibus , ordinata ad hoc , vt ab iis specie differat per differentiam adiunctam; sed animalitas hominis est ratio generica ; ergo ordinatur ad hoc , vt specie differat ab animalitate equi per differentiam adiunctā ; sed differt per hoc , quod est necessario rationalis, cum animalitas equi sit necessario irrationalis ; ergo animalitas hominis est necessario rationalis , animalitas equi est necessario irrationalis per differentias adiunctas, & non per se ipsas præcisè . Si verò opponatur : animalitas hominis per se ipsam non est rationalis; ergo per se ipsam est irrationalis: nego consequentiam. Ex eo enim , quod non identificetur cum rationalitate , non sequitur, quod identificetur cum irrationalitate: ly vero *per se ipsam* significat identitatem. Eodem pacto dico, quod sensitiuitas animæ rationalis est immortalis , incorruptibilis , ac spiritualis , sed per se ipsam præcisè non habet vllam ex dictis denominationibus , hoc est non est idem cum hoc , quod est esse immortalem , incor-

ruptibilem & spiritualement, sed est hæc omnia per differentiam rationalitatis adiunctam. Illa enim ratio, in qua conueniunt vniuocè formæ mortales, & immortales, per se ipsam præcisè nec est mortalis, nec immortalis; sed in ratione sensitiuitatis conueniunt vniuocè animæ brutorum mortales, & anima hominis immortalis ergo sensitiuitas per se ipsam præcisè nec est mortalis, nec immortalis. Nec opponant impossibile esse, vt aliqua ratio constituatur immortalis per aliquid superadditum. Hæc enim propositio est manifestè falsa. Nam corpora beatorum, quæ naturaliter exigunt mortalitatem, constituuntur immortalia, & incorruptibilia per qualitatem superadditam, non solum metaphysicè, sed physicè distinctā; ergo possunt à fortiori rationes genericæ per differentias distinctas solum metaphysicè constitui immortales, & incorruptibiles. Confirmatur ex Sancto Thoma prima parte quæst. 76. artic. 3. ad primū. *Anima sensitiua hominis non habet incorruptibilitatem ex hoc, quod est sensitiua, sed ex hoc, quod est intellectiua ei incorruptibilitas debetur. Licet enim sensitiuum incorruptionem non det, tamen incorruptionem intellectiua auferre non potest.*

Vrgent, quia sensitiuitas animæ rationalis per se ipsam exigit rationalitatem, est

est capax recipiendi rationalitatē, est perfectibilis per rationalitatē tanquā per naturale perfectiū, à quo reddatur incorruptibilis; sed animalitas equi per se ipsā non habet hæc prædicata, sed omnino opposita; ergo animalitas hominis & equi per se ipsas præcisè sunt dissimiles, & differentes.

Respondeo distinguendo maiorem. Sensitivitas animæ rationalis per se ipsam exigit rationalitatem, est capax, & perfectibilis exigentia, capacitate, & perfectibilitate non determinante, sed determinabili, concedo; exigentia, & capacitate determinante, nego; & distinguo minorem; animalitas equi non habet hæc prædicata, ita ut habeat omnino similia, concedo; ita ut nō habeat omnino similia, nego; & nego consequentiam. Duplex est exigentia, capacitas, & perfectibilitas; prima determinans, secunda determinabilis. Determinans competit formæ, ac differentiis respectu suarum proprietatum; e. g. forma ignis exigit proprietatem caloris, & rationalitas proprietatem risibilitatis exigentia determinante rationem specificam caloris, & risibilitatis; & similiter forma ignis est capax, & perfectibilis per calorem, ut calor est, ita ut talis capacitas, & perfectibilitas determinet rationem caloris. Exigentia, capacitas, & perfectibilitas

purè determinabilis competit materiae respectu formarum, & rationibus genericis respectu differentialium. Materia enim prima exigit, & est perfectibilis per formam hominis, leonis, &c, sed ita, ut perfectibilitas, & exigentia materiae determinet solum formam perfectiuam materiae, non verò speciem talis formae, ut dicetur quaest. 8. physicę. Proportionaliter ratio generica, e. g. sensitiuitas animę rationalis exigit quidem rationalitatem, est capax, & perfectibilis rationalitate exigentia, & capacitate purè determinabili. Sensitiuitas enim animæ rationalis exigit differentiam, qua necessario differat ab aliis sensitiuitatibus, quibus secundum se præcisè est omnino similis, non exprimendo, quod talis differentia est rationalitas; sed sola rationalitas est differentia determinans talem sensitiuitatem ad hoc, ut differat ab aliis; ergo exigit rationalitatem, & est capax, ac perfectibilis per illam, exigentia, capacitate, & perfectibilitate purè determinabili, cui est omninò similis exigentia sensitiuitatis animæ equinę; nam etiam illa est exigentia, & capacitas differentię, qua differat ab aliis sensitiuitatibus omnino similibus. Si verò quæratur, cur rationibus genericis competat exigentia, capacitas, & perfectibilitas purè determinabi-

nabilis? Respondeo rationem esse quia sunt rationes ordinatę ad hoc, vt cum secundum se sint omnino similes, differant, ac sint dissimiles per differentias adiunctas: si vero exigent exigentia determinante iam per tales exigentias essent dissimiles ante differentias adiunctas, adeoque non essent rationes genericę. Confirmatur, quia aliud est exigere differentiam, qua res differat, aliud exigere quia differt; ratio generica exigit differentiam, qua primo differat; forma exigit proprietates, quia iam differt; ergo ratio generica debet exigere differentias exigentia purę determinabili, & non determinante.

Vrgent: est per se notum hoc principium: duę differentię specie diuersę, cuiusmodi sunt rationalitas, & rugibilitas, non possunt respicere vt naturale perfectibile duas animalitates secundum se præcisę omnino similes; talis enim respectus esset omnino irrationabilis, ideoque Aristoteles docet, quod perfectiūm, & perfectibile debent sibi mutuo respondere; ergo ea, quę sunt perfectiua solum, perfectibilium specie diuersorum, specie differunt; & quę sunt perfectibilia perfectiuis solum specie diuersis specie differunt; sed animalitas hominis, & equi sunt perfectibiles solum differentiis specie

cie diuersis ; ergo secundum se præcisè specie differunt . Respondeo potius esse per se notum principium oppositum : duæ differentiæ specie diuersæ debent respicere vt naturale perfectiũ rationes genericas omnino similes . Probatur, quia illud est per se notum , quod sequitur ex descriptione explicante quid sit res ; sed ex descriptione explicante quid sit differentia, sequitur, quod diuersæ differentiæ debent respicere rationes genericas secundum se omnino similes ; ergo, &c. Probatur minor : differentia enim est ratio , per quam primo differunt quæ secundum se præcisè sunt omnino similia ; ergo differentiæ respiciunt rationes genericas omnino similes . Confirmatur , nam sicut quia motus est actus, quo mobile mouetur, respicit mobile , quod antecedenter ad motum non mouetur , ita quia ratio differentialis est actus , quo res differt , respicit rationem , quæ antecedenter non differt . Hinc patet rationabilissimum esse appetitum , quo differentia exigit perfectibile antecedenter non differens . Appetitus enim, qui est iuxta naturam rei, est maximè rationalis ; sed iuxta naturam differentiæ , qua res constituentur primò differentes, est , vt respiciat rationes antecedenter non differentes , ergo , &c. Aequiuocatio oritur ex eo, quod confun-

dan-

tur appetitus, quo res respicit aliquid, quia est tale, & quo respicit, ut sit tale; primus enim appetit rem, ut iam talem, secundus è conuerso, & vterque est rationalis. Perfectibile, & perfectiuum sibi mutuo respondent; sed tum respondent, cum perfectibile est quale exigit perfectiuum. Perfectiuum verò ordinatum ad dandam rationi perfectionem, qua primo differat specie ab aliis omninò similibus, exigit perfectibile omninò simile, & è conuersò.

Eodem pacto soluuntur argumenta, quibus impugnant proprietatem characteristicam. Cum enim proprietas characteristicam sit differentia, qua res omninò similes secundum speciem constituuntur indiuidualiter dissimiles, ac differentes, exigitur exigentia purè determinabili, & per hoc differt ab aliis proprietatibus, quæ rebus competunt non ut primo differant, sed quia iam differunt.

Ad 10. Ex eo, quod sententia allata, sit contra omnes scholasticos, respondeo certum esse, quod Thomistæ & Scotistæ, quos sequitur Fonseca 5. metaphys. aliique ex nostris contra Nominales conueniunt in admittenda aliqua distinctione ex parte obiecti inter rationes metaphysicas, licet differant in modo nominandi, & explicandi talem distinctionem; ergo
hęc

hæc sententia quoad rem ipsam fortasse
plures habet sectatores, quam opposita. .
Est quidem verum quod auctores admit-
tunt distinctionem cum reali identitate :
sed hanc etiam ego concedo, vt dictum
est quæst. 30. Nec dicas inseparabilitatem
non sufficere ad identitatem realem : ne-
go enim de inseparabilitate rationum cō-
stituentium vnicam essentiam. Potentię
igitur animæ licet inseparabiles non sunt
realiter idem cum anima, quia cum sint
accidentales, non constituunt vnā ef-
sentiam cum substantia animę; ex acci-
dentibus enim & substantia non potest
constitui vna essentia. Aristotelem, &
Sanctum Thomam puto stare pro nobis.
Licet enim dicant prædicata non distin-
gui re, sed ratione, tamen sensus est,
quod distinguantur ratione obiectiua suf-
ficiente ad contradictoria intrinseca sine
reali distinctione, quod etiam nos dici-
mus. Quod verò inter ea, quę sunt idem
realiter, ponant distinctionem rationis
sufficientem ad contradictoria intrinseca,
patet ex Sancto Thoma prima par. quæst.
28. art. 3. ad primum, vbi ex Aristote-
le 3. Phys. t. 21. docet principium illud,
*quę sunt eadem vni tertio, sunt eadem inter
se*, intelligi de iis, quę sunt idem re, &
ratione, sicut tunica, & vestimentum;
at posse ea, quę sunt ita idem vni tertio re,

ut distinguantur ratione , distingui inter se , ideoque docet Aristoteles loco allegato, quod actio, & passio , licet sint idem cum motu realiter, tamen quia distinguuntur ratione , distinguuntur inter se ; sed eo ipso , quod duo , quę sunt idem cum tertio , distinguuntur inter se , recipiunt prædicata contradictoria intrinsecā à tertio, cum quo identificantur; tertium enim non distinguitur , ipsa distinguuntur ab eo , à quo tertium non distinguitur ; ergo Aristoteles , & Sanctus Thomas inter ea, quę sunt realiter idem, concedunt distinctionem rationis obiectivę , hoc est sufficientem ad intrinseca contradictoria . .

Confirmatur, nam Sanctus Thomas prima parte quęst. 3. art. 5. docet Deum non esse in genere , quia *semper id, à quo sumitur differentia, se habet ad id unde sumitur genus , sicut actus ad potentiam ; unde cum in Deo non adiungatur potentia actui , impossibile est quod sit in genere*; sed hæc ratio nihil valeret , nisi ex parte obiecti id, unde sumitur genus, se haberet ad id, unde sumitur differentia , sicut potentia ad actum ; ergo supponit , quod ex parte obiecti ratio generica se habeat ad rationem differentialem, sicut potentia ad actum . Art. deinde septimo eiusdem quæstionis concludit. Deū esse omnino simplicem per hæc verba . *Cum enim in Deo non sit compositio , ne-*
que

*que quantitativarum partium, quia corpus non est; neque compositio formae, & materiae, neque in eo sit aliud natura, & suppositum, neque aliud essentia, & esse, neque in eo sit compositio generis, & differentiae, neque subiecti, & accidentis, manifestum est, quod nulli modo compositus est, sed est omnino simplex. Aliæ compositiones, quas excludit, sunt ex parte obiecti; ergo etiā cōpositio ex genere, & differentia est ex parte obiecti; præsertim cum nihil spectaret ad probandam diuinam simplicitatem, quod Deus ratione merè extrinseca non sit compositus ex genere, & differentia. Hinc patet, quod cum locis allegatis Sanctus Thomas dicit genus, & differentiam distinguere non re, sed ratione, & per considerationem nostram, loquitur de distinctione rationis obiectivæ, quæ sola repugnat diuinæ simplicitati. Locus adductus Aristotelis ex primo Posteriorum non concludit. Solum enim asserit, quod qui cognoscit, quod *omne triangulum habet tres angulos æquales duobus rectis*, cognoscit aliquammodo id etiam de hoc triangulo, quod etiam ego concedo; at non negat, quod differentiaë triangulorum addant aliquid distinctum ratione obiectiva à ratione generica trianguli, quod solum ego affirmo.*

Sed omnium clarissimè sententiam nostram

stram docet Sanctus Bernardus serm. 80. in cantica , vbi probans magnitudinem animæ rationalis , hoc est capacitatem æternorum distingui ab anima , licet sit inseparabilis , sic arguit . *Nulla forma est id, cuius est forma ; est autem magnitudo forma animæ ; nec enim ideò non forma , quia inseparabilis est illi, hoc siquidem sunt substantiales differentie omnes ; hæc non modo propriè propria , sed etiam propria quedam ; non igitur sua magnitudo anima ; non magis quam sua nigredo coruus , quam suus candor nix , quam sua risibilitas , seu rationalitas homo , &c. & paulo post , sola summa , & increata natura hanc sibi vindicat meram , singularemque sue existentie simplicitatem , ut non aliud , & aliud , non alibi quoque & alibi , sed ne modo quidem , & modo inueniatur in ea . Nempe in semet manens quod habet est , &c. Quid poterat expressius dici pro mea sententia , in qua assero gradus creatos distingui cum omnimoda inseparabilitate , in Deo omnia esse idem .*



Vtrum intellectus faciat vniuersale per abstractionem. Quaestio XXXIII.

Videtur quod intellectus nullo pacto possit facere vniuersale 1. quia nihil potest dare alteri, quod non habet in se; sed intellectus humanus non habet in se vniuersalitatem, sed singularitatem; ergo non potest dare naturæ vniuersalitatem, qua faciat naturam vniuersalem.

2. Intellectus humanus accipit cognitionem à sensibus, e. g. accipit cognitionem colorum à sensu visus, ideoque cæcus à natiuitate non potest habere cognitionem colorum, vt Aristoteles docet 1. post. tex. 33.; sed sensus non cognoscunt vniuersale, sed singulare; ergo intellectus non potest cognoscere vniuersale, sicut cæcus natus non potest cognoscere colores; ergo neque potest facere vniuersale.

3. Si Intellectus faceret vniuersale, faceret cognoscendo; sed non potest facere vniuersale cognoscendo; ergo non potest facere vniuersale. Probatur minor: intellectus enim cognoscendo non potest immutare naturas rerum, e. g. si pomum
fit

sit acerbum, quomodocumque intellectus illud cognoscat, numquam reddet dulce, vel non acerbum; sed naturæ à parte rei non sunt vniuersales, sed singulares, vt dictum est quæst. 28; ergo intellectus non potest cognoscendo naturas facere vniuersales.

Neque dicas, quod intellectus per cognitionem confusam, qua cognoscit naturam sine singularitatibus, abstrahit naturam à singularitatibus, quibus multiplicatur, & diuiditur, & sic naturam reddit indiuisam, & vnā; nam vnitas, & vniuersalitas non minus debent esse intrinsecè rebus, quæ denominantur vniuersales, & vnæ, quam albedo, vel dulcedo debeant esse intrinsecè rebus, quæ denominantur albæ, vel dulces; ergo ex eadem ratione, ex qua res non possunt verè fieri albæ, vel dulces per cognitionem extrinsecam intellectus, non possunt naturæ verè fieri vniuersales per cognitionem extrinsecam intellectus.

4. Si intellectus deberet facere vniuersale, maximè propter scientias, quæ debent speculari non singularia, sed vniuersalia; sed scientiæ debent speculari naturas rerum prout sunt; ergo si res à parte rei sunt singulares, intellectus non debet illas per suam cognitionem facere vniuersales. Et confirmatur, quia ad scientias

non requiritur cognitio fingens, cum omnis fictio sit contra veritatem, quam vnicè quærunt scientiæ; sed per cognitionem facientem vniuersale intellectus fingeret; ergo ad scientias non requiritur cognitio faciens vniuersale.

5. Si intellectus faceret vniuersale, vel faceret per operationem intellectus agentis, vel per operationem intellectus possibilis; vel per cognitionem absolutam, vel per comparatiuam; vel per directam, vel per reflexam; non potest explicari quo ex dictis modis faciat vniuersale; ergo intellectus non potest facere vniuersale.

Respondeo duo axiomata esse communiter recepta. Primum est *modus operandi sequitur modum essendi*. Secundum *modus cognoscendi sequitur modum essendi*. Ratio primi axiomatis est, quia vnaquæque res habet modum operandi conformem suæ naturæ, & illi debitè proportionatum, ideoque ex propria operatione cognoscitur, ac demonstratur natura rei; e. g. quia homo habet naturam rationalem, habet etiam modum operandi rationalem, & ex modo operandi rationali, quem habet homo, cognoscitur hominis natura rationalis. Ex primo axioma probatur manifestè secundum. Cognitio enim est propria operatio naturæ cognoscitiuæ; sed

ex primo axiomatè modus operandi sequitur modum essendi; ergo in natura cognoscitiua modus cognoscendi sequitur modum essendi. Hinc est, vt vnica via demonstrandi à posteriori, seu per effectum quales sint essentię rerum, desumenda sit ex operationibus, quę sunt effectus rerum; vnica via demonstrandi à priori, seu per causam, quales sint operationes rerum, desumenda sit ex essentiis, quę sunt causę operationum; & ad penetrandas tum essentias rerum, tum earum operationes sit vnicè necessarium considerare mutuam earum proportionē. Vt igitur in pręsentia explicemus modū cognoscendi, quo natura intellectiua cognoscit, ac facit vniuersale, debemus explicare mutuam proportionem inter modum essendi, & modum operandi, ac cognoscendi naturę cognoscitiuę.

Triplex est forma, & natura cognoscitiua. Prima est, quę est omninò alligata materię corporeę, ac sensibili, & accidentibus materię, quę sunt locus, tempus, figura, & alia huiusmodi, quę vocantur accidentia indiuiduantia: e. g. anima equi ita est alligata materię, seu corpori equino, vt omninò dependeat à tali corpore, & eius accidentibus, nec possit esse extra corpus sine figura, sine loco, & tempore materię, & sine aliis

accidentibus conseruantibus; & idem dic de animabus omnium brutorum. Tales formæ sicut habent modum essendi alligatum materiæ, & accidentibus indiuidualibus loci, temporis &c. ita habent modum cognoscendi alligatum materiæ, & accidentibus indiuiduantibus: e. g. sicut anima equi non potest esse nisi in materia, & corpore, & cum dependentia à loco, & tempore, in quo est, ita non potest quidquam cognoscere, nisi prout existens in aliqua materia, & corpore, in aliquo loco, & tempore; & quia quod cognoscitur vt existens in aliqua materia, in aliquo loco, & tempore, cognoscitur vt materiale, & singulare, ideò equus, & omnia bruta animalia non possunt quidquam cognoscere, nisi vt materiale, & singulare; & quia natura, quæ non potest quidquam cognoscere, nisi vt materiale, & singulare, est sensitiua tantum, ideò omnia bruta animalia sunt sensitiua tantum, nec participant vlllo pacto naturam intellectiuam.

Secunda forma, & natura cognoscitiua est, quæ ita est, vel potest esse in materia corporea, & sensibili, vt non sit alligata tali materiæ, nec ab ea, vel ipsius accidentibus indiuidualibus in essendo dependens. Talis est anima rationalis hominis. Ita enim est in corpore materiali, ac sensibili-

sibili, vt non dependeat à corpore, & eius
accidentibus, sed possit existere extra cor-
pus, sine figura, & sine omnibus acciden-
tibus materiæ, sicut de facto post mortem
hominis corrupto corpore, remanet anima
rationalis separata à corpore, & à loco,
ac tempore corporeo, & materiali. Hæc
forma sicut est in materia sensibili, & ac-
cidentibus indiuiduantibus affecta, sed
non dependet in essendo à materia sensi-
bili, & eius accidentibus indiuidualibus,
sic potest per sensum cognoscere res vt
existentes in materia sensibili, & acci-
dentibus indiuidualibus affecta, sed non
dependet in cognoscendo à tali materia,
sed potest etiam cognoscere, vt non exi-
stentes in materia sensibili, & affecta ac-
cidentibus indiuidualibus. Et quia co-
gnoscere res vt existentes in materia sen-
sibili est cognoscere vt singulares; cogno-
scere res abstrahendo à materia sensibili,
& ab accidentibus indiuidualibus est co-
gnoscere vt vniuersales; ideò anima ra-
tionalis potest cognoscere res tum vt sin-
gulares, tum vt vniuersales. Quia rursus
posse cognoscere res in vniuersali, & ab-
strahendo à materia sensibili indiuiduali
est habere potentiam intellectiuam, ideò
anima rationalis non solum habet natu-
ram sensitiuam, in quantum potest per sen-
sus cognoscere res vt existentes in mate-

ria indiuiduali, sed etiam habet naturam intellectuam, in quantum potest cognoscere res in vniuersali, & abstrahendo à materia sensibili, & indiuiduali.

Tertia forma, & natura cognoscitiua est, quæ non solum non est alligata, ac dependens à materia, sed est ita perfecta, & completa per se ipsam, vt non possit esse in materia, nec possit ab illa recipere vllum complementum essendi. Tales formæ sunt Angeli, qui à philosophis vocantur Intelligentiæ. In hoc enim Angeli differunt ab anima rationali, quod quia anima rationalis est forma imperfecta, & incompleta, indiget corpore, & materia, vt ab ipsa accipiat complementum essendi, & cognoscendi: at Angeli sunt formæ completæ, & perfectæ, ideoque non possunt esse in vlla materia, vel corpore, nec accipere aliquod complementum materiale. Hæ formæ sicut nullo pacto dependent à materia in essendo, nec per materiam complentur quo ad esse, sic nullo pacto dependent in cognoscendo, ideoque non accipiunt cognitionem à sensu, sicut anima rationalis, sed sine adiutorio sensuum cognoscunt immediatè naturas rerum.

Hinc primo patet, cur intellectus humanus cognoscat, & faciat vniuersale. Ratio est, quia sicut non dependet in

essen-

essendo à materia indiuiduali, sic non dependet in cognoscendo, vt explicatum est.

Patet secundo, quo pacto cognoscat, & faciat vniuersale. Possumus loqui de duplici vniuersali, specifico, & generico. Vniuersale specificum facit cognoscendo res omninò similes in essentia, & abstrahendo à materia affecta accidentibus indiuidualibus; e. g. omnes homines sunt omninò similes in natura, & essentia, ac solum sunt dissimiles in accidentibus, quæ exprimentur hoc versu:

Forma, figura, locus, stirps, nomen, patria, tēpus;
sed intellectus noster cognoscens res omninò similes abstrahendo ab omni dissimilitudine, eo ipso confundit, atque illas constituit vnum obiectum, nec potest inter se distinguere, vt dictum est quæst. 32. in probatione conclusionis quintæ; ergo intellectus eo ipso quod cognoscit omnino similia, & abstrahit ab omnibus accidentibus indiuidualibus dissimilibus, facit vniuersale; e. g. eo ipso quod cognoscit hominem, abstrahendo ab omni eo, per quod vnus homo est dissimilis alteri, facit vniuersale hominis; & quia accidentia indiuidualia dissimilia conuenientia rebus eiusdem speciei distinguuntur ab ipsis à parte rei; ideo intellectus facit vniuersale specificum, abstrahendo, & præ-

sciendando obiectiuè ab accidentibus individualibus dissimilibus, & confundendo singularitates identificatas, & omninò similes. Vniuersale genericum facit abstrahendo rationem genericam à differentiis specificis, vel ex parte obiecti, si rationes genericę distinguuntur ex natura rei, aut virtualiter intrinsecè à differentiis, vel per solam confusionem ex parte conceptus, e. g. intellectus facit vniuersale animalis abstrahendo rationem animalis à differentiis rationalis, & irrationalis, vt explicatum est.

Ad 1. Concedo maiorem, & distinguo minorem; intellectus non habet vniuersalitatē in essendo, concedo minorem; non habet vniuersalitatem in cognoscendo, & repræsentando, nego minorem; & distinguo consequens; ergo non potest dare naturę vniuersalitatem consistentem in hoc, vt confusè repræsentetur cognitione vniuersali in repræsentando, nego consequentiam; non potest dare naturę aliam vniuersalitatem, concedo consequentiam. Intellectus non est vniuersalis in essendo, cum sit hic numero intellectus, sed est vniuersalis in repræsentando, quia est vnus potens repræsentare multa, & etiam omnia vnica cognitione non distinguente illa inter se; ergo potest naturę tribuere vniuersalitatem consistentem in

in hoc, vt cum sit multiplex repræsentet
vnica cognitione non distinguente vnum
indiuiduum ab alio. Si verò quæratur vl-
terius, cur intellectus, cum sit singularis,
& vnus, potest formare cognitionem, quæ
sit plurium, immo & omnium? Respon-
deo rationem esse, quia natura intellecti-
ua consistit in hoc, vt cum sit vna, & sim-
plex, sit quodammodo plura, immo &
omnia, in quantum continet in se perfe-
ctionem omnium rerum, ideoque tertio
de anima tex. 27. dicit Aristoteles, quod
anima intellectiua est quodammodo om-
nia, sed modus operandi, & cognoscen-
di sequitur, & proportionatur modo esse-
di; ergo intellectio, quæ est propria ope-
ratio nature intellectiue, cum sit vnica,
est quodammodo plura, & etiam omnia,
in quantum plura, & omnia cognoscit,
adeoque est vniuersalis in repræsentando.
Hinc reiicitur error Auerrois, qui ex
eo, quod intellectus faciat vniuersale, in-
tulit quod est vniuersalis, adeoque quod
intellectus est vnicus in omnibus homini-
bus. Ex eo enim, quod intellectus faciat
vniuersale, sequitur quod sit vniuersalis
non in essendo, sed in repræsentando; et ex
eo, quod sit vniuersalis in repræsentando
non sequitur, quod sit vnus tantum in
omnibus hominibus, vt putauit Auerroes,
sed quod ita sit vnus, vt sit quodammodo

omnia per quamdam virtualem continen-
tiam perfectionis, vt docuit Aristoteles,
& ex eo sanctus Thomas, tum in commen-
tario tex. allegati, tum prima parte q. 14:
art. 1. & alibi.

Ad 2. Distinguo maiorem: intellectus
humanus accipit cognitionem à sensu in-
choatiuè, concedo maiorem; perfectiuè,
nego maiorem; concedo minorem; & ne-
go consequentiam. Anima rationalis sup-
ponit corpus tanquam materiam, sed est
multò perfectior corpore, & à corpore
independens in essendo, vt dictum est in
resolutione quæstionis; sed modus operā-
di, & cognoscendi proportionatur modo
essendi; ergo connaturalis modus cogno-
scendi animæ rationalis est, vt incipiat à
cognitione materiali sensus, qua cogno-
scit obiectum cum dependentia à materia,
& ab accidentibus indiuidualibus, sed su-
peraddat cognitionem proportionatam,
ipsi animæ, qua cognoscat idem obiectum
sine dependentia à materia, & ab acci-
dentibus indiuidualibus; sed talis cog-
nitio cognoscit, ac facit vniuersale; ergo
connaturale animæ est, vt à cognitione
singularium accepta per sensus progre-
diatur ad cognitionem vniuersalis tanto
perfectiorem cognitione sensitua singu-
larium, quantò intellectus est perfectior
sensu. Cæcus igitur à natiuitate non
po-

potest habere cognitionem colorum, quia intellectus debet inchoare cognitionem propriam sensibilem à sensu ; ergo si deficit sensus colorum, non potest inchoare, atque adeò nec perficere cognitionem propriam colorum. At licet sensus non cognoscat vniuersale, sed solum singulare, possumus peruenire ad cognitionem propriam vniuersalium. Ratio est, quia sensus non requiritur vt perficiat, sed vt incipiat cognitionem vniuersalium ; ergo dummodo sensus cognoscat singularia, potest intellectus abstrahendo ab accidentibus indiuidualibus perficere cognitionem vniuersalem.

Ad 3. Concedo maiorem, & nego minorem. Ad probationem concedo, quod intellectus cognoscendo non immutat naturas rerum, sed dico, quod ad hoc, vt faciat naturas vniuersales, non requiritur, vt immutet intrinsecè naturas rerum, sed sufficit, vt naturas cognoscat cognitione vniuersali in representando, vt explicatum est in responsione ad primum.

Dum opponitur, quod vnitas, & vniuersalitas debent esse forma intrinseca naturæ, respondeo falsum id esse, si loquamur de vniuersalitate requisita ad scientiam, de qua sola loqui debemus, cum tota hæc quæstio sit de vniuersali scientifico. Ratio est, quia scientiæ debent facere naturas

vniversales non ideò vt perficiant, vel immutent ipsas naturas, sed vt sciens habeat cognitionem scientificam de naturis; sed per hoc ipsum, quod sciens cognoscat totam naturam, & omnia singularia licet infinita vnica cognitione abstrahente à materia, & ab accidentibus indiuidualibus, habet cognitionem scientificam de natura; ergo vniuersalitas requisita ad scientias non debet esse intrinseca naturæ, sed habetur per solum modum cognoscendi. E conuersò quod mel sit dulce, vel amarum non spectat ad perfectionem cognoscentis, sed ad perfectionem mellis; ergo mel non potest fieri dulce, vel amarum per solam cognitionem, sed requiritur intrinseca mutatio ipsius mellis. Idem dic ad alias paritates similes, quæ possunt afferri.

Ad 4. Concedo maiorem, & distingo minorem; scientiæ debent speculari res prout sunt, si sensus sit, quod debent de rebus affirmare tantum quæ conueniunt rebus, concedo minorem; si sensus sit, quod speculatio scientiæ debet esse ita materialis, & crassa, sicut res, nego minorem; & nego consequentiam. Est quidem verum, quod scientiæ non debent de rebus affirmare quæ non conueniunt rebus; e.g. quia equus non est rationalis, non debet scientia affirmare de equo, quod
fit

fit rationalis , alioquin erraret . At
speculatio scientiæ non debet esse ita
materialis , & crassa sicut res , e. g. spe-
culatio de asino non debet esse materia-
lis , & crassa sicut ipse asinus , immò
debet esse immaterialis, & subtilis, & quo
cognitio est immaterialior , eo est perfe-
ctior , ideoque dicitur , quod cognitio
perficitur per recessum à materialitate .
Iam materialitas præsertim consistit in
quadam compositione, per quam res con-
tinet plures partes distinctas ; immateria-
litas è conuersò consistit in quadam sim-
plicitate , per quam res cum sit simplex ,
& partibus carens , continet plura, vt di-
ctum est quæst. 5. ad 10; ergo cognitio per
hoc ipsum , quod cum sit vnica , & sim-
plex, cognoscit vniuersaliter totam natu-
ram , est immaterialis ; ergo vniuersalitas
spectat , & requiritur ad perfectionem
cognitionis scientificæ. In hoc verò, quod
rerum naturæ cognoscantur vniuersaliter
modo explicato, non fit vlla fictio. Neque
enim intellectus fingit naturam esse vni-
uersalem à parte rei; hæc enim fictio esset
inutilis, immò contraria scientiæ ; sed
per vnicam simplicem cognitionem co-
gnoscit naturas vniuersaliter , vt explica-
tum est .

Ad 5. In quo proponuntur varia du-
bia, respondeo resolvendo talia dubia.

Primo quæritur vtrum vniuersale fiat per operationem intellectus agentis, vel per operationem intellectus possibilis. Intellectus agens est potentia, quæ producit speciem, hoc est imaginem spirituales, repræsentantem naturam vniuersaliter: intellectus possibilis est potentia, quæ format cognitionem repræsentantem naturam vniuersaliter. De vtroque intellectu, & de eorum distinctione agendum in libris de anima. Quæritur vtrum vniuersale fiat per productionem speciei repræsentantis naturam vniuersaliter, an per productionem cognitionis? Dico, quod fit per vtrumque. Probatur, quia naturam esse vniuersalem nihil aliud est, quam naturam esse vniuersaliter repræsentatam; sed natura vniuersaliter repræsentatur tum per speciem, tum per cognitionem vniuersalem; ergo natura sit vniuersalis tum per operationem intellectus agentis, tum per operationem intellectus possibilis. Neque quoad hoc punctum præcisè potest fieri alia quæstio, quam de nomine. Quæstio de re potest esse, vtra operatio præcedat, productio speciei vniuersalis facta ab intellectu agente, an cognitio vniuersalis producta ab intellectu possibili. Sed hæc quæstio spectat ad libros de anima.

Eodem pacto respondeo ad alia duo
quæ-

quæſita , vtrum vniuerſale fiat per cognitionem abſolutam, vel comparatiuam: per directam, vel per reflexam . Dico enim, quod natura ſit vniuerſalis per omnem cognitionem , quæ repræſentat ipſam vniuerſaliter; ſed tum cognitio abſoluta, tum comparatiua , tum directæ , tum reflexæ, poteſt repræſentare naturam vniuerſaliter; ergo per omnes iſtas cognitiones poteſt fieri vniuerſale ſaltem ſcientificum ; licet fortasſe non fiat vniuerſale omnino conſuſum, de quo dicetur ſectione vltima .

*Vtrum omnis, & ſolus intellectus
faciat vniuerſale . Quæſtio
XXXIV.*

Primo videtur quod omnis intellectus faciat vniuerſale . Si enim aliquis nō faceret , maximè diuinus , & angelicus ; ſed etiam iſti faciunt vniuerſale ; ergo . Minor probatur , quia ideò cum ſenſus non faciat vniuerſale , intellectus humanus facit , quia eſt ſuperior, ac perfectior ſenſu ; ſed intellectus angelicus , ac diuinus ſunt ſuperiores , ac perfectiores intellectu humano ; ergo faciunt vniuerſale .

2. Quod intellectus humanus faciat vniuersale non spectat ad imperfectionē , sed ad perfectionem ipsius intellectus; sed quidquid perfectionis datur in intellectu humano, datur à fortiori in angelico , & diuino ; ergo etiam intellectus angelicus, & diuinus faciunt vniuersale .

3. Intellectus diuinus , & angelicus vident cognitionem, per quam nos facimus vniuersale, cognoscendo naturam confusè ; sed in tali cognitione vident reflexè obiectum , & non aliter , quam vt repræsentatur in tali cognitione ; quod enim videtur in imagine non aliter videtur , quam prout in tali imagine repræsentatur, atque adeò si per imaginem repræsentatur confusè videtur solum confusè ; ergo intellectus diuinus , & angelicus saltem per cognitionem reflexam faciunt vniuersale .

4. Videtur specialiter de diuino intellectu , quod faciat vniuersale . Intellectus enim quo altior est , eo minus descendit ad singula , & eo magis considerat solum vniuersa; sed intellectus diuinus est altissimus ; ergo non descendit ad considerationem singularium, sed contemplatur sola vniuersalia . Confirmatur , quia indignum esset intellectu hominis sapientis, vt immoraretur in contemplatione & enumeratione singularum muscarum , &

pulicum; ergo intellectus diuinus vilissima obiecta contemplantur solum in vniuersali.

5. Videtur, quod non solus intellectus faciat vniuersale. Nam in in tantum intellectus facit vniuersale, in quantum tendit in obiectum vniuersaliter; sed etiā voluntas tendit in obiectum vniuersaliter; cum enim aliquis amat bonum tendit vniuersaliter in bonum, non distinguendo vnum bonum ab alio; ergo etiam voluntas facit vniuersale.

6. Videtur, quod etiam imaginatio faciat, ac cognoscat vniuersale. Cum enim lupus famelicus appetit, ac quærit ouem, quam non videt, imaginatur ouem, quam quærit; sed tum non appetit potius vnā ouem, quam aliam, sed quamcumque, dummodo sit expletiva famis; ergo imaginatur ouem non determinatam, sed quamcumque; sed hoc est imaginari ouem in vniuersali; ergo imaginatio lupi cognoscit ouem in vniuersali, ac facit vniuersale.

7. Videtur, quod etiam sensus externi, qui sunt infimi inter potentias cognoscitivas, faciant vniuersale. Visus e. g. videt in iride, vel in collo columbæ varios colores, qui verè non sunt; sed per talem visionem non est maior ratio cur videat hunc potius colorem viridem, quam

quam alium e. g; ergo videt vniuersaliter omnes colores virides, adeoque facit vniuersale.

Respondeo duas examinandas esse questiones. Prima est vtrum omnis intellectus faciat vniuersale; secunda vtrum solus intellectus, an etiam voluntas, imaginatio, ac sensus externi.

Quoad primam quæstionem certum est, quod omnis intellectus potest habere cognitionem vniuersalem in representando, hoc est talem, vt cum sit vnica, cognoscat plura, immò etiam omnia. Ratio est, quia vt ex Aristotele dictum est quæst. 33. in responsione ad 1. natura intellectiua consistit in hoc, vt cum sit vna, & simplex, sit quodammodo omnia; sed modus cognoscendi proportionatur modo essendi; ergo omnis natura intellectiua potest formare cognitionem vniuersalem in representando, hoc est talem, vt cum sit vnica, & simplex, cognoscat quodammodo omnia. Sed quia ex dictis ad faciendum vniuersale non sufficit cognitio vna quomodocumque representans plura, & omnia, sed requiritur, vt representet illa confusè, ac non distinguendo vnum ab alio, quæritur, vtrum solus intellectus humanus, an etiam angelicus, & diuinus formare possit talem cognitionem.

Dicendum, quod intellectus diuinus non potest formare cognitionem representantem plura, & omnia confusè, humanus, atque angelicus potest. Ratio est, quia modus cognoscendi per vnā cognitionem plura, vel omnia proportionari debet modo, quo natura cognoscitiua ita est vna, vt sit quodammodo omnia per continentiam, qua continet perfectionem omnium; sed natura diuina ita est simplicissima, vt contineat omnia perfectissimè, in quantum continet perfectissimo modo perfectionem specificam, & indiuidualem omnium rerum, secluis imperfectionibus, ideoque potest per se solam omnia causare; ergo diuina cognitio ita est vna, & simplicissima, vt cognoscat omnia perfectissimè, & distinctissimè secundum omnem rationem tum vniuersalem, tum singularem sine vlla confusione, vel imperfectione. Cognitio igitur diuina cognoscit omnia sub qualibet ratione tum vniuersali, tum singulari; e. g. non solum cognoscit, quod Petrus est risibilis, Paulus est risibilis &c; quod est cognoscere homines sub ratione singulari, sed etiam per eandem cognitionem cognoscit, quod omnis homo est risibilis, quod est cognoscere homines sub ratione vniuersali. Ratio est, quia ad perfectionem scientiæ spectat cognoscere risibilitatem non solū
de

de singulis hominibus , sed etiam de omnibus ; sed Deus sicut omnia continet modo perfectissimo , sic omnia cognoscit modo perfectissimo ; ergo non solum cognoscit quod singuli sunt risibiles , sed etiam quod omnes . Neque ex eo , quod cognoscat omnes homines esse risibiles , sequitur vlla confusio in cognitione diuina . Tunc enim cognosceret omnes homines confusè , cum ita cognosceret omnes , vt per eam cognitionem non distingueret singulos ; sed Deus ita per suam cognitionem cognoscit omnes , vt etiam distinguat singulos ; ergo non cognoscit confusè , sed distinctissimè . Deus tamen simpliciter non facit vniuersale , quia vniuersale est vnum vnitatem abstractionis , & confusionis , vt dictum est .

Ex opposita ratione probatur , quod intellectus humanus , & angelicus possunt formare cognitionem repræsentantem plura , vel omnia confusè . Nam omnis natura intellectiua creata etiam angelica ita est simplex , vt sit plura , & omnia solum imperfectè ; ergo cognitio , qua cognoscit omnia , debet illa cognoscere imperfectè , ac non distinguendo vnum ab alio . Et confirmatur , quia intellectus angelicus debet posse aliquo modo cognoscere totam naturam humanam , equinam , & alias naturas , cum sit perfectior intellectus

lectu humano , qui hoc potest ; sed non potest cognoscere totam naturam humanam , distinguendo omnes homines possibiles inter se ; homines enim possibiles sunt infiniti , intellectus verò finitus , qualis est angelicus , non potest cognoscere infinita , illa inter se distinguendo ; ergo potest cognoscere solum confundendo , adeoque potest facere vniuersale scientificum . Differunt tamen in modo cognoscendi vniuersalia , & singularia intellectus humanus , & angelicus differentia fundata in diuerso modo essendi . Intellectus enim humanus peruenire non potest ad cognitionem vniuersalium , nisi per abstractionem à singularibus per sensum cognitis ; è conuersò intellectus angelicus cognoscit naturas vniuersales cognitione propria , & quidditatiua per species sibi connaturales acceptas à Deo sine vlla abstractione à singularibus . Rursus intellectus hamanus singularia cognoscit solum cognitione exprimente quid per accidens sint , non penetrando distinctè singularitates per se singularibus competentes ; at intellectus angelicus cognoscit singularia cognitione exprimente quid per se sint , penetrando singularitates per se singularibus competentes .

Quoad secundam questionem , dicendū primo , quod voluntas potest facere vniuer-

uersale proportionaliter ac intellectus. Ratio est, quia in tantum intellectus facit vniuersale hominis e. g, in quantum tendit in omnes homines vnica cognitione confusa non distinguente illos inter se; sed voluntas potest amare omnes homines amore confuso non distinguente vnū hominem ab alio; ergo &c. Ratio à priori est, quia non minus voluntas in essendo est independens à materia, quam intellectus; ergo non minus potest voluntas per suam operationem tendere in obiectum, abstrahendo à materia, & ab accidentibus indiuidualibus, quam intellectus; ergo potest facere vniuersale non minus, quam intellectus. Neque quoad hoc potest fieri alia quaestio, quam de nomine, dicendo, quod voluntas non facit vniuersale, quia supponit iam factum ab intellectu. Sed hæc erit altercatio de voce, & contra sensum legitimum quaestionis, qua quaeritur, an possit voluntas tendere in obiectum vniuersaliter tendentia non distinguente vnum ab alio.

Dicendum secundo: imaginatio non potest facere vniuersale completum, & scientificum, sed solum incompletum. Probatur à priori, quia potentiæ, quæ in essendo pendent à materia, etiam in cognoscendo pendent à materia, & ab accidentibus indiuidualibus loci, temporis
&c.

&c; sed imaginatio est potentia materialis , adeoque pendens à materia in essendo ; ergo in cognoscendo ; ergo non potest cognoscere obiectum , abstrahendo penitus ab accidentibus individualibus loci, & temporis &c;e. g. cum lupus imaginatur ouem , imaginatur ouem nunc existentem in aliquo loco , cum aliqua figura, & cum quibusdam accidentibus individualibus; sed vniuersale scientificum debet esse abstractum ab accidentibus individualibus loci, & temporis , & ab omnibus , quę competunt naturis solum per accidens , vt dictum est quęst. 26; ergo imaginatio non potest facere vniuersale scientificum , & completum . Potest tamen facere vniuersale incompletum . Lupus enim cum quęrit ouem , non quęrit potius hanc numero ouem, quam aliā, sed quamcumque , licet non abstrahat ab omnibus accidentibus individualibus ; sed hoc est facere vniuersale incompletum ; ergo facit vniuersale incompletum . Et ratio à priori , cur imaginatio possit facere vniuersale incompletum est , quia licet sit potentia materialis , tamen est suprema inter potentias materiales , & intellectui propinquissima; sed supremum infimi attingit infimum supremi , vt ex Sancto Dionysio docent Sanctus Thomas, & omnes scholastici ; ergo imaginatio ,
que

quæ est suprema inter potentias cognoscitivas materiales, attingit aliquammodo perfectionem intellectus humani, qui est infimus inter potentias cognoscitivas immateriales; sed perfectio intellectus humani consistit in hoc, ut faciat vniuersale scientificum omnino abstractum ab accidentibus indiuidualibus; ergo imaginatio potest facere vniuersale non scientificum imperfectè abstractum, quod est vniuersale incompletum.

Confirmatur primo, quia imaginatio brutorum debet posse imaginari cibum, etiam non propositum sensui, ut possit quærere cibum etiam cum non proponitur sensui; sed ad hunc finem non requiritur, ut imaginetur cibum, abstrahendo perfectè ab accidentibus indiuidualibus; ergo non debet abstrahere perfectè ab accidentibus indiuidualibus.

Confirmatur secundo, nam imaginatio hominis vtpotè animalium perfectissimi est perfectior imaginatione aliorum animalium; sed nos experimur, quod per imaginationem nunquam perfectè abstrahimus obiectum ab accidentibus indiuidualibus loci, temporis, &c. ergo à fortiori nec imaginatio brutorum abstrahit, adeoque non facit vniuersale completum.

Dicendum tertio: sensus externi nullum

lum possunt facere vniuersale ne incompletum quidem, sed solum attingunt singularia hic, & nunc præsentia. Probat, quia hæc est differentia inter sensus externos, & imaginationem, quod per sensus externos solum sentimus obiecta hic, & nunc præsentia, e. g. videmus colores hic, & nunc præsentes: at per imaginationem percipimus etiam obiecta absentia; sed obiectum præsens hic, & nunc est hoc singulare determinatum, e. g. hæc determinata albedo; ergo sensus externi possunt solum percipere hæc singularia determinata, adeoque non possunt facere vniuersale, ne incompletum quidem. Ratio à priori desumitur à maiori materialitate sensuum externorum supra imaginationem, vt dicetur in libris de anima.

Ad 1. Nego minorem, in quantum in ea asseritur, quod intellectus diuinus facit vniuersale. Ad probationem distinguo maiorem: ideo intellectus humanus facit vniuersale, quia est superior sensu, ita vt contineat omnia solum imperfectè, concedo maiorem; quia vtrumque est superior sensu, nego maiorem; & distinguo minorem: intellectus diuinus ita est superior intellectu humano, vt contineat omnia perfectissimè, concedo minorem; vt contineat imperfectè; nego minorem;

& ne-

& nego consequentiam. Ratio cur intellectus humanus faciat vniuersale, est quia ita est superior sensu in hoc, quod est continere quodammodo perfectionem omnium, vt contineat solum imperfectè; qua enim modus cognoscendi sequitur modum essendi, potest vnico actu cognoscere omnia, sed imperfectè, & confusè, prout requiritur ad vniuersale, quod etiam valet proportionaliter de angelico: at intellectus diuinus continet omnia perfectissimè; ergo per suam cognitionem, cognoscit omnia distinctissimè, adeoque non facit vniuersale, vt dictum est in resolutione quæstionis.

Ad 2. Distinguo maiorem; quod intellectus humanus faciat vniuersale spectat ad perfectionem ipsius admixtam imperfectioni, concedo maiorem; ad perfectionem non admixtam, nego maiorem; & distinguo minorem; quidquid perfectionis datur in intellectu humano datur à fortiori in diuino, seclusis imperfectionibus, concedo minorem; non seclusis imperfectionibus, nego minorem; & nego consequentiam. Quod intellectus humanus possit facere vniuersale spectat ad perfectionem, per quam continet aliquam omnium, admixtam imperfectioni, per quam continet omnia imperfectè. Quia enim modus cognoscendi

di proportionatur modo essendi, potest vñico actu cognoscere omnia, sed imperfectè, & confusè, prout requiritur ad vniuersale. At diuinus intellectus continet omnia perfectissimè; ergo potest vñico actu cognoscere omnia distinctissimè, adeoque non faciendo vniuersale.

Ad 3. Concedo maiorem, & nego minorem. Ad probationem distinguo quod videtur in imagine, & ex vi imaginis, non aliter videtur, quam prout repræsentatur in imagine, concedo quod videtur in imagine, sed non ex vi imaginis, nego; & nego consequentiam. Quando homines vident imaginem, & in ea vident obiectum repræsentatum in imagine, si videant tale obiectum ex vi imaginis, & visione ab imagine causata, non possunt perfectius videre, quam ab imagine repræsentetur. Imago enim confusa obiecti non potest causare visionem claram eiusdem obiecti. At si obiectum non videatur ex vi imaginis, tunc potest videri perfectius, quam ab imagine repræsentetur. In casu nostro Deus cognoscens actum, quo nos facimus vniuersale hominis, in eo actu cognoscit hominem; at cognitio diuina de homine non causatur à nostro actu, sed est omnino incausata, ideoque cognoscit hominem distinctissimè, licet actu nostro co-

gnoscat^{ur} confusissimè , claritate accepta non à nostro actu , sed à diuina essentia .

Ad 4. Distinguo maiorem ; intellectus quo altior est , eo minus considerat singula , & eo magis considerat vniuersa , si à consideratione singulorum impediatur à contemplatione vniuersorum , concedo maiorem ; si non impediatur , nego maiorem ; distinguo eodem pacto minorem , & nego consequentiam . Intellectus quo altior est , si sit ita limitatus , vt non possit simul contemplari singula , & vniuersa , contemnit , & omittit contemplationem singulorum vt deteriorem , & totam suam vim cognoscitiuam impendit in contemplatione vniuersorum , quæ multo est dignior . At intellectus diuinus est altissimus , & habet infinitam vim cognoscitiuam , per quam potest simul attendere singulis , & vniuersis ; ergo simul contemplatur vniuersa , & singula , vt dictum est in resolutione quaestionis .

Ad confirmationem respondeo eodem pacto , concedo antecedens , & nego consequentiam . Homines sapientes si suam finitam vim cognoscitiuam impendant in contemplatione singularum muscarum , vel pulicum , impediuntur à contemplatione veritatum vniuersalium multò digniorum , sed est indignum sapiente , vt suam

suam considerationem impēdat in obiectis vilibus, à quibus impediatur à contemplatione digniorum; ergo &c. At non est indignum, vt intellectus diuinus infinitus contempletur vilia, à quibus nullo pacto impeditur à contemplatione digniorum, immo quibus non cognitis, non haberet perfectam cognitionem digniorum consistentem in hoc, vt cognoscantur secundum respectus, quos habent ad cætera omnia viliora, & digniora.

Ad 5, & 6. Patet ex resolutione questionis, in qua concessum est voluntatem facere vniuersale, & imaginationem facere vniuersale incompletum.

Ad 7. Nego maiorem. In libris de anima dicitur, quod in iride, & collo columbæ dantur colores non permanentes, sed transeuntes consistentes in lumine aliququaliter obscurato; sed hi videntur per potentiam visiuam; ergo visus videt hos numero colores transeuntes, adeoque non facit vllum vniuersale. Si vera esset sententia quorundam, quod colores, quos videmus in iride, vel collo columbæ, nullo pacto sint, potentia visua faceret vniuersale incompletum, sicut imaginatio. Sed hæc sententia reiicitur ex hoc ipso, quia tribuit potentia visua virtutem videndi obiectum absens,

quæ virtus propria est imaginationis .

Vtrum predicabilitas sit proprietas vniuersalis . Questio XXXV.

Videtur non esse , 1. quia in tantum predicabilitas non esset essentia , sed proprietas vniuersalis , in quantum natura constitueretur vniuersalis per cognitionem abstractiuam absolutam , at verò constitueretur proximè prædicabilis de inferioribus per cognitionem comparatiuam cum inferioribus , e. g. cum Petro , Paulo &c ; sed ad hoc , vt vniuersale sit proximè prædicabile , non requiritur cognitio comparatiua , sed sufficit absoluta ; ergo prædicabilitas non est proprietas , sed essentia vniuersalis . Probatur minor : eatenus enim ad prædicationem prærequireretur comparatio prædicati cum subiecto , quatenus per talem comparisonem videri deberet identitas prædicati cum subiecto ; sed cognitio , qua cognoscitur identitas prædicati cum subiecto est ipsa formalis prædicatio ; ergo ad prædicationem prærequiritur prædicatio , quod est absurdum ; vel si comparatio non prærequiritur ad videndam talē identitatem , non potest assignari ad quid prærequiratur .

2. Vniuersale hominis, equi, idemque dic de aliis, non est prædicabile de pluribus, e.g. de Petro, Paulo &c; ergo prædicabilitas de pluribus non est proprietas vniuersalis. Probatur antecedens; de Petro e.g. potest solum prædicari ille homo, qui identificatur cum Petro; sed vniuersale hominis non solum dicit illum hominem, qui identificatur cum Petro, sed omnes homines. ergo vniuersale hominis non potest prædicari de Petro, alioquin posset de Petro prædicari omnes homines, ac posset dici, *Petrus est omnis homo*.

3. Si prædicabilitas de inferioribus esset proprietas vniuersalis, vniuersale etiam cum prædicatur de inferioribus, retineret suam vniuersalitatē; eo pacto, quo quia risibilitas est proprietas hominis, homo retinet humanitatem, per quā est homo, etiam cum actu ridet; sed vniuersale cum prædicatur de inferioribus non retinet suā vniuersalitatem; ergo &c. Minor probatur: v. homo e.g. sit vniuersalis, debent ita omnes homines cognosci per vnicam cognitionem, vt vnus non distinguatur ab alio; sed cum facio prædicationē, qua dico *Petrus est homo*, & *Paulus est homo*, ita cognosco omnes homines, vt saltē distinguā Petrum à Paulo; ergo homo non remanet vniuersalis, adeoque non retinet suā vniuersalitatē.

Respondeo, quod vniuersale in prædi-

cando, definitur *unum aptum predicari de multis*, & vocatur vniuersale logicum. Circa vniuersale igitur logicū tres quaestiones sunt examinandę. Primo an, & quomodo predicabilitas sit proprietas vniuersalis metaphysici. Secundo an vniuersale constitutur proximè prædicabile per cognitionem absolutam, vel per cognitionē comparatiuam prædicati cum subiecto. Tertio utrū vniuersale prædicetur de inferioribus secundum totam suam vniuersalitatem, & ita, vt in actuali prædicatione retineat unitatem.

Quoad primā quæstionē, dicendū, quod predicabilitas proxima est proprietas vniuersalis metaphysici, sed est de essētia vniuersalis logici. Probatur, quia illud est proprietas rei, quod non ingreditur definitionem & primum conceptū rei, sed ex definitione consequitur; sed predicabilitas non ingreditur primum conceptum, & definitionem vniuersalis metaphysici, quod definitur solū *unum aptum esse in multis*, & consequitur ex eius essentia, nam ex eo, quod aliquid sit vnum aptum esse in multis, sequitur, vt possit de ipsis prædicari; ergo predicabilitas est proprietas vniuersalis metaphysici; est tamen de essentia vniuersalis logici, seu proximè prædicabilis, in quantū est proximè prædicabile, sicut licet risibilitas sit proprietas hominis, tamē
est

est de essetia risibilis in quātū est risibile.

Quoad secundam quæstionem dicendū ,
quod ad prædicationē prærequiritur cō-
paratio prædicati cum subiecto. Probatur
à priori, quia naturalis modus cognoscen-
di proportionatur modo essendi; sed homo
est per hoc, quod anima, quæ est forma,
vniatur corpori, vt materiæ; ergo natura-
lis modus, quo homo cognoscit rem esse,
est vt prædicatū, quod se habet vt forma,
vniat intentionaliter subiecto tanquā ma-
teriæ; ideoque connaturale est homini in-
telligere veritatem, componendo, ac diui-
dendo, vt ex Aristotele docet sãctus Tho-
mas p. p. q. 85. art. 5. in corpore; sed mate-
ria, & forma vt sint inuicem proximè vni-
biles realiter debēt se mutuò respicere vt
perfectibile, & perfectiūm, potentia, & a-
ctus ergo vt prædicatum, & subiectum sint
inuicem vnibilia intentionaliter, debent
inuicem intentionaliter referri per ap-
prehensionem comparatiuam, adeoque nō
sufficiunt duę apprehensiones absolutæ.

Confirmatur à posteriori ex experien-
tia, & inductione: nā vt cognoscamus. e. g.
vtrum duę magnitudines sint æquales, vt
inæquales, vtrū duę qualitates sint similes
vel dissimiles, prius debemus eas inuicem
cōparare; ergo vt cognoscamus vtrū præ-
dicatum, & subiectum sint idem, vel non,
prius debemus inuicem comparare prædi-

catum cū subiecto. Et licet apprehensiones absolutæ determinant immediatè ad comparationē, & comparatio ad prædicationē compositiuā, vel diuisiuā, tamen apprehensiones absolute nō possunt immediatè determinare ad prædicationē. Ratio est, quia cum operationes, & effectus sunt ordinati, non potest fieri transitus à primo ad vltimū sine medio, vt potest patere innumeris exemplis, ac præsertim exēplo conclusionis. Licet enim apprehensiones terminorū determinant ad assensum præmissarum, & medio assensu præmissarum ad assensū conclusionis, quæ infertur ex præmissis, tamen apprehensiones terminorū nō possūt immediatè determinare ad assensū conclusionis.

Quo ad tertiā quæstionē dicendū, quod vniuersale prædicatur de inferioribus secundum totam suam vniuersalitatē, & ita, vt in actu prædicationis retineat vnitatem scientificam, licet non retineat vnitatem omnimodā confusionis, quæ non requiritur ad scientiā. Probatur, quia per prædicationē componimus cū subiecto, vel à subiecto diuidimus illud idē prædicatū, quod apprehendimus per primā apprehensionē; sed per apprehensionē, qua dicimus *homo*, nō apprehēdimus vnicū hominē in singulari, sed hominē in vniuersali; ergo per prædicationem, qua dicimus *Petrus est homo*, non prædicamus de Petro vnicū hominē in sin-

gu-

gulari, sed hominē in vniuersali. Et hinc probatur, quod prædicatum *homo* retineat vnitatē scientificam. Vnitas enim sciētifica est, per quam infinita ita cognoscūtur vnico actū, vt coalescant in vnicū prædicatum, vel vnicum subiectum; sed cum dico, *Petrus est homo*, omnes, & infiniti homines ita cognoscūtur, vt coalescāt in vnicum prædicatū; ergo prædicatum *homo* retinet sufficientē vnitatem scientificam. At non retinet omnimodam vnitatē confusionis. Vnitas enim omnimoda confusionis habetur ab actū, quo omnia ita cognoscūtur, vt nullū ab altero distinguatur; sed per actū, quē dico *Petrus est homo*, ita cognosco omnes homines, vt aliquem hominem, hoc est Petrum distinguam ab aliis; ergo homo in tali actū non retinet omnimodā vnitatem confusionis. At hæc omnimoda vnitas confusionis nō requiritur ad scientiam. Dummodo enim omnia, & infinita coalescant in vnum prædicatū, aut subiectum propositionis, non officit, quod non cognoscantur omnimoda confusione.

Hinc patet resolutio aliquorū dubiorū. Quæritur, vtrum vniuersale fiat solum per hunc actū *homo*, an etiā per hos actus *vnus homo*, *aliquis homo*, *homines* &c. Respondeo quod per omnes tales actus fit vniuersale scientificum, licet non fiat vniuersale omninō confusū. Probatur, quia per omnes

istos actus omnes, & infiniti homines ita cognoscuntur, vt possint coalescere in vnicum prædicatum, aut subiectum propositionis; sed hoc solum requiritur ad vniuersale scientificum; ergo &c.

Potest esse specialis difficultas, an per actum, quo dicitur *omnis homo, vel omnes homines* fiat vniuersale, cum *omnis homo* nō sit prædicabilis de pluribus, dicendo *Petrus est omnis homo*. Sed dico, quod fit vniuersale subiicibile, non verò prædicabile. Vniuersale enim subiicibile est, cum omnia, & infinita sumuntur ita, vt coalescant in vnicum subiectum; sed cum dico *omnis homo*, omnes, & infiniti homines ita sumuntur, vt coalescant in vnicum subiectum propositionis scientificæ, qua dicitur *omnis homo est risibilis*; ergo fit vniuersale subiicibile.

Ad 1. Transeat maior, nego minorem. Ad probationem distinguo maiorem; requiritur comparatio prædicati cum subiecto, vt cognoscatur identitas, vel convenientia prædicati cum subiecto cognitione merè apprehensiuæ; transeat maior; cognitione iudicatiua, nego maiorem; & distinguo minorem; cognitio, qua cognoscitur iudicatiuè identitas prædicari cum subiecto, est ipsa formalis prædicatio, concedo minorem; cognitio merè apprehensiuæ, nego minorem; & nego

con-

consequentiam . Per cognitionem comparatiuam fortasse cognosci debet identitas , vel aliqua conuenientia prædicati cum subiecto , sed merè apprehensiuè , non iudicatiuè . Cognitione verò apprehensiuæ identitatis non est prædicatio formalis , licet cognitio iudicatiua sit prædicatio formalis . Addo probabile esse cognitionem comparatiuam non requiri ad cognoscendam identitatem , vel aliam conuenientiam ex parte obiecti , sed purè ad hoc , vt prædicatum referatur ad subiectum .

Ad 2. Nego antecedens . Ad probationem distinguo maiorem ; de Petro potest solum prædicari ille homo , qui identificatur cum Petro , prædicatione adæquata , concedo ; prædicatione inadæquata , vel confusa , nego : concedo minorem ; & distinguo consequens ; ergo vniuersale hominis non potest prædicari de Petro prædicatione adæquata , concedo consequentiam ; prædicatione inadæquata , vel confusa , nego consequentiam . Triplex est prædicatio , quantū spectat ad rem præsentem : copulatiua , quæ procedit per particulam & , vt cum dico , *homo est rationalis , & risibilis* ; disiunctiua , quæ procedit per particulam *vel* , vt cum dico , *homo vel est rationalis , vel binnibilis* ; & confusa , per quam prædicatum affirmatur de su-

de subiecto, neque determinando sensum copulatiuum, neque disiunctiuium. Prædicatio vniuersalis de inferioribus non est copulatiua, quia cum dico *Petrus est homo*, non est sensus, quod sit hic, & ille homo; eo enim ipso prædicatio esset falsa, quia ad veritatem propositionis copulatiue requiritur, ut totum prædicatum verificetur de subiecto; similiter nec est disiunctiua expressè, quia cum dico *Petrus est homo*, non dico expressè quod sit hic, vel ille homo. Reliquum igitur est, ut sit prædicatio confusa, ita ut cum dico *Petrus est homo*, non affirmem quod sit hic & ille homo, neque quod sit hic, vel ille homo, sed solum quod Petrus habet cum homine aliquam identitatem saltem inadæquatam. Ad veritatem autem prædicationis confusæ sufficit identitas inadæquata prædicati cum subiecto.

Ad 3. Argumentum probat tantum, quod non retinet unitatem confusionis. Et hæc de vniuersalibus in communi.

F I N I S.

Regestum fol. viginti quatuor cum dimidio.



u co
ran
opu
a est
nim
rita
, vt
cio
quia
ex
eli
nfu
na
que
mod
len
ate
de
ro.
is.



